

(1) R

JOANNIS DEVOTI

DEI ET APOSTOLICÆ SEDIS GRATIA

EPISCOPI OLIM ANANIENSIS

DEIN

ARCHIEPISCOPI CARTHAGINENSIS

INSTITUTIONUM CANONICARUM

LIBRI IV.

EDITIO SECUNDA NEAPOLITANA

POST NOVISSIMAM ROMANAM AB IPSO AUCTORE RECOGNITAM
ET NUNC PRIMUM ADDITIONIBUS LOCUPLETATAM EORUM
QUÆ SUMMORUM PONTIFICUM AUCTORITATE
IN NEAPOLITANO REGNO VIGENT.

TOMUS TERTIUS.



NEAPOLI

EX TYPOGRAPHIA SIMONIANA

1852.

Quid adhuc quaeris examen, quod apud Sedem Apo-
stolicam factum est? S. Augustinus *Oper. imperf.*
contra Iulianum lib. 2. opp. tom. 10. col. 993.
edit. Maurin. Venet. 1783.

LIBER TERTIUS TITULUS I.

DE JUDICIARIA ECCLESIAE POTESTATE.

- I. Omnis bene constituta res publica suos habet magistratus cum imperio, et jurisdictione.
- II. Ecclesia distincta est a civili republica, quae suos habet magistratus cum imperio, et jurisdictione.
- III. Potestas judiciaria pars est hujus imperii, et jurisdictionis.
- IV. Eam habet Ecclesia non hominum beneficio, sed suo imperio, et jurisdictioni cohaerentem.
- V. Judiciaria potestas vel in personas, vel in res, quae ad rempublicam pertinent.
- VI. In quibus aequa sit ecclesiasticae, civilisque reipublicae conditio; in quibus haec ab illa differat?
- VII. et VIII. Potestas a Christo Ecclesiae data tum in interiori, tum in exteriori foro.
- IX. Locus Joannis, et Lucae expenditur.
- X. et XI. Potestas, quam Apostoli exercuerunt.
- XII. Paulus ecclesiasticum judicium expresse memorat.
- XIII. et XIV. Apostolorum successores, Ethnicis dominantibus, non solum in interiori, sed etiam in exteriori foro judicia exercuerunt.
- XV. et XVI. Atque hi quidem veri judices erant, non arbitri litigantium voluntate electi.
- XVII. et XVIII. Eorum judiciis nihil deerat, quod verum, perfectumque judicium requirit.
- XIX. Concordia Sacerdotii, et Imperii sub Christianis Imperatoribus.
- XX. Utriusque Potestatis regimen, et administratio.
- XXI. Ecclesiae coercitio.
- XXII. Judicia Ecclesiae sub Christianis Imperatoribus.
- XXIII. Leges Principum Christianorum de clericorum causis tantum ab ecclesiasticis judicandis.
- XXIV. Civiles quoque laicorum controversias Episcopi judicarunt; verum ex voluntate litigantium.
- XXV. Cur ecclesiasticum judicium saepe a forensi distinguatur?
- XXVI. Ordo judiciorum a Jure Canonico constitutos etiam in foro civili receptos.

Ecclēsiā visibīlem esse societatem, et ideo visibīli regendam esse gubernatione, sine qua nulla

hominum societas diu stare, et conservari potest, superiore loco demonstratum est (1). Haec autem gubernatio non tantum pertinet ad ferendas leges, quibus jubeantur, quae faciendae sunt, prohibeanturque contraria, sed etiam comprehendit juscurendi, et providendi, ut hae leges vim, atque exitum obtineant. Frustra enim leges feras, nisi etiam cures, ut his obtemperent, et obediant, qui societate continentur: et frustra cures, nisi imperium, et potestatem habeas, per quam repugnantes ad parendum cogas. Quare in omni bene constituta republica magistratus esse oportet, qui non tantum cura, et providentia, sed etiam imperio, et jurisdictione faciant, ut ab omnibus observentur leges, quae sunt ad societatis commodum, utilitatemve comparatae.

(1) Confer ea, quae diximus in *Prolegomenis* c. 1. §. 4. et seq., et cap. 2. tom. 1. pag. 3. seq.

§. II. Christus Ecclesiam constituit ad instar reipublicae a civili distinctae (1), eique dedit magistratus, qui huic hominum societati cum imperio praeessent (2). Quare in hos magistratus omnem contulit potestatem, qua opus est, ut recte administretur, regaturque respublica, atque ut optimis abundet legibus, quibus cuncti pareant, et repugnantes etiam in officio poenis coerceantur. Nam quomodo stabit respublica sine magistratibus, aut cum magistratibus ociosis, et inanibus, qui jurisdictione, imperioque careant?

(1) Consule, quae dicta sunt in *Prolegomenis* c. 1. §. 6. pag. 6. et seq. tom. 1. et quae complexus solide,

copiose, diligenter est doctissimus Mamachius in *Epist. ad Febron.* 11. §. XVIII. seq. pag. 265. seq. tom. 1. edit. Rom. an. 1776., et *Antiquit. Christianar. lib. IV. cap. III. pag. 270. seq. tom. IV.*

(2) Magistratus a Cujacio ad Tit. 2. de Orig. jur. opp. tom. 1. col. 629. ed. Venet. 1758., definitur qui juri dicendo, et assidua jurisdictione servando praeest. Atqui hanc a Christo Episcopis datam in Ecclesia potestatem constat; et hoc etiam spectat Apostolus ad *Hebraeos XIII. 17. obedite Praepositis vestris, et subjacete eis. Ipsi enim pervigilant quasi rationem pro Animabus vestris reddituri.* Quibus quidem verbis imperii potestas in Ecclesiae Praepositis sine dubio continetur. Nam si Christiani obedire, et subjacere jubentur Praepositis suis, in his certe imperandi potestas esse debet. Similium praeceptorum plenae sunt literae Ignatii Martyris, qui in Joannis Apostoli disciplina fuit: *studeamus*, inquit ipse in *Epist. ad Ephes. n. 5.* apud Cotelerium *PP. Apost. tom. 2. p. 13. ed. Antwerp. 1698., Episcopo non resistere, ut simus subjecti Deo.* Magnesianos similiter num. 13. pag. 21. vult subjectos esse Episcopo, ut Christus Patri, et Apostoli Christo. lisdem pene verbis alloquitur Trallianos num. 2. pag. 22., Philadelphenos num. 2. 9. pag. 31. 33., Smyrnaeos num. 9. pag. 37. Atque aetate quidem Origenis, quae pertinet ad exitum saeculi II., aut initium III., ita certum, atque exploratum omnibus erat, Episcopos in Ecclesia gerere magistratum, et habere illam, quae magistratus est propria, jurisdictionem, et potestatem, ut id tamquam certissimum ipse Origenes adversus Celsum proponat, Ecclesiamque conferat cum republica, et cum civilibus ecclesiasticos magistratus *Contr. Cels. lib. 3. pag. 466. et 467. tom. 1. ed. Paris. 1733.* Memorat etiam Ecclesiae imperium, et Magistratus S. Gregorius Nazianzenus *Orat. 17. n. 15. opp. tom. 1. pag. 271. ed. Coloniae 1690. Vos quoque*, inquit, *imperio meo, ac throno lex Christi subijcitur. Imperium enim nos quoque gerimus, addo etiam praestantius ac perfectius; nisi vero aequum est, Spiritum carni fuscis submittere, et coelestia terrenis cedere.* Hinc ipse Gregorius *Epist. 46. Africano p. 807. Episcopatum την αναμπαχτου αρχην* incurrentum magistra-

tum, et S. Joannes Chrysostomus *Hom. 3. in Epist. ad Coloss. tom. 11. pag. 349. ed. Montfaucon. Paris. 1734.* πνευμ. ατιχην αρχην spiritualem magistratum, vocat. Quin omnes universe Graeci Patres Episcopatum αρχην, hoc est *Magistratum*, aut *Principatum* appellant. Similiter omnes Graeci, et Latini Patres ex divina institutione repetunt hunc ecclesiasticum magistratum, ejusque potestatem, et jurisdictionem. Quare nihil agunt, qui tantum *potestatis*, et *auctoritatis*, non item *jurisdictionis* vocabulum ab Ecclesia usurpatum putant ante aetatem S. Gregorii M., qui certe eo vocabulo usus est *Ep. 8. lib. 14. opp. tom. 1. col. 1266. ed. Maurin. Paris. 1705.* Nam si Ecclesia ipsius Christi voluntate, et instituto semper habuit magistratus cum potestate condendi leges, coercendi, infligendi poenas, habuit certe jurisdictionem; nihil autem refert, num Ecclesia jus suum potestatis, et auctoritatis, an potius jurisdictionis vocabulo explicaverit. Modo Ecclesiae detur, quod certe habet a Christo, ociosum est de vocabulis disputare.

§. III. Haec autem jurisdictio, quam habent in republica magistratus cum imperio praepositi, sine dubio comprehendit judiciariam potestatem. Nam qui leges condit atque ab omnibus observandas curat, imperioque tuetur, qui in subditos habet jurisdictionem, is etiam suam explicat potestatem in judiciis, in quibus ortae inter subditos controversiae dirimuntur, legumque observatio praescribitur. Itaque judiciaria potestas non cujusquam hominis beneficio data est Ecclesiae, sed penitus affixa, atque insita est in potestate condendi leges, in imperio, atque in jurisdictione, quam Christus in eam contulit.

§. IV. Qui hanc potestatem aut Ecclesiam habere negant, aut eam ab hominum beneficio repetendam putant, ii magistratus, et omnem jurisdictionem Ecclesiae adimant necesse est (1). Nam pugnan-

tia haec sunt, esse in republica magistratus cum imperio, ac jurisdictione, et hos magistratus non habere judicandi potestatem, quae eorum juri, et officio cohaeret, quaeque in primis est hujus imperii, et jurisdictionis propria. Atque Ecclesiam habere magistratus, quorum administratione, cura, potestate, imperio illa Christianorum hominum societas, illaque a civili distincta respublica regenda sit, hoc est Episcopos a Christo constitutos, inter catholicos omnes constat.

(1) Primus Aetius omnem Ecclesiae jurisdictionem, et legislativam potestatem eripere conatus est; ejus errorem sequuti sunt Valdenses, Joannes Hussius, Marsilius Patavinus, Jandunus, Lutherus, Calvinus, Grotius, qui falso putarunt, nullam Ecclesiae esse jurisdictionem, sed omnem ejus in dirigendo, et suadendo positam esse auctoritatem. Horum exemplo Protestantes omnes, qui jus Principis in sacra tuentur, Ecclesiae adiungunt judicariam potestatem. Qui cum Puffendorffio Ecclesiam non distinctam rempublicam, aut *statum*, ut inquiunt, sed tantum *collegium* esse contendunt, ut Mosheimius, Bohemerus, Budaeus, alique, omnem Ecclesiae esse negant judicariam potestatem, sed hanc ad jus majestatis Principis saecularis pertinere arbitrantur, atque Ecclesiae tantum jus collegiale tribuunt. Joannes Bodinus *lib. 3. de Republic.* ecclesiasticae jurisdictioni, ac foro vehementer adversatur, atque eam sequutus est Carolus Loysaeus in suo *Traité des Seigneuries*. In eodem luto haesitat P. la Borde, qui opusculo cui titulus: *Principes sur l'essence, la disinction, et les limites des deux puissances spirituelle, et temporelle*, datam a Christo Ecclesiae potestatem non solum dirigendi per consilia, et suasiones, sed etiam jubendi per leges, cogendique, et poena coercendi eos, qui poena sunt digni, labefactare, ac tollere conatur, atque ecclesiasticum ministerium ita saeculari potestati subjicit, ut ad hanc pertinere contendat de externa omni, ac sensibili gubernatione cognoscere, ac judicare. Pravum, ac perniciosam

opusculum damnavit Benedictus XIV. *Const. Ad assiduas* 44. tom. 4. ejus *Bullar.* p. 163. ed. Rom. seu. *Venet.* 1758., et similis Marsilii Patavini, et Janduni error multo ante damnatus est a Joanne XXII. *Const. Licet juxta doctrinam* apud Raynaldum tom. 5. pag. 347. ed. *Lucae.* Morinus in opere *de Poenitent. administr. lib. 1. cap. 10.* forum contentiosum Ecclesiae non distinguit a foro poenitentiali, atque illum tantum post XI. aut XII. saeculum Ecclesiam habuisse putat. Cum Morino sentit Van-Espenius *Jur. eccles. univers. l. 3. tit. 1.* Fevretii celebre est opus *de Abusu*, quo ipse ecclesiasticam jurisdictionem, et judicariam potestatem acriter insectatur. Inde Du-Pinius *de Antiqua Eccles. disciplin. Diss. VII. § ult.* judicium ecclesiasticum in civilibus, et criminalibus clericorum causis, et potestatem ex Principis permissu repetit. Petrus Giannonius in *Histor. civil. Regn. Neapolit. lib. 2. cap. ult. t. 1.* hostis insensissimus contentioso Ecclesiae foro omnem ejus potestatem in docendo, orando, suadendo, et per censuras corrigendo ponit; et Morino etiam assentitur Jacobus quoque Gothofredus *ad L. 47. Cod. Theodos. de Episc. et Cleric. tom. 6. pag. 106. et seq. ed. Lipsiae* 1743., et Jacobus Cajacius in *Paratit. Cod. de Episcopal. audien. opp. tom. 2. col. 30. ed. Ven.* 1758. judicariam Ecclesiae potestatem negant. Novissime Canonicus Litta in opere iterum edito Ticini an. 1783. *del Diritto di disporre gl' impedimenti dirimenti nel matrimonio, e di dispensare Tom. II. p. 125.* Morini sententiam ad VIII. saeculum contraxit, atque ante hoc tempus Ecclesiae veram judicandi potestatem solum in rebus Religionis adscribit. Plures viri docti hanc Ecclesiae potestatem vindicarunt, quos inter praestant Ven. Moneta *Adv. Cathar. et Valden. lib. 5. cap. 13. §. 5. et seq. pag. 532. ed. Rom.* 1743., Dandinius Altaserra in opere *de Juridict. eccles. adversus Fevretium*, et in libro peculiari *adversus Gothofredum*. Jo. Antonius Bianchi *Della potestà e della polizia della Chiesa lib. 1. cap. 5.* Joannes le Gendre *Judicium Episcopale adversus calumnias J. Gothofredi acerrime vindicatum.* Doctissimus Mamachius *Ep. II. ad Febronium §. XIX. seq. p. 285. Tom. I. pag. 300. seq.*, et Auctor operis: *Le storte idee rad-*

drizzate cap. 5. Videndus est etiam Fleurius disc. 7. sur l'Histoire Eccles. de la Jurisd. essent. à l'Eglise.

§. V. Jamvero pars haec jurisdictionis , quam judicariam potestatem vocamus, in omni republica vel in res, vel in personas a magistratibus explicatur. Nam qui reipublicae cum imperio praepositi sunt, in omnia, quae ad rempublicam pertinent, habent potestatem; hoc est in personas, ex quibus ea constat, atque in res, quibus utuntur, frontur personae ad vitam traducendam. Quare etiam Ecclesiae magistratus in res, et personas suae reipublicae habere debent judicariam potestatem, quam in res, et personas suarum rerumpublicarum habent ceteri magistratus.

§. VI. His in rebus aequa est conditio civilis, et ecclesiasticae reipublicae, quae utraque imperium habet in res, et personas suas; verum ecclesiastica respublica habet etiam praecipuam spiritualem potestatem, qua civilis respublica prorsus caret. Scilicet Christus non tantum Ecclesiam instituit, quae esset perfecta respublica, et ideo juribus frueretur ceterarum rerumpublicarum, sed etiam ejus unius esse voluit praeesse rebus sacris, atque divinis, et curam gerere eorum, quae ad aeternam hominum felicitatem pertinent. Itaque Ecclesiae potestas non tantum est potestas propria cujusvis reipublicae; sed etiam sese exerit in stabiliendis fidei, morumque regulis, in sacramentis administrandis, in cultu Religionis, in sacris ritibus, in ceteris generis ejusdem.

§ VII. In haec quidem omnia Christus expresse dedit uni Ecclesiae potestatem; et vero ita dedit, ut in ipsum Christum contumax haberetur quisquis Ecclesiae praeceptis non obediret (1). Haec autem potestas a Christo data duplex est: altera, quae in in-

teriori; altera, quae in exteriori foro exercetur: Primam expressit Christus his verbis: *quorum remiseritis peccata, remittuntur eis; quorum retinueritis, retenta sunt* (2); alteram his: *Si peccaverit in te frater tuus vade, et corripe eum inter te, et ipsum solum; si autem te non audierit, adhibe tecum adhuc unum, vel duos testes; si non audierit eos dic Ecclesiae* (hoc est Conciliis, aut Episcopis, accepta eo loco Ecclesia ex sententia Judaeorum, quales erant Apostoli, quos Christus compellat; Judaei vero Ecclesiam appellatur, aut conventum in Synagoga habitum, aut Principes Synagogae): *Si Ecclesiam non audierit, sit tibi sicut ethnicus, et publicanus* (3); quos Judaei synagoga excludebant. Habes hic omnia, quae sunt exterioris judicii propria, accusatorem, reum, judicem, causae cognitionem, sententiam, coercionem.

(1) *Qui vos audit*, inquit Christus apud Lucam X. 16., *me audit; qui vos spernit, me spernit*. Latinis autem, uti et Hebraeis, et Graecis *audire* idem est ac *obedire*. Porro ei parendum, cui jubendi jas est.

(2) Joannes XX. 23.

(3) Matthaeus XVIII. 15. *seq.* Vide Auctorem operis *des Deux puissances*, chap. 8. tom. 3. pag. 154. et *seq.*, in primis autem vide Cl. Mamachium *Epist.* 1. ad Auctorem operis inscripti: *Quid est Papa?* num. XV. p. 60. *seq.* ed. an. 1787.

§. VIII. Potestas in haec a Christo Ecclesiae data nominatim est, quoniam eam nonnisi a Christo acceptam Ecclesia habere potuisset. De reliqua potestate, quae ad Ecclesiam pertinet eo jure, quod ipsi cum ceteris rebus publicis commune est, nullas Christus leges separatim dedit, neque profecto eas dare necesse erat. Nam cum Ecclesia tamquam pro-

pria, et distincta respublica ab eo instituta fuisset, cum ejus reipublicae status, et gubernatio constituta, cum ei dati magistratus, atque inter eos unus, qui omnibus dignitate, et jurisdictione praeesset, consequens erat ut haberet omnem potestatem, quae reipublicae propria est; neque Christus inter homines versabatur, ut rerumpublicarum imperium, et jura constitueret, sed ut sanciret leges, quae ad Religionem pertinent, atque ad aeternam felicitatem eorum, qui hac republica continentur.

§. IX. Ea de causa declaravit, *regnum suum non esse de hoc mundo* (1), et ortam controversiam super familia erciscunda judicare noluit, quoniam ejus rei judex a nemine constitutus fuerat (2). Non haec certe dixit, quod in *hunc etiam mundum* non haberet potestatem, aut quod ab hominibus judex constitui deberet, qui omnium dominus erat, quique a Patre *omne judicium* acceperat (3); sed ut demonstraret, maxime se esse sollicitum de rebus Religionis, deque aeterna hominum felicitate (4). Verum post Christi mortem Apostoli utramque potestatem exercuerunt, et quam a Christo nominatim acceperant in res sacras, atque divinas, et quam habebant tamquam magistratus Christianae reipublicae cum imperio praepositi (5).

(1) Joannes XVIII. 36. Locum hunc expendens Augustinus *Tract.* 115. in *Joan. num.* 2. *opp. tom.* 8. *col.* 792. *ed. Venet.* 1729. rectissime, verissimeque animadvertit, Christum non dixisse, *regnum suum non esse in hoc mundo*, quibus verbis significare voluit regnum suum non ab humanis causis, atque ab hominum electione, sed aliunde, hoc est ab ipso Patre originem habuisse. *Hic non ait*, inquit ipse Augustinus, *regnum meum non est in hoc mundo*, sed *non est de hoc mundo*. *Non ait*, nunc *regnum meum non est hic*, sed *nunc regnum meum*

non est hinc. Confer Cl. Mamachium *del Diritto libero della Chiesa* t. 1. c. 1. num. 8. pag. 64. seq. t. 1. et lib. 2. §. 3. p. 93. seq. tom. 2. par. 1.

(2) Lucas XII. 24. Vide eundem Mamachium l. c. l. 1. cap. 1. §. 3. p. 37. et seq. t. 1.

(3) Joannes V. 22. 27.

(4) Aptissime S. Thomas 3. p. qu. 59. art. 4. ad 1. *Christus*, inquit, *quamvis esset Rex constitutus a Deo*, non tamen in terris vivens terrenum regnum administrare voluit. Similiter etiam judicariam potestatem exercere noluit super res temporales, qui venerat homines ad divina transferre. Unde Ambrosius . . . nec *judex dignatur esse litium*, et *arbiter facultatum* etc.

(5) Obedite, inquit Paulus ad *Hebraeos XIII. v. 17.*, *Praepositis vestris*, et *subjacete eis*. Apostoli autem constituerunt legem, quae divina certe non erat, de sanguine, et suffocato. Id vero non fecissent, nisi a Christo potestatem accepissent. Hinc Paulus *Act. XV. v. 41.* *Perambulabat Syriam, et Ciliciam* . . . *praecipiens custodire praecepta Apostolorum, et Seniorum*. Negat quidem Witacherus, hoc in graecis codicibus extare; sed in vetusto Codice Alexandrino reperiri eruditus Millius Anglus in hoc cap. et v. *Act. Apostol.* confitetur. Fac tamen non extare; quid tum? Lucas cap. *XVI. v. 4.* dicit haec: *Cum autem pertransirent Civitates, tradebant eis custodire dogmata, quae erant decreta ab Apostolis, et Senioribus, qui erant Hierosolymis.*

§. X. Itaque non tantum de rebus, quae ad Religionem, et Ecclesiae gubernationem pertinerent, tum voce, tum scripto praecepta constituerunt, quorum quidem sacri libri pleni sunt; sed etiam legibus repugnantes, statumque reipublicae pervertentes poenis compresserunt. In primis Paulus, cujus plura, quam alius cujusquam Apostolorum, scripta extant, *virgam* minatur Corinthiis (1) profitetur; habere se in promptu *ulcisci omnem inobedientiam*

ex potestate quam dedit, ait, nobis Dominus (2), ac ne eos denunciatione potestatis frustra *per epistolas terrere videretur: quales sumus, inquit, verbo, tales et praesentes in facto.*

(1) *I. ad Corint. IV. 21. Adi-sis Mamachium l. II. Del Diriuo libero della Chiesa cap. I. §. III. p. 131. seq. Tom. 2. Par. II.*

(2) *II. ad Corint. X. 6. seq.*

§. XI. Thessalonicensibus quoque imperat, ut sibi obediant, et si qui non paruerit, eum a Christianorum societate exterminandum jubet: *Si quis, inquit, non obedit verbo nostro per epistolam, hunc notate, et ne commisceamini cum illo* (1). Quam eandem poenam pluribus quoque criminibus constituit (2); et eadem etiam coercuit tum Hymenaeum, et Alexandrum in fide naufragos (3), tum Corinthium incestus in novercam reum (4). Quin ne sola severitate jus sacrae potestatis exercere videretur, eundem Corinthium postea resipiscentem Ecclesiae communioni restituit.

(1) *Apostolus II. ad Thessalonicen. III.*

(2) *I. ad Corint. V.*

(3) *I. ad Timot. I. 20. II. ad Timot. IV. 15.*

(4) *I. ad Corint. V. 1. et seq.*

(5) *II. ad Corint. II. 6. seq.*

§. XII. Qui tantum in Ecclesiae subditos habet potestatem, ut eos omnino ad parendum cogat, poenis coerceat, in eorum crimina animadvertat, an non etiam tribunal habere poterit, in quo eorum controversias judicet? Certe Paulus (1) vehementer objurgat Corinthios, quod extra Christianorum rem-

publicam iudices quaerent, qui eorum saecularia negotia cognoscerent, et abjectum quemque hominem e Christianis aptiorem ad iudicandum dicit, quam potentiorum quolibet, qui Christianus non sit. Tum nescitis, inquit, quoniam Angelos iudicabimus: quanto magis saecularia? Ipse Paulus (2) Timotheum docet iudicii methodum, quam Episcopum contra Presbyterum servare oportet.

(1) Apostolus I. ad Corint. VI. v. 1. et seq., quem locum ita interpretatur Jo. Chrysostomus *Hom.* 16. in I. Ep. ad Corinth. num. 2 pag. 136. tom. 10. opp. ed. Montfaucon. Paris. Volens nos docere quodcumque tandem fuerit, non oportere nos externos committere, cum objectionem, vel quae talis esse videbatur, movisset, prius illam solvit. Hoc enim vult significare. Fortasse dicet quispiam, nullum esse apud vos sapientem, neque ad iudicium ferendum aptum, sed contemptibiles omnes. Et quid hoc? Etiam si enim nullus sit sapiens, inquit, vos minimis permittite. Hoc autem ad verecundiam vestram dico etc.

(2) I. ad Timoth. V. 19. Confer Tertullianum *Contr. Marcion.* lib. 5. cap. 12. p. 477. ed. Ven. 1744. Atque haec quidem ab Apostolo proposita iudicii contra Presbyterum agendi ratio tamquam firma, constansque regula in omnibus ecclesiasticis iudiciis observanda semper agitata est, ostendunt Theodoretus *Histor. Eccles. lib. 1. cap. 22. pag. 47. ed. Taurin. 1748.* et Acta Cleri Gallicani *De la Jurisd. Ecclesiast. par. 2. p. 30. seqq. tom. 6. ed. Paris. 1716.*

§. XIII. Vita functis Apostolis, eorum successores suam semper exercuerunt potestatem non solum in interiori, sed etiam in exteriori foro (1); habueruntque iudicia non tantum de rebus fidei, morumque regulis (2), sed etiam de controversiis, quae inter Christianos oriebantur. Id vero factum est

non modo cum Christiani, sed etiam cum ethnici imperio potirentur. Hoc enim temporis intervallo semper Ecclesiae Magistratus, hoc est Episcopi, ea curarunt, quae ad Religionem pertinent, atque etiam poenis coercuerunt crimina Christianorum, praesertim poena excommunicationis, quam nulla gravior est, et quam servato ordine judiciario inflixerunt (3).

(1) Joannes Morinus de *Administr. sacram. poenitent.* lib. 5. cap. 26. num. 18. et 19 et lib. 6. cap. 25. num. 12. demonstrare conatur, per plura saecula in Ecclesia censuras a publica poenitentia distinctas non fuisse, recentiori autem disciplina inductum fuisse, ut censurae sint actus judiciales in foro contentioso, qui ex jurisdictione procedunt, atque has a publicis poenitentiis distingui, et tamquam judiciales actus haberi coepisse cum forum exterius ab interiori distinctum est. Verum falsa prorsus haec sententia est, et veteri Ecclesiae disciplinae adversatur. Certissimum enim est semper ab Ecclesia censuram fuisse distinctam a publica poenitentia, atque habitam tamquam sententiam, qua servata iudicii methodo reus criminis condemnabatur, ita ut prorsus a Christianorum societate repelleretur, et cum eo reliqui fideles nullam societatem, rerumque communicationem haberent. At vero publica poenitentia non ita gravem afferebat poenam, atque, ut plurimum, erat signum reconciliationis, quoniam saepe imponebatur iis, quibus dabat Ecclesia pacem, posteaquam ipsos ab se omnino rejecerat. Qui publicae poenitentiae subjectus fuerat, semper ecclesiasticae communioni restituebatur, eaque imponebatur poena ut post emensa legitimae poenitentiae spatia restitueretur; sed alia erat censurarum ratio. Similiter exploratum est, Ecclesiam semper habuisse forum exterius ab interiori, et poenitentiali distinctum, neque aliquis ignorare potest, eam semper contra reos criminum accusationes, et denunciationes accepisse, audivisse testes, cuncta expendisse, ac denique sententiam in reum protulisse. Certe ad interius forum non spectat

Paulus I. *ad Timoth.* V. 19, cum vetat Episcopum *adversus Presbyterum accusationem recipere*, nisi *sub duobus*, aut *tribus testibus*. Canon autem Apostolorum 66. et 67. apud Cotelierium PP. *Apostolic. tom. 1. p. 451. ed. Amstelard. 1724.*, itemque Concilium Antiocheum *sub Julio I. Can. 1.*, et Carthaginense I *Can. 10.* apud Labbaeum *tom. 2. col. 590. et 1247. ed. Venet.* ut mittam cetera monumenta, quorum magnus est numerus, solemnibus iudicii formam, quae in exteriori foro adhibetur, disertissime proponunt. Videndi quoque sunt Balsamon, et Zonaras in *Can. 37. Apostolor.* apud Beve-regium *tom. 1. p. 25.*, a quibus multa de ecclesiasticis iudiciis afferentur. Quin etiam certus erat iudicii exercendi dies, nimirum *feria secunda*, uti tradit Auctor *Constit. Apostolic. lib. 2. cap. 47.* apud Cotelierium *tom. 1. pag. 257. ed. cit.* Consule Jo. Antonium Bianchi *della potestà e della polizia della Chiesa, lib. 1. cap. 5. §. 2 n. 11. l. 3. seq. p. 443. seq.*, et Mamachium *lib. II. del Diritto libero della Chiesa Tom. 2. Par. 1. p. 131. seq.*

(2) Confer Donjatium *Praenot. canonic. libr. 2. cap. 2.*

(3) Cyprianus *Epist. ad Cornelium* apud Labbaeum *tom. 1. col. 716. ed. Ven.* Nam cum statutum sit, inquit, omnibus nobis, et aequum sit pariter, ac justum, ut uniuscujusque causa illic audiat, ubi est crimen admissum oportet utique eos, quibus praesumus, non circumcursare, nec Episcoporum concordiam cohærentem sua subdola, et fallaci temeritate collidere, sed agere illic causam suam ubi et accusatorem habere, et testes sui criminis possunt. Habes hic accusatores, testes, sententiam: quid aliud ad veram iudiciam, forumque constituendum requiritur? Ipse Cyprianus *loc. cit.* narrat solenne iudiciam actum adversus Privatum, et adversus Jovium, ac Maximum, qui omnes re primum diligenter quaesita, cognita plurimum Episcoporum sententia damnati sunt. Huc etiam referendus est Tertullianus, qui in *Apologet. c. 39. pag. 31. ed. Paris. 1675.* Coimus, inquit, in coetum, et congregationem Ibidem etiam exhortationes, et censura divina. Nam et iudicatur magno cum pondere, ut apud certos de Dei conspectu: summumque futuri iudicii prae-

judicium est, si quis illa deliquerit, ut a communicatione orationis, et conventus, et omnis sancti commercii relegendur. Quibus ex verbis intelligitur, censuram ecclesiasticam, ac praesertim excommunicationem, de qua Tertullianus loquitur, fuisse actum judiciale, eamque ab Ecclesia, re primum cognita, et expensa diligenter, ferri consuevisse. Quid dicam de Concilio Eliberitano, quod habitum est anno 305. ? In eo duo sunt canones, nimirum can. 74. et 75., in quibus agitur de accusationibus, quae contra clericos proponuntur, gravesque contra calumniatores indicantur poenae, ac ea de re tota agi dicitur *in conventum clericorum*. Duo hi canones sine dubio pertinent ad judicia ecclesiastica, ut rectissime observat Alaspinaeus in *Not. opp. pag. 185. edition. Neapol. 1770.*

§. XIV. Temporales quoque causas Christianorum, ethnicis dominantibus, ab Ecclesiae magistratibus judicatas fuisse, vel ex eo intelligitur, quod per tria saecula aliquae certe inter illam hominum multitudinem existere debuerunt controversiae, quae ne defuerant quidem initio Ecclesiae ac vivis Apostolis, et tamen nullus unquam Christianus eas detulit ad ethnicos magistratus. Manebat enim alta mente repositum praescriptum Pauli, quod Christianos eorum ethnicis magistratibus litigare vetabat, et ideo qui Christianae reipublicae cum imperio praeerant, hanc etiam sui imperii, et officii partem in suum cuique reddendo explicabant (1).

(1) Secundum Apostoli praeceptum Auctor *Const. Apostolic. lib. 2. cap. 45.*, apud Cotelieriam PP. *Apostolic. tom. 1. pag. 156. ed. Amstelæd.* vetat, ne quis adeat ad *judicium gentilium*, imo ne *patiamini*, ait, *ut saeculares Magistratus de causis vestris judicent.* Et c. 46. *pag. ead. ne igitur*, inquit, *disceptationes vestras gentiles cognoscant.* Concilio Hipponensi ann. 398. can. 87. *tom. 2. col. 1444. Collect. Labbaei, ed*

Venet. item statuitur, quod catholicus, qui causam suam sive justam, sive injustam, ad iudicium alterius fidei iudicis provocat, excommunicetur. Hinc S. Augustinus in *Psalm.* 118. *Serm.* 24. *opp. tom.* 4. *col.* 1340., et de *Oper. monach. cap.* 29. *num.* 37. *col.* 499. *tom.* 6. *ed. Maurin. Venet.* 1730, ex Apostoli praecepto repetit iudicandi munus; quo ipse tamquam Episcopus fangebatur. Uterque hic Augustini locus dignus est, qui sedulo expendatur, ut pateat, Ecclesiae iudicia, vera fuisse iudicia, et veros item iudices fuisse Episcopos, non arbitros litigantium consensu constitutos, eamque Augustini fuisse sententiam, quod Episcopi ex Apostoli lege iudicia exercerent. Inquit enim ipse Augustinus *cit. Serm.* 24. *Maligni infirmos premunt, et causas suas ad nos ferre compellunt, quibus dicere non audemus: dic homo, quis me constituit iudicem, aut divisorem inter vos? Constituit enim talibus causis ecclesiasticis Apostolus cognitores in foro prohibens iurare Christianos.* Habes hic iudicia acta ab Episcopis in invitos, non in eos, qui illos sua voluntate tamquam arbitros elegerant. Haec autem ipse Augustinus de *Oper. monach. cit. cap.* 29. dicit: *mullem manibus aliquid operari . . . quam tumultuosissimas perplexitates causarum alienarum pati de negotiis saecularibus vel iudicando dirimendis, vel interveniendo praecidendis. Quibus nos molestiis idem afflixit Apostolus non utique suo, sed ejus, qui per eum loquebatur, arbitrio.* Locus hic ostendit, Episcopos non solum fuisse arbitros controversiarum, neque solum eas officii composuisse, quo spectant verba vel interveniendo praecidendis, sed etiam veros fuisse iudices, quo referenda sunt verba vel iudicando dirimendis, et haec quidem iudicia habuisse tumultuosissimas perplexitates, quibus verbis judicialis strepitus, cursusque multiplex indicatur. Hoc ipsum Apostolicum praeceptum agnoscit Concilium Carthaginense III. *can.* 9. *tom.* 2. *col.* 1401. *collect. Labbuel*, et Concilium Carthaginense V. *can.* 1. *col.* 1454. *cod. tom.* 2.

§. XV. At enim Ecclesiae Magistratus arbitri potius erant, qui mutuo litigantium consensu sus-

sidia componebant, quam veri iudices, cum neque jus coercionis haberent, neque jus redderent servatis iudiciorum solemnitatibus, neque litigantes eorum sententiis parere cogerentur. Sed primum nego, tantum ex consensu litigantium, non item iure suo, et proprio Ecclesiae Magistratus fidelium controversias iudicasse. Apostolus Christianos apud ethnicos litigare vetuerat, neque id consilii, sed praecepti loco constituerat (1); et vero consequenti aetate Christiani omnes huic Apostolico praecepto paruerunt. Si Christiani apud ethnicos iudicium exercere non poterant, consequens est ut ea agerent vel apud *Sapientem*, quem Paulus eligendum suaserat, quique eligi non poterant sine auctoritate eorum, qui Reipublicae praeerant, vel apud Apostolos, et Episcopos, hoc est apud illos, qui summum in Christiana Republica magistratum obtinebant.

(1) Verba Pauli cit. *Ep. 1. ad Corint. VI.* sunt: *Audet aliquis vestrum habens negotium adversus alterum, judicari apud iniquos, et non apud sanctos? Qui tam graviter objurgat eos, qui hoc audent facere, nonne evidenter ostendit, indignum esse hoc nullo modo ferendum? Quare qui in illis Apostoli verbis non praeceptum, sed consilium inesse putant, illi mihi non videntur animadvertisse, Paulum legem dedisse adversus ausum, quem ipse graviter reprehendendum putabat, et in hunc quidem ausum non consilium, sed praeceptum cadere debebat. Consilii quidem est electio *Sapientis*, qui possit judicare inter fratrem suum; sed quam dissimili ratione id Paulus urget, quam diversis hoc loco verbis utitur! Revera Apostoli praeceptum memorant Auctor epistolae ad Jacobum apud Cotelierium tom. 11. pag. 611., Auctor Constitutionum et ceteri, quorum paulo ante facta mentio est; et Concilium Hipponense loc. cit. excommunicationis poena plectit Catholicum, qui ad iudicium alterius fidei iudicis provocat. Adde observantiam trium saeculorum, quo spatio temporis neminem e Chri-*

stianis ad ethnicos iudices ivisse scimus. An id tam longo temporis cursu, atque inter ingentem illam hominum multitudinem tam diligenter observatum fuisset, nisi Christianis omnibus persuasum fuisset ab Apostolo datum non consilium, sed praeceptum, cui omnes parere oportebat? Ipse Augustinus *Enchirid. de Fide, spe, charitate cap. 78. opp. tom 6. col. 226. ed. ind.* Paulum illis, quae supra descripsi, verbis non merum dedisse consilium, sed *terribiliter vetuisse* docet, ne Christiani extra Ecclesiam iudicia exercerent. Neque vero obtrudi potest factum Pauli, qui ad Caesarem provocavit *Act. Apostol. XXV.* Ipse enim comprehensus a Festo Praeside, qui ei vim inferre volebat, necessario provocare debuit ad Caesarem, hoc est ad eum cui Festus suberat, quique ejus vim reprimere posset.

§ XVI. Itaque Christianorum iudicium in aliorum Christianorum controversiis non voluntarium erat, quodque ab litigantium arbitrio penderet, sed necessarium, quoniam ipsi extra Christianam rempublicam iudices quaerere prohibebantur. Atque hi quidem iudices omnes habebant potestatem, et jurisdictionem, qua praeditos esse oportet Magistratus, qui reipublicae cum imperio praesunt, et quam Apostoli non semel ostenderant, praesertim Paulus, qui *se in promptu habere* declaraverat *ulcisci omnem inobedientiam* (1), qui Alexandrum: quod verbis suis *restiterat devitari* jusserat (2), qui eum, qui sibi non obediebat, *notari*, et cum reliquis fidelibus *commisceri* noluerat (3). Revera toto illo temporis cursu, quo ethnici imperio potiti sunt, adeo certum, fixumque Christianis erat controversias suas ab Ecclesiae magistratibus esse definiendas, seque eorum iudicio parere oportere, ut nemo adversari, atque ad ethnicos iudices adversus illorum sententiam querelas deferre ausus fuerit.

(1) Apostolus II. *ad Corinth.* X. 6. *seq.*

(2) II. *ad Timoth.* IV. 15.

(3) II. *ad Thessalonic.* III. 14.

§. XVII. Quod si Ecclesiae magistratus formidosis illis temporibus jus non reddebant ea pompa, et splendore, quo ethnicorum iudices, si non erant stipati ministris, qui adversus repugnantes vim adhiberent, si illas iudiciorum ambages, et solemnitates non observabant, non inde certe effici potest, quod in Christianorum controversias non iudicaverint. Quando Christiani non alios habere iudices poterant, quam Ecclesiae magistratus, quando hi in Ecclesia imperium, et potestatem habebant, quando ipsis cuncti parere cogebantur, quis neget, eos vera iudicia exercuisse, aut saltem, quoties opus fuit, suo jure exercere potuisse? Pompa, ministri, solemnitates nihil ad iudicaturam pertinent. An non etiam summarium iudicium, in quo hae solemnitates omittuntur, verum iudicium est?

§. XVIII. Iudicium faciunt duo litigantes, quorum alter actor, alter reus est, causa, seu controversia, et magistratus, qui iudicat, suaeque sententia controversiam dirimit. Quando haec sunt, verum iudicium est; cetera non inhaerent in rei natura, atque usu fori extrinsecus accesserunt. Itaque si Christiani controversias, iudicia etiam habuerunt, et harum controversiarum iudices non alii esse potuerunt, quam qui Christianae reipublicae cum imperio praeerunt, quibus omnes parere debebant, semperque paruerunt.

§. XIX. Atque haec quidem in Ecclesia iudiciorum ratio fuit, donec ethnici rerum potiti sunt. Delato ad Christianos imperio, consequens erat, et

illa inter ecclesiasticam, civilemque rempublicam conciliaretur concordia, quae inter Christianorum, atque Ethnicorum societatem esse nequiverat. Ecclesiae Magistratus curam abjecerunt earum rerum, quas antea administraverant, quod dedeceret, ethnicos magistratus miscere se in rebus Christianorum. curamque retinuerunt rerum spiritualium, atque omnemin clericos potestatem Nam utraque respublica civilis, et ecclesiastica in uno genere perfecta, ac distincta est, utraque suos habet magistratus, et subditos, certasque res suae potestati subjectas.

§. XX. Ad Ecclesiam pertinet divinarum, sacrarumque rerum administratio, atque in his nulla clericorum et laicorum distinctio est, sed omnes, qui per Baptismum inter Ecclesiae filios recepti sunt, ejus potestati subjiciuntur. Civilis potestas curat res temporales, et in his quidem in omnes suos Cives imperium exercet, uti etiam Ecclesia imperio utitur in cives suos, qui clerici sunt. Utraque respublica omnem habet potestatem in res, civesque suos, utraque imperat, poenaeque coercet eos, qui latis ab se legibus non obtemperant.

§. XXI. Sed ecclesiasticae coercionis summus est gradus ejectio eorum, qui in religionem, vel in societatem peccarunt. Si quis religionem violare ausus fuerit crimine, schismate, haeresi, neque monitus redierit in bonam mentem, eum sive clericus, sive laicus sit, Ecclesia ejicit a sacris, et societate Christianorum, propter potestatem, et officium, quod habet in omnes Christianos, curandi, regendique cuncta, quae ad religionem pertinent. Quo aliquo crimine societatem laesit, si clericus sit, Ecclesiae judicio subest, non propter rem ipsam, quae propria est civilis reipublicae: sed propter personam, quia scilicet ecclesiasticae reipublicae civis est. Itaque

in eum Ecclesia animadvertit carcere, aut alia poena corporali (1), et si gravius crimen sit, cui non parem habeat poenam Ecclesiae lenitas, et mansuetudo, eum de gradu dejicit, hoc est non amplius suae reipublicae Civem esse sinit, sed ad instar ceterorum laicorum subjicit civili potestati. Ipsa vero in hunc hominem, qui jam suae reipublicae Civis est imperium exercet, quod habet in reliquos cives suos, eumque coercet morte, ceterisque poenis, quae sunt a civilibus legibus constitutae.

(1) Agam de his poenis copiose Libro IV., ubi de criminali Ecclesiae potestate disserendum erit. Interim, quoniam carceris feci mentionem, hoc animadvertam, jam inde a IV. saeculo Ecclesiam ad puniendos clericos criminum reos carceres habuisse, qui *Decanica* appellabantur. Patet id ex Arcadii, et Honorii constitutione, quae est *Leg. 30. Cod. Theod. de Haeret.* Hos carceres memorant etiam Justinianus *Novel. 79. cap. 2.* et Capitularia Caroli M. *lib. 5. cap. 378.* apud Balutium *tom. 1. col. 604. ed. Venet. 1772.*, ubi dicitur in *decanicis*, alii in *catenis*, *Ecclesiae recludatur, competent poenas luiturus*, in Graecorum paratitlis apud Henricum Justellum *Biblioth. jur. canon. tom. 2. pag. 1335.* habentur haec: *εις την Εκακλησιαστικην νεγκλεισρας μ-βραλετωσαν* in *claustrum ecclesiasticum conjiciuntur.* Eorundem carcerum mentio est apud Basilium Diaconum in libello ad Theodosium, et Valentinianum in *actis Concil. Ephesini par. 1. cap. 30. num. 3. col. 997. tom. 3. concilior. collect. Labbaei ed. Venet.*, et apud Gregorium II. in *Epist. ad Leonem Isaur. tom. 3. concilior. col. 671. ejusdem collect.* Consule Du-Fresnium *Comment. in Paul. Silent. pag. 594.*, et Jacobum Gothofredum in *cit. Leg. 50. cod. Theodos. tom. 6. pag. 166. ed. Lipsiae cit.* qui tamen vir doctissimus hoc loco

deridendum se praebebat, cum fatetur in *decaniciis*, quae procul dubio loca conclusa fuere, immorigeros clericos asservari consuevisse; inquit tamen, quod *Ecclesia* his temporibus jurisdictionem proprie non haberet, sed audientiam tantum. Sed quomodo sine jurisdictione potuisset Ecclesia clericos in carceres detrudere, in lisque conclusos, et custoditos retinere? At signum esse luculentius, et praeclarius jurisdictionis potest? Decania secretarii partem fuisse putat Binghamus *Orig. Eccles. lib. 8. cap. 7. §. 9. tom. 3. pag. 264. ed. Halae Magdeburg. 1728* De verberibus, exilio, multis pecuniariis, ceterisque poenis, quae ab ecclesia dabantur, sequenti libro, saus erit agendi locus. Confer praeterea la Cerda *Adversar. cap. 39. num. 1.*

§. XXII. Ita sane postquam ad Christianos Imperatores rerum summa delata est, Ecclesia non solum de rebus spiritualibus (1), sed etiam de civilibus clericorum controversiis (2), adhibitis solemnitatibus, quae in veris, perfectisque judiciis adhibentur (3), et in suo quidem foro (4) judicavit. Quin etiam ne qui clericus minus ecclesiastico iudice contentus ad Laicum iret, graves constitutae sunt poenae, quibus hujusmodi facinus coerceretur (5). Hae autem clericorum controversiae, ut plurimum, in provinciali synodo (6), sed saepe etiam Episcopi iudicio dirimebantur (7).

(1) Cunctas de religione controversias a sola Ecclesia definiri posse, ac semper definitas fuisse, inter catholicos omnes constat. Sed in his definiendis iudiciariam quoque methodum adversus haereticos adhibitam fuisse, facile intelliget quisquis ad ea advertat, quae in conciliis gesta sunt. Nicaeni Patres antequam in Arium sententiam ferrent, eum ad synodum vocarunt, tum eum, tum ejus accusatores audiverunt, denique re cognita, expensaque diligenter, cum plane convictus esset, adversus eum sententiam protulerunt,

sicuti patet ex Socrate *lib. 1. cap. 9. pag. 11. ed. Vales. Cantabr. 1720.* aliisque. A Patribus Ephesinis ter citatus, atque ad synodum vocatus est Nestorius, ut adesset *juxta canones* (quorum nomine Beveregius *Cod. can. Primit. Eccles. vindic. lib. 1. cap. 5. num. 4.*, apud Colelerium *PP. Apostol. t. 2. pag. 23.* designari putat *Can. Apostolor. 74.*) *quoniam nihil*, inquebant, *ex iis omnibus*, quae ad ecclesiasticum ordinem pertinent, *praetermittere par est.* Legatorum, quos postremo misit Concilium, monita fuerunt, quod nisi coram de omnibus, quae scripto contra te allata fuerint, sive citra scriptum expurgaveris, eum Synodus condemnasset. Vocatus his, et tertio Nestorius venire noluit, atque in contumacem, et absentem sententia lata est, quae omnia narrantur in relatione Concilii ad Caelestinum Pont. *Tom. 3. concil. Labbaei Venet. ed. col. 1190.* Vide etiam Bos-suetum *Remarques sur l'Histoire des Conc. d' Ephese, et de Calced. de M. Dupin, t. 15. ed. Leod.*, et Cl. Card. Gerdilium *Confutazione di due libelli contro il Breve ec. tom. 1. pag. 319. seq.* a quibus ostenditur, quemadmodum totum illud judicium contra Nestorium jussu Caelestini P. actum fuerit. Trina monitione Euty-ches a Concilio Constantinopolitano, et trina item monitione Dioscorus vocatus est a Concilio Chalcedonensi, ac denique expensis omnibus contra utrumque lata sententia est, quae omnia patent ex relatione ejusdem Concilii ad Leonem apud Labbaeum *tom. 4. col. 1778. et collect. 1811.* Quid aliud hic restat, ut omnes judiciorum solemnitates adhibitae videantur? Concilii Patres, qui ejus controversiae judices sunt, reum citari jubent, repetunt his, et tertio citationem, quae solemnitas judiciorum est a legibus inducta, ut nonnisi post unam peremptoriam, aut tres simplices citationes adversus contumacem reum sententia proferatur. Emis-sis tribus citationibus, itemque secundum judicariam methodum *elapsis terminis* sententia emittitur. Quid aliud egisset judex laicus, si de re sui fori propria judicare debuisset? Atque in omnibus aut Episcoporum depositionibus, aut haeticorum condemnationibus occurrunt accusationes, testes, iudices, cetera ad verum, perfectumque judicium necessaria.

(2) Concilium Nicaenum *Can. 5. tom. 2. collect. Labbaei ed. Venet. col. 35.*, Constantinopolitanum I. *can. 6. cit. tom. 2 col. 1128.*, Carthaginense I. *can. 10. col. 1247. eod. tom. 2.*, Carthaginense IV. *can. 23. eod. t. 2. col. 1439.*, Andegavense *can. 1. col. 18. tom. 5. col. 526.*, Agathense *can. 32. cit. tom. 5. col. 526.*, Aurelianense III. *canon. 32. eod. tom. 5. col. 1281.*, Aurelianense IV. *can. 20. cit. t. 5. col. 1367.*, Veneticum *can. 9. col. 81. eod. tom. 5.*, Matisconense I. *can. 8. col. 662. tom. 6.*, Innocentius I. *Ep. 11. ad Vultic. Rothomag. cap. 3.*, apud Constantium *Ep. Pontific. Rom. col. 749.*, Gelasius P. *can. 13. cap. 11. quaest. 1. Joannes VIII. can. 11. dist. 96.*

(3) Ecclesiam in exercendis judiciis adhibuisse methodum judicariam, ostendunt tum ea, quae paulo ante diximus, praesertim de Nestorio, Eutychē, Dioscoro, tum indoles ipsa rerum, de quibus Ecclesiae judicio agendum erat. Definendae erant controversiae, quae fervebant inter duos, pluresve clericos, qui ad laicos judices ire non poterant. Quomodo hae controversiae sine vero, perfectoque judicio definiri potuissent? Revera in hoc judicio erat causa, actor, reus, judex, non deerat citatio, testes, probationes, cuncta demum, quae in judiciis requiruntur. Judex expendebat actoris petitionem, rei que exceptionem, ac denique, cum explorata erant omnia, sententiam ferebat, cui clerici, qui iudicium illud egerant, parere cogeantur. Quid aliud agebat iudex laicus in causis, quae ad ejus tribunal deferantur? Fateor, haec iudicia, quae ab Ecclesiasticis fiebant, cursum, atque exitum habuisse celeriores, quam ea, quae a laicis exercebantur, atque ab illis procul fuisse tricas, ambagesque forenses; verum haec non pertinent ad intimam iudicii naturam, neque iis neglectis minus verum, minusque perfectum iudicium videri potest. In summa iudicia ecclesiastica vera erant iudicia, quae ex litigantium contentione, et iudicis potestate, impensioque fiebant, ac iudex audito actore, et reo, expensisque probationibus, *absolutoriam*, vel *condemnatoriam* sententiam proferebat, cui litigantes parere cogeantur. Jam pars illa, inquit S. Joannes Chrysostomus *de Sacerd. lib. 3. cap. 17. tom. 1. opp. p. 399. ed. Pa-*

ris 1718. quam Episcopum tractare in judiciis convenit, infinita certe odia, infinitas offensiones parit. Haec certe in judicem odii, et offensionis causa, quem alium attingere potest, praeter litigantem, qui condemnatus est ac sententiae parere invitatus cogitur? Simile est, quod habet Concilium Terraconense I. can. 4., apud Labbaeum tom. 5. col. 698. ed. Venet., quo sancitum est, ut nullus Episcoporum, aut Presbyterorum, vel Clericorum die dominico propositum cujuscumque causae negotium audeat judicare. Ergo clerici exercent actus vere judicarios, et contentiosae jurisdictionis, qui die dominico fieri non possunt. Verum etiam, perfectumque judicium ecclesiasticum memorat Sidonius Apollinaris lib. 2. Epist. 12. col. 522., et lib. 6. Epist. 2. et 4. ed. Sirmondi int. ejus opp. edit. Venet. 1728. not. 576. et 577. Synesius autem Ep. 105. pag. 248. ed. Patavii 1633. Episcopum vult esse legum Doctorem, ut quae legibus consentanea sunt, loquitur. Sed videndus est in primis Ambrosius, qui graviter reprehendit Syagrium Veronensem Episcopum, quod in judicando non eam adhibuisset methodum, quam adhibere oportebat Ep. 5. t. 5. p. 479. opp. ed. Maurin. Venet. 1781.; ex qua quidem epistola manifestum est, qua solemnitatem ab Episcopis judicia agerentur, et quemadmodum in iis nihil omitteretur eorum, quae ad verum, et perfectum judicium requirebantur. Quin et Episcopos non solum judicasse, sed et judices suo arbitrio dedisse, testatur Socrates Histor. lib. 7. cap. 37. pag. 387. ed. Valesii Cantabr. 1720., qui narrat, Sylvanum Troadis Episcopum, cum suos clericos, quos dirimendis controversiis dare judices solebat, aliquod inde lucrum quaerere animadverteret, laicos judices elegisse, qui controversias illas definirent. Hi laici, qui episcopi jussi, et clericorum loco judicabant, quam in judicando methodum servare debebant? Adde ea, quae in causa S. Athanasii a Liberio Pontifice dicta sunt adversus Constantium Imperatorem, qui sanctissimum illum virum vehementer condemnari cupiebat, apud Constantium Epistol. Roman. Pontific. col. 433. seq. Ex quibus intelligitur, quam accurate, diligenterque ab Ecclesia judicia agerentur, diu multumque audito reo, datis ei defensoribus, excussis omnibus probationibus, ser-

vatis demum omnibus, quibus opus erat, ut verum, perfectumque iudicium haberetur.

(4) Qui Ecclesiam vera, et propria iudicia exercuisse inficiantur, ii negant, habuisse territorium, et forum, in quo jus diceret, atque ajunt, Episcopale iudicium non verum, propriumque iudicium, sed *audientiam*, hoc est arbitrium appellari. In primis autem obtrudunt Novellam Valentiniani III. quae est *Novel. 12. de Episc. judic.*, et qua scriptum extat: *Quoniam constat, Episcopos forum legibus non habere, nec de aliis causis, quam de Religione posse cognoscere, ut Theodosianum corpus ostendit, aliter eos iudices esse non possumus, nisi voluntas iurgantium sub vinculo compromissi procedat; quod si alteruter nolit, sive laicus, sive clericus sit, agent publicis legibus, et jure communi.* At si territorii nomine intelligimus locum intra certum terminum positum, in quo magistratus jus dicit, et suam jurisdictionem exercet, quis neget, jam ab ipso initio Ecclesiam territorium habuisse? Cum divisae sunt dioeceses, cum instituta sunt jura metropolitana, quae sane Titum, et Timotheum habuisse constat, cum item jura patriarchica, quorum initia aut ab Apostolis sunt repetenda, aut certe Nicaeno Concilio antiquiora sunt, nonne Episcopis, Metropolitanis, Patriarchis datum est territorium, in quo jus dicerent, suamque potestatem exercerent? Concilio Nicaeno *can. 6.* apud Labbaeum *tom. 2. col. 35. ed. Venet.* designata sunt certa loca, quorum omnium Alexandrinus, et Antiochenus Episcopus haberent potestatem. An non his locis eorum Episcoporum territorium est? Postremo ipsum territorii vocabulum expresse memorat Zosimus P. *Ep. 5.* apud Labbaeum *collect. concil. tom. 3. col. 409. ed. Ven.* Omnes sane, inquit, *admoneantur, ut quique finibus, territoriisque suis contenti sint.* Quod si Episcopi habebant territorium, in quo imperabant, jus dicebant, poenis coercerant, consequens est, ut etiam forum habere debuerint. Nam forus locus est, in quo inter litigantes jus dicitur. Neque refert, quod non hoc ipsum fori vocabulum occurrat; nam satis est, quod fuerit res ipsa, hoc est potestas, et locus reddendi juris, ut deesse non potuerit forus, quod tandemcumque vocabulo appelletur. Quid quod Consti-

tutiones Apost. lib. 2. cap. 47. apud Cotelarium PP. *Apostol.* tom. 1. p. 257. ed. *Amstelædami* 1724. expresse memorant *δικαστήριον χριστιανῶν* forum? Quod vero *audientiae* nomine interdum ecclesiastica judicia nuncuparentur, id certe argumento esse non potest, quod vera judicia non essent, sed potius arbitraria haberentur, quae sententia est Cujacii in *Paratit. eod. de Ep. laud. opp.* tom. 2. col. 30., Caroli Loysei *des Seigneuries* cap. 15., Frevetii in *Libro de Abusu* lib. 4. cap. 1. Itemque Van-Espenii *Jur. Eccles. par.* 1. tit. 1. cap. 3., Jacobi Gothofredi in *Extravag. de Episcopali judic. Cod. Theodos.* tom. 6. pag. 340. ed. *Lipsiae* 1743., aliorumque maxime Protestantium. Principio apud Jurisconsultos in *Juris civilis* voluminibus *audire causam* idem significat, ac rite cognoscere et judicare litem *L. 1. C. de Lit. constet. L. 2. C. Si ex fals. instrum. vel testim. L. 6. §. Super his C. de Appellat.*, et auditorium saepe pro tribunali foroque judiciario usurpatur *L. 54. ff. de Offic. Adsess.* Deinde vero ad ecclesiastica officia designanda utramque vocabulam et *judicii*, et *audientiae* usurpatum constat; quod evidenter ostendit, veteres inter haec duo vocabula nullum discrimen posuisse. Certe *judicium* ecclesiasticum, non *audientiam* memorant S. Leo M. *Ep. 2. ad Rustic. Narbonen.*, opp. tom. 2. col. 1424. ed. *Ballerin.* 1753, S. Augustinus *ad Bonifac. lib. 3 cap. 5. tom. 10. col. 456. et Serm. 351. num. 10. tom. 5. col. 1559. ed. Ven. 1731.* S. Ambrosius *Ep. 5. ad Synagr. Episc. Veron. opp. tom. 5 pag. 479. ed. Maurin. Ven. 1781.*, Sozomenus *Histor. lib. 1. cap. 9. pag. 21. ed. Valesii Cantabrig. 1720.*, Gratianus Imperator *Ep. ad Aquilin. apud Constantium Ep. Roman. Pontif. col. 530.*, qui ecclesiastico judicio vim tantam attribuit, ut Imperatorem appellare vetet eos, qui sunt *condemnati judicio recte sentientium Sacerdotum*. Mitto loca alia sexcenta Patrum, et Conciliorum; ac mitto etiam titulum Codicis Theodosiani, qui est *de Episcopali judicio*; quoniam de eo paulo post suus erit agendi locus. Deinde vero titulus ille Codicis Justiniani *de Episcopali audientia* editus est, posteaquam multae prodierant superiorum Imperatorum Constitutiones, quibus judiciaria Ecclesiae potestas confirmata fuerat, adjectis legibus, ut quod ab

Episcopis judicatum fuisset, ab omnibus ratum, firmumque haberetur. An judicia tam solemnia, tam firma, quibus omnes parere coguntur, mera arbitria videri possunt? Extat ea de re Constantini Constitutio in *Extravag. de Episcop. judic. Cod. Theodos. tom. 6. pag. 339.*, qua sancitum est ut omnes causae, quae vel praetorio jure, vel civili tractantur, Episcoporum sententiis terminatae perpetuo stabilitatis jure firmentur, nec liceat ulterius retractari negotium quod Episcoporum sententia deciderit. Falsam hanc constitutionem putant Gothofredus, Fvretius, Loyseus loc. cit., sed etiam late vindicant Altaserra de *Jurisd. Eccles. lib. 1. cap. 7.*, Baronius ad an. 314. num. 38. t. 3. p. 572. ed. Lucae, Sirmondus in *Append. Cod. Theod. tom. 7. p. 5. ed. Gothofredi Lipsiae 1745.*, Valesius in *Not. ad Euseb. de Vit. Constant. lib. 4. cap. 27. p. 640. ed. Cantabrig.* Seldenus de *Syned. lib. 1. cap. 10. Jo. Antonius Bianchi della Podestà e della Polizia della Chiesa tom. 3. pag. 404. Fr. Florens de Jurisdict. eccles. tom. 2. p. 35. ed. Norimb. 1756. Doujat Praenot. can. lib. 2. cap. 2.*, ac Joannes le Gendre *Episcopale judicium advers. calumn. Gothofredi acerrime vindicat.* Atque ad hanc quidem legem spectare videntur Eusebius de *Vit. Constantin. lib. 4. cap. 27. p. 550. ed. Valesii Cantabrig. 1720.*, et Sozomenus lib. 1. *Histor. c. 9. p. 21. ed. ejusdem cum de Constantino scribit, quod litigantibus permisit, ut ad Episcoporum judicium provocarent, si magistratus civiles rejicere vellent, eorum autem sententia rata esset, aliorumque judicum sententiis praevaleret, perinde ac si ab Imperatore ipso data fuisset. Patet ex hoc loco Episcopos habuisse forum, et contentiosam jurisdictionem; secus enim quomodo episcopale judicium potius, quam saeculare litigantes elegissent? Ac patet etiam, sententias Episcoporum exitum et vim tanta habere debuisse, quantum habere maximam poterant, et ideo non arbitria fuisse, quae forte despicere potuissent. Eandem Constantini legem, cujus nunc facta mentio est, memorant etiam, atque confirmant Capitularia Caroli M. lib. 6. cap. 366. tom. 1. col. 658. ed. Balutii Ven. 1772. ubi ea sumpta dicitur ex sextodecimo Theodosii Imperatoris libro cap. XI., qui locus nonnullos in eam opinionem adduxit, ut*

crederent illam legem a Carolo M. non Constantino, sed Theodosio adscriptam fuisse. Sed falluntur egregie; quoniam, ut observat Balutius in *Notis tom. 2. col. 819.* his verbis Theodosianus Codex designatur. Cum Constantino consentiant Arcadius, et Honorius, quorum est constitutio in *L. 9. Cod. de Episc. audient.*, qua Imperatores inquirunt: *Episcopale iudicium ratum sit omnibus, qui se audiri a sacerdotibus elegerint, eamque illorum judicatione adhibendam esse reverentiam jubemus, quam vestris deferri necesse est potestatibus, a quibus non licet provocare.* Quis, nisi plumbeus in jurisprudentia sit, merum arbitrium dicat Episcopalem sententiam, cujus tanta vis est, ut ei cuncti parere debeant, atque ab ea ne provocare quidem liceat? Est etiam de Episcopali iudicio lex Marciani Imperatoris, quae est *Leg. 14. Cod. de Episcop. audien.*, et ex qua similiter patet Episcopos non meros fuisse arbitros, sed veri iudicis partes egisse. Idem etiam ostendit Lex Theodosii, et Valentiniani in *Leg. 47. Cod. Theodos. de Episc.*, ex qua intelligitur, Episcopalem audientiam veram fuisse iudicium, et ab eo tantum nomine discrepasse. Quod si Episcopale iudicium, profecto cum Tribonianus in titulo Codicis *audientiae* vocabulo usus est, nullam inter audientiam, et iudicium discrimen posuit; praesertim cum ipso titulo *Episcopali audientia* leges descripserit, in quibus iudicii vocabulum usurpatur, quaeque ad verum iudicium pertinent. Cum autem tot praeclara habeamus Episcopalis iudicii monumenta, nulla prorsus habenda ratio est constitutionis, quam edidit Valentinianus III., ut Episcopis jus suum adimeret, quamquam ejus successor Majoranus abrogavit, ut ostendit Baronius *ad an. 452. n. 52. tom. 8. p. 134. ed. Lucae.*

(5) Concilium Antiochenum *an. 341, can. 5. t. 2. col. 590. collect. Labbaei ed. Venet.*, Carthaginense III. *can. 9. col. 1401. eod. tom. 2.*, Chalcedonense *can. 9. col. 1686. tom. 4.*, Aurelianense IV. *can. 20. col. 1367. t. 5.*, Matisconense I. *can. 7. et 8. col. 659. et 660. tom. 6.*, Toletanum III. *can. 13. col. 700. cit. tom. 6.*, Parisiense V. *can. 3. col. 1389. eod. tom. 6.*, Cabillonense I. *can. 11. col. 397. tom. 7.*

(6) Id sane Nicaeno Concilio statutum est *can. 5.*

et a Sardicensi *can. 3. tom. 2. collect. Labbaei col. 35. et 659.*

(7) Concilium Chalcedonense *can. 9. Toletanum III. can. 13. loc. cit.* Eodem se manere saepe functum testatur Augustinus, qui illud ex Apostolico praecepto repetit, uti demonstratum supra est. Atque in ejus vita *opp. Aug. tom. 10. col. 270. cap. 19.* Possidius narrat, quae ipse diligentia, ac pietate causa judicaret, idque, inquit Possidius, *secundum sententiam Apostoli dicentis, audeat quisquam etc.* Idem quoque Ambrosium praestitisse, testatur ipse Augustinus *Confes. lib. 6. cap. 3. tom. 1. col. 121. cit. ed.*

§. XXIII. Ipsi etiam Christiani Principes non solum sponte sua, sed etiam hortatu sanctissimorum Episcoporum, quibus certum, atque exploratum erat, clericos ad laicos judices non esse trahendos (1), aequissimas tulere leges (2), quibus cautum est, ut clerici suarum controversiarum judices non nisi ecclesiasticos haberent. Quia etiam dignitas Episcopatus, et praeclara virtus illorum, qui eoungebantur, diu fecit ut Episcopi civilium quoque controversiarum, quae inter laicos fervebant, judices constituerentur (3). Verum id fiebat consensu litigantium, qui coram Episcopo litigare malebant, quam coram saeculari magistratu, et concessu Principum, qui ab Episcopis, quorum sapientiam exploratam habebant, civium suorum causas judicari cupiebant.

(1) S. Hilarius Pictaviensis Episcopus *ad Constant. August. lib. 1. num. 1. opp. tom. 2. col. 535. ed. Veron. 1730.* Provideat, et decernat clementia tua, Constantio Imperatori inquit, ut omnes se ubique judices, quibus provinciarum administrationes creditae sunt, ad quos sola cura, et sollicitudo publicorum negotiorum pertinere debet, a religiosa se abstineant, neque post hac praesumant, atque usurpent, et putent se causas cognoscere clericorum. Extat autem in *Lib. 12. Cod. Theodos. de Episc. et Cleric.* Constantii lex, qua cau-

tum est , ut clericorum causa , nonnisi ab Episcopis judicentur ; atque hanc quidem legem Hilarii hortatu editam , putat Baronius *ad an. 355 num. 82. pag. 555. t. 4. ed. Lucae*. Eadem est Ambrosii sententia *Epist. 21. n. 2. tom. 6. p. 52. opp. ed. Maurin. Venet. 1781.* , qui laudat ea de re Valentiniani legem , qui *sacerdotes de sacerdotibus voluit judicare* ; eademque etiam Martini Turonensis , uti testatur Severus *Histor. sac lib. 2. c. 50. tom. 2. p. 263. ed. Veron. 1754*. Abutuntur autem auctoritate Patrum quorundam ii , qui judicariam potestatem Ecclesiae negant , eorumque sententias detorquent , praveque interpretantur. Nam locus Lactantii *de Divin. instit. lib. 5. cap. 20. tom. 1. pag. 412. ed. Paris. 1748.* , pertinet ad infideles , qui invitati ad fidem compelli non possunt. Chrysostomus *de Sacerdot. Lib. 2. num. 3. opp. tom. 1. pag. 354. edit. Montfaucon. Paris.* non negat imperium , et potestatem Ecclesiae , quam imo certam habet , cum illud Apostoli *ad Timot. 4. praesepit ac doce* , ita explicat *Homil. 13. num. 1. pag. 617. tom. 11. vides* , ut *imperare sacerdotum necesse sit* ; tantum dicit Ecclesiam non habere potestatem arcendi homines a delictis , et si haberet , eam inutilem futuram , cum *Deus noster non necessitate submotus a peccato , sed propria sese sponte abstinens sit remuneraturus*. Hieronymus *in can. 23. caus. 23. quaest. 5. inquit* , quod *regum proprium officium est facere judicium* , et *iustitiam* , non id dicit quasi id tantum ad reges , non etiam ad Ecclesiam pertinere statuatur ; imo *in Jerem. lib. 4. cap. 22. opp. tom. 4. col. 987. edit. Vallarsii Veron.* quidquid regibus in Scriptura , id et Sacerdotibus datum ostendit. Denique Bernardus *de Consider. ad Eugen. lib. 1. cap. 6. col. 417. ed. Paris. Mabillon.* , inquit : *metisse denique lego Apostolos judicandos , sedisse judicantes non lego* ; non ut judicariam Ecclesiae potestatem adimat , sed ut reprehendat eos , qui neglectis illis , quae potiora sunt , judicandi studio rapiuntur. Atque ad haec fere revocari omnia possunt Patrum loca , quae contra judicariam Ecclesiae potestatem opponuntur.

(2) Confer ea , quae paulo ante diximus de legibus a Constantino , Theodosio , et Arcadio , ac Marciano latis. His vero adde leges Constantii ac Theodosii , quae

sunt *Leg. 12. et L. 47. Cod. Theod. de Episc. et Cleric.*, tum Justiniani *Novellam 76.*, quae ad Monachos pertinent, qui tantum Episcopali iudicio subduntur, praeterea leges, quas a Theodorico licet Gotho, et Ariano editas memorat Cassiodorus *Var. lib. 1. Epist. 9. p. 7. tom. 1. ed. Rotomag. 1679.* Quod si aliquando clericos ad laicos magistratus ivisse, memoriae proditum est, id quidem aut factum a clericis audacibus, et protervis, qui se despiciere impune putabant posse ecclesiastici iudicis imperium, aut interdum etiam ab ipsis Ecclesiae magistratibus, ut civilis quoque magistratus imperio homines in officio continerentur, eorumque sententiae exitum haberent faciliorem. Atque huc referenda sunt exempla universa, quae de hoc rerum genere ex ecclesiastica historia desumi possunt.

(3) Huc spectat Lex Constantini, cujus feci paulo ante mentionem, quaeque extat in Codice Theodosiano *de Episcop. judic.*, praeterea *Leg. 8. et 9. Cod. de Episcop. audien.* Repete etiam ea, quae paulo ante de Augustino, deque Ambrosio dicta sunt.

§. XXIV. Nam Ecclesiae potestas, atque iudicium tantum pertinet ad res sacras, ac divinas, atque ad personas clericorum, qui nonnisi Ecclesiae imperio subjiciuntur. In controversiis laicorum mere civilibus, atque profanis nullae sunt Ecclesiae partes, sed eae tantum spectant ad iudicium, potestatemque laici Magistratus, cujus imperio illi, tamquam reipublicae cives, subesse debent. Quare Ecclesia, cui nulla in his rebus jurisdictio est, eam exercere non potest, nisi acquirat consensu litigantium, et auctoritate Principis, qui civili reipublicae imperat.

§. XXV. Atque intra hos quidem fines, et leges utraque respublica suam semper exercuit potestatem: ecclesiastica in rebus sacris, et divinis, negotiisque clericorum: civilis in omnibus laicorum controversiis, quae spiritualis non attingunt. Initio

ecclesiae judicia minoribus solemnitatibus acta fuisse videntur, ut celerius expedirentur. Hinc saepe *ecclesiasticum* iudicium *forensi* opponitur (1), quoniam ab illo procul aberant tricae, et ambages, quae forensem concertationem implicabant. Satis erat esse actorem, qui petitionem proponeret, reum, qui excluderet, iudicem, qui rem nosceret, et sententiam ferret, ut omnis rei ratio conclusa haberetur. Non deerat quidem, quae ex jure naturae procedit, citatio rei, non deerant legitimi probationum exquirendarum modi, neque cetera opportuna remedia; sed iudicium sine tot solemnitatibus, quas civiles leges invexerant, celeriter expediebatur.

(1) *Ecclesiasticum* iudicium a *forensi* distinguunt S. Augustinus *ad Bonifac. lib. 3. cap. 5. opp. t. 10 col. 456. ed. Venet. cit.*, S. Leo M. *Epist. 2. ad Rustic. Narbonen. Inquis X. col. 1424. t. 1. ed. Ballerin. 1753.* alique complures. Sed hi omnes distinctionem hanc inter utrumque iudicium adhibent, non quod *ecclesiasticum* verum non esset iudicium; sed quod celerius, quam forense expediebatur, neque in eo tricae, ambagesque forenses obtinebant.

§. XXVI. Denique aucto litium numero, commodius visum est in judiciis ecclesiasticis certum ordinem, formamque constituere, atque in iis quasdam adhibere solemnitates, quae partim a Jure civili desumptae, partim ab Ecclesiasticis primum legibus constitutae sunt. In primis autem Romani Pontifices ea de re laborarunt, proposita judiciorum methodo, quae neque importuna brevitatem officeret veritati, neque copia multiplici, et operosa solemnitate, ac formularum litigantes irretiret. Quam haec methodus apta, et concinna sit, et quantum ei praestet, quae a Jure civili procedit, omnes facile intellexerunt; ideoque illa summo omnium consensu etiam in foro civili ubique recepta est.

TITULUS II.

DE JUDICIIS, ET EORUM DIVISIONE.

- | | |
|---|---|
| I. Judicium quid? Judex ordinarius, et delegatus. | et saeculare. |
| II. Quis delegatum judicem constituat? | VI. Judicium possessorium, et petitorium. |
| III. Causae notio, et mixtum imperium. | VII. Ordinarium, et summarium. |
| IV. Jurisdictio contentiosa, et voluntaria. | VIII. Aliae judiciorum divisiones. |
| V. Judicium ecclesiasticum, | IX. Civile, et criminale. |
| | X. Judiciorum ordo. |

§. I.

Judicium vocamus ipsam causae disceptationem, quae in jure fit, quaeque constare debet quatuor praesertim rebus: actore, reo, judice, et causa(1). Actor ille est, qui prior in judicium venit aliquid petiturus; reus, qui ab actore in jus vocatur, et a quo petitur; causa est ipsum quod petitur, et quod materiam judicio praebet; judex autem ille est, coram quo disputamus, et cujus decreto res absolven- da, ac definienda est. Hic si jure magistratus cognoscendarum, finiendarumque controversiarum habeant potestatem, Judex ordinarius, si non propriam ac suam habeat, sed ab alio mandatam, et commissam, delegatus appellatur. De utroque duo sunt tituli in Decretalibus.

(1) *Cap. 10. de Verbor. signific.*

§. II. Mandat hanc postestatem ordinarius iudex qui eam suo jure habet, et mandat utiliter, non omnibus sine delectu, sed illis qui iudices dari possunt (1). Qui non propriam, et suam habet jurisdictionem, sed ab alio mandatam, is eam alteri mandare non potest (2); nisi procedat ab ipso Principe, cujus delegatus alterum recte delegat (3).

(1) *Leg. 2. et 4. ff. de Offic. ejus cui mandat. jurisd.*, *Leg. 5. ff. de Jurisdiction.* Confer Donellam *de Jur. civil. lib. 17. cap. 8. §. 1. et 5. opp. tom. 4. col. 1117. et 1128. ed. Lucae 1764.*

(2) *Leg. ult. ff. de Offic. ejus*, *cap. 62. de Appellat.*

(3) *L. 5. Cod. de Judic.*, *cap. 28. de Offic. et postest. delegat.*

§. III. Praeter judicandi potestatem, quam notionem dicimus, inest etiam in iudice jurisdiction, et jus modicae coercitionis, per quam sui munus officii exequi, ac tueri possit, atque in eos, qui parere recusant, animadvertat. Modica haec coercitio mixtum imperium dicitur (1), quod semper jurisdictionis, sed non semper judicandi potestati cohaeret (2). Sunt enim Iudices qui solam habent notionem, non item jurisdictionem; et hi tantum rem controversam cognoscunt atque definiunt, imperium, quo sententiam exequantur adjunctum non habent, ac proprie non jus dicere, sed judicare dicuntur (3).

(1) Mixtum imperium dicitur, quod jurisdictioni admixtum est, ab eaque separari non potest *L. 1. in fin. ff. de Offic. ejus cui mand. est jurisd. L. 3. ff. de Jurisd.* Frustra enim Magistratus causam cognosceret, at-

que aliquid decerneret , si non posset exequi sententiam , suaeque jurisdictioni parere recusantes coercere. Itaque verissime Paulus in *Leg. ult. de Offic. ejus cui mand.* inquit , sine modica coercitione nullam esse jurisdictionem , quoniam haec sine illa expediri , atque explicari non potest ; et huc spectat Innocentius III. in *Cap. 28. Offic. et potest. delegat.* Consule Averanum *Interpr. jur. lib. 1. cap. 4. tom. 1. p. 23. ed. Lugdun. Batav. 1753. , Donellum de jur. civil. lib. 17. cap. 6. §. 6. opp. tom. 4. pag. 1088. ed. Lucae , et Scipionem Gentilem de jurisdiction. lib. 1. cap. 4. et 5. opp. tom. 3. p. 7. et seq. ed. Neapol. 1764.* Varia autem sunt modicae coercitionis genera , quae , praeter ceteros , diligenter explicat Scipio Gentilis *lib. cit. cap. 6. seq. pag. 11. et sequent.*

(2) *Leg. 5. ff. de re jud.*

(3) *Leg. 4. §. ult. de Interrogat. action. , Leg. 57. ff. de Re judic.* Consule Averanum *loc. cit. cap. 5. et Scipionem Gentilem de Jurisdict. lib. 1. cap. 28. opp. t. 3. p. 82. ed. Neap. 1764.*

§. IV. Est autem jurisdictio vel voluntaria, vel contentiosa (1) ; illa ex re appellata , quae in volentes exercetur , ut fit in adoptionibus , in mulierum , minorumve contractibus , in ceteris generis ejusdem. Cuncta haec geruntur extra judicium , atque inter volentes , et a Magistratu confirmantur , ut eorum rata firma auctoritas sit (2). Contentiosa jurisdictio ex re item dicta in invitos, et contendentes exercetur , eique locus est in judiciis , quae in invitos redduntur , et utriusque litigantis contentionem , et disceputationem habent de re controversa.

(1) Hugo Donellus *loc. cit. cap. 8. §. 7. p. 1124.* adjicit etiam mixtam , vel intermediam jurisdictionem , quae in dandis tutoribus , aut curatoribus versatur ; sed tertium hoc jurisdictionis genus inutile esse , observat Scipio Gentilis *loc. cit. cap. 18. pag. 43.*

(2) Ex iis vero quaedam sunt , quae solam Magistratus auctoritatem , et approbationem , quaedam , quae permissum causa cognita , et uno verbo Magistratus decretum postulant. Cuncta explicat Donellus *loc. cit.* §. 9 pag. 1126.

§. V. Judiciorum summa divisio est , ut alia ecclesiastica , alia saecularia sint. Ecclesiasticum iudicium agitur in foro Ecclesiae , et in eo quaeritur de causis ecclesiasticis , sive quod hae natura sua ecclesiasticae sunt , sive quod sunt causae clericorum. Saeculare iudicium est , in quo de rebus mere temporalibus coram laico iudice disputatur. Utraque iudicia multifariam dividuntur , et primo quidem in possessoria , ac petitoria.

§. VI. Possessorium iudicium est , in quo de sola possessione , aut quasi-possessione quaeritur , sive adipiscenda , sive retinenda , sive recuperanda (1). Possessio est rerum corporalium , quasi-possessio incorporalium. Petitorium , quod *dominii litem* Jurisconsultus (2) appellat , est in quo de proprietate , vel de alio jure seorsim a possessione disputamus. Nam proprietas nihil commune habet cum possessione (3) ; licet interdum majores quidam iudices utramque conjungant. Separata autem de possessione quaestio illud efficit , ut eo finito iudicio , atque uni data possessione , victus debeat in petitorio jus suum ostendere , quod nisi praestiterit res manebit apud possessorem (4).

(1) Causam , sive quaestionem possessionis Gregorius IX. in c. 1. de caus. possess. et propriet. causam *momenti* vocat , quia nimirum amota omni cunctatione , exceptione celeriter expedienda est *Leg. un. Cod. Si de moment. possess. appell. Leg. ult. in fin. Cod. de com.*

pens. cap. ult. de ordin. cognit. Isidorus Etymolog. lib. 8. cap. . . . opp. tom. . . . pag. . . . ed. Romae 18 . . . momentum dici, inquit, a brevitate temporis, quod tam cito, quam statim, salvo negotio principali, possessio reformetur, nec in ullam moram producat, protrahatur. Quia ex re etiam dicitur momentaria possessio, quod momento temporis, cum id fieri potest emendanda est, resque adscribenda illi, ad quem eam revera pertinere constat. In Leg. 5. Cod. Theodos. de denunci. et ad. rescind. celeris redhibitio in Leg. 4. Cod. Theod. unde vis celer executio appellatur. Hinc omne interdictum, quod pertinet ad possessionem retinendam, adipsam, vel recuperandam momentarium est.

(2) *L. 18. ff. de Usuris.*

(3) *L. 12. ff. de Acquiren. possess.*

(4) *§. 4. Instit. de Interdict.*

§. VII. Dividuntur etiam judicia in ordinaria, quae et solemnia, atque in summaria, quae et extraordinaria appellantur. Ordinaria sunt, in quibus acta omnia et solemnia, quae in judiciis leges praescribunt, observantur, tum in iis, quae intimam judicii naturam, tum in iis, quae solemnitates attingunt. Summaria judicia sunt, in quibus multiplices illae solemnitates omittuntur, eaque tantum servantur, quae sunt ad judicii naturam, hoc est ad noscendam veritatem necessaria (1).

(1) Haec quidem a Jure Civili, Canonica divisio judiciorum traditur. Sed Pragmatici in foro judicia dividunt in ordinaria, summaria, summarissima, executiva. Et summaria quidem, atque ordinaria judicia, quae ad ordinem pertinent, apud nos fori usu fere inter se conveniunt.

§. VIII. Digna quoque memoratu sunt judicia realia, quae ad rem; et personalia, quae ad per-

sonam pertinent; temporalia, ac spiritualia, quae a re ipsa, de qua quaeritur, nomen accipiunt; simplicia, in quibus alter litigantium actor, et alter reus est; ac duplicia, in quibus uterque partes eadem sustinet, et uterque alter ab altero vicissim petit; judicia, quae bonae fidei, et quae stricti juris appellantur. Horum natura est, ut nullus sit iudicis arbitrio locus, ita ut ipse sententia complecti debeat tantum quod pacto conventus est, vel lege constitutum, praeterea nihil. Contra illa arbitrium permittunt iudicis, qui ex bono, et aequo aestimat, quantum actori restituendum sit, potestatemque suam eo pertrahit, ut suo iudicio subiciat, quod minime conventum, comprehensumque libello est (1).

(1) De his iudiciis actum est tom. 3. *Juris Canonici universi publici et privati* §. 9. seq. p. 11. seq.

§. IX. Denique judicia alia sunt civilia, alia criminalia; quoniam omnia vel detrahendarum controversiarum, vel maleficiorum puniendorum causa reperta sunt. Civilia pertinent ad privatorum controversias dijudicandas, criminalia vero crimina persequuntur, poenasque irrogant vindices sceleris, et violatae publicae tranquillitatis.

§. X. Judiciales disceptationes ordine noscendae, expendendaeque sunt; quoniam ex inordinata rerum ratione oritur confusio, quae jura potius obscurat, quam explicat litigantium. Ordo hic iudicium etiam dicitur, et passim processus appellatur. Est autem compositio rerum aptis, et accommodatis locis, ut procul sit confusio, et perturbatio, noscatur veritas, ac suum cuique tribuatur. Et sane ju-

diciarius ordo a Legibus est constitutus, quem iudicem ita dirigere, et moderari oportet, ut litigantes in recta justitiae semita insistant (1); quia in re nihil pro arbitrio, sed omnia canonum, legumque auctoritate agenda sunt.

(1) *Cap. 19. de Judic. , cap. 22. de Accusation.*

TITULUS III.

DE PROCURATORIBUS.

- | | |
|---|---|
| I. Quis Procurator? Plures procuratorum species. | V. Quomodo officium procuratoris expiret. |
| II. Tam unus, quam plures procuratores constituuntur. | VI. Syndici Universitatum procuratores sunt. |
| III. Qui procuratores esse possint? | VII. In quibus syndici differant a procuratoribus privatorum? |
| IV. In quibus causis adhibeantur. | |

§. I.

Judicia aut per nosmetipsos, aut per procuratores exercemus. Procurator, quem *alieni juris vicarium* eleganter Cicero appellat (1), ab Ulpiano definitur, qui aliena negotia mandato domini administrat (2). Constituitur vel ut certum negotium expediat, vel ut omnia gerat, et curet: hic generalis, ille autem specialis appellatur. Rursus procurator judicialis est, si alienam litem iudicio persequitur; extrajudicialis,

si aliena negocia extra iudicium conficit. Generalis procurator tum judicialibus, tum extrajudicialibus rebus praepositus intelligitur, non tamen iis, quae speciale mandatum requirunt (3). Datus autem cum libera administratione omnia fere potest, quae ipse dominus, et ideo quamquam donare nequeat (4), tamen res domini alienare potest, non solum cum id necessitas, sed etiam cum utilitas mandantis postulat (5). Sine hac libera administrationis potestate generalis procurator recte distrahit tantum fructus, et cetera, quae facile corrumpuntur (6).

(1) Cicero *pro A. Caecina* n. 20. *opp. tom. 4. pag. 629. ed. Genevae 1744.*

(2) *L. 1. ff. de Procur.*

(3) *Cap. 5. de Procurat. in 6.*

(4) Donare enim potius est perdere, quam administrare *Leg. 28. §. ult. ff. de Pactis, Leg. 7. §. 3. ff. de Donation.*

(5) *Leg. 60. §. Lucius. ff. Mandat., 58. ff. de Procurat., Leg. 9. §. 4. de Acquirend. domin., §. 43. Inst. de Rer. divis.*

(6) *Leg. 63. ff. de Procurator. Confer Voetum in Pandect. lib. 3. tit. 3. §. 7.*

§. II. Procurator interdum unus, interdum plures, iique aut conjunctim, aut in solidum constituuntur. Ubi conjunctim, et eodem tempore omnes constituti sunt, alter sine altero nihil agere potest, exceptis causis electionum, postulationum, provisionum, aliorumque ecclesiasticorum negotiorum, in quibus unus ex pluribus admittitur (1); ubi in solidum, potior habebitur qui litis contestatione negotium occupavit, nisi secus mandato cautum sit (2).

At procuratore uno primum, deinceps altero constituto, prioris mandatum revocatum videtur (3).

(1) *Cap. 6. §. Sanc. de Procurat. in 6.*

(2) *Cap. 6. mox laudat.*

(3) *Cap. 14. de Procurat.*

§. III. Omnes autem, qui expresse non prohibentur, procuratores esse possunt. Prohibentur autem expresse eo munere in judicio fungi excommunicati (1), qui etiam in jus vocati per alium respondere debent (2), minores annis vigintiquoque (3), infames (4), mulieres (5), milites (6); fiscus, respublica, ceteri potentiores, qui adversarium opprimere possunt (7), reus criminis constitutus, nisi se primum purgaverit (8), reipublicae causa abfuturus (9), monachus, nisi qua agatur monasterii causa, idque monasterii praefectus probet (10), Episcopus, et Sacerdotes (11), postremo omnes clerici apud saeculares iudices, nisi pro Ecclesiae suae, aut propria causa, vel necessitate coacti pro cunctis, et miserabilibus personis procurationis officium gerant (12).

(1) *Cap. 13. §. Credentes de Haeretic., cap. 7. de Probat., cap. 1. de Except. in 5.*

(2) *Cap. 7. de Judic.*

(3) *Cap. 1. §. ult. de Procurat. in 6.*

(4) *Can. 1. et 2. c. 3. quaest. 7; cum tamen jure civili Justiniani infamia, nisi manifesta sit, procuratori non obstat §. ult. Inst. de Except. sed jam fori civilis usus jus canonicum recepit. Confer Galliam lib. 1. obs. 43. num. 7. et 8., et Gudelinum de Jur. novis. lib. 4. cap. 4. num. ult.*

(5) *Leg. 18. et 21. Cod. de Procurator. Quidam tamen excipiant casus in Leg. 41. ff. de Procurator., et in L. 4. Cod. eod. Consule Donellum de Jur. Civil. lib.*

8. cap. 11. opp. tom. 5. ed. *Lucæ* col. 191. et seq. ibique *Hilligerum* in *Not.*, qui omnes enumerat, quos civiles leges a procuratoris munere repellunt.

(6) *Leg.* 8. §. *Veterani ff. de procurator.*, *Leg.* 7. *Cod. eod.* Quomodo autem nunc nostris moribus a procuratoris officio milites repellantur, explicat *Hilfigerus* loc. cit. not. 3. col. 193.

(7) *Leg.* 1. et tot. tit. *Codicis De lic. potent. patroc. litig. praest.*, *Leg.* 3. tot. tit. *Codicis Ne fise. vel respubl.* Consule *Cujacium* in *Cod. lib. 2. tit. 13. opp. tom. 2. col. 95. et seq. et observat. lib. 8. cap. 31. tom. 3. col. 195. et 196. ed. Venet. 1578.*

(8) *Leg.* 6. *eod. de Procurat.*

(9) *Leg.* 8. §. *Procuratorem*, et *Leg.* 54. §. *de Procurator.*

(10) *Can.* 35. cap. 19. quæst. 1.

(11) *Can.* 3. cap. 5. quæst. 2., cap. 3. et 4. *Ne cleric. vel monach.*

(12) *Cap.* 1. et ult. *de Postulan.*, cap. 2. et 4. *Ne cleric. vel Monach.* Atque hæc quidem vetus est Ecclesiae disciplina etiam Justiniano probata *Novell. 123 cap. 6.*

§. IV. Adhibentur procuratores in omnibus causis, tam saecularibus, quam Ecclesiasticis (1), quin etiam criminalibus, in quibus agitur civiliter, non criminaliter (2). Jure civili mandato, quod solo consensu constat (3), procurator constituitur, sed Jure canonico scripto opus est (4). Quae jurisprudentia obtinet etiam in foro civili, neque nunc procurator admittitur sine scripto mandato, quamquam de rato cautionem offerat (5). Servatis mandati finibus, quidquid procurator gessit ratum firmum est, sive domino noceat, sive prosit (6).

(1) *Cap.* 2. *de Integr. restit.*

(2) *Cap.* 5. *de Procurat.*, *Cap.* 16. *de Accusation.*

Late hoc argumentum de adhibendis, aut non adhiben-

dis in criminali judicio procuratoribus persequuntur Donnellus *de Jur. civil. lib. 18. cap. 10. §. 8. et seq.* ibique Hilligerus *Not. 5. opp. tom. 5. col. 176. et seq.*, et Voetus in *Pandect. lib. 3. §. 14. et 15.*

(3) *Inst. lib. 3. tit. 13. Paulus Recept. sentent. l. 1. tit. 3.* apud Schultingium *Jurisprud. vet. antejustinian. tom. 1. pag. 223. ed. Lipsiae 1737.*

(4) *Cap. de Procurat.*

(5) Consule Voetum *loc. cit. §. 10.*

(6) *Cap. 1. cit.*

§. V. Expirat procuratoris officium mutuo consensu (1), mandato a domino revocato, si res integra adhuc sit, quia post litem contestatam procurator litis dominus efficitur, ac nonnisi ex justa causa removeri potest, veluti si sit suspectus, aut impeditus, vel morbo teneatur (2); mortuo mandante, cum res est integra (3), re autem non integra expirare mandatum potest, si praelatus, vel alius pro ecclesia, aut beneficio procuratorem constituerint, posteaque ex hac vita migraverint (4); per renunciationem procuratoris justas ob causas factam, aut per ejus obitum, quoniam mandatum ad haeredes non transit (5), denique si dominus litem per se agere velit (6).

(1) *Leg. 24. de Procurat.*

(2) *Leg. 22. C. de Procurat., Leg. 17. et seq. ff. eod. cap. 2. eod. in 6.*

(3) *Leg. 23. C. de Procurat.*

(4) *Cap. 1. et ult. Ne sed. vacan., Clem. ult. de Procurat.*

(5) *Leg. 27. §. Morte ff. Mandat.*

(6) *Cap. 8. de Procurat. in 6.*

§. VI. Procuratores universitatis syndici (1) appellantur; atque hoc inter singulos, interque uni-

versitates discrimen est, quod illi regulariter non coguntur procuratorem dare (2), sed universitates, et collegia iudicio experiri non possunt, nisi syndicum constituerint (3). Cum enim universitas personae tantum vices gerat, uti naturaliter consentire nequit (4), ita naturaliter pro se agere, ac semetipsam defendere non potest (5). Accedit quod a cunctis tractata universitatis negocia perpetuo dissensu facile turbarentur, ac supervacaneum visum est, plures a propriis abstrahi negociis, et communi vacare causae universitatis, cui tractandae potuit unus sufficere. Ea de causa cum olim nondum liceret alieno nomine iudicio experiri, tamen pro universitate licebat (6).

(1) Extat in decretalibus Gregorii IX. titulus de *Syndico*, et ejus quoque mentio est in *L. 6. §. Sed si ita ff. Quod cujusque universit.*, et in *L. 18. §. 13. ff. de Muner. et honor.* Dicitur etiam universitatis actor in *Leg. 74. ff. de procurator. et in Leg. 6. §. Quod si et ult. ff. Quod cujusque univers.* et Ecdicus in *L. 3. Cod. de Ep. aud.*, et *Nov. 15.* apud Dionysium Gothofredum, ejus Novellae Graeca inscriptio est *τῶν ἐκκλησιῶν ἐκδικῶν*, et defensor in *Leg. 18. §. 13. ff. de munerib. et honor.*, et procurator universitatis, praecipue si monasterii actor sit *Novel. 125. cap. 27.* Apocrisarii etiam appellantur syndici *Novel. 123. cap. 25*, et *Novel. 6. c. 5.*, et sponsarii *Nov. 123. c. 42.*, et *Novel. 233. c. 2.* Est ergo syndicus, qui universitatis causam agit mandato ipsius, atque is interdum ab actore distinguitur, quod hic certae causae, ille autem universis negociis tractandis praepositus est. Apud Graecos syndici dicebantur qui ad leges suadendas a populo electi erant, ut observat Carolus Bigonius de *Republic. Atheniens. lib. 4. cap. 6. fere in princ.* Confer etiam Du-Cangium *Glossar. v. Syndicus.*

(2) *Cap. 2. de Procurat.*

(3) *Cap. 7. eod.*

(4) *L. 1. §. ff. de libert. universit.*

(5) *Arg. cit. L. 1. §. 1, et L. 1. §. ult. ff. de Acquir. vel amitt. possess.*

(6) *Inst. de his per quos agere possumus, in princ.*

§. VII. Quae de procuratoribus dicta sunt, ea generatim ad syndicos quoque pertinent, verum in nonnullis inter se differunt. Nam syndicus ab universitate, aut collegio per suffragia majoris partis eligitur (1), procurator ab uno, alterove, cujus negotium gerendum est, sola nominatione constituitur (2). ille necessario eligendus est (3), etiam criminale iudicium exercet pro universitate, si quod ei crimen impingitur (4), suam jurejurando fidem obstringit (5), et cum a collegiis ordinatis, ut plurimum, ad quascunque causas detur, publicum hoc modo officium sustinet (6). Verum procurator non juris necessitate, sed domini arbitrio, ac voluntate constituitur, repellitur, sicut supra demonstratum est, a criminali iudicio, non suam obligat sacramento fidem, sed mandantis, denique privatum officium gerit.

(1) *Cap. 2. de Integr. restit.*

(2) *Clem. 1. de Procurat.*

(3) *Cap. unic. de Syndic.*

(4) *Confer Wessembecium Paratitl. ff. Quod cujusq. univers. num. 6.*

(5) *Cap. 3. et 4. de Juram. calumn.*

(6) *Cap. unic. de Syndic.*

TITULUS IV.

DE FORO COMPETENTI.

- | | |
|--|---|
| I. Quid forum competens? | X. Causae Episcoporum |
| II. Causae de fide, divino cultu, ecclesiae disciplina, ceteris ejusmodi. | Summo Pontifici reservatae. |
| III. et IV. Causae matrimoniales. | XI. Causae viduarum, pupillorum, miserabilium personarum. |
| V. Causae beneficiariae. | XII. Reus vocandus ad judicem, cui subest. |
| VI. Causae decimarum, et funerariae. | XIII. Judex domicilii. |
| VII. Causae de immunitate ecclesiae, de ejus bonis alienandis, de ejus privilegiis, ac juribus, de vita, et institutis clericorum. | XIV. Contractus. |
| VIII. Causae majores. | XV. Delicti. |
| IX. Causae temporales Clericorum. | XVI. Loci rei controversae. |
| | XVII. Ex privilegio. |
| | XVIII. Continentia causae. |
| | XIX. Prorogatio jurisdictionis ex consensu litigantium. |

§. I.

Illud in primis, cum aguntur judicia, curandum est diligenter, ut ea coram legitimo iudice, sive in competenti foro exercean- tur. Nam acta in foro non competenti nullius momenti sunt; et impune, non paretur iudici dicenti jus inter eos in quos jurisdictionem non habet (1). Forum, seu forus (2), et exercendae negotiationis et agendarum litium locus fuit (3). Nobis de judiciis agentibus forus est judiciorum locus, qui saepe pro ipso iudicio sumitur. Competens autem forum est idem ac forum proprium,

scilicet ubi iudex suam exercere jurisdictionem potest, et in quo reus conveniendus est (4).

(1) *L. ult. ff. de Jurisd.*, *L. ult. Cod. Si a non competen. judic.*, *can. 7. caus. 2. qu. 1.*, *can. penul. caus. 11. qu. 1.*

(2) Forum, et forus latine dicitur, uti loquitur Isidorus *etymolog. lib. 15. cap. 2. num. 27. opp. tom. 4. pag. 212. ed. Romae 1801. et cap. 6. num. 8. pag. 225.*, quem immerito reprehendit Poletus *Histor. for. Roman. lib. 1. c. 1.*: nam virile ejus nominis genus egregiis Latinorum scriptorum testimoniis ostendit Cujacius in *tit. Decret. de For. compet. opp. tom. 6. col. 773. ed. Maurin. 1778.*

(3) Confer prae ceteris Poletum *loc. cit. lib. 1. cap. 2. et seq.* In eodem foro, in quo res venales exponebantur, initio jus dictum fuisse, tradit Innocentius Cironius in *Paratitl. Decretal. de For. compet.*

(4) Hinc proprius Iudex competens dicitur in *L. 19. ff. de Jurisd.*, et competens tribunal in *L. 35. §. Non solum, ff. de Procurat.* Iudex autem non competens incongruus appellatur in *L. 1. Cod. de Jurisd. omn. jud.*

§. II. Competentem autem forum, et judicem facit in primis natura causae, de qua quaeritur, et persona rei, qui in iudicium vocatur. Causa si spiritualis sit, vel conjuncta rebus spiritualibus, tantum ab ecclesiastico iudice noscenda, ac definienda est. Quare ad eum in primis pertinent causae de fide, de religione, aut cultu divino, de sacramentis, de sacris ritibus, de Ecclesiae disciplina. Nam eas cognoscendi potestas pendet a jure clavium, quod solis sacerdotibus a Christo concessum est (1).

(1) Praeclara ea de re sunt Osi Cordubensis Episcopi verba apud Athanasium in *Histor. Arianorum ad Monachos num. 44. opp. tom. 1. par. 1. pag. 293. ed.*

Patav. 1778. Tibi Deus, inquit, imperium commisit, nobis, quae sunt Ecclesiae, concredidit. Et quemadmodum qui unum imperium malignis oculis carpit, contradicit ordinationi divinae, ita et tu cave, ne quae sunt Ecclesiae ad te trahens magno crimini obnoxius fias. Sapienter etiam Joannes VIII. in can. 11. dist. 96. Si Imperator, inquit, catholicus est, non praesul ecclesiae, quod ad religionem competit, discere ei convenit, non docere . . . Ad sacerdotes enim Deus voluit, quae Ecclesiae disponenda sunt, pertinere, non ad saeculi Potestates; quas, si fideles sunt, ecclesiae suae sacerdotibus voluit esse subjectas. Confer Cabassutium Theor. et prax. jur. canon. lib. 1. cap. 9. num. 15. et 16., de Marca Concord. sacerdot. et imper. l. 2. cap. 1. num. 4. et seq. Doujatam Praenot. can. lib. 2. cap. 2.

§. III. Verum ex causis sacramentalibus vix ullae ad forum contentiosum deferuntur, exceptis causis matrimonialibus, quae per cursum, ordinemque judicalem expediuntur. Harum autem matrimonialium controversiarum, de quibus institui solent judicia, triplex est genus. Aliae enim vim ipsam icti foederis, ac firmitatem attingunt, et hae cum respiciant naturam intimam sacramenti, tantum in ecclesiastico foro tractandae sunt (1). Aliae pertinent ad vim sponsalium, atque ad jus instituendi divortii quoad torum, ac mutuam habitationem; et hae similiter ecclesiastico judicio noscendae, definiendaeque sunt (2). Nam respectum habent ad sacramentum matrimonii, quoniam ad illud contrahendum sponsalibus obligamur, ac per divortium jura utrique conjugum matrimonio quaesita relaxantur.

(1) Si quis dixerit, causas matrimoniales non spectare ad iudices ecclesiasticos, anathema sit, inquit Synodus Tridentina Sess. 24. can. 12. de Matrim. Tum

Sess. 24. cap. 20. de Reform. hujusmodi causas non *Decani*, *Archidiaconi*, aut *aliorum inferiorum* iudicio committendas, sed ab uno Episcopo cognoscendas esse statuit. Atque hoc quidem perpetuum Ecclesiae jus fuit. Cum inter Lotharium, et Teuthbergam de vi matrimonii inter eos initi quereretur, actum ea de re est in synodo Aquisgranensi an. 860. et 962. apud Labbaeum t. 10. col. 146. et 200. cumque ab ejus sententia Teuthberga provocasset ad Nicolaum I. Summum Pontificem, ipse hanc controversiam *saeculari iudicio* submitti non debere respondit, eamque commisit Synodo Metensi apud Labbaeum tom. 10. conc. col. 1413. Confer etiam acta Concilii Remensis apud Oldericum Vitalem lib. 12 pag. 859 inter *Script. antiq. Hist. Norman. Duchesnii ed. Paris. 1619.*, et Alexandrum II. can. 10. cap. 36. qu. 6. praeterea opusculum Assisii editum an. 1784. *Su l'esenzione de' Regolari ec. e su le cause matrimoniali*, quaeque ipse scripsi lib. 2. sect. 9. §. 115. seq. not. 1. p. 192. et seq.

(2) *Cap. 10. de Sponsal.*, cap. 3. de *Divort.*

§. IV. Aliae denique sunt causae, quae aliquam quidem habent cum matrimonio affinitatem, sed directo spectant res mere politicas, ac temporales. Hujusmodi sunt causae de dote, de donatione propter nuptias, de haereditaria successione, alimentis, ceteris generis ejusdem; et hae quidem saeculari iudici committendae sunt (1). Verum si qua interim, dum haec in laicali foro expenduntur, oritur controversia de jure connubii, puta de impedimento dirimente, inchoato iudicio supersedendum est, cunctaque ecclesiastico iudici adscribenda sunt (2). At ecclesiasticus iudex ipse etiam cognoscit causas de haereditaria successione, de dote, de similibus, si qua de his rebus incidat disputatio, cum de vi matrimonii, aut jure ad divortium quaeritur (3).

(1) Consule Bellarminum *de sacr. Matrim. cap. 32. pag. 587. tom. 3. opp. ed. Venet. 1721*, et Tannerum *t. 4. Disp. 8. num. 166.*

(2) Confer Altaserram *de jurisd. eccles. lib. 6. c. 3. § Superest.* Renatum Choppinum *de Sacr. polit. l. 2. tit. 1. num. 16.*, Annaeum Robertum *Rer. judicat. l. 3. cap. 5, et lib. 4. cap. 10.*

(3) *Cap. 1. Qui filii sint legit., cap. 3. et 7. de Donat. tit. vir. et uxor.*

§. V. Causae quoque beneficiariae, quoniam spiritualibus accesserunt, ad ecclesiasticum forum pertinent, sive de ipsa collatione, sive de instituendis conjungendisve, aut dividendis beneficiis disputetur (1). Eadem est ratio causarum juris patronatus, quippe quae spiritualibus adnexae sunt (2). Sed in locis quibusdam sive expresso privilegio Apostolico, sive diuturna consuetudine ab Ecclesia tolerata inductum est, ut cum de his rebus possessorio iudicio quaeritur, laico iudici, cum petitorium agitur, ecclesiastico committantur (3).

(1) Alexander III. *in cap. 21. de Jurepatr., et in Ep. ad Episc. Galliae in append. Concil. Lateranen. cap. 33. tom. 13. col. 626. Collect. Labbaei.*

(2) *Cap. 3 de Judic.*

(3) Consule Barbosa *Jur. Eccles. lib. 1. cap. 39. numer. 161., et seq.*, Thomassinum *Vet. et nov. Eccles. disciplin. par. 2. lib. 1. cap. 36. num. 13.*, et Benedictum XIV. *de Synod. dioeces. lib. 9. cap. 9. n. 7.*

§. VI. Eodem loco sunt causae decimarum; quinimo ecclesiastici iudicis est laicos ad earum solutionem cogere (1): sed hae quoque causae, cum de possessione controversia est, alicubi vel privilegio, vel consuetudine a laico iudice expenduntur. Par est

ratio causarum funerariarum , in quibus agitur de concedenda, negandaque ecclesiastica sepultura, de ejus electione , de stabiliendo tempore efferendorum , humandorumque cadaverum , de usu crucis parochialis , de tollendis abusibus , qui forte irrepperunt, de juribus funerariis inter Ecclesias , et clericos dividendis (2). Quin etiam laici imperio episcopalis fori coguntur ad praestandas oblationes, quae dari solent , nisi eae sponte offerantur (3).

(5) *Cap. 5. de Decim. Concilium Tridentinum Sess. 25. cap. 12. de Reform.*

(2) Vetus est regula , ut Ecclesia moderetur , et regat quae ad fidelium sepulturam pertinent , ejusque legibus designetur locus in quo illorum cadavera sepelienda sunt. Confer Concilium Bracarense I. , quod aliis est II. , *can. 18. tom. 6. col. 522. Coll. Labbaei*, Arelatense VI. *can. 21. tom. 9. col. 321.* , Moguntinum I. *in can. 18. caus. 13. qu. 2.* , et Moguntinum II. *in can. 31. et 50. caus. 13. qu. 2.* , Agrippinense seu Colonienso *in can. 28. dist. 1. de Consecr.* , item Theodulphum Episcopum Aurelian. *in Capitulare ad suae Parochiae Sacerdotes c. 9. apud Labbaeum t. 9. col. 186.* Hincmarum Remensem in capitulis , quae edidit an. 852. *cap. 12. apud Labbaeum tom. 10. col. 3. ed. Ven.* , Attonem Vercellensem *in Capitular. canon. cap. 23.* , apud Dacherium *Spicileg. tom. 8. pag. 10. ed. Paris. 1668.* Decretalium titulum *de Sepulturis* , aliaque sexcenta monumenta , ex quibus patet , semper ab Ecclesia de fidelium sepultura leges fuisse constitutas.

(3) *Cap. 42. de Simon.*

§. VII. Denique ecclesiastico foro addictae sunt causae , quae clericorum vitam , et instituta respiciunt, itemque causae de rebus Ecclesiae alienandis, de ejus immunitate, similibusque juribus, ac privilegiis (1). Jure decretalium etiam profana negotia , quibus jusjurandum ad junctum est, propter religio-

nem, ad ecclesiasticum judicem deferenda sunt (2). Generatim vero non agitur adversus contractum, quem quis jurejurando firmavit, nisi primum ejus laxato vinculo, quod ab Ecclesiastica Potestate iustis de causis fieri solet, agendi potestas data sit (3).

(1) Consule Gagliardum *Inst. Jur. canon. lib. 3. t. 7. n. 31. et seq.*

(2) *Cap. 13 de Judic., cap. 3. de For. competen. in 6. Vide Benedictum XIV. de Synod. dioeces. lib. 9. c. 9. num. 8.*

(3) Vide Gonzalez in *cit. cap. 1. de jurejur. n. 10.* Olim et contractus stipulatio, quae saepe coram ecclesiasticis notariis fiebat, plures laicorum lites ad episcopale judicium deferbat. Notariorum episcopalius usus antiquissimus in Ecclesia est, ut patet ex actis Conciliorum, et ostendit Valesius in *Not. ad Socrat. Histor. Eccles. l. 5. cap. 22. pag. 251. ed. Taurin. 1747.* Confer etiam S. Gregorium M. in *Sacrament. opp. tom. 3. col. 70., et Menardum in Not. 300. col. 343. ed. Paris. 1705.* In *Capitulare Caroli M. an. 805. cap. 3. apud Balutium Capitular. Reg. Fran. tom. 1. col. 295. ed. Ven. 1772.* statutum est ut unusquisque Episcopus, et Abbas, et singuli Comites suum Notarium habeant, quod etiam cautum est in *Capitular. lib. 6. cap. 256, ibid. col. 644.* Erant autem Episcopales Notarii ex ordine clericorum, quin etiam erant Subdiaconi, Diaconi, Presbyteri, cujus quidem rei multa collegerunt testimonia, et monumenta Thomassinus *Vet. et nov. Eccl. discipl. par. 1. lib. 2. cap. 106., et Muratorius Antiq. Italic. dissert. 12. Innocentius III. Ep. 129. lib. 14. tom. 2. pag. 566. ed. Balutii 1682.* clericos in sacris ordinibus constitutos notarii munus vetuit exercere, quod cum dedecore ordinis ecclesiastici saeculari curiae servirent, atque in profanis negotiis versarentur. Sed Thomassinus *loc. cit. num. 8.* simplicibus clericis numquam notarii officium vetitum fuisse contendit, imo ne ipsis quidem Presbyteris, cum de ecclesiasticis rebus ageretur. Certe in profanis quique negotiis notarii ecclesia-

stici, quod plus fidei, et peritiae haberent, saepissime adhiberi solebant; et hinc plures causae, quae propter rem ipsam, aut personas laici tribunalis propriae fuissent, a Judice ecclesiastico cognoscebantur. Synodus Tridentina *cap. 10. Sess. 22. de Reform.* cum animadverteret, quod ex notariorum imperitia plurima damna, et multarum occasio litium oriator, statuit, ut possit Episcopus quoscumque notarios, etiamsi apostolica, imperiali, aut regia auctoritate creati fuerint, etiam tamquam delegatus Sedis Apostolicae, examinatione adhibita, eorum sufficientiam scrutari, illisque non idoneis repertis, aut quandocumque in officio delinquentibus, officii ejus in negotiis, litibus, et causis ecclesiasticis, ac spiritualibus exercendi usum perpetuo, aut ad tempus prohibere, neque eorum appellatio interdictionem Ordinarii suspendat. Quod etiam sancivit Benedictus XIV. *Const. Ad militantis 48. §. 33. tit. 1. ejus Bullar. p. 48. ed. Rom. seu Ven. 1754.*

§. VIII. Ex his autem, quas descripsi, causis spiritualibus quaedam majores, gravioresque sunt, quarum judicium Summo Pontifici servatum est (1). Hujusmodi sunt controversiae de fide, resque omnes, quae ad disciplinam, rectamque gubernationem, et statum pertinent Ecclesiae universae. Non enim una omnibus fides esse potest sine judicio, et auctoritate ejus, quem Christus unitatis centrum constituit, et a quo disjuncta Ecclesiae membra copulantur; neque alius cogere omnes potest ad eandem disciplinam, certamque administrationem, nisi qui toti Ecclesiae praepositus est, et in omnes habet jurisdictionem.

(1) De majoribus quidem causis, quae semper Apostolicae Sedis judicio reservatae fuerunt, innumera sunt testimonia, et antiquitatis monumenta. Multa ea de re dixi *lib. 1. tit. 3. sect. 1. not. 4. p. 172.* Addam nunc Petrum Chrysologum *Ep. 25. ad Eutych inter Leonin. t. 1. col. 777. ed. Bullerin., Juliam I. P. Ap. 1. ad*

Eusebian. apud Constantium *Ep. Pontif. Roman.* col. 386., Innocentium I. *Ep. 30. ad Concil. Milevitan.* num. 2. col. 806. *ib. Ep. 37. ad Felic. Nucerin.* num. 1. col. 910. Sixtam III. *Ep. 10. ad tot. Illyric. Episc.* num. 3. *ib. col. 1272.*, Vigiliū *Ep. 7. ad. Auson. Arelat.* apud Labbaeum tom. 5. col. 1300. Gelasium in *Commonitor. ad Faustum in Elem. Jur. Can. P. Amort.* tom. 1. p. 502. *ed. Ferrar. 1763*, Gregorium M. *Ep. 7. lib. 3. col. 630. Ep. 54. lib. 5. opp. tom. 2. col. 784 ed. Paris. 1705*, Hilarium *Ep. 8. ad Metr. Gall.* apud Labbaeum tom. 5. col. 66., Gregorium IV. *Ep. ad Gall. Germ. Episc.* apud Labbaeum tom. 9. *Concil. col. 682. Ven. ed.*, Avitum Viennensem *Ep. 36. in Biblioth. PP. tom. 9. p. 578. ed. Lugdun.*, Sozomenum *Hist. lib. 6. cap. 22. pag. 245. ed. Cantabrig. 1720.* Ejusdem quoque rei in ecclesiastica historia certissima monumenta sunt. Huc enim spectant, quae de Irenaeo, de Dionysio Alexandrino, de Patribus Concilii Antiocheni, qui propter errores Montani, et Sabellianorum Sedis Apostolicae iudicium postularunt, narrat Eusebius *Hist. lib. 5. cap. 3. et 4., et lib. 7. cap. 5., et 26. pag. 213. 324. et 356. ed. Cantabrig. 1720.*, de praeposita ab se contra Arianos legatione ad Damasum P. Basilius *Ep. 69. ad Athanas. Ep. Alex. opp. tom. 3. p. 161., et Ep. 70. p. 173. ed. Paris. 1730.*, de Alexandro Episcopo Alexandrino Liberius *Ep. 4. Constant. num. 4. apud Constantium col. 426*, de Gallorum ac Venetentium relationibus ad Silvestrum, deque legato ad semetipsum ex Oriente misso propter haeresim Apollinarii, Damasus, *Ep. 5. ad Orient., et Ep. 14. apud eundem Constantium col. 488. et 571.*, de controversia Spiritus Sancti Romanae Ecclesiae iudicio definita, Sozomenus *Hist. lib. 6. cap. 22. p. 245. ed. Cantabrig. 1720.* de Joanne Hierosolymitano, Venerio Mediolanensi, Theophilo Alexandrino Anastasius *Ep. 2. ad Joannem Hierosolym.* apud eundem Constantium col. 723., et Hieronymus *Ep. 78. ad Pammach. et Marcellam opp. tom. 3. col. 577. ed. Vallorsii Veron.* de causa Pelagii Epist. Conc. Carthaginensi inter *Epistolas Innocentii I. Ep. 26. apud eundem Constantium col. 873. et Ep. 28. col. 875.*, quaeque ipse Innocentius I. scripsit in *Ep. 29. ad*

*Concil. Carthag. col. 888. , et Ep. 30. col. 896 , et Augustinus Ep. 186. num. 2. opp. tom. 2. col. 664. ed. Maurin. Ven. 1729 , et Serm. 131. cap. 10. tom. 5. par. 1. col. 645. ubi ea de re dicit haec : Jam enim de sa causa duo concilia missa sunt ad Sedem Apostolicam , unde etiam rescripta venerunt , causa finita est ; utinam aliquando finialur error. Similiter orta haerese Nestorii Cyrillus Alexandrinus epistolam , quae extat apud Constantium col. 1086 , ad Caelestinum Pontificem misit , quod longa Ecclesiarum consuetudo suadet , ut hujusmodi res cum Sanctitate tua communicentur ; in quaestione Monachorum Scytarum literas ad Hormisdam dedit Justinianus Imperator apud Labbaeum Collect. Concil. tom 5. col. 649. , de orta propter libros Fausti controversia ad eundem Hormisdam Possessor Episcopus Africanus loc. cit. col. 661 ; Caesareus Arelatensis propter eosdem libros ad Felicem IV. , ad quem missa legatio est , et cujus successor ea , quae synodo statuta fuerant , confirmavit cit. tom. 5. Concil. col. 809. Confer etiam Justinianum Imp. Ep. ad Joan. II. P. et ipsius Joannis ad eundem Justinianum Ep. 2. tom. 5. Concil. col. 888. et 890. Collect. Labbaei edit. Ven. et Constantinum Pogonatum Imp. Epist. ad Leonem II. apud Labbaeum tom. 7. Conc. col. 1142. Mitto cetera , ne longus sim ; cum praesertim multa , eaque praeclara testimonia de Sedis Apostolicae decisionibus in rebus fidei , ac disciplina , collegerit Cl. Mamachius ad Auctorem op. Quid est Papa ? Ep. 3. tom. 1. pag. 237. seq. Tantum addam literas , quas ad Innocentium X. P. dedit Clerus Gallicanus , ut de Jansenii propositionibus claram , certamque sententiam ferret : caliginem omnem , ut ipsi inquit , discuteret , animos fluctuantes componeret , dissidia prohiberet . Ecclesiae tranquillitatem , splendoremque restitueret. Extant hae literae in opere , cui titulus : *Histoire des cinq. propositions de Jansenius tom. 3. Recueil des pieces p. 64. Trevoux 1702* atque ita exordiantur : majores causas ad Sedem Apostolicam referre sollemnis Ecclesiae mos est , quam fides Petri nunquam deficiens perpetuo retineri pro jure suo postulat. Aequissimae huic legi obsequentes de gravissimo circa Religionem negotio Sanctitati tuae scribendum esse cen-*

suimus. Ad majores causas, quae Sedi Apostolicae reservatae sunt, pertinet etiam confirmatio Ordinum Regularium, de qua late disserit Mamachius *loc. cit.* §. 14. p. 272. *seq.* . eorumque exemptio de qua egi l. 2. tit. 10. §. 3. not. 1. 4. et 5. p. 371. 372. Sanctorum canonizatio, de qua agit Mamachius *loc. cit.* §. 13. p. 264. *seq.* , ipseque etiam disserui lib. 1. tit. 3. Sect. 1. §. 16. p. 166. , legum ecclesiasticarum relaxatio, de qua dictum est *cit.* §. 15. p. 160. , et disputat Ballerinius de *Potest. eccles. Summ. Pontif. cap. 3* , §. 2. p. 42. *ed. August. Vindelic.* 1770. , novarum Ecclesiarum cathedralium erectiones, et antiquarum uniones, ac divisiones, quarum, ne sim nimius, testimonia non colligam. Satis erit indicare Thomassinum *Vet. et nov. Eccles. disciplin. tom. 2. par. 2. lib. 1. c. 39. et 45. 54. et 58.* , Zachariam Anni Febron. *tom. 3 par. 2. lib. 1. cap. 7.* , Mamachium *loc. cit. Ep. 3. §. 7. p. 208. seq.* , a quibus loculentissima harum rerum testimonia collecta sunt. Apte, et egregie S. Bernardus *Ep. 131. opp. tom. 1. pag. 118. edit. Ven.* 1781. *Plenitudo siquidem potestatis super universas Orbis Ecclesias singulari praerogativa Apostolicae Sedi donata est. Qui igitur huic potestati resistit, Dei ordinationi resistit. Potest si utile judicaverit, novos ordinare Episcopatus, ubi hactenus non fuerunt. Potest inter eos, qui sunt, alios deprimere, alios sublimare, prout ratio sibi dictaverit, ita ut de Episcopis, creare Archiepiscopos liceat, et e converso, si necesse visum fuerit.* Confer etiam quae a me dicta sunt lib. 1. tit. 3. sect. 1. pag. 164. *seq.* , ubi cuncta exposui, quae summo Pontifici ex suprema ejus potestate reservata sunt. Late quoque de majoribus causis agit Altaserra de *Jurisd. lib. 10. per tot.* , et David *des Jugemens canoniques chap. 15. art. 3.*

§. IX. Causae vero temporales, et profanae ad ecclesiasticum forum pertinent, cum clericus in jus vocatur, quoniam actor rei forum sequi debet (1). Quare in his controversiis si clericus actor est adversus laicum, judex item laicus eligendus est, nisi forte aliud ferat locorum consuetudo (2); contra

si clericus a laico in iudicium ducitur, totum iudicium ab ecclesiastico conficiendum est. Quod fori privilegium ita adhaeret personis clericorum, ut eo ne volentes quidem ipsi abdicare se possint (3).

(1) *Leg. 3. Codic. Ubi in rem actio, Leg. 2. Cod. de Jurisdict. Cap. 5. et 8. de For. competenti.* Est haec vetus quidem Ecclesiae regula; ac recte Ambrosius in *Actis Concilii Aquilejensis opp. Ambros. l. 5. p. 611. ed. Venet. 1781. Sacerdotes, inquit, de laicis judicare debent, non laici de sacerdotibus.* Et paulo post: *erubescemus, ut videamur qui sacerdotium sibi vindicat, a laicis esse damnatus; ac per hoc quoque, et in hoc ipso damnandus est, qui laicorum expectat sententiam, cum magis de laicis sacerdotes debeant judicare.* Quo quidem concilio damnatus est Palladius Episcopus, qui laicorum iudicium postulabat. Videndi sunt etiam Athanasius *Histor. Arian. ad Monach. n. 52. opp. tom. 1. p. 297. ed. Patav. 1777. Hilarius lib. 1. ad Constant. num. 1 et Contr. Constant. num. 16. tom. 1. col. 533. et 575. ed. Veron. 1730., Lucifer Calaritanus pro Athanas. lib. 1. p. 61. ed. Venet. 1778., Concilium Milevitannum can. 19. tom. 3. col. 385. collect. Labbaei suo etiam honore privat clericos, qui a Principe petierint, ut sibi in aliqua causa saeculares iudices attribuat. Atque hic quidem verus, et germanus esse videtur sensus can. 11. et 12. Concilii Antiocheni 1. tom. 2. col. 580. cit. collect., quem canonem Antonius Augustinus de *Emendat. Gratian. lib. 1. dial. 11. opp. tom. 3. p. 64. ed. Lucae, et Baronius ad an. 341. num. 28. t. 4. p. 374. ed. Lucae* minus recte putant ab Arianis editum contra S. Athanasium, et eundem esse canonem, quem Chrysostomo ejus adversarii objecerunt, quemque ipse ejusque defensores consequenti aetate rejecerunt. Quod recte ostendit Emmannel Schelestratus de *Concil. Antioch. p. 541. qui late demonstrat, longe alium esse Arianum canonem contra Athanasium conditum, ac postea Chrysostomo objectum, et hunc Antiochenum canonem plane consentaneum esse receptae antiquae Ecclesiae disciplinae. Neque solam cum inter clericum, et laicum lis erat, clericus nonnisi ad ecclesiasticam judicem vo-**

cari debebat. Concilium Agathense *can. 32. t. 5. col. 526. cit. collect.* Multa ea de re sunt in *Capitularibus Regum Francorum* apud Balutium *Capitularibus Carol. M. lib. 5. cap. 378. et cap. 390. et t. 6. cap. 156. lib. 7. cap. 19. tom. 1. col. 604. 606. 634. 702. ed. Venet. 1772.*, et multo etiam apud Herardum in *Capitulis cap. 7. et 8.* apud Labbaeum *tom. 10. col. 61.*, itemque apud Hincmarum Remensem, qui peculiarem ea de re tractatum edidit, quem misit ad Carolum Calvum, et quo demonstravit, nemini licere ad laicum iudicem clericum vocare. Hic tractatus extat *tom. 2. ejus opp. p. 316. ed. Sirmondi Paris. 1745*, ex eoque patet, eam semper fuisse et antiquae, et recentioris Ecclesiae disciplinam, ut nullus clericus ad laicum iudicem duceretur. Late hoc argumentum persecutus sum *tit. 1. hujus libri.*

(2) Vide Benedictum XIV. *Inst. eccles. inst. 40.*

(3) Justiniani constitutione in *Leg. 50. Cod. de Episc. et cleric.* poterat clericus in conscribendo instrumento pacisci non usurum se fori praescriptione ob regulam juris antiqui omnes licentiam habere his, quae pro se indulta sunt, renunciare; unde et malier Vellejano *Leg. ult. §. pen. ff., et L. 23. Cod. ad Vellejan.*, et Princeps qui solutus est legibus *Leg. 4. Cod. ad Leg. Falcid. §. ult. Inst. Quib. mod. testam.* Verum Innocentii III. rescripto in *cap. 12. de For. compet.* prohibentur clerici privilegio fori renunciare, quod sapientissime constitutum est, ut Ordinis dignitati consuleretur. Non enim fori privilegium peculiare privilegium est, quod privatam attingit personam unius, alteriusve clerici, sed ad commodum, decusque pertinet ordinis ecclesiastici universi. Potest sane unusquisque pacisci contra jus peculiare, quod privatam personam respicit eique renunciare *cap. 6. et 15. de Privileg., cap. 16. et 23. de Regular.*, ut optime distinguit Innocentius III. in *cit. cap. 12.*, atque ita intelligenda est Justiniani constitutio in *Lib. 20. Cod. de Pactis.* Verum fori privilegium non peculiare, ac privatum est, sed ad totum pertinet ordinem clericorum, ideoque clericus ei renunciare non potest in perniciem juris ecclesiastici, ut inquit Honorius III. *c. 4. de Judic.* apud Cironium V. *Compilat. pag.*

97. edition. Vindob. 2761. *Ecclesiasticae personae non solum invitae, sed etiam voluntariae non possunt, ut iudicium subeant saeculare pacisci, cum non sit personale hoc beneficium, cui renunciari valeat, sed indultum potius toti collegio ecclesiastico, cui privatorum pacto derogari non potest.* Sane quemadmodum laicorum iudicia, forumque publicum turbari vetat Ecclesia, ita forum suum turbari non sinit; et hoc non est contra legem agere, sed legi facere subsidium; uti dicitur in c. 2. de Priv. Late Innocentii rescriptum contra Cujacium de for. comp. in Decretal. cap. 12. opp. tom. 6. col. 778. ed. Venet. 1778. teneatur Cironius in Decretal. paratitl. de Pactis, et Gonzalez in cit. cap. 12. de For. compet., et contra Fevretium Altaserra de Jurisd. eccl. lib. 3. cap. 4.

§. X. Ex causis clericorum quaedam sunt majores, quae ad Episcopos pertinent, et hae Summi Pontificis iudicio reservatae sunt. Nom enim decet, ab inferioribus clericis judicari graviora negotia Episcoporum, quorum tanta ac tam praeclara dignitas est. Lex quidem Ecclesiae supra Episcopos posuit Metropolitans, et Patriarchas; sed ea nihil detraxit de jure, et potestate Summi Pontificis, quem unum lex Christi Episcopis superiorem fecit (1). Quare suo jure, et omnino ex potestate divinitus in Episcopos accepta Romani Pontifices eorum sibi causas reservant; et haec sane antiquissima est, ac perpetua Patrum traditione firmata Ecclesiae consuetudo. Sunt autem majores hae causae confirmationes (2), translationes (3), depositiones (4), restitutiones (3), resignationes (6) Episcoporum.

(1) Agam ea de re latius in tit. de appellationibus §. XVIII ad fin.

(2) Episcoporum electiones semper confirmari consueverunt a Summis Pontificibus, qui id praestabant aut electi consecratione, aut consensu ante, vel post con-

secrationem dato. Hoc tamen inter et Orientem , et Occidentem discrimen fuisse observat P. Bianchius *t. 1. par. 1. l. 3. c. 4. §. 4. p. 513.* , quod in Oriente id fieri sinebant a Patriarchis , quos tamen ipsi Pontifices confirmabant , adeo ut qui ab iis confirmatus non esset , verus Patriarcha non haberetur : id patet ex iis , quae gesta sunt a Theodosio M. , qui ad Damasum legationem misit , ut Nectarius Patriarcha Constantinopolitanus ab eo confirmaretur , cuius rei praeclarum testimonium est in *Epist. 15. S. Bonifacii ad Rufum* apud Constantium *col. 1043.* ; item ex actis S. Leonis , qui Anatolium Constantinopolitanum , Proterium Alexandrinum , Maximum Antiochenum Patriarchas confirmavit , Leo M. *epist. 69. 70. 104. 127. 129. 130. ad Theodos. et Pulcher. opp. tom. 1. col. 1009. 1151. 1247. 1254 1256. ed. Ballerin. Vened.* , et Concilium Chalcedonense *Act. 10. tom. 4. Conc. col. 1599. collect. Labbaei*. Simplicius Joannem Alexandrinum , et Calendionem Antiochenum Patriarchas confirmavit , ut constat ex ejus *Epist. 16. ad Acacium , et Epist. 17. tom. 3. conc. col. 112. et 113. Collect. Labbaei*. Flavita Constantinopolitanus non consensit sine Romano Episcopo intronizari , ut testantur Liberatus *Breviar. cap. 18. p. 127. ed. Garner. Paris. 1675.* , et Felix P. *Epist. 13. tom. 5. conc. col. 210. collect. Labbaei*. Ipse Felix Eaphemium Orthodoxum agnovit , sed eum Episcopum haberi noluit , nisi primum ab se confirmatus fuisset , uti narrant Theophanes *Chronograph. p. 116. ed. Paris. 1655.* , et Nicephorus Callixtus *Hist. lib. 16. cap. 19. p. 685. tom. 2. ed. Paris 1630.* , idque etiam educitur ex Felicis *Epist. 14. ad Thalassium Archimandr. tom 5. conc. col. 213. collect. Labbaei*. Hac etiam refer quod de Agapito P. memoriae prodidit Liberatus *Breviar. cap. 21. pag. 147. cit. ed. Paris. 1675.* , quodque Joanni Philadelphensi scribit Martinus I. *Epist. 5. t. 7. conc. col. 22. collect. Labbaei*. Ipse Michael Rousellius , qui certe nimii in Sedem Apostolicam studii suspectus haberi non potest , potestatem hanc Summi Pontificis agnoscit ; imo *Hist. Pontif. jurisd. lib. 2. num. 12.* scribit haec : Quod si non saepius , at absolute hanc praerogativam exercuit (Papa) , tribuendum est illius modestiae , qui non putavit

summa sua potestate utendum, nisi ubi necessitas exigeret. Alia ex Oriente exempla collegerunt Hallier de *Sacr. elect. et Ord. par. 3. sect. 5. cap. 4. art. 3. p. 60. ed. Rom. 1741.*, et P. Bianchini cit. *tom. 5. par. 1. p. 513. et 518.* In Occidente vero non tantum Primatus, sed etiam Patriarchatus jure Episcoporum ordinationes, quae olim confirmationis loco erant, semper a Sede Apostolica fieri consueverunt. Celebre in primis est ea de re testimonium Innocentii I. *Epist. 25. ad Decent. Eugubin.* apud Constantium col. 856. Si quando ab aliis Episcopis in Occidente absolutae sunt Episcoporum ordinationes, id cum venia, et auctoritate Sedis Apostolicae factum est. Ita Metropolitae Aquilejensi, et Mediolanensi, quod ob difficultatem itineris incommodum esset, eas ab Apostolico ordinari, permissum est, ut ipsi sese invicem ordinaarent, Pelagius I. in *Fragm. Epist. ad Joannem Patricium* in *tom. 6. concil. Labbaei col. 482. ed. Venet.* Quod adeo verum est, ut in iis quoque Ecclesiis Romani Pontifices jus suum agnoverit, et Gregorius M., ut patet ex *Epist. 30. lib. 3. opp. tom. 2. col. 646. ed. Paris. 1705.*, Joannem subdiaconum Legatum miserit, ut Mediolanensis Episcopi electioni praeesset, et nostrae, inquit, *auctoritatis assensu a propriis Episcopis facias consecrare.* Similiter Ecclesia Ravennatensis, quae V. saeculo a Summo Pontifice Metropolis est constituta, illius ordinationi subiciebantur. uti colligitur ex Joanne Ravennae Episc. in *Epist. ad Gregorium M. lib. 7. Epist. 57. col. 670. cit. ed.*, et Agnello in *Vit. Mariniani par. 2. pag. 201.*, et in *Vit. Theod. p. 319. par. 2. ed. Mutin.*, quem in locum Bacchinii notae videndae sunt. Episcoporum ordinationes, quae a Ravennatensi Metropolita fiebant, judicio Sedis Apostolicae subjectas fuisse, constat ex Simplicio *Epist. 2. ad Joannem Raven. t. 5. concil. col. 95. collect. Labbaei.* In aliis quoque provinciis jus idem fuisse, ut Episcoporum ordinationes a Sedis Apostolicae auctoritate penderent, constat ex Vicariis Apostolicis Thessalonicensibus per Illyrium, itemque ex iisdem vicariis in Galliis, et in Anflia constitutis. Confer Siricii *Epist. 4. ad Anysium Thessalon.* apud Constantium col. 642., atque ut mittam Innocentii I. Bonifacii, Sixti, Caelestini literas,

Leonem M. *Epist.* 5. cap. 2. col. 618. et *Epist.* 5. c. 2. col. 621. opp. tom. 1. ed. *Ballerin.*, *Bedam Histor. Anglic.* lib. 2. c. 18. opp. 1. 3. p. 67. ed. *Basileae* 1563. Idem in Africa jus fuisse, docet *Siricias Epist.* 5. ad *Epist. Afric.* apud *Constantium* col. 651., in quam epistolam videndus est ipse *Constantius*, et videnda in primis sunt, quae graviter, et praeclare animadvertit *Cl. Zacharia Anti-Febzon.* par. 2. lib. 1. cap. 4. num. 13. ipse de *Marca Concord. sacerdot. et imper.* lib. 1. cap. 7. §. 1. 3. et 7. defendit, ordinationes *Episcoporum*, causasque majores ad *Jus Patriarchicum* pertinere; ideoque ejus etiam concessu omnia haec uni *Pontifici* in Occidente adscribi debent. Vide *Blasum de Collect. Isidor.* cap. 9. §. 1., *Zachariam* loc. cit. cap. 3., et *Carlium del Dritto metropolitico opp.* tom. 15. p. 272. ed. *Mediolani* 1786.

(3) Consule quae supra dixi lib. 1. tit. 3. sect. 1. §. *XVIII.* not. 2. p. 176., et vide etiam *Blasum* loc. cit. cap. 10. §. 1., *Bianchiam* tom. 5. par. 1. cap. 4. §. 1. p. 390., seq. et *Cl. Mamachium* ad *Auctor. opp.* *Quid est Papa?* Ep. 3. tom. 1. pag. 212. seq.

(4) De *Episcoporum* depositionibus item egi citat. sect. 1. §. *XVIII.* not. 4. p. 164. 177. et 178. Adde *Mamachium* loc. cit. p. 212. seq. De *Episcoporum* translationibus, renunciationibus, depositionibus, electionum confirmationibus celebris est *Innocentii III.* decretalis in cap. de *Translat.*, quam scite explicat, et tuetur *Carolus Blasus de collect. Isidor. Mercator.* c. 10. §. 2. not. 1. p. 120., et *Bianchius* loc. cit. num. 1. p. 390. et seq.

(5) De restitutionibus quoque *Episcoporum* actum est cit. §. *XVIII.* not. 5. p. 178. ad p. 180. Videndus est etiam *Mamachius* loc. cit. p. 218. seq.

(6) Renunciationum, quae ab *Episcopis* nonnisi cum venia, et auctoritate *Sedis Apostolicae* factae sunt, exempla extant apud *Leonem M.* *Epist.* 167. ad *Rustic. Narbon.* col. 1417. tom. 1. ed. *Ballerin.*, *Gregorium M. I.* 11. *Epist.* 47., et lib. 13., *Epist.* 5. et 6. opp. tom. 2. col. 1135. 1217. 1218. ed. *Paris.* 1750., *Joannem Diaconum* in *Vit. Gregor.* lib. 4. cap. 39. opp. *S. Gregor.* tom. 4. col. 131. cit. ed. *Maurin.* *Paris.* Mitto ce-

tera, quae referunt Zacharia *Anti-Febron. par. 2. lib. 1. cap. 5. §. 13. p. 228. seq.* Bianchini *par. 1. tom. 5. lib. 3. cap. 4. §. 2. num. 6. et seq., p. 462. seq.* Mammachius *loc. cit. p. 224. et seq.* Atque haec quidem omnia falsis Isidori decretalibus antiquiora sunt, adeo ut se deridendos praebeant Febronius, Eybelius, ceteri similes, qui hanc Pontificiam potestatem repetunt a falsis decretalibus, quae multo post in manus hominum pervenerunt. Confer etiam Blascum *loc. cit. cap. 10. §. 2. p. 119.*

§. XI. Decretalium jure etiam viduae, pupilli, ceteraeque mirabiles personae ad ecclesiasticum judicem vocandae sunt (1); quoniam iis opitulari ab ipsis Ecclesiae incunabulis non ultimum fuisse constat munus, et curam Episcoporum (2). Quin etiam civiles leges laicorum controversias ecclesiastico judici committunt non solum cum duo litigantes consentiunt (3), sed etiam cum eorum alter dissentit (4).

(1) *Cap. 26. de Verb. signific., et cap. 15. de For. competen.*

(2) *Can. 1. et 2. dist. 87.* Duo hi canones qui certe antiquissimi sunt, et antiquam exhibent Ecclesiae disciplinam, inscriptum habent nomen Gelasii Pontificis; sed quidam sunt, qui eos ipsi adscribendos negant. Verum, ut recte observat Carolus Sebastianus Berardus *Gratiani Canon, genuini par. 2. cap. 46.*, stylus a Gelasio non dissentit, imo et sententia rescripti generalibus Gelasii sententiis consentanea est. Nam his canonibus constituitur, ut Episcopi viduarum, ac pupillorum praesertim tuitionem habeant; at vero similia prorsus extant in Gelasii *Epist. 10. ad Episc. Sicil.* apud Labbeum *tom. 5. Conc. col. 321. ed. Venet.* Eadem disciplina recepta, ac probata est in Concilio Aurelianensi I. *Can. 16. ibid, col. 549.*, ac passim a Gregorio M. praesertim *Ep. 13. et 59. lib. 1. opp. tom. 2. col. 499. et 549. opp. tom. 2. ed. Paris. 1705.* Consentit Concilium Matisconense II. *can. 12. col. 677. tom. 6. coll. Lublaci.* Neque vero hi canones ita explicandi, intelligendique sunt, quasi significant meram tuitionem, ac patrocinium viduarum,

et pupillorum, quod in primis Episcopis commissum, et commendatum est. Nam Matisconenses Patres, non rogant, sed lata lege qua omnes obstringi volunt, constituunt, ut saeculares iudices viduas, et pupillos sine Episcopi venia non conveniant, et Episcopo absente ab Archidiacono, vel Presbytero terminos praefiniri volunt ad illorum causas definiendas, poenamque addunt anathematis adversus iudices, qui huic Concilii legi non obtemperaverint. Sunt haec veri iudicii, et jurisdictionis propria, non meri patrocinii, ac tuitionis.

(3) *L. 8. et 9. Cod. de Episcopat. audient.*

(4) *Extravag. I. de Episcopat. Judic. in append. Cod. Theodos. tom. 6. p. 339 ed. Lipsiae 1743.*, de qua quidem Constantini lege satis supra dictum est *lib. 3. tit. 1. §. 22. not. 4. p. 27.* Atque haec quidem facultas ab utroque jure laicis concessa deferendi anas causas temporales ad Episcopi iudicium in exitu saeculi XIII., seu potius initio XIV. sarta tecta servabatur. Scribit enim Meyerus *Annal. Flandriae lib. 10*, a Synodo provinciali, quam habuit an. 1301. Remensis Archiepiscopus apud Compendium, anathematis poenam indictam fuisse adversus laicos magistratus, qui non patiebantur, ut laici in foro ecclesiastico convenirentur; atque id revera colligitur ex ipsius concilii actis apud Labbaeum in *collect. concilior. tom. 14. col. 1344.*

§. XII. Sed non est satis considerare, quae sit natura causae, de qua quaeritur, et qui status personae, quae in jus vocatur, ut constet, num a laico, an potius ab ecclesiastico iudice negotium agendum sit. Non enim omnis ecclesiasticus, aut laicus iudex assumi sine delectu potest, sed illud praeterea requiritur, ut proprius iudex sit; qui videlicet in reum habeat jurisdictionem. Nam reus invitatus in iudicium rapitur, et ideo necesse est eum vocare ad iudicem, cui jus est, ejus vocandi, et cogendi.

§. XIII. Reus autem sive in ecclesiasticis, sive in civilibus iudiciis ex quatuor praesertim causis a-

pud certum judicem forum habet, nimirum ex domicilio, ex contractu, ex re sita, ex delicto (1). Domicilium si cum naturali origine conjunctum non sit, tale esse debet, ut manifesto constet, illud certo in loco fuisse constitutum. Nam sola habitatio non est satis, ut domicilii jura acquirantur; sed praeter ea requiritur, quod quis in certo loco per decennium commoratus sedem posuerit (2), aut ibi fixerit, et locaverit, nunquam inde discedendi animo, lares, et summam fortunarum (3). Praeter hoc cujusque proprium domicilium, Jus Romanum aliud etiam agnoscit commune omnibus, idque ipsa Roma erat (4). Quare unusquisque ibi repertus conveniri poterat, nisi jus revocandi domum haberet (5). Simili modo clerici Romae reperti, nisi ad eam venerint ex justa, et necessaria causa, propter quam revocandi domum jus habeant, judicio vocati respondere coguntur, quoniam communis omnium clericorum patria Roma est (6).

(1) *Cap. ult. de For. competen.*

(2) *Leg. 2. Cod. de Incolis lib. 10.*

(3) *Leg. 7. Cod. eod.* Quod si quis plura in diversis dioecesis habeat domicilia, apud unum ex iis quolibet Ordinarium recte in jus vocabitur *Leg. 29. ff. Ad Municip. cap. 15. de For. competen.* At sola domus possessio, quae in aliena civitate comparatur, domicilium non facit, ut tradit Papinianus in *Leg. 17. §. 13. ff. ad Municip.*

(4) *Leg. 33. ff. Ad Municip. Leg. Roma 33. ff. ad municip., Leg. eos. 9. ff. de vacat. mun.*

(5) *Leg. 2. §. 2. ff. de judic.*

(6) *Cap. ult. de Foro competen.*

§. XIV. Altera causa, propter quam aliquis certum habet forum, et judicem, est contractus. Nam ubi quis contraxit, ibi actione in personam

reus praesens convenitur (1). Si formula contractus locum non expressit, quo solvenda pecunia est, is locus intelligitur, in quo res gesta est (2); si expressit, in eo loco, qui designatus est, iudicium agere oportet (3). Quod si is, qui certo loco solvere promisit, ad locum non accedat, quod vel data opera facit, vel quod alibi necessario detinetur, composita est in eam rem utilis actio de eo, quod certo loco (4), qua actione actor, cui quid certo loco promissum est, nec tamen datum alio etiam loco iudicium exercet (5); modo idoneus, et legitimus locus sit, is videlicet, in quo non alio designato loco, reus aut contractus, aut domicilii causa conveniri debuisset (6).

(1) *Leg. 19. §. 1., Leg. 20. et 45. ff. de Judic. ; cap. 1. §. 3. de For. competen in 6.*

(2) *Cit. Leg. 19. §. 1., et Leg. 45. ff. de judic.*

(3) *Leg. 3. ff. de Bon. auctor. judic. possid., Leg. 19. §. ult., et Leg. 20. ff. de Judic., Leg. 20. ff. de Act. et oblig.*

(4) *Leg. 1. ff. de Eo quod cert. loc.*

(5) *Confer titulum pandectarum de Eo quod cert. loc.*

(6) *In hanc sententiam scripta est Leg. 19. de Judic., atque in hanc eandem sententiam actionem de eo, quod certo loco, Jus Canonicum recepit Cap. 17. de for. competen.*

§. XV. Delicti causa ubi quis deliquit, ibi iudicio in personam convenitur. Nam ubi crimen est patratum, ibi facilior est probationum copia, et majus expensarum compendium; praeterea curandum est, ut reus prosit exemplo poenae, ubi obfuit exemplo delicti (1). Quod si reus a loco delicti absit, etiam ubi reperitur ea de re quaeri potest (2); nisi magistratus loci patrati criminis reum ad se mitti pe-

tat, ut in loco delicti meritis plectatur poenis (3). Verum in hoc toto negotio servare oportet locorum consuetudines, et pacta conventa inter supremos Principes; quandoquidem scitum est, neminem extra suum territorium jurisdictionem exercere sive in suos, sive in alienos posse (4).

(1) *Leg. 7. et 22. ff. de Accusat., Leg. 1. Cod. Ubi de Crimin. ager. opor., L. 1. Cod. Ubi Senator., cap. 14. de For. competent.* Vide etiam S. Cyprianum *Ep. 19 pag. 266. ed. Amstelædami 1700.*

(2) *Leg. 1. Cod. ubi de Crimin.*

(3) *Leg. 7. et 11. ff. de Custod. et exhibit. reor. Novell. 134. cap. 2., cap. 1. de Raptor., can. 4. et 5. caus. 6. quæst. 3.* In eandem sententiam est *can. 1. caus. 3. qu. 6.,* quem canonem Gratianus eduxit ex epistola S. Fabiani Pontificis, hoc est ex falsis decretalibus Isidori Mercatoris.

(4) *Cap. 2. de Constit. in 6.*

§. XVI. Locus quoque in quo res, de qua quaeritur, sita est, proprium judicem facit. Nam ibi in rem actio adversus possidentem instituitur, quasi actio rem ipsam persequi videatur (1). Neque refert, immobilis ne, an mobilis res controversa sit; quin etiam si possessor absit, actio intenditur (2). Num autem necessarium omnino sit actione in rem cum reo agere in loco, in quo sita res est, ac etiam actori liceat exercere iudicium in loco domicilii, vetus disputatio est. Sed hoc posterius fori usus recepit videtur (3). Jure canonico etiam propter beneficium, veluti propter rem sitam, competens forum evadit (4); ideoque in causis beneficiariis recte clerici ad Episcopum beneficii vocantur.

(1) *Leg. 3. Cod. Ubi in rem actio*, cap. 3. de *For. competen.*

(2) *Leg. 2. Cod. Ubi in rem actio.*

(3) Consule Hotōmanum *lib. 3. Observ. 3.*, Duarenum *ad tit. de judic. Cod. de For. compet.* Donellum *de Jur. civil. lib. 17. opp. tom. 4. p. 1275. ed. Lucae*, Vianlum *Select. jur. quaest. lib. 1. cap. 18.*

(4) *Cap. 3. de Tempor. ordinat. in 6.*

§.XVII. Sunt etiam alii modi, quibus forum competens et proprium efficitur; quales praecipui sunt privilegium, continentia causae, et consensus litigantium. Porro jure Romano pupillis, viduis, et ceteris miserabilibus personis fori electio concessa est (1). Similiter jure Decretalium Monachi, regulares (2), ecclesiae multae, et multa item capitula canonicorum sedis Apostolicae privilegiis vel omnino, vel ex parte ab Episcoporum jurisdictione subtracta sunt. Itaque horum causae aut a Sede Apostolica, aut ab eo Judice, cui sunt addictae, cognoscuntur. Nec praetereunda peculiaria quorundam privilegia, qualia sunt illa concessa certis corporibus, atque collegiis, pluribusque gymnasiis, et academiis, quibus qui addicti sunt, hi proprium habent judicem, ad quem tantum vocantur (3).

(1) *Leg. unic. Cod. Quand. Imperator.*

(2) Consule Fagnanum in *cap. Cum dilectus 8. de Relig. Domib. num. 17.*, et in *cap. Tuarum n. 18. de Privileg.*, ubi etiam describitur celebris Sixti IV. Constitutio, quam *Mare magnum* appellant. Ceterum de Regularium exemptione late disserui *l. 2. tit. 10. §. 3. p. 370. et in Not. p. 371. et seq.* Sed praeter auctores eo loco indicatos, vide etiam C. Gagliardum *Instit. canonic. lib. 3. tit. 12. §. 19. et seq.*, ubi harum exemptionum multa habes antiqua monumenta, quae a Natali Alexan-

dro, Ughellio, Mabillonio, Muratorio, aliisque viris doctis collecta sunt. Novissime de Regularium exemptione graviter, solideque disseruit Emmanuel Ituriaga Auctor epistolae editae Assisii an. 1785. *Su l'esenzione dei Regolari dalla giurisdizione de' Vescovi, e su le cause matrimoniali.*

(3) Late, ac diligenter de hoc privilegio, quo Academiae fruuntur, disputat Scipio Gentilis *de Jurisdic.* l. 3. cap. 17. opp. tom. 3. p. 276, ed. Neapol. 1664.

§. XVIII. Etiam continentia causae facit, ut judex, qui competens non esset, competens evadat; nimirum si quaestio princeps in cursu judicii incidentem quaestionem habeat, cujus illi cognitio directe commissa non erat. Tunc enim idem Judex utramque controversiam noscit, ne res inter se nexae, et jugatae dividantur (1). Hinc Decretales foro ecclesiastico addicunt causas de dote, deque alimentis praestandis, quae matrimonialibus incidunt (2).

(1) *Leg. 10. Cod. de Judic.*

(2) *Cap. 3. de Donation. int. Vir. et uxor.*

§. XIX. Denique litigantium consensu jurisdictio profertur, sive, ut dici solet, prorogatur, et tunc alius judex, quam cujus notio est litigantium voluntate proprius, et competens evadit (1). Licet enim jure Romano litigantibus in alienum judicem consentire, dummodo ipse jurisdictionem habeat (2); nam quae in privatis viris nulla est, jurisdictio prorogari non potest (3). Clerici cum Episcopi consensu, in alienum judicem ecclesiasticum recte consentiunt (4), in laicum vero consentire nulla ratione possunt (5).

(1) *Leg. 1. Cod. de Jurisd.* Verum si prius quam adiretur alienus iudex, mutata voluntas fuerit, procul dubio nemo compellitur huic conventioni stare, inquit Africanus *Leg. 18. ff. de Jurisd.*

(2) *Leg. 1. et 2. ff. de Judic.*

(3) *Leg. 3. Cod. de Jurisdic.*

(4) *Cap. 18. de For. competent.*

(5) *Cap. 12. eod.* Hanc Innocentii III. constitutionem minus vere, minusque recte, uti supra animadverti §. IX. Not. 3., reprehendit Cujacius, quem praeter Cironium, aliosque ibi laudatos, solide etiam graviterque refellit Carolus Gagliardus *Inst. Canonic. lib. 3. tit. 10. §. 5. et seq.*

TITULUS V.

DE LIBELLI OBLATIONE, DEQUE IN JUS VOCANDO.

I. Libellus quid?

II. Accusatorius, vel conventionalis.

III. Quomodo jus actoris libello exprimendum?

IV. Quid libello comprehendendum?

V. Quibus modis plus petatur?

VI. Poenae adversus plus petentes constitutae.

VII. Emendatio, et mutatio libelli.

VIII. Quid in jus vocatio, et quemadmodum facienda?

IX. Citatio.

X. Judicium a citatione inchoandum.

XI. Ea vel realis, vel verbalis est.

XII. Citatio verbalis vel simplex, vel peremptoria.

XIII. Quomodo citatio reo significanda?

XIV. Citatio in alieno territorio, ejusque in actis relatio.

XV. ad XIX. Quae in citatione observanda?

XX. Effectus citationis.

§. I.

Postquam consideravit actor, quis proprius et competens iudex sit, in *judicio postulationem depo-*
Der. Instit. Can. Tom. III.

nit (1), hoc est apud acta deponit libellum, quo actio continetur (2). Actio est jus persequendi in iudicio, quod sibi debetur (3); brevis scriptura, qua haec actio, et actoris petitio clare, et distincte proponitur, libellus appellatur (4). Huic respondet reus; et sic oritur litis contestatio de qua postea erit dicendi locus. Reo post libelli oblationem dantur viginti dierum induciae, ut deliberet, cedatne, an resistat, pareatne iudici, an eum recusset (5).

(1) Ita loquitur Honorius *Leg. 3. Cod. de Praescript. 30. ann.*, et Justinianus *Leg. ult. Cod. eod.*

(2) *Novell. 53. cap. 3.*

(3) *Leg. 59. ff. de Act., et princip. Instit. lib. 3. tit. 6. de Action.*

(4) Multa libellorum genera habes apud Brissonium *de verb. signific.* De S. Cirillo Hierosolymitano Episcopo, qui a Seleucensi concilio depositus fuerat, narrat Socrates *Histor. lib. 2. cap. 40. pag. 154. ed. Valesii Cantabrig. 1720.*, eum libello provocasse, praeterea Sylvanam Troadis Episcopum supplicantium libellos accepisse, eisque iudicem dedisse, scribit idem Socrates *lib. 7. cap. 37. p. 388.* Unde intelligimus, ea jam aetate in ecclesiasticis iudiciis adhibitas fuisse solemnitates, quae in iudiciis adhibebantur.

(5) *Novell. 53. cap. 3.*, quam refert Gratianus *can. 4. cap. 3. quaest. 3. §. Offeratur.* Consule Cujacium in *eamid. Novell. 53. opp. tom. 2. col. 961. et 962. ed. cit.*

§. II. Libellus vel conventionalis, vel accusatorius est. Conventionali utimur in civilibus negotiis, accusatorio in causis criminalibus, cum reum criminis apud iudicem accusamus. Clarus, et obscuritatis expers libellus uterque esse debet, quodque petitur perspicue significandum est (1). Non enim sub obscuro libello respondere reus cogitur, et iudex

recte potest rejicere libellum, in quo non dilucide, et explicate omnia declarentur.

(1) *Cap. 2. de Libell. oblat.*

§. III. Antiquo jure Romanorum certae, ac solemnes erant constitutae formulae, cum quibus actio institui debebat, et eas actor a Praetore impetrabat. Sed postea, sublati ambagibus, et subtilitatibus formularum (1), placuit libello exprimere genus, speciem, et nomen actionis, quae in judicium deduceretur (2). Verum Decretales de exprimendo nomine actionis, qua quis usurus est, non admodum laborant; modo res ipsa ita clare, apte, que proponatur, ut ex ea jus petentis manifestum sit (3).

(1) *Leg. 1. et 2. Cod. de Formal. et impetr. act. sublat.*

(2) *Leg. 3. Cod. de Edn., Leg. ult. Cod. de Interd. Consule Cajacium in cap. 6. de judic. opp. tom. 6. col. 763. et 764. ed. Muin. seu Venet. 1778.*

(3) *Cap. 7. de Judic. Confer Donellum de Jur. civil. lib. 23. cap. 4. §. ult. col. 64., ibique Hilligerum in Not. opp. tom. 6. cit. ed. Lucae.*

§. IV. Accusatorius libellus complecti debet nomen accusatoris, rei accusati, et judicis, coram quo accusatio instituitur, praeterea tempus, locumque criminis. Conventionalis autem contineat oportet nomen actoris, rei, atque judicis, rem petitam, et petendi causam. Cum agitur actione in rem, satis est exprimere causam actionis proximam, puta dominium; cum exercetur actio in personam, exprimi debet tum proxima, hoc est obligatio, tum

remota, hoc est titulus, ex quo obligatio nata est (1).

(1) *Cap. ult. de Libell. oblation.* Consule Donellum *loc. cit.* 3.^a ibique Hilligerum in *Not. col.* 57. et seq.

§. V. In offerendo libello praecipue curandum est, ne plus petatur, quod fit quatuor modis: re, tempore, loco, et causa. Re plus petitur, si ex. gr. petantur triginta, cum viginti deberentur, aut si is, cujus ex parte res est vel eam totam, vel majorem partem suam esse contendat; tempore, si ante statutum diem, vel ante conditionem actio instituitur; loco, si quis quod sibi certo loco dari stipulatus est, alio petat, nulla illius loci facta mentione; causa, si quis certam rem petat, cum debitor posset dare, quod mallet suo arbitratu (1). Jure veteri plus petens actor causa cadebat (2), sed jure novo civili aliae adversus plus petentium importunitatem poenae sunt constitutae (3).

(1) *Inst. lib. 4. tit. 6. de Action. §. 33.*

(2) Paulus *Recept. senten. lib. 1. tit. 10. §. 1.*, apud Schultingium *Jurisprud. vet. Ante-Justinian. p. 241. ed. Lipsiae 1737. §. 33, Inst. cit.* Hinc illud Plauti in *Mostellar. act. 3. scen. 1. ver. 123. pag. 528. tom. 1. ed. Lugdun. Batav. 1699.*; *velim quidem hercle, et uno summo plus petas.* Num autem id Lege XII. tabularum, an potius edicto Praetoris factum fuerit, non satis compertum est, Consule Raevardum *Varior. lib. 3. cap. 14. p. 69. tom. 2. ed. Neopol. 1779.*

(3) Zeno Imperator adversus eum, qui ante tempus petiit, temporis Inducias duplicari, atque his finis rem cogi non posse voluit ad suscipiendam litem; nisi prioris litis impensae solutae fuissent. Constitutio haec desideratur, sed ejus epitomen ex Basilicis eduxit Cujacius *Observat. lib. 12. cap. 21. opp. tom. 3. col. 319. ed. cit.*

Contra eos , qui re , aut loco , aut causa plus peterent , triplici poenam constituit Justinianus cit. *Instit. lib. 4. tit. 6. de Action. §. 33.*

§. VI. Jure canonico, qui re , aut causa plus petunt , in expensas condemnantur , qui loco , in id , quod debitoris interest , denique qui tempore plus petierint , duplo majores inducias reo tribuere debent , neque ipse cogitur judicium suscipere, nisi antea prioris litis expensae solvantur (1). Nunc fere omnes eo jure utuntur , ut reus ante tempus conventus tantum a judicii observatione liberetur , et actor quidem in litis expensas condemnatur; sed ei tamen integrum sit reum in judicium vocare, cum primum obligationis diem venisse constat. In ceteris hujasmodi petitionibus reo licet offerre plus petenti, quod se debere censet; id vero si non accipiat actor, neque aliud revera judex deberi intelligit actor, uti temere litigans , in expensas condemnatur (2).

(1) *Cap. unic. de plus petition.*

(2) Confer Vinnium in *Instit. lib. 4. tit. 6. §. 3.* et Voetum in *Pandect. lib. 5. tit. 1. §. 25.*

§. VII. Emendatur interdum libellus, interdum etiam mutatur; cum videlicet pridem instituta actione retenta , aliquid adjicitur , aut detrahitur , vel cum prima actione repudiata , nova instituitur. Ita qui pro decem , quae sibi ex causa mutui deberi dixit , ex eadem illa causa petit viginti , libellum emendat ; mutat autem qui fundum , quem ex testamento petierat , deinceps ex stipulatu petit. Utrumque fieri potest etiam post litem contestatam (1); sed qui contestata lite actionem mutat , prioris ju-

dicii expensas solvere debet, et novum dare libellum, novasque ad deliberandum inducias reo. At vero libelli solemnitas in causis summariis non est necessaria.

(1) Consule Donellum *de Jur. civil. lib. 23. cap. 5. et ad tit. Instit. de Action. §. 27. opp. tom. 6 col. 65. et seq.*, et col. 839. et seq. ed. Lucae cit., et Voetum in *Pandect. lib. 3. tit. 13. §. 9. et seq.*

§. VIII. Oblato ab actore libello, qui est quasi primus aditus judicii, reus in jus vocatur. Vocare autem in jus nihil est aliud, quam vocare aliquem ad eum, qui jus dicturus est ea de re, de qua quaeritur (1). Nullum olim ritus vocationis fuit; sed licebat privato privatum, cum quo jure agere vellet, per se, et sua auctoritate in jus vocare, et quidem ita, ut vocatus, nisi vadimonium promitteret, hoc est nisi satisfaceret judicio sisti, etiam invitatus in jus rapi posset (2). Sed postea mos hujusmodi sublatus est, sive quod absurdum videretur, rem tantum privati arbitrio permittere, sive quod melius aequius videretur hoc negotium transigere auctoritate ejus, qui juri dicundo praeest (3).

(1) Paulus in *Leg. 1. ff. in jus vocan.* ita rem explicat ut sit in jus vocare juris experiendi causa vocare. Recte prorsus. Non enim quis vocatur in jus, nisi ut de suo jure expediatur apud eum, apud quem id facere jus est, idest apud eum jure judicioque agat ea de re, quem in judicium vocat. Id enim significant Jurisconsulti, cum dicunt de jure suo, aut de re aliqua experiri, ut *L. 1. ff. Ex quib. caus. major.*, *Leg. 1. ff. Quand. de pec. act. annal. cit.* vel jus experiri, ut in *Leg. 1. ff. de Divers. et temp. praescript.*, et in *L. 1. ff. Quae in fraud. credit*, hoc est rem tentare, et sui juris periculum facere.

(2) *Consule Duarenum lib. 1. disp. cap. 1.* Adversus eos, qui in jus venire recusarent, vim adhiberi, et iuvitos injecta manu, obtortoque collo in jus rapi consuevisse certum est, idque late ostendunt Goveanus 1. *Var. lect. ult.*, Raevardus ad *LL. 12. Tabular. cap. 5. et ad L. 108. de Divers. regul. jur. opp. tom. 1. p. 7. et 167. ed. Neap. 1779.*, Cajacius *Observ. lib. 10. cap. 10. opp. tom. 3. col. 240. et seq. edit. Venet. 1758.*, Heineccius *Antiquit. lib. 4. tit. 6. §. 14. et seq. opp. t. 5. p. 429. et seq. ed. Neap. 1769.*, alique complures.

(3) Ulpiani, et Pauli aetate jam illum obtinuisse morem, ut nemo sine magistratus auctoritate in jus vocaretur, ostendit Donellus *de Jur. civil. lib. 23. cap. 1. §. 6. opp. tom. 6. col. 34. et seq. ed. Lucae.* Vide etiam Hilligerum in *Notis ad eundem Donellum loc. cit.*

§. IX. Nunc ipsa libelli oblatio in jus vocatio dici potest; sed quoniam libellus aptus non est ad inducendam litis contestationem, ac tantum continet actoris petitionem, non item probationes, quibus eadem petitio nititur: hae sunt in actis post oblatum libellum exhibendae probationes, quibus exhibitis reus in iudicium vocatur, ut respondere possit, atque ita litis contestatio inducatur. Id vero fit per citationem, quae judicialis est actus, per quem reus, actore rogante, iudicis auctoritate litis peragendae causa in iudicium vocatur. Proprie haec citatio in jus vocatio est, et utraque saepe confunditur; quamquam citatio latius pateat, quippe quae in qualibet iudicii parte adhibetur, quoniam singuli iudicarii nunciantur; verum in jus vocatio tantum pertinet ad primam citationem, unde iudicium exorditur (1). Sed veteri jure Romano in jus vocatio, et citatio differebant; quoniam, illa privata auctoritate, haec vero mandato iudicis per praeco-

nem, et interdum etiam per edictum fiebat; nec tantum reus, verum etiam actor, patroni, et testes in iudicium citabantur.

(1) Confer Vinnium *Commentar. ad Inst. lib. 4. tit. 16. §. 3. n. 5.*

§. X. Omnia iudicia a citatione inchoanda sunt, neque, ea omissa, nulla iudicii vis, et auctoritas est (1). Vetat enim non civilis modo, sed etiam naturalis juris ratio, damnari aliquem, qui auditus, ac defensus non sit. Hinc defectum citationis *insanabilem* pragmatici appellant, quoniam sanari non potest iudicium, quod sine citatione gestum est (2).

(1) *Can. 2. et 4. cap. 3. quaest. 9. Clem. 2. de Senten. et re judic.*

(2) Confer Hilligerum *ad Donellum de Jur. civil. lib. 23. cap. 2 §. 2. not. tom. 6. p. 11. ed. cit.*

§. XI. Est autem citatio vel realis, quae fit injectis in reum publica auctoritate manibus, vel verbalis, quae procedit ab imperio iudicis, cujus jussu, verbis vel literis quis in iudicium vocatur. In civilibus iudiciis verbali citatione plerumque utimur; nam in iis citatio realis ante sententiam non emittitur, nisi reus sit fugitivus aut de fuga suspectus, et nisi primum res cognita, et explorata sit.

§. XII. Verbalis citatio alia simplex, alia peremptoria est. Simplex continet merum praeceptum, ut reus in iudicium veniat; sed ipse contumax non efficitur, nisi eadem citatio post tres terminos certis dierum intervallis praefinitos tertio repetatur (1). Quae intervalla jure veteri decem dies singula con-

linebant (2), jure Novellarum ampliata sunt ad dies triginta (3); sed jure decretalium arbitrio judicis pro temporum, ac locorum ratione statuuntur (4). Peremptoria citatio instar est omnium simul simplicium, atque ita rem perimit, ut si reus praestituta die in judicium non venerit, contumax habeatur. Nam peremptorium praecidit, et abscindit omnes adversarii tergiversationes, eoque comminatur judex, sese causam cogniturum, etiam absente illo, qui citatus sese judici sistere recusat (5). Edictum peremptorium jure civili emittitur post tres simplices citationes, interdum post duas, interdum etiam statim, quod vocatur *unum pro omnibus*; pendetque ab arbitrio judicis pro conditione causae, vel personae, vel temporis, ordinem edictorum (6), et compendium moderari (7).

(1) Trium tantum edictorum mentio est in *Leg. 53. ff. de Re Judic.*, et apud Paulum *Recept. sen'en. lib. 5. tit. 5. num. 7*, ac trium item denunciationum, aut litterarum in *Leg. 8. Cod. Quomod. et quand. judex senten.* Quare mirum est, Ulpianum in *Leg. 70. ff. de Judic.* tradere post tertium demum edictum peremptorium emitti. Gerardus Noodtius *Observat. lib. 1. cap. 8.*, ita illum Ulpiani locum legendum putat: *quibus propositis, et tertium tunc peremptorium impetret.* Ego ejus in sententiam facile descendo, neque de ea dimoveor illis ejusdem Ulpiani verbis, quibus dimotus est Antonius Schellingius in *Paulum recept. senten. lib. 5. tit. 5. not. 32. Jurispr. vet. ante-Justinian. p. 450. ed. Lipsiae 1737.* Sunt autem verba Ulpiani in *Leg. 72. ff. de Judic.* omnino haec: *Nonnumquam hoc edictum post tot numero edicta quae praecesserint, datur, nonnumquam post unum vel alterum; nonnumquam statim, quod appellatur unum pro omnibus.* Hinc quidem Ulpianus etiam post tria edicta denique peremptorium dari statuit, sed loquitur non de ordinaria et usitata edictorum methodo, quae tribus tantum edictis constat, et quam respicit *Leg. 70*; ve-

rum agit de arbitrio iudicis, quod extra ordinem est. Nam, ut ipse inquit Ulpianus, totum hoc negotium aestimare oportet eum, qui jus dixit, et pro conditione causae, vel personae, vel temporis ita ordinem edictorum, et compendium moderari. Hinc iudici pro suo arbitrio licet tria dare edicta, antequam peremptorium emittat. Itaque Ulpianus in *Leg. 70. ordinariæ*, et usitatam constituit edictorum methodum; in *Leg. 72. exceptionem* ponit, ut iudex possit hanc methodum omittere, ac non tertio, sed quarto loco peremptorium dare.

(2) *Leg. 69 ff. de Judic.*

(3) *Novell. 112. cap. 3.*

(4) *Cap. 7 de Dol. et contumac.*, *Clem. 1. de Judic.* Quae de tribus edictis, aut de uno pro omnibus dato a jure civili sancita sunt, eadem videtur constituisse Innocentius III. in *Cap. 24. de Offic. et potest. delegat.* Sed et ante Innocentium III. Parisiense Concilium apud Gratianum *Can. 6. cap. 24. quaest. 3.* Romanam legem de tribus edictis, aut uno pro tribus approbavit.

(5) *Leg. 70. et 75. ff. de Jud.*, *Cap. 6. de Dol. et contumac.*

(6) Edicta haec interdum etiam *contestationes*, ab Aniano autem in *Paul. Recep. senten. lib. 5. tit. 5 § 7.* apud Schultingium *Jurispr. vet. Ante-justinian. p. 450. ed Lipsiae 1747.*, et in *Can. 6. cap. 24. quaest. 3.* *Auctoritates* appellantur. Proprie a Latinis *denunciationes* dicuntur, sed corruptae Latinitatis scriptores *Auctoritates* vocant. Multa ejus rei exempla sunt apud Dugangium *Glossar. Med. et infim. Latinis.*

(7) *Leg. 72. ff. de Jud.*

§. XIII. Citatio reo significanda, et demonstranda est, idque apparitoris, sive publici nuntii opera fieri solet. Significantur autem vel denunciatione, vel literis, vel edictis (1). Denunciationes per officia, et exequutores fiunt, literae ad reum mittuntur, edicta publico loco affiguntur, unde recte legi possint (2). Nuncius reo denunciare decretum citationis debet vel in faciem, vel ad domum (3),

et praesenti quidem in faciem, absentem ad domum, si rei copia haberi possit, in faciem, si non possit ad domum in qua reus habitat (4), et si plures domos habuerit, ubi frequentius commoratur, aut commorari debet. Quod si reus absit, neque resciri possit, in quo loco versetur, edicto publico loco affixo evocandus est, ut ita reus absens per propinquos, aut amicos, quibus edictum patet, admo-
neatur (5).

(1) Tria haec discriminat Paulus *Recept. senten. lib. 5. tit. 5. §. 7.*, apud Schultingiam *loc. cit. p. 450.*

(2) Consule Cajacium in illum Pauli *loc. cit. 32.*

(3) *Leg. 13. §. 1. de Excusat. tut.* Vide etiam Cajacium *Observ. lib. 7. cap. 15. opp. tom. 3. col. 161. et 162. ed. Venet. seu Mutin. 1758.*, ubi multa habes de denunciatione ad domum.

(4) Argum. *Leg. 1. §. 1. ff. de Agnoscen. et alien. liber.* Idem etiam non obscure tradit Alexander III. in *Cap. 3. de Dol. et contumac.*

(5) *Extravag. unic. de Dol. et contumac. int. commun., Clem. 1. de Judic.*

§. XIV. Et quoniam in alieno territorio jus dicenti impune non paretur (1): adversus eum, qui in alieno territorio versatur, citatio expediri non potest, nisi ab ejus loci magistratu venia petita, atque impetrata sit. Facta vero citatione, nuncius id in acta referre debet, et vero expressis omnibus, quae scire opus est, nimirum die, loco, modo factae citationis, ceteris adjunctis, atque ejus relationi creditur propter fidem publicam, qua munitus est.

(1) *L. ult. ff. de Jurisd. omn. judic.*

§. XV. Ut citatio rite et recte fiat, multa sunt

observanda. Principio scilicet exprimendum est nomen actoris, quo instante citatio emittitur, quia tantum in causis publicis iudex ex officio procedit (1); itemque nomen rei ne quis in ancipiti persona decipiat. Deinde continere debet nomen iudicis, cujus mandato citatio emittitur, tum quod jure novo sine mandato iudicis nemo in jus vocari potest, tum quod citatus scire debet, num proprius, et competens iudex sit, ad quem vocatur. Et quoniam delegatus iudex alienam jurisdictionem exercet, citationis decreto inserendum est exemplum literarum, quibus ei causa commissa est (2): nam secus ejus jurisdictio reo comperta, et explorata esse non potest. Si manifestum sit, iudicem non esse competentem, reus ad eum ire non cogitur; si id manifesto non constet, reus omnino cogitur sistere se iudici, cujus est aestimare, num sua sit jurisdictio (3).

(1) *Cap. 9 de Accusat.*

(2) *Cap. 2. de Dilat.* Quod forte primum jure canonico expresse constitutum videtur, sed tamen alienum non est a juris Romani sententia *Leg. 5. unic. Cod. de Mandat. Princ. Leg. 5. Cod. de Jur. fisc. lib. 10.*

(3) *Leg. 2. ff. Si quis in jus vocat. non ierit, Leg. 5. ff. de Judic.*

§. XVI. Exprimenda etiam est causa, propter quam reus vocatur, ut is negotium meditetursum, et paratus ad iudicium veniat, posteaquam re cognita sese contra actorem tueri constituit. Veteri jure Romano actor postulatam impetratamque a Praetore actionem edebat reo, cum in iudicium venerat, atque ita ipse vocationis causam noscebat (1). Sed antiquo vocationis ritu sublato, sancitum est a Justiniano (2), ut in ipsa vocatione libellus con-

ventionalis reo tradatur ; atque ita in unum judicalem actum in jus vocatio, et actionis editio coalluerunt. Decretales de exprimenda vocationis causa, reoque simul offerendo libello non admodum laborant ; sed jam fere ubique gentium moribus, usque fori receptum est ut decreto ipso citationis causa significetur, vel simul reo libellus offeratur.

(1) Pluribus sane modis id fieri potuisse scribit Ulpianus in *Leg. 1 ff. de Eden.* Confer Heineccium *Ausquit. lib. 4. tit. 6. §. 19. opp. tom. 3. p. 432. ed. Neap. 1766.*, Raevardum *lib. Protribunal. cap. 4. opp. tom. 2. p. 200. ed. Neap. cit.*, Cujacium in *Cod. lib. 2. tit. 1. opp. tom. 10. col. 828. ed. Mutin. 1782.*, Donnellum in *Cod. l. 2. tit. 1. opp. t. 7. col. 21 et seq. ed. Lucae cit.* ceteros interpretes ad titulum de edendo.

(2) *Novell. 53. cap. 4.*

§. XVII. Praeterea designandus est iudicii locus, ut reus noscat, quo ipse venire, et se iudici sistere praesentem debeat, et simul intelligat, num locus ille tutus sit. Praesertim vero si delegatus sit iudex, certum in citatoriis literis indicare locum omnino necesse est; quoniam illi nullus est huiusmodi locus, ad quem reus certo venire possit. Si ordinarius est iudex, qui certo loco tribunal habet, nihil attinet hunc locum exprimere, nisi ipse velit alio loco jus reddere, quam quo reddere consuevit (1). Sed et tutus debet esse locus, in quo iudicium est agendum, et per quem necessario transitus faciendus est reo (2); adeo ut si manifestum sit, locum tutum non esse, nulla sit citatio ipso jure (3); si non ita sit manifestum, valeat quidem citatio, sed reus demonstrare debeat, eum sibi locum tutum non esse (4).

(1) *Leg. 59. ff. de Judic.*

(2) *Clem. 2. de Sentent. et re judic., Cap. 4. Ut lit. non contest., in quod vide Gonzalezium.*

(3) *Cit. Clem. 2.*

(4) *Cap. 7. §. 3. Sentent. excom. in 6.* At enim reus per procuratorem respondere potest, cum tutus non est iudicii locus. Et hoc sane verum; sed reo justa excusatio ob hanc eandem causam est, quod per se ipsum respondere non potest.

§. XVIII. Certus quoque dies, quo reus in ejus venire debet, in citatione notandus est, ut ipse intelligat, num die, quo vocatus fuit, exercere iudicium liceat. Qui dies arbitrio boni viri a iudice constituitur, habita ratione temporum, locorum, personarum. Nam iniquum esset reum vocare ad id tempus, quo ipse sui copiam facere vel omnino non potest, vel saltem cum magno incommodo potest.

§. XIX. Plura efficit citatio, quae rite, et recte facta sit. Nimirum facit, ut reus ad eum iudicem, ad quem primum vocatus est, venire debeat, quamquam reus deinceps alteri iudici subesse coeperit (1); rumpit praescriptionem (2); perpetuat iudicis delegati jurisdictionem, adeo ut ea delegantis obitu non extinguatur (3); litis pendentiam inducit, si tamen in citatione illa sint expressa, ex quibus reus noscat omnia, quorum causa in jus vocatur (4). Pendet autem lis post citationem quoad hoc, ut nihil debeat innovari (5); nam alias nonnisi post contestationem lis pendet (6). Ex quo efficitur, ut post citationem, unde reus causae certior fit, res litigiosa evadat (7); ideoque alienari non possit (8).

(1) *L. de Judic., Cap. 19. de For. competen.*

(2) *L. ult. Cod. de Annal. except. , L. 7. Cod. de Praescript. 50. annor.*

(3) *Cap. 20. de Offic. et potest. delegat.*

(4) *Clem. 2. Ut lit. penden. Id vero constitutum est ex sententia juris civilis in Auth. litigiosa Cod. de litigios.*

(5) *Cit. Clem. 2.*

(6) *Cap. 39. Verb. signific. , ibique Gonzalez , in cap. unic. de Lit. contest.*

(7) *Clem. et Auth. mox laudatae.*

(8) *L. 18. ff. de Rei vindic. , Can. ult. cap. 11. qu. 1. , cap. 3. Ut lit. penden.*

TITULUS VI.

DE DOLO ET CONTUMACIA.

I. Quis contumax.

II. Poena propter contumaciam actoris.

III. et IV. Missio in possessionem propter rei con-

tumaciam.

V. Aliae poenae in ream contumacem.

VI. Sequestratio rei litigiosae.

§. I.

Ne dolo, et contumacia litigantium inutile evadat iudicium, poenae indictae sunt adversus eum qui in jus vocatus non venerit. Dolum malum vocamus omnem calliditatem, fallaciam, machinationem ad circumveniendum, fallendum, decipiendum alterum adhibitam (1). Hoc loco dolus est fraudulentum consilium litigantis, qui contumax est (2), et iudicium detrectat. Contumax autem dicitur, qui iudicis mandato non obtemperat, hoc est qui tribus edictis, vel uno peremptorio evocatus sui copiam non fecit, eum

nullo justo impedimento detineretur (3); vel cum venit, judici parere recusavit (4); vel impedit, quominus ad reum citatio perveniat (5); vel sine iudicis venia susceptum iudicium deseruit (6).

(1) Ita dolum malum definit Labeo apud Ulpianum *Leg. 1. §. 2. ff. de Dol.*, et contumac in qua quidem definitione nihil ociosum esse demonstrat Huberus *l. 3. observ. 25.*

(2) Contumax a Graecis αὐθαδὴς, περὶκαξ, et superbus, dicitur qui alios ita contemnit, ut eorum consortium fugiat; ideo etiam Constitutio Graeca περὶκαξ fugientem vocat, in *L. 10. Cod. de Judic.*

(3) *Leg. 53. ff. de Re judic.* Idque etiam tradit Paulus *Recept. senten. lib. 5. tit. 5. §. 7.*, apud Schultingium *loc. cit. p. 450.* Demonstrare autem ex circumstantiis intelligit, justa ne sit excusatio, an secus *cap. 6. de Dol.*, et *contumac.* Saepe etiam a iudice constituitur terminus, intra quem citatus venire in iudicium debet, eoque non veniente, et elapso termino contumax habetur. Verum, antequam Iudex de contumacia decernat, adhuc ipse moram pargere potest, ut iudex ex aequo, et bono ultra terminum condemnationem differre queat, *cit. cap. 6.*

(4) *Leg. un. ff. Si quis jus. dicen. non obtemper.*

(5) *Cap. 5. §. 1. Ut lit. non contest.*

(6) *Cap. 3. de Dol. et contumac.*

§. II. Tam actor, quam reus contumax esse potest (1); neutrum verum sinunt leges judici jubentur impune non obtemperare. Actor si constituto tempore, quo reus citatus est, in iudicium non venerit, in expensas condemnatur, neque alia ei citatio permittitur, nisi de se iudici sistendo cautionem praestet (2). Qui etiam non veniente in iudicium actore, reus illud a iudice petere, et rogare potest, ut sibi detur probationum afferendarum locus, ac sententia

proferatur (3). Verum contestata lite (4) si actor contumax evaserit, ejus procurator, si quem reliquerit, vocandus est, aut si nullum reliquerit, vel relictus in jus non venerit, ipse absens per edictum ejus domui affixum vocatur, et inde contra eum fertur sententia, cum res satis est comperta, aut saltem, actore in expensas condemnato, ab observatione judicii reus absolvitur (5).

(1) Hinc ea pars, quae in Decretalium libris inscribitur *de Dolo, et contumacia*, in antiquis collectionibus inscribitur *de Dolo, et contumacia alterius partis puniendi*, ubi contumacia alterius partis actoris, vel rei contumacia est.

(2) *Cap. 1. de Dol. et contumac. in 6.*

(3) *Cap. 3. de Dol., et contumac.*

(4) Juris interpretes discrimen constituunt inter actorem, qui ante contestatam litem, interque actorem, qui post contestatam litem contumax est. Nituntur Novell. 112. cap. 3. §. 1. et 2, ubi de actore agitur, qui actione proposita abesse coepit, cum *apud judicem iurium lis non acceperat*, hoc est cum nondum erat contestata, et vero si postea, contumax fieri dicitur. Vulgarem hanc distinctionem ridet Gonzalesius in cap. 3. de *Dol. et contumac.* hoc fretus argumento, quod cum reus ab actore vocatus in iudicium venit, lis contestata intelligitur, quoniam canonico saltem jure actoris, ac rei praesentia non requiritur, ut lis contestata habeatur; et ideo fieri non potest, quod actor non contestata lite contumax evadat. Illam autem novellam, cujus nunc facta mentio est, ita interpretatur Gonzalesius, ex parte tantum actoris, non etiam ex parte rei, litem contestatam fuisse, cum actor abesse coepit, quae imperfecta quaedam contestatio est; tum in jus veniente, et actoris petitioni respondente reo, cum ipse actor abesset, contestationem fuisse perfectam. Sed nego fieri non posse quod actor, veniente in iudicium reo, ante contestatam litem contumax sit. Nam aliud est vadimonii, et alia litis contestatae desertio. Actor certa die reum in iudicium vocat, venit quidem reus, non item actor; hic

quidem deserere vadimonium dicitur, non litem contestatam. Nam desertio vadimonii est desertio promissionis iudicio sistendi causae factae ante litem contestatam *L. 4. §. 1. ff. Si quis caut.* Contra litem contestatae desertio est desertio ipsius iudicii, quod jam contestatione litis, hoc est clara actoris petitione, aptaque rei responsione constitutum, firmatumque est. Quae litem contestatae desertio eremodicium dicitur, quod et actore, et reo absente contrahitur *Leg. 10. §. Sin autem reus Cod. de Judic.* En igitur duplicem actoris contumaciam ob desertum vadimonium, et ob desertam litem contestatam, et utrique huic contumaciae dissimilis poena constituta est.

(5) *Cap. 3. de Dol. et contumac., Leg. 10. de Judic.*

§. III. Quod si absit per contumaciam reus, videndum est, num id ante, an post litem contestatam faciat. Lite nondum contestata, in actione reali actor mittitur in possessionem rerum, de quibus controversia est; in actione personali mittitur pro modo, et ratione debiti, vel possessionem bonorum mobilium ipsius rei in immobilium, cum nulla mobilia sunt. Quae possessio datur ex primo, et secundo decreto. Primi decreti possessio tantum custodia est (1), quoniam ea conceditur rei servandae, et custodiendae causa, atque actor non dominus, sed tantum custos efficitur. Quare et actor, et reus possident, hic quidem ut fundum colat, fructusque colligat; ille autem ut fundum, et fructus, sive fructuum pretium observet, atque custodiat (2).

(1) Ita Innocentius III. in *Cap. ult. §. In aliis vero casibus Ut lit. non contest.* controversiam definivit quae inter Pilaenum, et Bulgarum ex una, interque Joannem Martenium, et Azonem ex parte altera agebatur, probavitque sententiam Pflaei, ac Bulgari, qui sola missione in possessionem actorem tantum rei custodem, non

dominum et possessorem fieri putabant; quae sententia probabilior est ex jure civili *Leg. 8. §. Sed et quis, Cod. de Praescript. 30. an.*

(2) *Cap. 4. de Eo qui mittit. in possess., cap. ult. §. In aliis sunt. Ut lit. non contest.*

§. IV. Hanc vero possessionem actor adipisci censetur, quantumvis eam potentia, doloque adversarii revera non acquisiverit, aut acquisitam amiserit (1); haud tamen si actor ipse nulla justa causa impeditus eam intra annum obtinere neglexit (2). Intra anni spatium si reus in judicium non veniat, solvatque expensas, ac praeterea cautionem non praestet de se judici sistendo, emittitur secundum decretum, cujus ea vis est ut reus contumax de bonorum possessione dimoveatur, fiatque actor unus, et verus eorum possessor, fructus colligat, suosque faciat (3).

(1) *Cap. 9. de Dol. et contumac.*

(2) *Cap. 2. de Eo qui mittit. in possess.*

(3) Secundum decretum in actione tantum personali, non item in reali, in qua actor post annum jure possessor efficitur, necessarium esse putat Glossa in *cap. 9. verb. Constituatur de Dol. et contumac.*, atque haec vulgus interpretum sententiam sequitur. Confer tamen Cujacium in *cap. ult. Ut lit. non contest. et ad tit. de Eo qui mitt. in possess. opp. tom. 6. col. 729., et col. 728. ed. Mutin. cit.*, et Cironium *Paratitl. in decret. lib. 2. tit. 15.*

§ V. Verum si post contestatam litem reus contumax evadat, causaque ex actis satis explorata videatur, judex sententia sua litem definit; si non satis de causa liqueat, actor in bonorum contumacis rei possessionem mittitur, fitque ipse statim verus possessor, ac reo sola domini lis integra relin-

quitur (1). Sed in causis beneficiariis propter rei contumaciam actor in possessionem non mittitur, ne ultior in beneficia ingressus detur (2).

(1) *Cap. 5. §. In aliis Ut lit. non contest. , cap. 4. de Dol. et contumac.*

(2) *Cap. un. de Eo qui mittit. in poss. in 6.*

§. VI. Sunt et aliae poenae adversus contumaces constitutae, quarum unam, aut alteram, utriusque ratio postulare videtur, infligit iudex suo arbitratu, interdum enim pecuniaria mulcta aut censuris, certisve poenis contumaces coercentur (1). Ex quibus poenis unam, aut alteram, quae plus metus afferat, initio seligat iudex, ad alias nihilominus processurus, si contumax, sua adhuc obstinatione sententiae, pergat iudici non obtemperare (2). Verum censuris caute, atque sobrie iudices uti debent, neque sunt adhibendae, nisi cum contumaces re, aut persona coerceri non possunt (3).

(1) *Leg. 2. ff. Si quis in jus vocat. , cap. 2. 5. 8. de Dol. et contumac. , cap. 4. Ut lit. non contest.*

(2) *Cap. 5 §. In aliis Ut lit. non contest.*

(3) *Conc. Trident. Sess. 25. cap. 3 de Reform.*

§. VII. Saepe etiam actor non mittitur in possessionem rei servandae causa, neque ea penes reum contumacem relinquitur, sed penes tertium deponitur, et committitur alicui, qui finita lite rem, et fructus victori restituat (1) Quae dicitur sequestratio rei litigiosae, quam iudex ex justa causa decernit, puta si metus sit, ne res vel fructus dilapidentur (2). Si maritus ad inopiam vergat, dos sequestro datur (3):

similiter, si persona, a qua res mobilis petitur, suspecta sit (4), si de beneficio ecclesiastico agatur contra possessorem, non triennalem, et contra ipsum in possessorio, vel petitorio sit lata sententia, sequestrum constituitur (5). Sed generatim sequestrum revocatur, cum reus in iudicium veniens expensas restituit, et cautionem praestat, per quam omne, quod timetur, periculum removeatur (6).

(1) Tertius hic, apud quem res litigiosa deponitur, *sequester* dicitur *Leg. 5. §. 1. et 2., Leg. 6. et 7. ff. Deposit.* Eodem hoc sensu vocabulum usurpat *Plantas in Mercat. act. 4. sc. 3. vers. 36. et in Ruden. act. 4. scen. 3. vers. 79. tom. 2. pag. 748 et 1016 ed. Lugd. Batav. 1669.* Sequestrum autem a sequendo dictum quod ejus, qui electus est, utraque pars fidem sequatur, scribit *A. Gellius Noct. Attit. lib. 20. cap. 1. p. 1128. ed. Lugd. Batav. 1166.* In Glossis *Philoxeni* sequester explicatur *μεσιτης εντριλος συντηχοφυγας*: similiter in Glossis *Cyrylli μεσιτης* sequester, arbitrator, mediator. *Quintiliano Institut. Orator lib. 12. cap. 8. tom. 2. p. 673. ed. Patav. 1736.* sequester est media litium manus; *Tullius* autem, qui pluries utitur eodem vocabulo, sequestrum appellat, apud quem pecuniam corrumperendi iudicii, aut tribuam causa deponebatur, ut suffragia obtinerentur.

(2) *Leg. 71. de appellat., cap. 5. de Sequestrat. possess. et fruct.*

(3) *Leg. 13. §. Si autem ff. Solut. matrim.*

(4) *Leg. 7. §. ult. ff. Qui satisd. cogant.*

(5) *Clem. 1. de Sequestr. posses. si fruct.* Confer Glossam in *cap. 2. ver. Sequestr. posses. et fruct.* ubi diligenter explicatur, quando sequestrationi locus esse debeat.

(6) *Cap. 1. de Sequestr. posses. et fruct.* Quoniam vero sequestrum facta mentio est, animadvertere oportet, illud non tantum in res, sed saepe etiam in ipsas perso-

nas cadere. Ita sequestri loco uxores collocantur apud probam, et honestam mulierem ob insignem mariti saevitiam, quae impedit, quominus uxor, quae a marito divertit, ei restituatur *c. 8. et 13. de Restit. spol.* Similiter cum de sponsalibus agitur, atque metuitur, ne vis puellae inferatur, atque impediatur, quominus ea liberum edere consensum possit, eadem puella collocanda est in domo, in qua nihil eam timere oporteat, donec de praecipua causa iudicium absolutum fuerit *cap. 14. de Sponsal.* Jus Pontificium hujus sequestri locum potissimum constituit monasterium *c. 14. de Probat.*, quod et ipse Bohemerus homo ex protestantium numero summopere laudat *lib. 2. Decretal. tit. 17. §. 5.*, cum vix tutior, et commodior locus inveniri possit.

TITULUS VII.

DE LITIS CONTESTATIONE.

- | | |
|------------------------------|------------------------------------|
| I. Litis contestatio quid? | IV. Effectus litis contestationis. |
| II. Quomodo fiat? | |
| III. Ea iudicii initium est. | |

§. I.

Lite per libellum actoris, et citationem praeparata, ejus fundamentum jacitur, quod in contestatione positum est. Litis contestatio legitimus est actus, quo actor coram iudice proponit petitionem suam, reus autem negat, se cessurum petitioni, iudicium, et litem in se recipiens (1): Ex quo patet, necessariam esse contradictionem ad litem contestandam, quia nulla lis est, cum reus affirmat id, quod ab actore proponitur (2). Num jure civili ad contestan-

dam litem actoris , et rei praesentia , ac voce sit opus , incertum , controversumque est ; jus canonicum tantum requirit *petitionem in jure propositam, et responsionem sequutam*, praeterea nihil (3).

(:) *Cap. un. de lit. contest.*

(2) Quare probari non potest , quae multis probata est , divisio contestationis litis in negativam , et affirmativam , uti ostendit Joannes Voetus in *Pandect. lib. 5. tit. 1. num. 146.* Confer etiam Vinnium *Select. quaest. lib. 1. capit. 7.*

(3) Videndus Gonzalez in *cap. un. num. 8. de Lit. contest.*

§. II. Antiquo jure Romanorum lis contestata dicebatur, cum apud Praetorem per mutuam actoris, reique narrationem controversiae statu constituto, datoque judice, litigantes judicium suscipiebant, ac testes, qui rei totius fidem facerent, vocabant his verbis : *testes estote* (1). Inde litis contestatio dicta est, quia scilicet testibus adhibitis res tota declarabatur (2). Jure novo quamquam testes non adhibeantur, tamen retentum est vocabulum contestationis ad designandum concertationem verborum inter litigantes, quorum alter petit, alter petitioni adversatur. Non enim simplex actoris petitio litis contestatio est; sed eam facit conflictus ille litigantium, qua reus adversus propositam actionem coram judice profert exceptionem suam, per quam contraria actio vel certo tempore, vel perpetuo depellitur (3).

(1) Consule Festum v. *Contestari*, quem Festi locum exornant Defensiones pro Salmasio *Obs. ad jus Aetic. p. 818. ed. Lugd. Batav. 1645.*, et Cujacius *Observ. lib. 9. cap. 21. opp. tom. 3. col. 214. edit. c17.*

(2) Veterem contestationis formam vel ante sublata formularum solemnia desisse ex *Leg. unic. de lit. contest.* ostendit Vinnius *Select. qu. lib. 1. cap. 17.*

(3) *Leg. 1. Cod. de lit. contest. Leg. rem. §. Patrum Cod. de judic. cap. 54. §. Partibus de elect.*

§. III. Contestatio igitur initium est iudicii, ut in *Jus* vocatio initium actionis (1); illaque intra viginti post oblatum libellum dies ab actore fieri debet. Ante hanc contestationem totum negotium, quod agitur, non lis, aut iudicium, sed controversia censetur (2). Quare ut litis initium sit constitutum, omnino requiritur ejus contestatio, neque ante eam emitti sententia (3), aut recipi testes, vel alia probatio admitti potest, nisi aut natura causae (4), aut periculum amittendarum probationum aliud exigat; quia tunc locus est *examine testium ad perpetuam rei memoriam* (5). Interim poenae causa alterutrius litigantis contumacia contestationis loco habetur, quae etiam ficta litis contestatio dicitur (6); neque expressa, et sollemnis contestatio requiritur in causis quibusdam, quales sunt summariae causae appellationis, quae contra certam personam institutae non sunt, quae item sine libello expediuntur (7).

(1) *Leg. 15. ff. Rem ratam haberi §. ult. Instit. de Pom. temer. litigant.*

(2) *Leg. 28. §. Si ante ff. de Petit. haered.*

(3) *Leg. 4., ibique Glossa, c. Solitum Cod. de Senten. de interloq.*

(4) Consule *cap. 20. de Jurejur., cap. 4. de Procurat., cap. 5. Ut lit. non contest.*

(5) *Cap. 5. cit. Ut lit. non contest., cap. 4. de Confess. util. vel inutil.* Edita ea de re est an. 1776. Heidelbergae dissertatio, cui titulus est: *de Examine test. ad perpetuam rei memoriam.*

- (6) Confer Voetum *ad Pandect. l. 5. tit. 1. n. 145.*
 (7) Consule Voetum *l. c. n. 147.*

§. IV. Plura efficit litis contestatio. Nimirum inducit malam fidem (1); quasi contractum perficit inter litigantes, ita ut neuter possit, altero invito, a judicio discedere, sed uterque debeat praestare id, quod judicabitur (2); rem in judicium deductam litigiosam facit, ita ut alienari non possit (3); perpetuat, atque ad haeredes transmittit actiones tempore, vel morte perituras (4); mandatam jurisdictionem perpetuam facit (5); exceptiones dilatorias excludit, ac judicis recusandi potestatem adimit (6), nisi postea causa suspicionis emergerit; inchoatam usucapionem, et praescriptionem interrumpit (7).

(1) *Leg. 4. ff. Fin. regund., Leg. 1. Cod. de Petit. haered. Leg. 22. Cod. de Rei vindic., Leg. 10. Cod. de Acquir. et retinen. possess.* Sed ante litem contestatam etiam motam controversiam ad inducendam malam fidem satis esse, scriptum est, in *Leg. 4. §. Si ante litem ff. de Petit. haered.*

(2) *Leg. 3. §. Idem scribit ff. de Pecul.*

(3) *Auth. Litigiosa Cod. de Litigios. Leg. 4. Cod. eod., cap. 3. et 4. Ut lit. penden.*

(4) *Leg. 6. §. ult. de Re judic., Leg. ult. ff. de Fidejus. et nominat. et haered. tut. Leg. 57. ff. de Action. et obligat., Leg. 88. ff. de Regul. jur., Leg. unic. Cod. Ex delict. defunct. in quantum haered. ten., §. 2. Inst. de Perpet. et tempor. act.*

(5) *Cap. 19. de Offic. delegat.*

(6) *Leg. ult. Cod. de Except.*

(7) *Leg. 10. Cod. de Praescript. longi tempor.* Verum sola conventionem, etiam ante litem contestatam, praescriptionem rumpi sancitum est *Leg. ult. Cod. ed Annal. except., Leg. 1. et 2. Cod. de Praescript. long. tempor., Leg. 3. 4. 7. Cod. de Praescript. 30. vel 40. annor.*

TITULUS VIII.

DE JURAMENTO CALUMNIAE.

- I. Juramentum calumniae sis dandum est.
 quid ? III. Num et clerici jurent.
 II. Petitum in omnibus cau. IV. Juramentum militiae.

§. I.

Lite contestata, ut a calumnia, atque insidiis tu-
 ta sint omnia, visum est religione adstringere liti-
 gantium fidem, ut omnes divinae ultionis metu ab
 injusta, et fraudulenta vexatione deterreantur. Ea de
 causa introductum est juramentum calumniae (1),
 quod in judicio praestant tum actor, tum reus, tum
 etiam eorum procuratores cum speciali mandato ve-
 nientes (2), generatim omnes litigantes, sive suo,
 sive alieno nomine judicium exerceant (3). Actor
 juratus confirmat, nullam se adhibere calumniam,
 sed justam causam agere, reus vero, bona etiam
 sui juris opinione sese adversario resistere. Hinc u-
 terque pollicetur, sese vera in judicio dicturos, ni-
 hil acturos judicii corrumpendi causa, nullam alla-
 turos probationem aut fallacem, aut non necessa-
 riam, neque operam daturus, ut judicium calumnio-
 se differatur (4).

(1) Auctorem jurisjurandi propter calumniam ali-
 qui Justinianum faciunt, et moventur §. 1. *Instit. de*
Foen. temer. litigant., ubi Tribonianus illud inductum
 tradit constitutione Justiniani, quae extat in *Leg. 2.*

Cod. de Jurejur. propt. calumn. Sed revera illius origo antiquior est. Nam hoc jusjurandum memorant disertissime Paulus *Recept. sentent. lib. 2. tit. 1. §. 2.* apud Schultingium *Jurisprud. vet. Ante-Justinian. pag. 268. edition. Lip. cit.*, itemque ejus mentio est in *Leg. 45. §. Si familiae ff. Famil. ercisc.* (quam legem a Triboniano confictam esse, aut corruptam perperam quidam putant) in *Leg. 34. §. Qui jusjurandum, et leg. 37. ff. de Jurejur.* denique apud Senecam *Controv. lib. 3. cap. 10. pag. 257. tom. 3. edit. Amstelæd. 1672.* Sed ante Justinianum tantum speciale calumniae juramentum obtinebat, totiesque locum habebat, quoties pendente lite malitiae suspicio aderat, atque ita saepius repetebatur. Solus actor, et in certis tantum causis de calumnia jurabat, uti ostendunt Paulus *loc. cit.* et Ulpianus *Leg. 13. §. 3. ff. de Damn. infect.* Nam in plerisque nuda repromissione actor cavebat, se nisi vicisset, daturum reo decimam partem ejus, quod petebat, unde repromissionis remedium in Codice Hermogeniano *tit. de Calumniat.* apud Schultingium *loc. cit. pag. 713.* Atque haec erat vetus actio calumniae ex stipulatu, quae jam ante aetatem Justiniani desuenerat. Sed Justinianus in omnibus civilibus causis, et ab utroque litigante jusjurandum de calumnia emitti voluit, praeterea veteris calumniae actionis loco sarciri damnum, et expensas restitui jussit *§. 1. inst. de Poen. temer. litigant.* Sed postea *Novel. 112. c. 2.* decimariam illam actionem restituit, atque illud addidit, ut decimae cantio satisfactionem habeat. Confer Cujacium *Observ. lib. 7. cap. 5. opp. tom. 3. col. 156. edit. cit.* Jamvero cum constet, juramentum calumniae, quod initio speciale erat, a Justiniano factum fuisse generale, ita ut in primordio litis super universa causa a litigantibus emitti deberet, non ita exploratum est, num ipse Justinianus illud etiam speciale juramentum sustulerit. Nihil ipse ea de re constituit in *Leg. 2. Cod. de Jurejurand. propter calumn.* Sed id demum secisse videtur in *Novel. 49. cap. 3.*, ubi animadvertit, quod olim in uno negotio frequenter jusjurandum emitti solebat: *Sancimus itaque, inquit, hanc perimentes injuriam, et no-*

lentes crebro in eodem negotio jusjurandum praeberi . . . non crebro cogi quemquam sacramenta subire, generaliter semel hujusmodi sacramento prohibito. Quibus ex verbis colligi videtur posse, a Justiniano fuisse sublatum speciale calumniae juramentum; idque etiam videtur suadere Auth. Hoc sacramentum L. de jurejur. propt. calumn. ubi item generatim statuitur: Hoc sacramentum hodie remittitur, cum initio juretur, nihil se calumniose in toto negotio exigere. Inde tamen ortum est dubium, quod Justinianus loqui videatur de juramentis, quae olim ab iis emittebantur, qui probationes subire volebant; quod in Novel. 73 cap. 7. adhuc speciale juramentum calumniae desideretur ab eo, qui literarum comparationem postulavit. Quamvis autem a pluribus animadversum sit, in hac Novella contineri exceptionem, cujus ratio specialis in Novellae praefatione data est, ut eo magis coerceatur malitia, quae tunc frequens erat, eorum, qui documenta vitare solebant, nihilo tamen minus res nondum satis comperta, atque explorata fieri potuit. Sed omnem sustulit dubitationem Bonifacius VIII. in Cap. 2. de Juram. calumn. 6. ubi statuit, quod in omnibus causis solum ante, sed etiam postquam lis fuerit contestata, sive de veritate, sive de calumnia sit juratum in ipsis, potest iudex a partibus exigere juramentum malitiae, quoties viderit expedire.

(2) *Cap. 2. et ult. de Juram. calumn. in 6.*

(3) *Cap. 3. 4. 6. de Juram. calumn.*

(4) *Leg. ult. Cod. de Jurejur. propt. calum. Glossa in L. 1. de Juram. calumn.*

§. II. Datur hoc jusjurandum in omnibus causis (1), etiam spiritualibus, tam in prima, quam in secunda instantia (2). Si non petatur impune omittitur, neque propterea iudicium irritum est (3); verum pacto convento remitti non potest (4). At petitum omnino praestandum est, et si illud litigantes subire recusent, actor quidem causa cadet, reus vero pro confesso habebitur (5).

(1) In omnibus quidem causis jusjurandum propter calumniam dari voluit Justinianus in *Leg. 1. Cod. de jur. propt. calumn.*, sed tamen multi sunt interpretes juris civilis, qui in criminalibus causis illud locum habere negant. Consule Cujacium in *L. 1. de Juram. calumn. opp. tom. 6. col. 794. edit. cit.* Verum Honorius II. in *L. 1. de Juram. calum.* etiam ad causas criminales hoc jusjurandum videtur pertraxisse.

(2) *Cap. 1. et 2. de Juram. calumn. in 6.* De causis spiritualibus non eadem est sententia Honorii II. in *L. 2. de Juram. calumn.*, et Bonifacii VIII. in *L. 1. §. ult. eod. in 6.*, nam ille in causis spiritualibus juramentum calumniae emittendum negat, hic autem affirmat. Ut haec dissidia componerent, multi Juris interpretes otio, et tempore abusi sunt. Mihi certum, exploratumque est, Bonifacium VIII. jus antea constitutum abrogare voluisse. Inquit enim in *causis spiritualibus canones non indicare alicui calumniae juramentum*, se tamen, quia frequenter calumniari videbat in ipsis, juramenti necessitatem in his quoque causis imponere.

(3) Jure civili in *Leg. 1. §. 4. Cod. de Jurejur. propter. calumn.* hoc juramentum per judicem exigi necessitatis est: eoque omisso irritum esse judicium plerique interpretes docent. Sed Jure canonico, quo ubique utimur, in *L. 1. §. de Juram. calumn. in 6.* tacite omitti posse, eoque omisso valere judicium, statuit Bonifacius VIII., quae Baldi, et aliorum contra Azonem, Martinum, aliosque nonnullos sententia fuit.

(4) Confer Glossam in *L. 1. v. Tacite de Juram. calumn. in 6.*

(5) *Cap. ult. de Juram. calumn. Leg. ult. Cod. de Jurejur. propt. calumn.*

§. III. Clerici olim laicorum more in judicio jurare non poterant (1), sed nunc et ipsi jurant de calumnia, modo cum venia Summi Pontificis, si episcopi sint, cum venia autem proprii Antistitis,

si sint clerici inferiores, jusjurandum emittant (2). Hoc inter laicos, et clericos discrimen est; quod illi tactis, hi vero propositis Evangeliiis jurant (3).

(1) *Leg. 25. §. 1. Cod. de Episc. et Cleric.*, qua Marcianus antiquam Ecclesiae disciplinam confirmat: *ecclesiasticis, inquit, regulis, et canone a beatissimis Episcopis antiquitus instituto clerici jurare prohibentur.* Eadem haec disciplina est in *Can. 1. et 5. cap. 2. qu. 4., et can. pen. et ult. cap. 22. quæst. 5.*, eamque laudat Honorius II, in *can. 1. de Juram. calumn.* quo loco Marcianus mendose Marcus dicitur. Tum ipse Honorius describit constitutionem Henrici II. Imperatoris *libr. 2. Leg. Longobardor. tit. 47.*, qua Marciani constitutio, quæ solos comprehendebat clericos Ecclesiae Constantinopolitanae, ad omnes universe clericos, atque etiam monachos traducta est. At enim clerici jurant in *L. 5. 6. 7. de Juram. calum.* Cujacius *L. 1. de Juram. calumn. opp. tom. 6. col. 794.* referendum id putat ad procuratorem, adeo ut clerici, et Episcopi per procuratorem jurare possint, per semetipsos vero non possint, nisi Episcopi cum venia Summi Pontificis, clericus cum venia proprii antistitis jusjurandum emittat. Ita, si licet gentium leges cum Ecclesiastico jure componere, Romæ olim Flamini Diali, et Sacerdoti Vestali jurare fas non erat, quod et A. Gellius *Noct. Attic. lib. 10. cap. 15. pag. 534. ed. Lugd. Batav. 1666.* in edicto Praetoris perpetuo expressum fuisse testatur his verbis: *Sacerdotem Vestalem, et Flaminem dialem in omni mea jurisdictione jurare non cogam;* quod idem confirmasse Caligulam tradit Dio *lib. 59. num. 13. pag. 915. tom. 2. ed. Hamburgi 1752.* Sed hi tamen recte per alium jurabant; quod plebiscito comprobatum est apud Livium *lib. 32. cap. 50. tom. 4. pag. 593. edit. Drakenborch. Amstel. 1741.* Mihi haec Decretalium interpretatio minus placet. Nam in *cap. 7.* clericus tum per procuratorem, tum per semetipsum jurare cogitur; et in *cap. 5.* clerici jurementum calumniae praestare jubentur, *consuetudine, quæ legi contraria est,*

non obstante. Quod ad clericos per semetipsos jurantes arbitror pertinere. Equidem claram, et perspicuam puto causam, propter quam clerici, qui antea juramentum calumniae non praestabant in *L. 5. et 7.* jurare cogantur. Utraque haec decretalis recentior est decretali Honorii II. in *L. 1.*, per quam clerici jurant cum venia Summi Pontificis. Itaque Lucius III., et Gregorius IX. harum Decretalium auctores sese referunt ad jus novum ab Honorio II. constitutum; et licet neque Summi Pontificis, neque Praelati veniam expriment, quam nominatim postulat Honorius II., tamen hujus veniae necessitas in eorum quoque decretalibus tacite intelligenda est. Atque haec quidem pertinent ad jusjurandum, quod in judicio emittitur, et quod calumniae dicitur. Nam extra judicium et clerici ob gravem causam jurare solebant. Ita Episcopos, et clericos, ut se purgent, jurasse constat ex Anastasio Bibliothecario in *Pelag. tom. 3. pag. 292. edit. Romae 1728. et ex can. 10. 18. 19. cap. 2. qu. 5.*, similiter eos interdum jurasse, cum iusta urgeret causa, ostendunt Sozomenus *Hist. lib. 6. cap. 30. pag. 263. ed. Valesii Cantabrig. 1720.*, et Justinianus *Novell. 23 cap. 1., et Novel. 187. cap. 2.*; ac Patres Concilii Constantinopolitani Oecumenici VI. Gregorium Diaconum in singulis propositis quaestionibus jurare coegerunt.

(2) *Cap. 1. de Juram. calumn.*

(3) *Cap. ult. de Juram. calumn.* Clericos, ad instar laicorum, Evangelia, aut martyrum reliquias manu tangere canones vetuerunt. Presbyteri, et Episcopi vice juramenti per sanctam consecrationem interrogabantur *can. 4. cap. 2. quaest. 5.* Interdum etiam ante corpus alicujus Sancti tantummodo quaesiti respondebint, *cap. 8. et 9. ead. caus. et quaest.* Verum cum gravior aliqua urgere videretur causa, non solum Diaconus, quod de Evagrio Constantinopolitano tradit Sozomenus *loc. cit.*, sed Episcopus tactis Evangelis jurasse constat ex *L. 4. §. ult. de jurejur. et L. 5. de Purg. canon.* Ad hunc sane modum Severum Episcopum jusjurandum dare, ac deferre debuisse, non obscure tradit S. Basilius *Epist. 188. Can. 1. ad Amphilocho.*

§. IV. Differt a juramento calumniae, quod generale est, et omnia complectitur, quae in judicio aguntur, juramentum speciale, quod datur quoties opus est, in singulis actibus judiciariis, etiam si generale sacramentum calumniae emissum fuerit, eoque jurans affirmat, se non ex dolo, aut calumnia certum illum actum expedire. Juramentum hoc a Bonifacio VIII (1) *malitiae* juramentum dicitur, ut a generali juramento calumniae distinguatur.

(1) Cap. 2. §. de Juram. calumn. in 6.

TITULUS IX.

DE PROBATIONIBUS.

- | | |
|--|---|
| I. Causae disceptatio. | XIX. Examinis publicatio. |
| II. Quid probatio; et ad quem probandi onus pertineat? | XX. Instrumenta. |
| III. Probatio plena, et semiplena. | XXI. Fides publici instrumenti. |
| IV. Confessio. | XXII. Fides privatae scripturae. |
| V. Positiones. | XXIII. Juramentum, ejusque divisio. |
| VI. Positionum effectus. | XXIV. Juramentum voluntarium, et judiciale. |
| VII. Testes. | XXV. Juramentum necessarium. |
| VIII. Unius testimonium. | XXVI. Vis juramenti, et quando ei locus sit. |
| IX. Qualis testium numerus requiratur. | XXVII. Inspectio rei controversae. |
| X. ad XII. Testium qualitates. | XXVIII. Praesumptio juris, et de jure. |
| XIII. Qui testimonium ferre nequeant in omnibus. | XXIX. Praesumptio juris tantum. |
| XIV. Qui in certis causis. | XXX. et XXXI. Praesumptio hominis, ejusque species. |
| XV. Qui pro certis personis. | |
| XVI. Qui contra certas personas? | |
| XVII. et XVIII. Examen testium. | |

§. I.

Jacto litis fundamento, fit progressus ad causae disceptationem. Si reus in judicium veniens satius ducat adversario cedere, quam obsistere, et liberaliter coram judice fateatur, veram, ac justam esse actoris petitionem, diutius judicio non contenditur; cum

reus ipse suo testimonio¹, ac sententia in se condemnationem protulisse videatur. Nullam tamen inde oritur impedimentum, quominus iudex, audita rei confessione, sententiam proferat. Nam scitum est, iudicium semel coeptum sententia esse absolvendum, nisi litigantes ultro, et mutuo consensu liti vale-dicant.

§. II. At si reus certamen non reformidet, iudiciumque suscipiat, adhibendae sunt probationes, per quas iudici rei veritas innotescat. Neque enim ipsi non cognita rei veritate, sententiam ferre licet (1). Probatio est illius rei, quae in controversiam venit, legitime iudici facta demonstratio. Generatim onus probandi ad actorem pertinet; eoque non probante reus absolvitur, quamquam nihil ipse praestiterit (2). Sed interdum probandi onere tenetur reus cum nimirum praesto est actori juris praesumptio (3): aut cum reus excipiendo aliquid affirmat quo contraria actio perimi, ac repelli possit, quia tunc ipse in exceptione sua actor efficitur (4). Interdum etiam tam actor, quam reus probare debet, quod pro se quisque asseverat, uti fit in iudiciis duplicibus familiae erciscundae, communi dividundo, finium regundorum, in quibus uterque litigantium partes actoris sustinet (5).

(1) *Can. 10. cap. 30. quaest. 5.*

(2) *L. 4. Cod. de Eden., Can. 1. cap. 6. qu. 5.*

(3) *Cap. 2. de Restit. spoliat. in 6.*

(4) *L. 9. et 19. ff. de Probat.*

(5) *Cap. 3. et 9 de Probat.*

§. III. Probatio alia plena, sive perfecta, alia semiplena, sive imperfecta est. (1). Plena est quae plane, atque evidenter ostendit id, quod proponitur,

quaeque apta est ad finiendam controversiam: semi-plena, quae fidem aliquam facit, sed non plenam, ac potius injicit opinionem, ut dictum unius testis, comparatio scripturarum, cetera similia.

(1) Plerique interpretes hanc tradunt probationum divisionem, quae in foro receptissima est. Quamquam enim actor contra reum plene probare debeat id, quod proponit, tamen despicienda non est ea probatio, quae conjecturam probabilem affert. Ea quidem satis non est ad condemnandum reum, sed tamen iudicis diligentiam excitat ad alias conquirendas probationes, quibus suppleatur id, quod in semiplena probatione deesse videtur. Ita haec semiplena probatio necessitatem imponit jurisjurandi, per quod aut reus se plane purgat, aut auctor probationum inopiam supplet. Sane in *Leg. 31. ff. de Jurejur.* scriptum est: *solent saepe iudices in dubiis causis exacto jurejurando judicare.* Et in *Leg. 3. Cod. de Reb. credit.* habentur haec: *Inopia probationum per iudicem jurejurando res decidi oportet.* Jam vero *to dubiis causis*, et *to inopia probationum*, cujus gratia res jurejurando deciditur, nonnisi ad semiplenas probationes referri potest. Accedit auctoritas Juris Canonici *C. 4. de in integr. rest.*, ubi haec scripta sunt: *licet non constet ad plenum; et C. 6. de Frig. et malef.*, ubi haec occurrunt; *quampis semiplene nobis expresseris.* Quo utroque loco sine dubio semiplena probatio designatur. Sed receptam hanc divisionem probationum in plenas, et semiplenas vehementer improbant Duarenus *lib. 2. disp. 33.*, Donellus *ad tit. Pandectar. de Jurejur.* *cap. 11. num. 3. et seq. opp. tom. 10. col. 747. et seq. ed. Lucae cit.*, Faber *de Error. pragmatic. dec. 19. er. 1.* Inquiunt enim, semiplenam probationem nullam esse, neque probatum haberi posse, quod perfecte probatum non est, quemadmodum vitiose cautum non videtur cautum *Leg. 6. ff. Qui satisd. cogant.* neque stipulatio, emptio, testamentum valent, nisi perfecta sint omnia *Leg. 115. ff. de Verb. oblig., Leg. 19. ff. de Contrah. emp.* Verum hi actus individui sunt, propterea mirum non est, eos non valere, nisi perfe-

cti sint. Sed probatio dividua est, ideoque eam plus, minusve evidentem saepe dicimus, et interdum etiam luce clariorem, qualem quidem causae criminales postulant *Leg. ult. Cod. de Probat.*

§. IV. Inter plenas probationes principem sibi locum vindicat confessio, cum nulla sit probatio major ea, quae a proprii oris confessione procedit (1). Fit autem confessio vel in iudicio, vel extra iudicium; idcirco dividitur in iudiciale, et extrajudiciale. Judicialis confessio summam vim habet, ut qui eam emisit sua se sententia quodammodo damnassee videatur (2). Sed ut ea vires habeat, fieri debet a maiore 25 annis coram competente iudice (3), ex certa scientia, sponte, atque libere, procul ab errore facti, quo probato nulla confessio est (4); denique non vaga, et incerta esse debet (5). Extrajudicialis confessionis non tanta vis est, neque ex ea confessus tamquam iudicatus habeatur; verum et ea plenam probationem constituit, si coram adversario, et idoneis rogatisque testibus emissa sit (6).

(1) *Leg. 1. ff. de Confessis, L. 13. Cod. de Non num. pecun.*

(2) *L. 1. ff. de Confessis, L. unic. Cod. eod.* Confiteri autem, inquit Paulus *Recept. sentent. lib. 5. §. 3.* apud Schultingium *loc. cit. pag. 442.*, quis in iudicio non tantum sua voce, sed et literis et quocumque modo potest. Locum hunc Pauli diligenter explicant Cujacius, et Schultingius *ibid.*

(3) Confer Glossam in *cap. ult. de Confessis.* Confessio coram incompetente iudice emissa extrajudicialis confessionis vim habet.

(4) *Cap. 3. de Confessis, L. 22. ff. eod.* Veram de errore juris aliud est a legibus constitutum. Recte, praeter ceteros, hoc argumentum persequuntur Donellus ad *L. 2. ff. de Confessis opp. tom. 11. col. 339.*

et seq. ed. *Lucae cit.*, et *Cajacius ad tit. Cod. de Confessis opp. tom. 9. col. 1032. edit. Mutin.*

(5) *L. 3., et L. 6. ff. de Confess. L. 6. ff. de Jur. fisci.* Nam confessus incertum declarare debet, ut omnis dubitatio removeatur *L. 12. §. Nihil ff. de Interrog. action.*

(6) *Novel. 90. c. 2., Auth. Rogati Cod. de Testib.*

§. V. Ad eliciendam hanc confessionem jamdiu receptum est, ut litigantium alter alteri proponat positiones, sive articulos respicientes non causam universam, sed facta quaedam, quae ad causam pertinent, ut iis ab adversario constitutis, alteri sit exploratum, quid probare ipse debeat, quid in probatis habere (1). Suffectae sunt positiones interrogationibus, quae olim ante contestatam litem fiebant in jure, sive apud Praetorem, cum quis experiri vellet actione reali, puta haereditatis petitione, ac rei vindicatione, et nescius, possideret ne aut quo jure possideret reus, ex ejus ore actor exprimebat genus actionis, qua ipsum uti oportebat. Actio descendens ex his interrogationibus actio interrogatoria dicebatur; unde Pandectarum tituli *de interrogationibus in jure factis, et interrogatoriis actionibus.*

(1) *Cap. 1. de Confess. in 6.* Positiones, quales hodie adhibentur, jus civile ignoravit, atque earum primum meminerunt Decretales *C. 54. de Elect., et C. un. de Lit. contest.* Quod vere inquit *Clemens V. Clem. Saepe de Verb. signific.,* eas longaevo usu in causis admissas, ad usum fori ecclesiastici referendum est.

§. VI. Ille, cui sunt oblatae positiones, iisdem respondere juratus debet, ac si confessus fuerit, ur-

gebitur testimonio suo , tamquam re satis certa, et probata ; si respondere noluerit , aut ne responderet , a iudicio discesserit , conscientia sua convictus iudicabitur (1). Quod quidem obtinet cum iudex respondere jussit , nam qui a iudice mandaretur , contumax , non convictus existimatur (2). Videre autem in primis iudex , et considerare debet , probandae ne , an rejiciendae sint positiones , non enim litigator positionibus obscuris , captiosis , dubiis , aut ad causam non pertinentibus cogitur respondere.

(1) *Cap. 2. de Confessis in 6.*

(2) *Cap. 1. de Confessis in 6.*

§. VII. Ubi confessione nequeat educi veritas , aliae in medium afferendae sunt probationes , et veritas exquirenda , vel testibus , vel instrumentis , vel jurejurando , vel oculari inspectione , vel indiciis , et praesumptionibus. Testes sunt personae fide dignae , quae rei controversae veritatem ostendunt , quodque ab iis dictum est , testimonium appellatur. Omnis quaestio de testibus ad tria capita facile redigitur , ad eorum numerum , qualitatem , examen.

§. VIII. Quod attinet ad numerum unius porro testis , quamquam ipse sit omni exceptione major (1) . nulla tuta fides est (2) ; tantum facit ne temere fiat , quod sine flagitii periculo fieri non potest. Ita cum dubitatur , num quis baptizatus sit (3) , num ecclesia sit consecrata (4) , cum agitur de impediendo matrimonio , deque avertendo malo , quod ex illo oriretur (5) , uni testi credendum est. Sed et notario , qui ea confirmat , quae sui officii sunt (6) ;

nuncio , qui se aliquem citasse testatur (7); Episcopo, qui testimoniales literas suo sigillo munitas dedit; parochio, qui de suorum vita, et moribus; magistro, qui de studio discipuli testimonium ferunt, omnibus habenda fides est.

(1) Sed testimonium ab uno licet Episcopo perhibitum omnes iudices indubitanter accipere oportere, scriptum est in *Extravag. in fin. Cod. Theodos. tit. de Episc. judic. pag. 339. tom. 6. edit. Gothofredi Lips. 1743.* De hac constitutione, quae Constantini M. nomen praesefert, et quam Gothofredus, aliique falsam putant, satis egi loco superiori tit. 1. § 22. not. 4. p. 28. et seq.

(2) *Cap. 10. et 28. de Testib., L. 8. Cod. eod.*

(3) *Can. 110. de Consecr. dist. 4.*

(4) *Can. 16. de Consecr. dist. 1., ibique Glossa v. Nec certi.*

(5) *Cap. 11. de Sponsal., cap. 22. de Testib.*

(6) *Novel. 73. c. 7.*

(7) *Cap. 19. de Appellat.*

§. IX. Generatim tamen duo saltem, tresve testes requiruntur, ut plena probatio habeatur (1); nisi forte illorum numerus certa aliqua in re a jure sit definitus. Nam sunt certa quaedam negotia, quae plures eo numero testes requirunt (2); et in his quidem praescriptus numerus omnino adhibendus est. Ita personae dignitas fecit, ut plures, quam duos, tresve, Ecclesia testes postulet, ut Episcopus condemnaretur (3). Expediit autem universe plures afferre testes, ut firmior, et luculentior probatio habeatur; modo adversarius non cogatur graves perferre sumptus propter inanem testium multitudinem. Jus civile eam rem permittit arbitrio iudicis, cujus est testium numerum moderari (4); sed

Jure decretalium testes supra quadraginta ex utraque parte in medium afferri non possunt (5).

(1) *Cap. 23. de Testib., L. 12. ff. eod.*

(2) *L. 1. §. 2. ff. de Testib., C. 23. mox cit. Consule Brissonium Select. qu. l. 2. c. 17.*

(3) Contra Episcoporum testes 72. adhiberi voluisse Zephirinum Pontificem, tradit Luitprandus in *ejus Vit. pag. 183. edit. Antwerp. 1640.* Eundem hunc numerum expresserunt Leo IV. in *can. 3. cap. 2. qu. 5. et Capitularia Caroli M. lib. 1. cap. 133. tom. 1. col. 491. edit. Balutii Ven. 1772.*, ac Macedonium Episcopum Constantinopolitanum ab Episcopis septuaginta duobus de gradu dejectum narrat Auctor *Chronic. Alexand. Olymp. 285 in Biblioth. PP. tom. 12. p. 951. edit. Lugd.* Imperatores Valentinianus, Valens, et Gratianus in *Leg. 20. Cod. Theodos. Quor. appellat. non recip. testes 70. memorant adhibitos in causa Chromatii Episcopi; et Augustinus Brevic. collat. diei 3. cap. 14. opp. tom. 9. col. 569. edit. Ven. cit. mentionem fecit Concilii apud Carthaginem a Donatistis habiti, quo Caecilianus ab episcopis fere septuaginta condemnatus fuit. Mitto decretum Concilii Romani sub Silvestro Pontifice, quod est apud Gratianum can. 2. cap. 2. qu. 5., et quo habentur hæc: Praesul non damnabitur, nisi cum 72. testibus . . . Presbyter Cardinalis nisi cum 44 . . . Subdiaconus, Acolytus, Exorcista, Lector, Ostiarius 7.; itemque mitto acta Concilii Sinuessani, ex quibus constat, adhibitos fuisse testes 72. adversus Marcellinum, qui idolis thus adolevisse ferebatur. Mitto inquam utramque, quoniam Romanum illud Concilium ab Isidoro Mercatore fuisse confictum, omnes norunt; et similiter omnibus compertum est, fabulam esse Marcellini lapsum; et acta Synodi Sinuessanae, quod, praeter ceteris, late ostendit Papebrochius in *Conat. Chronolog. Histor. in S. Marcellin. Dissert. 7. in Propyl. ap. act. SS. Maji p. 42. et seq. ed. Antuerpiae.* Illud in his actis cura, et observatu dignum est, quod dicitur: *hi omnes electi sunt viri libra occidua, qui testimonium perhibent; constat autem ex iisdem actis librae occiduae vocabulo testes 72. significari De librae nomi-**

ne parum laboro. Nam veteres nominibus ponderum numeros designare solebant, quod prae ceteris ostendunt *librae*, et *unciarum* vocabula usurpata ad significandam integram haereditatem, quae duodecim partibus constat. Mirum igitur non est, quod in actis Sinuessanis librae nomine 72. testes intelligantur, quoniam Valentiniani, et Valentis constitutione in *Leg. 5. Cod. de Susceptor. lib. 10.* sancitum est, ut libra constaret solidis septuaginta duobus. Neque refert, quod Marcellinus Valentiniano, et Valente antiquior fuerit. Nam, ut rectissime est a Baronio ad an. 302. num. 94. seq. tom. 3. p. 330. edit. Lucae observatum, acta Synodi Sinuessanae, qualia nunc extant, recentiorem habent auctorem, qui verba secundum sui temporis consuetudinem usurpavit. Itaque de *librae* nomine expedita res est; sed non ita facile judicari potest, quamobrem Auctor eorum actorum hanc *libram occiduam* appellet. Joannes Datis in *Decret. Gratian. cap. 2. qu. 5*, non *occiduam*, sed *assiduam* legendum putat, hoc est *veram*, et *expensam*, uti eam vocem explicat testimonio Isidori *Orig. lib. 1. p. 65. ed. Paris. an. 1580.*; sed id quidem est contra omnium codicum fidem, et auctoritatem. Cajacius *Observat. lib. 17. cap. 9. opp. tom. 3. col. 455. ed. cit.*, et Baronius *loc. mox cit.* *libram occiduam occidentalem* explicant. Nam discrimen constituunt inter *libram Orientalem*, et *Occidentalem* quarum altera constabat solidis octogintaquatuor secundum Constantini constitutionem in *Leg. 1. Cod. Theod. de Ponderat.*, altera ex *cit. Leg. 5. Cod. de Susceptor. l. 10.* solidos septuaginta duos continebat. Sed, ut bene monet Cironius *Observ. lib. 4. cap. 5. p. 80. ed. Vindobonae 1761.*, nulla est haec Orientalis, et Occidentalis librae distinctio; nec quod Constantini lex Antiochiae, lex autem Valentiniani, et Valentis Romae lata fuerit, exinde effici potest, quod illa tantum ad Orientem, haec vero ad solum Occidentem pertineret. Imo vero cum illi utrumque tenerent imperium, sine dubio tulerunt legem, qua totum imperium obstringeretur. Ipse Cironius *occiduam libram* in actis Marcellini interpretatur *stateram*, et paria libramenta accurato examine; sic ut occidua libra sit, quasi vergens, atque ad unam partem inclinans. Rejicit

hanc sententiam Jacobus Gothofredus ad *Leg. unic. Cod. Theodos. de Oblation. votor. tom. 2 p. 463. edit. Lipsiae cit.*, et occiduam libram explicat imminutam, quemadmodum a scriptoribus occiduam, imminutum, et quod occidit, passim appellari demonstrat.

(4) *Leg. 1. §. 2. ff. de Testib.*

(5) *Cap. 37. cod.*

§. X. Multa etiam in testibus requiruntur ut eorum testimonium iudicio probetur. Principio citandi atque etiam inviti cogendi sunt ad ferendum testimonium, et patefaciendam veritatem. Vetus est cogendorum testium in causis criminalibus (1): sed postea Justinianus etiam ad civiles causas jus idem produxit (2), atque ita factum est, ut in his quoque causis inviti darentur testes, qui pridem erant tantum voluntarii (3). Nunc igitur jure civili etiam invitis denunciatur testimonium, exceptis cognatis, affinibus, et quibusdam aliis (4).

(1) *Leg. 4. 5. et 19. ff. de Testib. Plinius lib. 3. Ep. 9. ad Minutian. p. 62. ed. Oxonii 1703. Confer Cironium ad tit. Decretal. de Testib. cogen.*

(2) *L. 16. et 19. cod. de Testib.* Antiquiorem illam constitutionem, qua novum hoc jus induxit Justinianus, ipse memorat *cit. Leg. 16*; eam vero ex Basilicis restituit Cujacius *Observat. lib. 8. cap. 13. opp. tom. 3. col. 186. edit. cit.* De testibus ad ferendum testimonium cogendis est etiam decretum in *Lege Ripuariorum cap. 50. apud Balutium Capitular. Reg. Francor. tom. 1. col. 27. edit. Venet. 1772.*, et in *Lege Salica cap. 51.*, apud eundem Balutium *col. cit. 225.* Si quis, in *Lege Salica* scriptum est, *testes necessarios habuerit, et fortasse ipsi ad placitum (iudicium) venire noluerint, qui eos necessarios habet, manrire (monere) illos debet. Si vero venire noluerint, et eos sunnis (legitimum impedimentum) non detinuerit, unusquisque illorum sexcentis denariis, qui faciunt solidos quindecim, culpabilis judicetur.*

(3) Confer Quintilianum *Inst. Orat. lib. 5. cap. 7. pag. 243. ed. Patavii 1736.*

(4) *Leg. 4. 5. 8. 19 ff. de Testib.*

§. XI. Romana Ecclesia testes hortari, et monere, non cogere consuevit (1). Tantum ecclesiasticus iudex invito testimonium denunciatur, si is odio, vel gratia, vel timore se subtrahat (2); atque alia desit probatio, unde veritas nosci possit (3). Et laicum quidem ipse iudex cogit ad ferendum testimonium per excommunicationem (4), clericum vero per suspensionem ab officio, et beneficio, quam, si adhuc pergat obsistere, sequi potest sententia excommunicationis ac depositionis (5). Quod si quis iurejurando promiserit, se non dicturum testimonium, nulla vis sacramenti est (6).

(1) *Cap. 1. et 3. de Testib. cogen.*

(2) *Cit. cap. 1.*

(3) *Cap. 5. ult. de Testib. cogen.*

(4) *Cap. 1. 5. 9. ult. eod.*

(5) *Cap. 2. eod.*

(6) *Cap. 18. de Testib., C. ult. de Testib. cogen.*

§. XII. Sed et iurati debent esse testes, quoniam injuratis non creditur, nisi eis adversarius iurejurandum remiserit (1); praeterea non singulares, quales sunt, qui singuli de disjunctis, diversisque actibus testantur, iique, inter quos de eodem actu non convenit (2), neque qui rem ex auditu deprehenderit, quia testes auriti plenam sibi fidem non vindicant, nisi alia praesto sint adminicula, aut nisi aliud causae natura postulet (3); denique nullo vitio laborare debent, propter quod a testimonio re-

pellantur. Quidam enim ab omnibus judiciis arcentur, quidam ab aliquibus, quorundam testimonia pro certis personis, quorundam contra certas personas non recipiuntur.

(1) *Leg. 8. Cod. de Testib., C. 39. et 15. eod.* Vide etiam *Capitularia Caroli M. lib. 7. cap. 283, t. 1. col. 727. edit. Balutii Ven. 1772* Forte hujus sacramenti a testibus emittendi necessitas fecit, ut nonnisi a jejunis testimonium dari deberet. In *Capitularibus Caroli M., et Ludovici Pii lib. 5. cap. 277. apud Balutium tom. 1. col. 584. et 648. edit. cit. scriptum est: Omnino nullus, nisi jejunus, ad juramentum, vel ad testimonium admittatur. Quod item constitutum est in C. 1. de Testib., Nullus testimonium dicat, nisi jejunus. Nam uti sancitum est in canone, quem Cornelii P. nomine describit Burchardus in *Decret. lib. 12. cap. 12., honestum, et justum videtur, ut qui in sanctis audet jurare, hoc jejunus faciat cum omni honestate, et timore Dei.* Sane vetus haec est Ecclesiae disciplina, ut nonnisi a jejunis sacra tractentur *can. 6. et 7. dist. 5. de Consecr.* Sed ne despicienda quidem videtur conjectura eorum, qui testes jejunos testimonium ferre debuisse putant, ne onusti vino, et cibo perturbati, aut minus veram attestationem emitterent. Sane in iisdem *Capitularibus Caroli M., et Ludovici Pii C. 103. lib. 5. loc. cit. col. 565. cautum est, ut nullus ebrius suam causam in mallo possit conquirere, nec testimonium, nec placitum Comes habeat, nisi jejunus.* Illud de episcopis statutum est *Novel. 123. cap. 7.,* eos non ad instar aliorum testium jurejurando, sed fide tantum sua, ut decet Sacerdotes Dei propositis sanctis Evangeliiis, testimonium ferre oportere. *Tribuniensi autem Concilio ann. 89. can. 21. col. 640. tom. 11. col. lect.* Labbaei sancitum est, ut *Presbyter vir juramenti per sanctam consecrationem interrogetur, quia sacerdotes ex levi causa jurare non debent.* Consule *Christianum Lupum Append. ad Ephesin. Latrocin. cap. 2. act. 1. opp. tom. 2. pag. 220. edit. Venet.,* ubi causas habes, propter quas clerici jurant.*

(2) *Cap. 33. de Testib., cap. 9. de Probat., cap. 23. et 32. de Elect.*

(3) *Cap. 5. 27. et 47. de Testib., cap. 13. de Probat.* Tempus, quod hominum memoriam superat, per testes ex auditu, in quibus insint omnia, quae inesse oportet, et recte demonstratur *Leg. 28. ff. de Probat.* Iisdem quoque testibus consanguinitatem probari, traditum est: sed hodie, uti monet Cujacius *ad cap. 47. de Testib. opp. 6. col. 856. edit. cit.*, Lateranensis Concilii decreto arctata ad quartum gradum prohibitionem nuptiarum, arctatur etiam de audita testimonium. Confer ipsam *cap. 47. de Testib.*

§. XIII. A judiciis omnibus, tamquam minus apti, et idonei ad ferendum testimonium, repelluntur furiosi, amentes (1), itemque impuberes, servi, perjuri, infames, excommunicati (2). Quin jure decretalium quilibet reus criminis postulatus, etiamsi nondum confessus, convictus, damnatus et notatus infamia sit testimonium dicere prohibetur (3); exceptis gravioribus criminibus, qualia sunt simoniae, et laesae majestatis (4), in quibus etiam infames testimonium ferunt (5). Nam testes non tantum infamia, sed etiam infamiae suspitione vacare oportet (6). Ceteri criminosi omnino rejiciuntur, cum adhuc in sceleris contagione versantur (7). Qui crimen perpetrarunt, modo perjuri non sint (8), ac deinceps salva existimatione abjecerunt, ut judiciis civilibus, non item criminalibus, in quibus de crimine, poenaeque agitur, testes esse possunt (9).

(1) §. *Item furiosi Inst. Quibus non est permiss. fac. test.*, et *Leg. 20. §. Ne furiosus ff. Qui testam. fac. pos.*

(2) *Can. 1. et 3. cap. 4. quaest. 3., C. 47. de Testib.*

(3) *Can. 54. et ult. de Testib.*

(4) *Cap. 7. de Simon. , cap. 1. de Testib. in 6. lvo Carnotensis Ep. 27. opp. tom. 2. p. 13. ed. Paris. 1647. Cum in aliis accusationibus , inquit , accusatorum , et testium innocentia quaeratur , ad insimulationem tamen simoniacorum etiam infames personas admitti.*

(5) *Cap. 31. de Simon.*

(6) *Cap. 1. de Except. , can. 39. cap. 2. qu. 7. , cap. 2. et 3. cap. 3. qu. 11.*

(7) *Cap. 54. de Testib. cap. 32. de Simon. Confer etiam Capitularia Caroli M. l. 7. cap. 324. tom. 1. col. 732. ed. Baluzii cit.*

(8) Qui in alia causa aliquando pejerasse probantur , etiamsi de perjurio illi damnati non fuerint , testes esse prohibentur *cap. 7. de Testib. , can. 18. cap. 6. quæst. 1. , can. 7. et 14. cap. 22. qu. 5.*

(9) *Cap. 54. de Testib.*

§. XIV. In certis causis testimonium ferre nequeant foeminae in causis criminalibus (1), nisi plane alius desit veritatis ostendendae locus , ac nisi agatur de gravioribus criminibus simoniae , et laesae majestatis , in quibus etiam minus idonei testes recipiuntur (2) ; patronus , et advocatus in causa , quam defendunt (3) , judex in causa , quam judicat (4) , denique omnes in propria causa testes esse prohibentur (5).

(1) Jure civili a causis criminalibus mulierum testimonium excluditur , si hae corpore quaestum faciant *Leg. 3. §. 5. ff. de Testib.* Sed decretales omnes univærsæ foeminas repellunt.

(2) *Can. 3. et 4. c. 15. qu. 3.*

(3) *Glossa in cap. 6. de Test. , et Leg. fin. ff. eod.*

(4) *Can. 38. c. 2. qu. 6.*

(5) *Can. 1. et 2. c. 4. qu. 4. , Leg. 6. eod. de Testib.*

§. XV. Pro certis personis testimonium ferre nequeunt ii , qui sunt de domo , sive familia nisi

sint spectatae fidei, et probitatis (1), vel nisi in controversiam veniat, quod alio modo probari non potest; veluti si quaeratur de cognatione, legitimis natalibus, aetate (2). Similiter neque amici testimonium dicunt in causis amicorum (3); neque ii, qui similem cum aliis habent controversiam, et quorum iudicium illud interesse potest (4); itemque monachi, et clerici in profanis rebus coram laico iudice testimonium ferre vetantur, nisi aliud postulet necessitas ostendendae veritatis; uno casu sunt testes cum sui aut eorum testimonia ecclesiasticus iudex recipit.

(1) *Leg. 1. cod. de Testib., cap. 24. de Testib.*

(2) *Cap. 3. Qui Matrim. accus. po.*

(3) *Leg. 3. ff. de Testib.*

(4) *Cap. 10. et 20. de Testib.*

§. XVI. Postremo adversus certas personas testes esse nequeat reus contra socios criminis (1), exceptis criminibus laesae majestatis, haeresis et simoniae (2), inimicus contra inimicum (3), libertus contra patronum (4), filius contra patrem, et pater contra filium, exceptis causis matrimonialibus (5); haereticus, ethnicus, judaeus contra orthodoxos (6), denique in causis criminalibus laici a ferendo contra clericos testimonio jure decretalium repelluntur (7).

(1) *Cap. 1. de Confessis, c. 10. de Testib.*

(2) *Can. 1. dist. 79., c. 4. de Haeret. in 6. c. 1. de Testib. in 6.*

(3) *Cap. 32. de Simon.*

(4) *Leg. 4. ff. de Testib., Leg. 11. cod. de Testib.*

(5) *Can. ult. c. 4. qu. 2., Leg. 3. ff. de Testib. Leg. 5. cod. eod.*

(6) *Cap. 24. et 26. c. 2. qu. 7.*

(7) *Can. 14. de Testib.*

§. XVII. Probi, et honesti testes legitimi examinandi sunt, ut ipsis in judicio fides habeatur. Ergo qui probare debet, quod est incertum, testes producit, quos inde competens iudex advocat, posteaquam eos dignos judicavit, qui in judicio recipiantur. In primis autem citandus est adversarius, contra quem testes afferuntur, ut contra ipsos proponat, si quid forte objiciendum habeat (1). Sic probati testes initio jurant, se procul habere causas omnes gratiae, odii, simultatis, eaque dicturos, quae vere sciunt, non ut cuiquam gratificentur, neque ut spem aliquam propositam habeant, sed quod uno veritatis studio feruntur (2). Deinde a iudice clam, et seorsim ab aliis, singuli interrogari, et examinari debent (3); nisi ex justa causa ad iudicem venire impediuntur, quia tunc ad eos mittitur, qui interrogat (4).

(1) *Cap. 2. de Testib.*, quem in locum vide Cajacium *opp. t. 6. col. 837. ed. cit.*

(2) *L. 8. Cod. de Testib.*, *C. 31. et 47. eod.*

(3) *Cap. 52. de Testib.*

(4) *Leg. 15. ff. de Jurejur.*, *C. 8. de Testib.* Episcopos ad ferendum in judicio testimonium vocari voluit Justinianus *Novel. 123. cap. 7. et 8. Ad personas egregias*, eosque qui valetudine impediuntur domum mitti oportet ad jurandum, scriptum est in *L. 15. Cod. de jurejuran.* Videndus Cajacius in *tit. 20. lib. 2. decretal. c. 8. opp. tom. 6. col. 839. ed. Venet. 1778.*, qui verba illa ad egregias personas Tribonianum esse arbitratur. Nulla harum personarum quae egregiae dicantur mentio est in *cap. 8. de Testib. et attestat.*, sed

tantum memorantur valetudinarii senes , vel debilitate confecti , aut paupertate depressi.

§. XVIII. Summa in hoc examine diligentia est adhibenda (1) , et responsa testium clara esse debent , ita ut si obscura sint , iterum illi interrogari debeant (2). Interrogantur autem de circumstantiis , personis , loco , tempore , credulitate , fama ; in primis autem scientiae causam afferre testes oportet per eum corporis sensum , cui res controversa subjicitur , veluti per fidem oculorum , si de facto , per fidem aurium , si de dicto quaeratur (3). Quae interrogationes plerumque ab adversario proponuntur (4) , quo praesente interrogandi sunt testes , quae civilis (5) , et canonici juris (6) disciplina est ; sed fori usu jamdiu receptum est , ut clam a iudice interrogentur , ac tantum vocetur adversarius , ut adsit , cum illi sacramentum emittunt (7).

(1) *Cap. 52. de Testib.*

(2) *Cap. 53. eod.*

(3) *Cap. 37. et 47. eod.*

(4) *Cap. 2. de Testib. in 6.*

(5) *L. 15. Cod. de Testib. , Novel. 90. c. 9.*

(6) *Cap. 2 de Testib.*

(7) Error interpretum , maxime veterum , hunc morem induxit ; error autem processit ex prava intellecta Zenonis constitutione in *L. 12. Cod. de Testib.* Ea quidem scriptum est intrare testes judicantis secretum. Verum , ut bene monet Polletas *Histor. for. Roman. lib. 5. cap. 12.* secretum est tribunal , ac iudicii locus , non autem haec verba significant , quod putarant Interpretes , testes secreto interrogandos esse. Consule Cujacium ad *C. 2. de Testib. tom. 6. col. 837. ed. cit.*

§. XIX. Peracto testium examine publicanda , sive vulganda , ac litigantibus demonstranda sunt
DEV. Instit. Can. Tom. III. 6

omnia , ut intelligant, quid gestum, dictumque sit, ac si quid habent obijciendum proferant (1). At post publicationem neque super propositis articulis , nisi forte aliqui omissi fuerint (2) , interrogandi sunt testes (3) ; neque in eorum personas aliquid opponi potest , nisi qui eos refellit , prius juret , se id non dolo facere ; aut nisi ante publicationem protestatus sit , aut nisi ostenderit , se demum post publicationem didicisse exceptionum causas , quas ignoraverat (4). Testes ab actore datos refellere potest reus contrariis ab se productis testibus, quos actor aliis item testibus refutabit ; atque hic debet consistere productio testium, ut lites habent medium quemdam modum (5). Cum inter actoris , reique testes pugna est , plus fide digni , ac verisimiliora affirmantes , cum haec in omnibus paria sunt , plures numero praeferuntur (6). Testimonia vero in uno iudicio recepta fidem faciunt in eadem causa, et inter easdem personas coram alio iudice (7) ; sed in summano recepta in plenario non probant (8).

(1) *Cap. 15. et 41. de Testib.*

(2) *Cap. 48. eod.*

(3) *Cap. 17. 18. 25. eod.*

(4) *Cap. 31. eod.*

(5) *Cap. 15. 36. 49. 55. eod.* Sed interdum , ut his locis explicatur , iustis de causis etiam quarta testium productio conceditur. Illud omittendum non est , quod recte observat Cujacius *ad C. 49. de Testib. cit. tom. 6. col. 856* , magnum inter refellendos , producendosque testes discrimen Intercedere. Nam testes refelli , et refutari etiam post publicationem recte possunt ; cum tamen post publicationem iidem , vel alii non producantur.

(6) *Cap. 32. de Testib.*

(7) *Cap. 11. eod.*

(8) *Cap. 38. eod.*

§. XX. Praeter testes , probationes educuntur etiam ex instrumentis, nimirum ex scripturis, quae fidem judici faciunt rei , quam continent. Nam angustiori significatione scripturae instrumenta appellantur; cum latiori significatione, quidquid ad causam instruendam pertinet, ideoque etiam testimonia instrumentorum nomine comprehendantur (1). Instrumentorum quae rite confecta sint , eadem est in iudicio , quae testium , fides , et auctoritas (2), eaque vel publica vel privata sunt. Publica instrumenta, sive scripturae sunt quae publica auctoritate conficiuntur a personis , quibus id munus datum est , uti sunt censuales tabulae , instrumenta a notario rite conscripta , acta judicialia , scripturae ex publicis archivis eductae (3) , et a publica persona confectae. Eodem loco sunt scripturae publico , et authentico sigillo obsignatae, veluti Principis, Episcopi , Capituli , Universitatis, itemque libri Parochorum , in quibus baptismata, matrimonia, funera describuntur. Privatae scripturae a privatis nulla publica auctoritate conficiuntur , et huc spectant epistolae , apochae , antapochae, chirographa.

(1) *L. 1. ff. de Fid. instrum.* Harmenopolus lib. 1. tit. 2. c. 22. δικαιωματα vocat tam probationes , quam instrumenta , quia haec probant illud , quod iudicio proponitur , et causarum firmamenta sunt. In Basilicis vero , et apud eundem Harmenopolum instrumenta proprie dicuntur συμβολαια pacta conventa in scripturam redacta , ut actum facilius probari possit *l. 4. ff. de Fid. instrum.*

(2) *L. 15. Cod. de Fid. instrum.*

(3) *Auth. Ad haec, Cod. de Fid. instrum.*

§. XXI. Publica instrumenta plenam in iudicio probationem constituunt; modo authentica ipsa,

hoc est autographa proferantur (1). Nam exemplo non facile creditur, nisi ex authentico sumptum legitime sit, et cum eo conferatur, probeque conveniat (2). Fides tamen publicis quoque instrumentis subtrahi potest exceptione falsitatis, quae pluribus testibus evidenter demonstrata sit (3). Praeterea nihil efficit qui inter se contrarias scripturas protulit (4), aut abrasas in loco suspecto (5), aut lectionis ita impeditae, ut legi, et intelligi nequeant (6).

(1) *Cap. 1. et 16. de Fid. instrum. l. 16. 17. 19. Cod. eod.*

(2) *Cap. 1. et 16. eod.*

(3) *Cap. 10. eod.*

(4) *Cap. 13. eod. l. scripturae 14. Cod. eod.*

(5) *Cap. 3. eod., c. 7. de Relig. dom., c. 14. de Privil.*

(6) *Cap. 6. de Fid. instrum.*

§. XXII. Privata scriptura, cujus est comperita veritas tantum contra scribentem probat, modo causa debiti expressa sit (1); excepta liberatoria confessione, in qua creditor sibi solum debitum profitetur, quaeque nulla etiam adjecta causa, contra scribentem probationem facit (2). Sed scripturae, quae tribus munitae sunt testibus, vim habent publici instrumenti (3); ac libris mercatorum publicae utilitatis, et commercii ratio tam proscribentibus, quam contra scribentes fidem tribuit.

(1) *L. 25. §. ult. ff. de Probat., c. 14. de Fid. instrum.*

(2) *L. 40. ff. de Pactis.*

(3) *L. 11. Cod. Qui potior. in pignor. habeant. Ne-*

cesse tamen est, uti animadvertit Brunnemannus *in cit. l. num. 6.*, quod constet de manu, et subscriptione testium sive per recognitionem, sive per comparisonem, et quod etiam partes ipsae subscripserint, testesque idonei sint.

§. XXIII. Est et probatio, quae oritur ex jurejurando, quod definitur affirmatio religiosa, hoc est advocatio Divini Numinis in testem ejus rei, quae promittitur, aut asseritur. Dividitur Jusjurandum in promissorium, et assertorium. Illud futurum respicit, atque in contractibus non raro adhibetur; hoc ad praesens, aut ad praeteritum tempus pertinet. Assertorium juramentum triplex est: voluntarium, judiciale, et necessarium (1).

(1) Inscriptio illa tituli Pandectarum *de Jurejurando sive voluntario, sive necessario, sive judiciali* triplicem habet jurisjurandi divisionem.

§. XXIV. Voluntarium est, quod alter alteri aut ex conventu, aut sine conventu extra judicium defert, vel refert (1). Deferre jusjurandum est adversario offerre jurisjurandi conditionem; referre autem est non suscipere hanc conditionem, eamque in ipsum offerentem rejicere. Judiciale juramentum est, quod in judicio alter litigantium alteri defert, judice non cogente, sed approbante: necessarium est, quod judex vel actori, vel reo defert, ubi plena probatio desit, ut inde veritas innotescat (2).

(1) Recte hoc jusjurandum voluntarium dicitur, quoniam sive illud ex pacto emittatur, hoc quidem ex libera litigantium voluntate procedit, ac praeterea qui idem ex pacto deferre debet, neque extra judicium ad

deferendum cogi, neque item, si deferat, adversarium ad jurandum adigere possit; sive contra sine conventu deferatur, integrum sit deferenti non deferre; integrum ei, cui delatum est, nec praestare, nec deferre; integrum denique ei, cui relatum est, nec tunc illud praestare, quoniam semper deest, qui cogat, cum id privatus in privatam efficere nequeat. Consule Voetum in *Pandect. lib. 12. tit. 2. num. 7.*

(2) De voluntario jurejurando eadem est Latinorum, Graecorumque sententia, sed de necessario, ac judiciali magna dissentio est, quam jam sua aetate fuisse tradit Azo in *Summa Cod. de jurejur. num. 6.* Nam Graeci necessarium vocant, quod alter alteri in judicio defert, judice suscipiendi, aut referendi juramenti necessitatem imponente: judiciale, quod judex ipse defert sponte sua. Balsamon in *Nomocanon. Photii tit. 13. cap. 18.*, apud Justellum *Biblioth. Jur. Canon. tom. 2. p. 1117. ed. Paris. 1661.* Voluntarium, inquit, quod datur ex voluntate partim extra judicium; necessarium, quod deferente actore, et ex interloquutione judicis datur; judiciale, quod judicis sententia, etiam nolentibus iis, qui litigant, controversiam decidit. Cujacius in *Paulum Recept. senten. lib. 5. tit. 31. opp. tom. 1. col. 459.*, et ad *Edict. Paul. lib. 18. Leg. 17. tom. 5. col. 211.* ita rem omnem distinxisse videtur, ut voluntarium jusjurandum sit, quod alter alteri extra judicium defert; necessarium, quod alter alteri in judicio; judiciale quod a judice defertur. Tam *Observ. lib. 17. c. 35. tom. 3. col. 494.* jusjurandum alteri ab altero delatum voluntarium, aut necessarium esse inquit; voluntarium, quod extra judicium; necessarium, quod in judicio defertur. Verum in *Paratitl. Digestor. ad tit. de Jurejur. sive voluntar. sive necessar. sive judicial. t. 10. col. 393.* voluntarium esse inquit, quod ab altero alteri defertur in judicio, vel extra judicium; necessarium, quod refertur; judiciale, quod a judice refertur. Ego communem Latinorum opinionem sequor. Sane Cajus in *Leg. 1. ff. de Jurejur. maximum*, inquit, *remedium expediri idcirco litium in usum venit jurisjurandi religio, qua vel ex pactione ipsorum litigatorum, vel ex auctoritate judicis deciduntur controversiae.* Duplex hoc loco Cajus

jusjurandum proponit: alterum, quod *ex pactione litigatorum*; alterum, quod *ex judicis auctoritate* emittitur. Juramentum, quod ex litigatorum pactione procedit, necessarium esse omnino non potest; cumque huic pactioni opponatur judicis auctoritas, quae necessitatem facit, consequens est, ut necessarium juramentum illud prorsus habeatur, quod in dubiis causis a iudice pro sua auctoritate deferatur. Juramentum autem ex pactione aut in iudicio, aut extra iudicium datur. Hoc plane voluntarium est, illud iudiciale, quoniam coram iudice emittitur. Revera Paulus *Leg. 17. ff. de Jurejur.* juramenti ex conventionione unum genus constituit. *Jusjurandum*, inquit, quod *ex conventionione extra iudicium deferatur, referri non potest.* To *extra iudicium* evidenter ostendit, aliud esse jusjurandum ex conventionione, quod in iudicio deferatur; et hoc nonnisi iudiciale juramentum esse potest, quod ab alio distinguitur propter conventionem, quae in iudicio facta est. Cujas, qui genus enarrabat juramentorum finiendae litis causa institutorum, utrumque juramentum, quod nos voluntarium, et iudiciale appellamus, complexus est uno verbo *ex conventionione*; sed Paulus, qui speciem explicabat conventionalis juramenti, addere debuit *extra iudicium*, ut ostenderet, non utriusque conventionalis juramenti vim eandem esse, sed aliud valere juramentum ex conventionione in iudicio, aliud juramentum ex conventionione extra iudicium facta. Commune Latinorum de iurisjurandi distinctione sententiam, praeter ceteros, late exornant Douellus in *tit. Digest. de Jurejur. opp. tom. 10. col. 949. seq.*, et Voetus in *Pandect. lib. 12. tit. 2. num. 7.* Vide etiam Ant. Matthaeum de *Judic. Disp. 10. th. 6. et 7.*

§. XXV. Juramento necessario locus est in causis dubiis, idque dicitur *suppletorium*, quoniam eo semiplena probatio suppletur (1). Dubiae causae ex veriori sententia sunt, in quibus plena probatio data non est, puta, quod graves adsint praesumptiones, quae non omnem abigunt scrupulum, aut quod allati sint testes, in quos aliqua exceptio ca-

dere posse videatur. Defertur hoc jusjurandum ei , qui semiplene probavit, modo personarum , et causae ratio habeatur (2) ; et si reus aequae , atque actor semiplene probaverit , deferendum est reo , cujus in re dubia potior causa est (3).

(1) Qui semiplenam probationem contemnunt , juramenti suppletorii nullam rationem habent. At in dubiis causis , ut inquit Cajus in *leg. 31. ff. de Jurejur.* , vel ut loquantur Diocletianus , et Maximianus in *leg. 3. cod. de Reb. cred.* , in probationum inopia judex delato juramento litem finit. Verum si quaerimus , dubia causa , et inopia probationum nihil est aliud , quam causa , in qua semiplene probatum est. Nam si dubiam causam , et inopiam probationum intelligamus causam , in qua pares ab actore , et reo probationes datae sunt , par erit utriusque causa , ideoque absolvere oportebit reum , cujus in pari causa potior conditio est *leg. 125. et 128. ff. de Regul. jur.* , cap. 6. de *Fid. instrum.* , cap. 65. de *Verb. signif. in 6.* ; tantum abest , ut jusjurandum a judice deferendum sit. Rursus si probationum inopiam , quod placuit Giphanio in *leg. 3. , cod. de Reb. cred.* , intelligamus causam , in qua nihil ab actore probatum est , erit omnino judicandum pro reo , quem *actore non probante et si nihil ipse praestet , obtinere voluit Imperator Antoninus in l. 4. cod. de Eden.* Restat igitur , ut dubiam causam , et inopiam probationum omnino referamus ad causam , in qua semiplene probatum est.

(2) *Cap. ult. §. ult. de Jurejur.*

(3) *Leg. 125. et 128. ff. de Regul. jur.*

§. XXVI. Oblatum juramentum litigantes recusare non possunt , nisi justam habeant recusandi causam : ut si deferatur reo , contra quem nihil probavit actor , aut actori , qui plenam probationem attulit (1). Delato , et emissio juramento secundum eum , qui juravit , ferendum judicium est (2). In omnibus autem causis civilibus huic juramento lo-

cus est, non item in criminalibus propter perjurii metum (3).

(1) *Cap. 2. de Probat.*

(2) *Leg. 31. ff. de Jurejur.*

(3) Confer Voetum in *Pandect. lib. 12. tit. 2. num.*

10. Juramentum hoc, quo quis se pargat ob infamiam ex crimine contractam, purgatio canonica appellatur, de qua titulus est in Decretalibus de *Purgatione canonica*, et cujus olim frequens usus erat. Clerici, qui sunt de apostasiae crimine infamati . . . per distinctionem ecclesiasticam coercendi sunt, donec definiente probatione ad infamiam abolendam purgationem canonicam curaverint exhibere, inquit Innocentius III. in *cap. 3. de Apostat.* Idem de clerico homicidii reo in *cap. 2. de Calumn.*, de Presbytero accusato in *cap. 10. de Accusat.*, de clerico concubinator suspecto in *cap. 8. de Cohabit. cleric. et mulier.* statutum est. Memorant quoque hoc sacramentum Augustinus *Epist. 78. opp. tom. 2. col. 241. ed. Maurin. Venet. 1759.*, Gregorius M. *lib. 2., Epist. 33. lib. 7., Ep. 18. lib. 13., Ep. 34. opp. tom. 2. col. 597. 864. 1241. ed. Paris. cit.*, et Gregorius Turonensis *Histor. Francor lib. 8. cap. 9. et 40. col. 382. et 411. ed. Paris. 1699.* Jurare olim mos fuit ad *B. Petri corpus*, de qua formula, et similibus videndus Duncangius in *Glossar. Veteri consuetudine*, institutoque juraturus, tres, quinque, aut septem ejusdem prope ordinis vicinos, aut saltem, qui eum plane nossent, ac probatae fidei essent, sibi socios, tamquam adsertores, adsciscebant *can. 12. 13. 16. 17. 19. cap. 2. qu. 5. C. 7. 9. 11. de Purgat. canon.*, quo spectant formulae *tertia, quinta, aut septima manu* jurare. Interdum plures etiam ad jurandum vocabantur, si aut qui se purgabat, laicus esset, aut gravioris esset infamia criminis, qua clericus laborabat *C. 1. et 10. de Purgat. canon.* Hi porro socii *Compurgatores, Conjuratores, et Sacramentales* dicebantur; quorum crebra mentio est in capitularibus Regum Francorum, praesertim in Capitular. Dagoberti *ut. 1. num. 6. et tit. 9. num. 4.*, in Capitularibus Caroli M. *lib. 3. cap. 9. apud Balutium t. 1. col. 68. 84. 509, et in Leg. Salica tit. 50. ib. col. 224.* Primum ille, cujus

erat negocium , de quo quaerebatur , super sancta Evangelia jurabant , deinde compurgatores jurabant similiter super sancta Evangelia , cum vere , ut ipsi credebant , jurasse *can. 17. cap. 2. quaest. 5.* Sed nunc purgatio canonica fere ubique desuevit , ne amplius in causis criminalibus jus jarandum emittitur. Confer Giraldu *Exposit. jur. Pontific. l. 5. tit. 34. Sect. 894. pag. 723.* Memorat etiam Gratianus *can. 23. cap. 2. qu. 5.* , ex Concilio Wormaciensi purgationem *per sacram communionem* ; quae hoc modo fiebat. Cum aliquis accusatus omnem ab se remove cupiebat suspicionem criminis , quod vel non poterat demonstrari , vel non satis evidenter excludi , is ante altare , et sanctissimam Eucharistiam ducebatur. Antequam vero Christi corpus acciperet animum suum aliis praesentibus declarabat his , aut similibus verbis : *Corpus Domini sit mihi ad purgationem hodie.* Plures hujusmodi purgatione uti consuevisse testatur Muratorius *Antiquit. Italic. dissert. 38.* , qui illud etiam animadvertit , quod quamquam haec purgatio parum differret ab ea , quae per juramentum fiebat , tamen posteriori aetate legitima , et canonica purgatio juramentum habitum est. Alias quoque purgationes describit Martenius *de Antiq. Eccles. rit. lib. 3. cap. 7. §. 3. et 4.*

§. XXVII. In probationum ordinem referenda est etiam inspectio rei , quae a iudice adhibetur , ut oculis subjiciat , quae non satis certa , et explorata sunt , atque ita oculorum testimonio controversiam expediat. Hanc inspectionem pragmatici *accessum* vocant , quia iudex ad rem inspiciendam accedit , eique locus est in iis rebus quae sub oculos cadunt ; veluti in iudicio finium regundorum , ac servitutum , in novi operis nunciatione , in aetate ex habitu corporis definienda , in causis matrimonialibus , in quibus quaeritur , num aliquis aptus ad matrimonium sit , num unquam venerem exercuerit. Verum in his causis iudex non solum rem ipsam inspicit , sed viros adhibet peritos rei , de qua agitur , aut ipsis iudicium committit. Quin in causis

matrimonialibus ubi quaeritur, num quis liberis operam dare possit, viri a medicis, et chirurgis, mulieres ab honestis matronis, et obstetricibus inspiciuntur (1).

(1) *Cap. 4. et 14. de Probat., cap. 6. et seq. de Frigid. et malefic.*

§. XXVIII. Denique vim probationis habent praesumptiones (1), quae sunt conjecturae ex aliquo verisimili ad probandum sumptae (2); eaeque vel juris, vel hominis sunt. Praesumptio juris a lege procedit, hoc est certa lege, vel canone comprehenditur, neque a iudicis arbitrio pendet; eaque duplex est, pro diversa ratione, qua proponitur: alia *juris tantum*, alia *juris*, et *de jure*. Praesumptio *juris et de jure* est, quam non modo jus probat, sed etiam ita certam, atque exploratam habet, ut omnem contrariam probationem excludat. Ita jure Decretalium si quis concubuit cum muliere, cum qua prius sponsalia contraxerat, inducitur matrimonii praesumptio, quae labefactari non potest, et qui ea premitur, aliam uxorem accipere prohibetur (3).

(1) *Leg. 16. Cod. de Probat., C. ult. de Praesumpt. C. 7. de Haeret. in 6.*

(2) Hoc in primis habet praesumptio, ut ad veritatem referatur, neque de falsis argumentum accipiat, in eoque differt a fictione, quae fit de eo, quod non est, nec fuit, veluti fictio legis Corneliae, quae postliminio reversos in civitate semper fuisse fingit, non autem praesumit. Hoc etiam spectat Publiciana actio, et ficta traditio, cujus in jure civili frequens usus est. Ita si quis sibi rei donatae, et non traditae usumfructum retineat, ut in *leg. 28. et 36. §. Sed si quidem Cod. de Donat.*, vel conducatur, ut in *Leg. 76. ff. de Rei vindic.*, vel precario possidere constituat ut in *leg. 18. ff. de Acquir. possess.*, traditio corporalis rei donatae pro facta habe-

tar, quamquam revera facta non fuerit, quia fingitur, quod donans donatario, rem κατὰ συντομίαν brevi manu tradiderit. Raro jus canonicum has fictiones admittit; neque assentior Cujacio, qui *Observat. lib. 19. cap. 18. opp. tom. 3. col. 510.* fictae traditionis argumentum sumit a *cap. 2. de Consuet.*, ubi glebae traditio non fictionem continet, sed signum est datae possessionis, atque ejus veritatem ostendit. Quae traditio fit saepe per glebam, per herbam, per festucam, per cultellum, per ostium, in formulis antiquis, per panem, per librum. Atque ita annulus signum est foederis conjugalis, et veri matrimonii, vitta conjunctionis *can. 7. cap. 30. qu. 9.* Est autem praesumptio diligenter a fictione distinguenda.

(3) *Cap. 30. de Sponsal.* Sed hoc jus antiquatum esse monui *lib. 2. tit. 2. sect. 7. §. 105. p. 172.*

§. XXIX. Praesumptio *juris tantum* est ea, quam Jus probat tamquam verisimilem, non tamquam certam, et veram, adeout contraria probatione infirmari non possit. Ita haeres, qui inventarium non confecit, haereditaria bona distraxisse censetur; sed haec praesumptio contraria demonstratione tolli potest. Hujusmodi sunt pleraeque praesumptiones, de quibus agunt decretales in titulo *de Praesumptionibus*, et harum omnium propriae sunt formulae *videri, existimari, intelligi, haberi.* Praesumptio *juris et de jure* omnem respuit contrariam probationem (1); praesumptio *juris tantum* non eam sane respuit, sed probandi onus in illum transfert, qui habet contra se praesumptionem (2).

(1) *Cop. 30. de Sponsal., Cap. 4. Qui matrim. accusat.*

(2) *Leg. 24. ff. de Probat., cap. 10. de Praesump.*

§. XXX. Praesumptio hominis est conjectura ab indiciis nata, quae nulla certa lege continetur, eaque vel est levis, et temeraria, vel probabilis,

vel violenta. Levis, et temeraria praesumptio est, quae ex incertis oritur, levibusque argumentis, et quae nihil probat. Ad hoc praesumptionis genus referri possunt antiquae purgationes, quae vulgares dicebantur (1), quasque olim interdum adhibitae fuisse constat per aquam frigidam (2), aut ferventem (3), ferrum candens (4), monomachiam, seu duellum (5), et similia, quae cuncta a Summis Pontificibus merito damnata et improbata sunt (6).

(1) Vulgariam purgationum, quae etiam appellabantur *judicia Dei*, de quibus videndus Du-Cangius in *Glossar. verb. Judicium Dei*, multae erant species, quas a Longobardis, aliisque e Germania populis in Italiam invectas exponunt Gonzalez in *cap. 3. de Purgat. vulgar.*, Cajacius *lib. 1. Feudor. tit. 1. §. Si autem controversia opp. tom. 2. col. 1077. seq. ed. cit.*, Muratorius *Antiq. Italic. diss. 38. et 39.* Martenius *de Antiq. Eccl. rit. lib. 3. cap. 7.* aliique permulti. Longobardorum Rex Luitprandus *Leg. 3. Longob. de Hom. lib. hom. profitetur*, se propter suorum consuetudinem impiam illam legem duelli vitare non potuisse. Canones passim damnant has vulgares purgationes *can. 7. §. 1., can. 29. et 21. can. 2. quest. 5. c. 8. de Purgat. canonic.*, et titulus Decretalium *de Purgat. vulgar.* Tribuitur autem Gregorio M., *can. 7.*, quem mox laudavi; et certe prima ejus pars desumpta est ex ipsius Gregorii *Epist. 6. lib. 13. ad Brunicheldem Franc. Regin. opp. tom. 2. col. 1218. ed. Paris. cit.*, sed pars altera, ubi vulgaris per frigidam aquam, ignitamque ferrum probatio memoratur, pertinet ad epistolam Alexandri II., cujus initium est in *can. 11. caus. et quest. cit. post cujus can. 11. extrema verba pars posterior can. 7., continenter legenda est.* Revera Alexandro II. posteriorem hujus canonis partem tribuit Ivo *Part. 10 cap. 5. et Pamm. lib. 5. cap. 8.*, quod rectissime animadversum est a Romanis correctoribus, qui diligenter etiam notant apocryphos canones, qui in eam rem a Gratiano laudantur. Verum

alicubi ferventis aquae, aut ferventis ferri judicium permissum fuisse innuit Triburiensis Concilii canon apud Gratianum *can. 15. cap. 2. quaest. 5.*, cujus canonis sententia est in *C. 1. de Purgat. canon.* Sed quoniam haec indicia semper Romana Ecclesia aversata est, ea verba *ferventi aqua, aut candenti ferro* prudens Raymundus omisit. Vulgarium probationum vestigia usque ad extremam aetatem alicubi supertuisse tradit Van-Espanus *Jus. eccl. univ. par. 3. tit. 8. num. 37.* Vide etiam Ivonem Carnotensem *Epist. 74. opp. tom. 2. pag. 37. ed. Paris. 1647.*, et Cironium *Paratiil. in Decretal. de Purgat. vulgar.*

(2) Aquae frigidae judicium unum erat ex vulgaribus probationibus, quas Dei judicia appellabant. Gravioris alicujus criminis suspectus, aut accusatus, in aqua mergebatur, ac si supernataret, nocens, ac reus, contra si in imum delaberetur, innocens judicabatur. *Conligatur autem fune*, inquit Hincmarus *de Divort. Lothar.*, qui examinandus in aquam demittitur . . . qui ob duas causas conligari videntur, scilicet ne aut aliquam possit fraudem in judicio facere, aut si aqua illum velut innaxium receperit, ne in aquam periclitetur, ad tempus valeat retrahi. Similia habet vetustus Ordo apud Martenium *de Antiq. Eccles. rit. Ord. 8. l. 3 cap. 7.* Judicium hoc aquae frigidae etiam a monachis adhibitum narrat Mabillonius *Annal. Benedict. lib. 54. §. 112. tom. 4. p. 261. ed. Lucae. 1737.* Quibus autem ritibus, et caeremoniis judicium illud, ac cetera, de quibus mox dicam, perageretur, ostendant, praeter ceteros, Juretus in *Ivon. Carnaten. Ep. 74. pag. 154. seq. ed. Paris. 1647.*, Delrius *Disquis. magic. lib. 4. qu. 4. sect. 4.*, Pithoeus in *Glossar. ad Capitul. Caroli M. verb. Aquae ferventis etc.*, Balutius *Formul. Exorcisma. post Capitular. Reg. Franc. tom. 2. col. 445 seq. ed. Ven. 1733.*, Mabillonius *Analect. tom. 1.*, Martenius *de Eccles. rit. lib. 3. cap. 7. ord. 8. et 9.*, Muratorius *Antiq. Italic. Diss. 38.*

(3) Judicii, aut examinis aquae ferventis ratio haec erat. Criminis accusatus, ut se purgaret, manum in aquam ferventem nudato brachio immittebat, ac si il-

lam incolumem educeret , innocens ; si contra , reus pronuntiabatur.

(4) Criminis accusatus ferrum candens uuda manu tenere debebat , eaque incolumi iunocus , combusta vero reus habebatur. Judicium hoc ferri candentis dicebatur. Huic simile erat judicium vomerum ignitorum , per quos gravi criminis suspicione laborans audis pedibus transire debebat. In vita S. Henrici apud Surium *cap. 21. 14.* Julii scriptum est , hoc sibi judicium elegisse sanctissimam foeminae Cunegundam Henrici Imperatoris uxorem ; quamquam illud servorum proprium fuisse demonstrat Concilium Moguntinum ann. 847. *can. 24.* , apud Labbaeum *tom. 6. concil. col. 1045. ed. Venet.* Erat et judicium ignis , per quem transire debebat quisquis rei alicujus veritatem demonstrare cupiebat. Celebre illud , quod de Petro Monacho Vallis Umbrosae , qui *Igneus* appellatus , atque Albani Episcopus , et Cardinalis fuit , memoriae proditum est. Is ut ostenderet Florentinam Episcopum simoniace in eam sedem irrepsisse per medios ignes transivit , sicuti narrat Baronius *ad ann. 1063. num. 53. tom. 17. p. 249. ed. Lucae* , et Ughellius *Ital. sacr. Episc. Alban. num. 26. tom. 1. col. 251. ed. Venet. ann. 1717.*

(5) De monomachia , seu duello late agit Muratorius *Antiq. Italic. Diss. 39.* Erat et judicium crucis , ac panis et casei , quae duo similiter ad vulgares probationes referantur. Crucis judicium pluries memorant Capitularia Regum Francorum. Du-Cangius in *Gloss. verb. Crucis judicium* multis quaerit , quanam esset hujus judicii ratio , ac denique sic statuit , eos , qui hoc judicium subibant , expansis in crucis formam brachiis , ad crucem stare debuisse certo , ac defuncto tempore , ex. gr. donec Evangelium , aut aliqui psalmi recitarentur , qui si immobiles permanerent , innocui ; si vero caderent , aut crimen fateri ultro cogereantur , rei judicabantur. Judicium panis , et casei in eo consistebat , quod alicui panis , et caseum benedictum dabatur , ac si is utrumque ederet , atque in stomachum mitteret innocens , contra vero reus habebatur.

(6) *Can. 20. c. 1. quaest. 9. C. 8. de Purgat. canon.*

§. XXXI. Praesumptio probabilis oritur ex probabilibus conjecturis, quae prudentibus etiam viris persuaderi possunt; violenta ex judiciis, argumentisque gravissimis, quae fere claram probationem constituunt. Cunctae hominis praesumptiones pendunt ab arbitrio iudicis, cujus est pro animi sui religione judicare, quanta in singulis vis insit, et quanta iis fides tribuenda videatur. Coacervantur autem praesumptiones, et conjecturae, quaeque singulae forte inter se non movent, universae tamen connexae, atque conjunctae movere debent. Plus praestant praesumptiones in causis civilibus, quam in criminalibus, in quibus nemo ex solis conjecturis etiam vehementibus, condemnandus est (1); excepto crimine haereseos, cujus suspectus tamquam haereticus condemnatur, nisi omnem suspicionem excusserit (2).

(1) *Cap. 14. de Praesum.*

(2) *Cap. 13. §. Qui autem de Haeret., cap. 7. 8. eod. in 6.*

TITULUS X.

DE EXCEPTIONIBUS ET REPLICATIONIBUS.

- | | |
|--|--|
| I. Exceptiones peremptoriae, vel dilatoriae. | ctorem. |
| II. Peremptoriae litis finitae. | VIII. Exceptiones contra judicem. |
| III. Simpliciter peremptoriae. | IX. Dilatoriae exceptiones quando proponendae? |
| IV. Peremptoriae exceptiones quando proponendae? | X. Exceptio majoris excommunicationis. |
| V. Dilatoriarum exceptionum divisio. | XI. Effectus exceptionis. |
| VI. Dies feriati. | XII. Replicationes, duplicationes, triplicationes. |
| VII. Exceptiones contra a- | |

§. I.

Habet et reus arma sua, quibus in judicio adversus actorem utitur, eaque sunt exceptiones. Exceptio est actionis, vel intentionis exclusio. Ea si omnino perimit, ac tollit actionem, perpetua, et peremptoria; si tantum ad tempus agenti obstat, et causam ad aliud tempus, aut alium judicem, vel locum transfert, temporalis, et dilatoria appellatur.

§. II. Ex peremptoriis exceptionibus quaedam sunt, quae majorem vim habent, et ideo *peremptoriae litis finitae* dicuntur; ceterae *simpliciter peremptoriae* appellantur. Primi generis sunt exceptiones jurisjurandi, rei judicatae, transactionis. Hae litem jam compositam, atque e medio sublatam ostendunt, et exordium ipsum impediunt litis, ventantque ne frustra novum judicium instituatur (1).

Sed ut locum habeant hujusmodi exceptiones , necesse est , quod lis pridem extincta vel jurejurando , vel transactione , vel re judicata denuo inter easdem personas , de eadem re , atque ex eadem petendi causa instituat (2).

(1) *Cop. 1. de Lit. contest. in 6.*

(2) *Leg. 3. 12. 21. 23. 41. ff. de Except. rei judic.*

§. III. Exceptionum , quas *simpliciter peremptorias* dicimus , longe major est numerus , cum nulla fere sit actio , quae contraria exceptione submoveri , aut tolli aliquando non possit. Ad hoc genus referuntur exceptiones praescriptionis, doli mali , metus , et ceterae , quarum non exiguus est numerus, quaeque suis locis in utroque Jure singillatim explicantur. Hae non impediunt quidem ingressum litis , sed tamen perimunt , et vertunt actionem institutam.

§. IV. Peremptoriae exceptiones non modo ante litem contestatam , sed etiam postea in qualibet judicii parte ante rem judicatam (1), quin etiam interdum post rem judicatam in actione judicati recte opponuntur (2). Par est ratio exceptionum , quae impediunt exitum sententiae , ut si post eam actor acceperit , quod petebat , recte reus exceptionem avertit.

(1) *Leg. 4. et 8. Cod. de Except. , Leg. 2. Cod. Senten. rescind. non poss.*

(2) *Leg. 11. ff. ad S. C. Macedon. , L. 1. §. 18 , Leg. 20. §. ult. de Re judic. Confer Cajacium in C. 20. de Test. opp. tom. 6. col. 846.*

§. V. Dilatoriae exceptiones aut ipsam respiciunt causam , aut actorem , aut judicem. Prioris

generis sunt exceptiones illae, quae proponuntur contra libellum, quod sit vel ineptus, vel obscurus, quod non cesserit solutionis dies, quod feriarum tempore sit emissa citatio.

§. VI. Feriati dies sunt illi, quibus lege agere non licet, et omnis judicialis strepitus conquiescit (1). Feriarum quaedam civiles, quaedam ecclesiasticae dicuntur; hoc est quaedam hominum, quaedam religionis causa institutae sunt. Illae variae sunt pro more, et legibus populorum, praecipuae tamen pertinent ad commoda messium, et vindemiarum (2), hae sunt *dies devotionum* et *orationum* (3), seu festi dies, quibus religioni operam dare oportet, et quibus communes dies opponuntur (4). Jure civili judiciales actus feriatis diebus exerceri non possunt (5); nisi litigantes sua sponte ad judicem veniant (6), sed jure canonico, ne ipsis quidem litigantibus consentientibus, eosdem actus festis diebus expedire licet (7).

(1) Eleganter Ovidius *Fast. lib. 1. vers. 73. opp. tom. 3. pag. 15. ed. Amstelædami 1702.* hos dies expressit his versibus:

*Lite vacent aures, insanaque protinus absint
Jurgia, diffir opus, livida lingua, tuum.*

Ideo a clericis dies omnes hebdomadae feriae dicuntur, quia clerici nullo die a divinis vacare debent; sicut etiam Flaminibus omnes dies feriati erant, apud A. Gellium *Noct. Attic. lib. 10. cap. 15. p. 531. edit. Lugdun. Batav. 1666.*, quod recte observavit Baronius *ad an. 44. num. 88. tom. 1. pag. 316. edit. Lucae.* Atque hoc feriae nomen primum hebdomadae Paschalis diebus datum fuisse, animadvertit Cironius in *Paratitl. decretal. de Feriis num. 5. p. 147. ed. Vindobon. 1761.*; quibus diebus omnes Christiani sese ab opere servili abstinere, et sacrosancta mysteria percipere debebant. Concilium

Mavisonense II. can. 2. apud Labſaeum tom. 6. col. 674. Sed ſeriae vocabulum diebus affixum apud Chriſtianos hac aetate antiquius eſt. Nam eas memorat Tertullianus *de jejuniis cap. 2. pag. 545. ed. Venet. 1744.*, cum inquit: *proinde nec ſtationum, quae et ipſae ſuos quidem dies habebant quartae ſeriae, et ſextae.* Paſchale hoc tempus feriatum feciſſe Conſtantinum M., tradit Alexander Monachus *de Invent. S. Crucis* apud Cironium *loc. cit. num. 6.*; et forte exemplo harum ſerialium, reliqui etiam dies dicti ſunt ſeriae, diſtinctione tamen habita inter ſerías ſimplices, et ſolemnes *C. ult. de Feriis*. Sane lex Conſtantini memoratur apud Joſephum Scaligerum *de Emend. tempor. pag. 776. ed. Genuae 1629*, in qua duae hebdomadae paſchales, quarum altera Paſcha antecedit, altera ſequitur, ab opere faciundo excipiuntur. Nam majores noſtri Paſchali ſolemnitati integros dabant dies quindecim, hoc eſt hebdomadam, quae Paſcha antecedebat, et hebdomadam, quae ſequebatur; illa *παſχα σταυρωſιμου paſcha crucis*, haec vero *παſχα αναſταſιμου paſcha reſurrectionis* vocabatur. Utriusque generis exempla collegit Joannes Gaſpar Svicerus *Theſaur. eccles. tom. 1. p. 304. et t. 2. p. 1014. ed. Amſtelaed. 1682.* Generale nomen Paſcha, quod ex Hebraeo *peſach*, quod *transitum* ſignificat, utrumque comprehendit. Nam Paſcha Chriſtianorum tum paſſionem, tum reſurrectionem includit Chriſti Servatoris, qui eſt vere agnus paſchalis, qui pro noſtrum ſalute ſeſe praeſbuit hoſtiam ad ſacrificium. De his quindecim diebus Paſchalibus lex eſt Valentiniani, Theodoſii, Arcadii *Leg. 2. Cod. de Feriis*, in qua habentur haec: *Sanctos quoque Paſchae dies, qui ſepteno vel praecedunt numero, vel ſequuntur, in eadem obſervatione numeramus.* Conſule Gothofredum in *eamd. Leg. 2. tom. 1. Cod. Theod. p. 142. ed. Lipſiae 1736*, ubi multa habes antiqua teſtimonia, ex quibus conſtat, quare reverentia majores noſtri quindecim hos paſchales dies, quos rebus dabant Religionis, proſequerentur. Memorant etiam quindecim hos dies, tamquam ubique feriatos, Papinianus *Reſpons. tit. 12. apud Schultingium Jurispr. vet. ante-juſtin. p. 835. ed. cit. S. Auguſtinus Serm. 259. in die domin. oct. Paſch. lib. 6. col. 1064. tom. 5. par. 1.*

ed. Venet. 1731. S. Joannes Chrysostomus, S. Epiphanius, ceteri, quos laudat Gothofredus loc. cit.

(2) Harum feriarum mentio est apud Statium Silv. libr. 4. vers. 39. seq. p. 198. ed. Lugd. Batav. 1671.

*Certe jam Latiae non miscent jurgia leges,
Et pacem piger annus habet, messesque reversae
Demisere forum.*

A. Gellium Noct. Attic. lib. 9. cap. 15. p. 496. edition. Lugdun. Batav. 1606., Plinium lib. 8. Ep. 21. p. 212. edition. Oxonii 1703. Ulpianum L. 1. 2. 3. ff. de feriis, S. Augustinum Confess. lib. 9. cap. 2. opp. tom. 1. col. 157. ed. Venet. cit., in can. 2. cap. 15. qu. 4. in L. 2. et 7. Cod. de Feriis. In L. 2. Cod. Theod. de Feriis omnes dies juridici esse jubentur, exceptis duobus mensibus messium, et vindemiarum, Kalendis Januariis, natalibus urbium maximarum, Romae, et Constantino-
polis, natalibus Imperatorum, quibus et editi in lucem, et imperium auspicati erant, quindecim diebus Pascha-
libus, qui et ecclesiastica, et civili lege feriatum erant, et omnibus diebus Solis per integrum annum. Multa de feriis tum civilibus, tum ecclesiasticis habent Binghamus Antiq. eccl. libr. 20. cap. 1. et seq. tom. 9. p. 1. et seq. edit. Halae Magdeburg. 1760., Gothofre-
dus in cit. L. 2. Cod. Theod. de Feriis tom. 1. p. 140. seq., et Selvagius Antiq. Christian. l. 2. c. 4. §. 2.

(3) Ita hi dies appellantur in L. ult. Cod. Theod. de Navicul.

(4) L. 2. Cod. de Stat. et imagin. De feriatis die-
bus agit Gregorius IX. in cap. ult. de Feriis. Inter fe-
riatos festosque dies frequentiores sunt, quos Apostolus
Apocalyps. 1., et tota Ecclesia Dominicos vocat, a
quibus omnis hebdomada initium sumit. Et quamquam
Romano more quivis dies a media nocte initium, me-
diaque nocte, quae sequitur, finem accipiat L. mo-
re Romano 8. ff. de feriis cap. 24. de offic. et po-
test. delegat., tamen quod attinet ad reverentiam, ve-
nerationem, observationem horum dierum canon. quod
die 75. dist. can. 1. de consecrat. dist. 3. cap. 1. de
feriis statutum est, dominicorum dierum venerationem

incipere pridie vesperi, et desinere sequenti vespere, nisi aliud locorum consuetudine receptum sit, ut *cap. 2. de feriis*. Quod inductum est exemplo solemnitatis Paschae, quam Dominus inter duas Vesperas ab Ebraeis celebrari praeceperat.

(5) *L. 2. C. de Feriis.*

(6) *L. 8. Cod. eod.*

(7) *Cap. ult. de Feriis.* Sed obstare videtur *C. 6. de Dolo et contumacia*, ubi habentur haec: *Ipsi mandavimus, ut usque ad Dominicum . . . per se, vel procuratorem . . . ad praesentiam nostram accederet*; itemque *cap. 15. de Accusat.*, ubi scriptum est, *Episcopum ad festum Dominicae peremptorie nos meminimus citavisse*. Has decretales quidam ita explicant agentes, usque ad, et ad idem saepe esse quod *infra*, ut in *C. 9. de Fid. Instrum.* Sed aliud ex *cit. cap. 6.* non obscureprehenditur, ut proinde alia earum Decretalium sententia sit. Scilicet utroque loco reus citatus fuerat jussu Summi Pontificis, qui derogaverat legi, quae festis diebus judicia exerceri vetabat. Ceterum disertissime Gregorius IX. in *cit. C. ult. de Feriis* debere inquit *judicalem strepitum diebus conquiescere feriatibus*; idemque jam erat ante Gregorium jure canonico constitutum. Nam Concilio Compendiensi, quod descriptum est in *C. 1. de Feriis, in eis*, inquit de Dominicis diebus, *mercatum minime fiat, neque placitum hoc est judicium*, quo sensu illud vocabulum saepe usurpatur in Capitularibus Regum Francorum, in legibus Ripuardorum, Longobardorum, aliarumque gentium, unde ortum est verbum *placitare*, nimirum judicio contendere. Idem habet Concilium Triburiense *ann. 895. Can. 35. tom. 11. Concil. col. 647*, et Aquisgranense II. *Can. 18. tom. 9. col. 840. Collect. Labbaei ed. Ven. cit.* Quod autem addit Gregorius, judiciales actus festis diebus gestos plane irritos esse, id forte ante ipsum nullo canone expresse statutum fuerat; quamquam id esset nominatim sancitum a Jure civili in *L. 1. ff. de Feriis*, et in *L. 2. Cod. eod.* Sed quoad dies festos Gregorius Jus civile emendavit, quoniam, ne cum consensu quidem litigatorum, iis diebus judiciales actus fieri permisit.

§. VII. Ad actorem pertinent exceptiones, quibus reus utitur contra personam actoris, aut procuratoris, ut si apponat, alterutrum, vel utrumque esse excommunicatum, proscriptum, pupillum, aut alio juris, vel naturae impedimento in judicio stare prohibitum, procuratorem mandato carere, aut non recte esse constitutum.

§. VIII. Postremo exceptiones contra judicem duobus ex fontibus hauriuntur, aut quia non est competens, sive legitimus, aut quia suspectus est. Judex non competens, sive non legitimus ille dicitur, qui vel extra territorium suum jus dicit, vel inter homines sibi non subjectos, vel sane jurisdictionis modum excedit (1). Suspectus autem judex est, quia cognatus, affinis, conjunctus actori, quia cum reo graves inimicitias gerit, quia juris imperitus, quia eidem causae patronus fuit, quia similem ipse in alio judicio litem habet (2).

(2) Confer titulum Codicis *Si non a competen. judic.*

(2) *Cap. 36. de Appellat.* Vide etiam Capitularia Caroli M. *Leg. 7. cap. 240. col. 718. tom. ed. Balutii Venet. 1772.*

§. IX. Omnes dilatoriae exceptiones inter exordia litis (1), hoc est ante litem contestatam opponendae sunt (2), nisi postea suboriantur, vel postea innotescant (3). Quin etiam ne dolo, et malitia rei judicium in longum trahatur, certus a judice dandus est dies dilatoriis exceptionibus opponendis; quo elapso illae tantum proponi possunt, quas nova obtulit causa, quasque reus tunc sibi primum fuisse cognitae juratus affirmaverit (4), itemque illae, quae

irritum, et inane iudicium faciunt (5). Sed praesertim initio litis, ante ceteras dilatorias exceptiones opponi debet praescriptio fori, ne quis, ea omitta, si ad aliquem actum in iudicio pergat, in iudicem consensisse videatur (6): nisi justa recusandi iudicis causa deinceps exoriat (7). Excipitur clericus, qui, uti demonstratum supra est, jurisdictionem laici iudicis prorogare non potest.

(1) Sic Julianus Imperator in *Leg. 12. Cod. de Except.*

(2) Haec quidem Canonici, et Civilis Juris regula est in *Leg. 4. de Jurisd. omn. jud.*, et in *cit. Leg. 12. cap. 20. de Senten. et re judic.*

(3) *Cap. 4. de Except.*

(4) *Cap. 4. cit.*, cap. 6. *Qui matrim. accus. pos.*

(5) Huc spectat exceptio falsi Procuratoris, seu mandato carentis, quae non solum ante sententiam, verum etiam postea potest objici, utpote qua probata iudicium nullum, et nullius momenti controversiae reputantur, ut inquit Pontifex, in *cap. 4. de Procurat.* Eadem ratio est exceptionis revocati procuratoris, cum mandatam expiret, posteaquam revocatum est *C. 3. eod.*

(6) *Leg. 1. et 2. ff. de Judic.*

(7) *Cap. 21. et 25. de Offic. delegat.*

§. X. Sola exceptio majoris excommunicationis in qualibet parte litis opponi potest, etiamsi reus eam praefinito tempore omiserit; quod jure singulari cautum est, ne quisquam in periculum Animae suae excommunicato communicare cogatur (1). Tantum post appellationem proposita haec exceptio iudicii cursum non impedit (2); sed antea iudex ipse ex officio debet publice excommunicatum a iudicio repellere, quamquam nemo hujusmodi exceptionem objecerit (3). Quoniam vero litigatores exceptione excommunicationis ad vexandos adversarios abutebantur,

sapientissime ab Innocentio IV. certus est constitutus ejus opponendae modus (4). Scilicet reus, qui illa contra actorem exceptione utitur, exprimere speciem excommunicationis, nomenque excommunicatoris debet, illamque demonstrare intra dies octo; secus progrediendum judici in causa est, ac reus in expensas condemnandus. Quod si iterum haec exceptio objiciatur, atque probetur, actor a judicio repellitur, sed valent ea quae gesta sunt; post duas vero vices non amplius eadem exceptio, nisi ob justam causam, proponi potest.

(1) *Cap. 12. de Except.*

(2) *Cap. 11. de Except.*

(3) *Cap. 12. cit., et C. 1. eod. in 6.*

(4) *Cap. 1. de Except. in 6.*

§. XI. Duo potissimum parit exceptio; primum, quod ea recte probata actionem excludit sive ad tempus, sive perpetuo, prout exceptio dilatoria, aut peremptoria est (1); alterum, quod reus exceptione actor efficitur (2). Propterea quemadmodum ad actorem probandi onus pertinet, ita et reus probare debet exceptionem suam (3); quod si ipse non praestet, tamen actor non liberatur ab onere probandi, quoniam reus, qui excipit, actoris intentionem non censetur confiteri (4).

(1) *Leg. 2. ff. de Except.*

(2) *Leg. 1. ff. eod.*

(3) *Leg. 19. et 25. ff. de Probat.*

(4) *Leg. 9. ff. de Except.*

§. XII. Adversus exceptiones comparatae sunt replicationes, quae sunt adjumenta, et praesidia,
DE R. INSTIT. CAN. TOM. III.

quibus actor utitur adversus reum, ut exceptionem tollat (1). Nam replicatio est exceptionis exclusio (2), quae tametsi a parte actoris veniat, tamen est potius exceptio, quam actio; quia opponitur excipienti reo, qui in exceptione actor est (3). Quemadmodum vero rei exceptionem removeat actoris replicatio, ita hanc excludit duplicatio rei, atque hanc rursus actoris triplicatio; et sic *deinceps multiplicantur nomina, dum aut reus, aut actor objicit* (4). Non enim jure civili definitus est modus defensionum, quae ab actore, et a reo proponuntur. Sed in foro Ecclesiastico hae duplicationes, triplicationesque non obtinent: verum iudex ex officio iis modum constituit, et causam definit.

(1) *Leg. 3. Cod. de Except.*

(2) *Leg. 2 §. 1. ff. de Except.*

(3) *Leg. 1. ff. eod.*

(4) *Leg. 2. §. 3. ff. de Except.* Quo loco Ulpianus replicationi non duplicationem, ut Tribonianus §. 1. *Instit. de Replicat.*, sed triplicationem opponit. In eadem cum Ulpiano causa est Julianus in *Leg. 7. §. Curator, ff. de Curat. furios.* Ne a duobus his Jurisconsultis Tribonianus dissentiat, sunt qui ex ejus auctoritate utrumque illum Ulpiani, et Juliani locum emendandum putant: sed id quidem est contra omnium veterum exemplarium fidem. Meo iudicio, nihil est, quod ea de re multo sermone laboremus. Quae Triboniano est *duplicatio*, eam antiqui Jurisconsulti *replicationem* appellabant; et certe *replicare* est rursus plicare, idemque prorsus ac *duplicare*. Merito igitur replicationem *triplicatio* excipere debebat.

TITULUS XI.

DE ORDINE COGNITIONUM.

- | | |
|--|---|
| I. Quales exceptiones certo ordine cognoscendae? | bas in rebus committatur? |
| II. Quaestiones praejudiciales. | VIII. Spolium actionis, et exceptionis loco proponitur. |
| III. Causae incidentes. | IX. Spoliatus ante omnia restituendus. |
| IV. et V. Causae praeparatoriae, earumque species. | X. et XI. Quando spoliatus non restituitur? |
| VI. Spolium quid? | |
| VII. Quemadmodum, et qui- | |

§. I.

Exceptiones, quae a reo proponuntur, plures saepe causas, et quaestiones inducunt, quae certo ordine a legibus definito tractandae sunt, qui *ordo cognitionum* appellatur (1). Causae autem huiusmodi sunt vel *praejudiciales*, in quibus ab unius decisione alterius decisio pendet; vel *incidentes*, quae nimirum incident in ipsa lite, cujus gratia iudicium exercetur; vel *praeparatoriae*, quarum decisio alterius decisionem faciliorem reddit; vel quae quidem *ex eodem negotio* oriuntur, sed tamen *ad diversa* tendunt, neque a se invicem pendunt.

(1) Cognitionis nomen proprie ad principem, vel ad magistratus refertur, cum princeps sua sponte cognoscit, vel magistratui cognitionem committit: vel etiam ipsi magistratus ex suo officio cognoscunt, quae cognitio legitima, et extraordinaria appellatur, uti patet ex titulo *ff. de Extraord. cognit.* Hinc illud Suetonii in

Claud. cap. 15. p. 450. ed. Traject. ad Rhen. 1691. Alium interpellatum ab adversario de propria lite, negantemque cognitionis rem, sed ordinarii juris esse, agere causam confestim apud se coegit; ita intelligendum est, negantem ad principis cognitionem rem pertinere, atque agentem, ipsum non cognoscere, sed iudicem dare debuisse, apud se causam agere coegit. Scilicet cum ordine, et jure in jurisdictione recepto Praetor liceret iudicem dare, quod est jurisdictionis Leg. 3. ff. de jurisd., ac dare etiam pro potestate solitus esset, extraordinariam esse oportuit cognitionem, quam ipse cogente officio suscipiebat, et quam alteri committere non poterat. Atque huc equidem referendum arbitrò quod de Nerone narrat Tacitus Annal. lib. 13. cap. 51. tom. 1. p. 890. ed. Amstelæd. 1673., quem ait edixisse, ut Romae Praetor, per provincias qui pro Praetore, aut Consule essent, jura adversus Publicanos extra ordinem redderent. Alii extraordinarias cognitiones vocant, de quibus nulla ordinaria, certoque jure actio erat constituta, quaeque a Praetore extra ordinem, et ex aequitate suscipiebantur, easque opponunt ordinariis cognitionibus, quae ordinariam habebant actionem, certaeque jure nitebantur. Contra aliis ordinaria cognitio est, quae juriis datis competit. Consule Donellum de Jur. Civil. lib. 8. cap. 2. num. 4. opp. tom. 2. col. 693., et lib. 17. cap. 22. num. 9. et 10. tom. 4. col. 1351. et seq. edit. Lucae, et Scipionem Gentilem de Jur. l. 2. c. 20. opp. l. 3. p. 187. et seq. ed. Neap. 1764. Verum facultas judicandi, sive ordinaria, sive extraordinaria vulgo cognitio dicitur Leg. penult. ff. de Jur. Omn. jud. Quare titulus hic, qui in Gregorianis Decretalibus est de Ordine cognitionum, in prima compilatione inscribitur de Ordine judiciorum, quasi idem judicium, et cognitio sit, ut in cap. 1. et penult. de Ordin. cognit. Cognitionales sententias memorat. Leg. unic. cod. de Senten. praet., et Leg. 13. cod. de Sent. Praef. praet. et Leg. 13. cod. de Sent. et interlog., quae scilicet causa cognita feruntur; et in leg. ult. §. Illud etiam cod. de Temp. et reparat. occurrit verbum cognitionaliter, quo significatur id, quod parte utraque praesente, et adhibita causae cognitione gestum est.

§. II. Praejudiciales quaestiones noscendae, definiendaeque sunt, antequam causa altera, quae ex illis pendet, cognoscatur. Ita si qua mulier affirmet, se cum certo homine iniisse matrimonium, isque excipiat, illud consistere non potuisse propter impedimentum cognationis, antea haec exceptio cognoscenda est; quoniam ea cognita, ac definita matrimonii quaestio dirimitur (1). Similiter exceptio excommunicationis ante causam, de qua praecipue quaeritur, expendenda est (2); et si petenti haereditatem, et successionem jure cognationis opponatur status natalium, primum de natalibus, quoniam haec quaestio praejudicialis est, postea de successionem quaeritur (3).

(1) *Cap. de Ordin. cognit.* Sed tamen recte est, vereque animadversus a Jacobo Cujacio *in cit. cap. 1. opp. t. 6. col. 802. edit. citat.*, id quidem obtinere, cum reus actoris intentionem confitetur, verumtamen praejudicalem, et peremptoriam exceptionem proponit. Secus enim cum reus non confitetur actoris intentionem, non ante est probanda exceptio, sive dilatoria, sive peremptoria, quam actor probaverit intentionem suam *Leg. 9. eod. de Praescription. long. tempor., Leg. 9. Cod. de Except. seu praescript. Leg. 19. cod. de Probat*, nimirum quia actore non probante reus absolvitur, quamquam ipse exceptionem suam non probaverit *Leg. 4. cod. de Eden., C. 3. de caus. possess.*

(2) *Cap. 19. de Judic.*

(3) *Cap. 3. de Ordin. cognit.*

§. III. Causae incidentes ab eodem cognoscendae sunt iudice, cujus est de praecipua causa judicare, quamquam ipse minus competens esset, si de iis praecipue iudicium institutum fuisset (1): nisi

causa civilis incidens sit ecclesiastica, quam ne incidenter quidem cognoscere laicus iudex potest (2), licet contra integrum sit iudici ecclesiastico de causa civili incidente iudicare (3).

(1) *L. 1. Cod. de Ord. judic., L. 3. Cod. de Judic.*

(2) *C. 3. de Ordin. cognit., C. 7. Qui filii sint legit.*

(3) *Cap. 3. de Donat. inter vir. et uxor.*

§. IV. Causam quoque *praeparatoriam* prius definiri, iudiciali ordini aptum, et conveniens est (1). In quaestionibus civilibus, quae diversae sunt, neque a se invicem pendent, licet ex eodem negotio oriantur, videndum est, quomodo propositae sint. Si per modum *actionis* separato iudicio, utraque actio in proprio foro expeditur; si per modum *re-conventionis* in eodem foro, vicissim tractanda, atque eadem sententia utraque definienda est (2); si per modum *exceptionis peremptoriae*, illa adhibenda ratio est, quam in his exceptionibus cognoscendis observandam esse, superiori loco demonstravimus.

(1) *L. 35. ff. de Acquir. et amitt. posses., L. 13. Cod. de Rei vindic.*

(2) *Cap. 2. de Ordin. cognit.*

§. V. Si civiles et criminales causae concurrant, distinguendum est utrum altera praejudicialis sit, an semet invicem non attingant. Si causa praejudicialis sit, ea primum cognoscenda est, sive civilis (1), sive criminalis sit (2). Si altera causa alteram non attingat,

gat , neque ab ea pendeat , criminalis quae majoris est momenti , ante civilem definienda est (3).

(1) *L. 3. 5. et 6. Cod. de Ord. cognit.* Atque huc referenda est *L. 4. C. de Ordin. judic.* , ubi Constantinus inquit *saepe civilem causam prius esse cognoscendam* , si causa criminalis inde pendeat , quo spectat *L. 1. Cod. de Appellat.*

(2) *L. 14. Cod. de Testib.*

(3) Id quidem generatim est verum , cum semper criminalis quaestio gravior habeatur. Sed interdum iudex utramque causam et civilem , et criminalem uno iudicio absolvit , cum scilicet actor quaestionem utramque proposuit *L. 4. §. 4. ff. Fin. regund. L. 1. ff. de Publ. judic. L. un. C. Quand. civ. de crimin. praejud.* Quod si actio criminalis principaliter est proposita , et reus civilem quaestionem movet , primum illa , tamquam gravior , noscenda est *L. 5. §. 1 ff. ad L. Jul. de Vi publ. , L. 33. C. ad L. Jul. de adulter.* Quod etiam dicendum videtur , si quaestio civilis instituta sit , ac reus actorem criminis accusaverit ; nam causa civili tamdiu supersedendum est , quamdiu criminalis absoluta fuerit *L. 4. C. de Ordin. judic.*

§. VI. Sed et exceptio spoli hoc praecipuum habeat , ut ea sit expendenda , antequam proposita actio cognoscatur (1). Est autem spolium facinus indignum , et iniquum , quo quis ex rei suae possessione , vel quasi dejicitur. Itaque ad spolium utrumque requiritur , quod quis habuerit rei possessionem , vel quasi , et quod ea per injuriam ablata sit (2).

(2) *Cap. 2. et ult. de Ord. cognit.* Est autem a jure canonico inductum spoli iudicium ; ut quis recuperet possessionem , unde injuria dejectus est , eoque latius explicatum est civile interdictum *unde vi* , cui non omnia

ea de re satis considerata , et provisæ erant. Consule *Vitatum Vocabul. jur. verb. Spolium* , et Voetum in *Pandect. lib. 43. tit. 16. num. 7.*

(2) *Cap. 10. de Offic. et potest. jud. deleg. C. 17. de Restit. spoliat.*

§. VII. Committitur autem spolium in rebus tum immobilibus, tum mobilibus (1), atque etiam in juribus (2); neque vero refert, an vis, dolusve intervenierit, quoniam sola culpa, et bona fide committi potest. Etiam judex spoliî reus est cum neglecto juris ordine alicui possessionem adimit (3), neque a spolio alienus est, qui illud mandavit, vel ratum habuit (4), imo etiam qui rem spolio ablatam scienter accepit (5), non vero tertius bonæ fidei possessor.

(1) *C. 2. de Restit. spoliat. in 6. C. 6. de Sepult., C. 2. 3. 4. 8. et 13. de Restit. spoliat., C. 10. de Probat.*

(2) *Cap. 3. de Caus. pos. et propriet., C. 6. de Sepultur.* Spolium latissime patet, adeo ut qui qualicumque possessione, vel quasi inique est privatus, spoliatus habeatur. Si uxor a marito divertit, maritus spoliatus dicitur *C. 8. de Restit. spoliat.*, modo per legitimum matrimonium in ejus domum traducta fuerit, *C. 12. eod.* Mulier spoliata est, quæ a marito expulsa, et domo ejecta est *C. 10. et 12. eod.*, qui suo se beneficio, aut jure per vim, vel inique abdicare coactus est *Cap. 2. et 3. eod.*, quibus denegantur pensiones, quas hactenus perceperunt *Cap. 9. eod.* qui excluduntur ab electionibus, quibus hactenus interfuerunt *C. de Caus. possess. et propriet.*, qui injuria extra parochiam, vel ubi sepultura facienda erat, cadaver intulerunt *C. 6. de Sepultur.*, qui propter nullum contractum possessionem amiserunt.

(3) *Cap. 7. de Restit. spoliat., L. 22. de Offic. et potest. jud. delegat.*

(4) *Cap. 15. de Restit. spoliat.*

(5) *Cap. 14. eod.* Jure Civili interdictum *unde vi* datur tantum adversus eum, ad quem res ab alio violententer ablata pervenit *L. 7. de vi et vi armat.* Nam hoc interdictum scriptum est in personam hoc modo; *unde tu illum vi dejecisti.* Sed jure civili derogat Caelestinus III. in *cit. cap. 18.*, ubi interdictum *unde vi* concedit etiam adversus eum, ad quem non ignarum vitii res ab alio per vim ablata delata est. Fateor equidem Jns civile etiam adversus haeredem praedonis hoc idem interdictum tribuere *L. 1. §. ult., et L. 2. §. de vi et vi arm.,* quia nimirum haeres successor universalis est, ad quem omne defuncti vitium deferitur *L. 11. ff. de Divers. et temporalib. praescript. . L. penult. Cod. de Acquir. poss.;* sed non item concedit adversus emptorem, aliumve successorem singularem, qui non succedit in vitium ejus, a quo rem obtinuit. At jure canonico malae fidei emptor succedit etiam in vitium venditoris; et ideo nihil refert, sive quis rem per vim abstulerit, sive ab alio ablatam sciens prudens retinuerit. Errant autem vehementer qui hanc Caelestini constitutionem non pertinere existimant ad interdictum *unde vi*, sed potius ad beneficium editum in *Can. Redintegranda c. 3. qu. 1.*, quod quidem beneficium perpetuum est. Nam si id verum haberetur, nullum esset inter jus canonicum, et civile discrimen, quoniam ea in re eadem esset juris utriusque regula; at vero Caelestinus *cit. c. 18.* expresse profitetur, sese jure civili derogare, uti patet ex verbis *non obstante juris civilis rigore sancimus etc.* Non ignoro, quam multae sint turbae de interpretatione *Can. Redintegranda cap. 3. qu. 1.* Sed mihi perspicuum videtur, eum Canonem id velle, quod etiam jure civili sancitum est, ut quamquam interdictum *unde vi* annale sit *L. 1. ff. de vi et vi arm.,* tamen perpetua sit persecutio rerum vi ablatarum *L. penult. ff. de interd.* Nihil dico de fide, et auctoritate ejusdem canonis, quem Gratianus adscribit Joanni I. P. in *Ep. ad Zachariam Archiepisc.*, sed Joannis revera non est. Consule Berardum *Gratiani canones genuini etc. par. 2. t. 1. c. 50.*

§. VIII. Spolium vel exceptionis, vel actionis loco proponitur. Exceptio pertinet ad repellendam

intentionem actoris (1), qui non auditur, nisi primum rem injuria ablatam restituat (2), aequè spoliante contra spoliatum ex quacumque causa agentis opponi potest, nisi de causa ecclesiastica egerit (3). De tertii spolio excipere nequit reus, nisi in criminalibus, si demonstraverit, sibi violenter rem universam suam, vel majorem ejus partem ademptam fuisse (4). Exceptio autem probari debet intra dies quindecim, posteaquam proposita est, ne forte veritatur in fraudem, et judicii cursus retardetur (5).

(1) *Cap. 2. de Ordin. cognit.*

(2) *Cap. 16. de Restit. spoliat.*

(3) *Cap. 1. de Restit. spoliat. in 6.*

(4) *Cap. 1. cit.*

(5) *Cit. C. 1. de Restit. spoliat. in 6.*

§. IX. Actio spoliis eo spectat, ut spoliato res oblata ante omnia restituatur. Itaque nulla contra eum opponi potest exceptio, quae ad petitorium pertineat, veluti dominii (1), renunciationis (2), quod canonice non sit institutus (3), quod crimen commiserit (4). Adeo sane leges odio habent, improbantque spolium, ut, *praedo etiam secundum rigorem juris sit restituendus* (5); quia nec exceptionis spoliis antea commissi habenda ratio est, sed tantum vis inspicitur, quae postremo illata fuit. Quinimo non tantum res ablata spoliato restituitur, aut ejus loco aestimatio datur, sed etiam sarcienda sunt damna, ac restituendi fructus a spoliante percepti, quin etiam percipiendi, si spolium vi, aut dolo malo patratum sit (6). Quorum probationem, atque aestimationem spoliatus jurejurando peragere potest (7).

(1) *Cap. 1. de Restit. spoliat.*

(2) *Cap. 2. et 3. eod.*

(3) *Cap. 5. eod.*

(4) *Cap. 1. 6. eod.* Atque hoc est, quod dici solet, spoliatum ante omnia restituendum esse, hoc est nulla audita exceptione, vel objectione; satis est, quod actor spoliatus fuerit *L. 1. §. 30. de vi et vi arm.*

(5) *Cap. 5. eod. L. 12. et 18. ff. de Acquir. vel amit. possess.*

(6) *Cap. 51. de Appellat., C. 11. de Restit. spoliat.* Verum gravis inopia spoliantis, qui alienum restituere nequit, nisi primum ipse suum recuperet, impedimento est, quominus spoliatus statim rei suae fructus obtineat *cap. 16. de Restit. spoliat.*

(7) *Cap. 7. de Illis quae vi met. caus. fiunt.*

§. X. Atque haec quidem regula ejus est, ut nulla exceptio agenti de spolio opponi possit. Verum extra ordinem exceptiones admittuntur. Sic audienda est exceptio proprietatis, vel quae petitorium respicit, ubi actor consentit (1). Contra spoliacionem admittitur exceptio spoli, si actor in alia causa reum spoliavit, adeout probationes super hac exceptione primum noscendae sint, quibus absolutis, reus actori de spolio agenti respondere non cogitur, nisi ab ipso restitutus fuerit, quoniam exceptio spoli ex earum numero est, quae litis ingressum impediunt (2). Exceptio consanguinitatis opponi potest marito, a quo uxor discessit, si illico demonstrari queat (3), si graviolem indagacionem postulat, rejicitur, et restitutio decernitur (4). Si actor possessorium, et petitorium cumulat, recusare nequit exceptiones, quae petitorium respiciunt (5).

(1) *Cap. 1. de Restit. spoliat.*

(2) *Cap. 2. de Ordin. cognit.*

(3) *Cap. 13. de Restit. spoliat.*

5

(4) *Cap. 10. eod.*

(5) *Cap. 2. de Caus. possess. et propriet.*

§. XI. Simili modo audienda est exceptio deficientis possessionis (1), vel etiam quod quis ad possidendum minime aptus, et idoneus fuit, propterea restituendus non est laicus, qui ex spiritualium possessione dejectus est. Idem sit iudicium de exceptione vitiosae possessionis, cui jus commune aperte adversatur. Ita qui spoliatus est decimis, quas se in aliena paroecia habuisse contendit, non restituitur, nisi primum evidenter ostendat, jure se earum possessionem obtinuisse (2). Neque dissimilis ratio est exceptionis privatae occupationis in jure permissae, ac justae defensionis. Licet enim statim vim vi repellere, nec vis illata dicitur ab eo qui illico rejicientem rursus dejicit (3). Eodem loco est exceptio damni irreparabilis. Ita mulier non statim viro restituenda, si insidias suae vitae factas opponat, sed interim in loco tuto commorari debet (4), nisi maritus idoneam praestet cautionem, per quam illi consulatur (5). Scandali quoque exceptio admitenda, si evidens est; quoniam ut publica offensio, seu scandalum removeatur juris regulae negliguntur.

(1) *Cap. 2. de Restit. spoliat. in 6.*

(2) *Cit. Cap. 2.*

(3) *Cap. 12. de Restit. spoliat. L. 3. §. Cum igitur ff. de vi et arm. L. 12. §. 1. ff. Quod met. caus.*

(4) *Cap. 8. de Rest. spoliat.*

(5) *Cap. 13. eod.*

TITULUS XII.

DE MUTUIS PETITIONIBUS.

- I. Mutua petitio quid? IV. A quibus recte proponatur?
 II. Quomodo fiat?
 III. Ejus finis compensatio. V. Ejus effectus.

§. I.

Deductus in judicium reus non solum armis defenditur exceptionum, sed etiam petere a iudice potest, ut sibi ex actore justitia exhibeatur; quod fit mutuis petitionibus. Mutua petitio est mutua actio, seu reconventio (1), per quam reus cognito actoris libello, eundem convenit, et vicissim aliquid ab eo petit. Ita si actor petat decem ex causa mutui, reus vicissim ex testamento petat alia decem, vel amplius, mutua petitio est.

(1) *L. 11. §. 1. ff. de jurisd.* Mutua petitio actio est non exceptio, ut quibusdam visum, qui tamen a *Cap. 2. §. 2. de Ord. cognit.* aperte refutantur.

§. II. Si quid igitur causae sit, cur possit reus cum actore agere, eundem potest reconvenire, sive eadem, sive alia sit causa (1), aut in personam, aut in rem actio instituta sit (2). Id vero fit coram eodem iudice, ad quem reus vocatus est, quemque actor repudiare non potest, sive ordinarius sit, sive delegatus (3). Uni reo facultas est

proponendae mutuae petitionis, non item actori, ut lites habeant medium quemdam modum; quaeque in judicio conventionis data est agendi ratio, eadem etiam in reconventionem servanda est. Nam una eademque actoris, et rei conditio esse debet (4). Itaque si actori ex rescripto Pontificis datus sit iudex ita, ut ab eo appellare non liceat, debet etiam idem iudex de mutua petitione rei procedere *appellatione remota*, ne plus uni, quam alteri tributum videatur. Illis autem verbis *appellatione remota* non omnis inhibetur appellatio, sed eo tantum, quae jure speciali permissa non est (5).

(1) *Auth. Consequenter Cod. de Sentent. et interloq.*, C. 1. de *Ord. cognit.* Errat autem Antonius Faber *Conject. lib. 20. cap. 1.* contendens, non licere reo a. ctorem ex diversa causa reconvenire.

(2) Ab omnibus generatim rejecta est opinio Antonii Fabri *Conject. lib. 20. cap. 8.*, qui subtiliter more suo, sed minus vere demonstrare conatur; eum, cum quo actione in rem actum est, reconvenire non posse.

(3) *Cap. 3. de Rescript. in 6.* Id vero locum habet, si postulante reconvento datus fuerit delegatus *Cap. de Mut. petit.*, quia hic demum obtinet ratio allata in *L. 14. C. de senten. et interloq.* repetita in *Can. 1. can. 3. qu. 9.* Si delegatus motu proprio fuerit constitutus, locus reconventioni non est, cum actor iudicem illum non elegerit. Vide Gonzalez in *cit. cap. 1. de Mut. petit. num. 10*

(4) *Cap. 2. de Mutuis petit.*

(5) *Cap. pastorales 53. de appellat.*

§. III. Mutuae petitionis finis et compensatio (1). Itaque in causis, in quibus compensatio locum non habet, ne reconventio quidem proponi potest. Hujusmodi sunt causae criminales, in quibus agitur

criminaliter (2), quoniam *innocentia*, *non relatione criminum reus purgatur* (3), praejudiciales (4), depositi (5), spoli, in quibus, uti demonstratum supra est, spoliatus respondere non cogitur, nisi antea restituatur (6), causae momentaneae possessionis, quaeque celerem exitum postulant (7), denique in negociis ecclesiasticis coram laico judicare-conventio fieri non potest (8).

(1) Tertullianus *Contr. Marcion. lib. 2. cap. 20. p. 392. ed. Rigaltii Paris. 1675.* inquit, Hebraeos Aegyptiis ab se vasa aurea, et argentea petentibus opposuisse mutuas petitiones, agentes, sibi etiam deberi mercedem pro labore, atque opera, quam impenderant in duccendis lateribus, in civitatibus, atque in villis aedificandis, quod postea *compensationem* rectissime appellat. Quae compensatio vel sit ipso jure, vel per exceptionem doli inducitur, vel per mutuam actionem. Nam mutua hac actione alia actio tollitur, et debitum compensatur, ut est in capitularibus Caroli M. *lib. 7. cap. 303. col. 730. tom. 1. ed. Balutii Ven. 1772.* Ita per *recautionem*, ut inquit Augustinus *lib. de Cur. pro mortuis cap. 11. opp. tom. 6. col. 524. ed. cit. cautio evacuatur*, hoc est dissolvitur; et ita per *evacuatoriam*, quam memorat Marculphus *Formul. lib. 2. cap. 27. et 35. apud Balutium Capitular. Reg. Franc. tom. 2. col. 289. et 291. ed. cit.* (hoc est per *syngrapham*, qua creditor confitebatur, suam sibi pecuniam fuisse solutam) *vacua*, et *inanis* permanet obligatio.

(2) *Can. 1. 2. et 4. cap. 3. qu. 1., L. 1. et 19. eod. de His, qui accus.*

(3) *Leg. 5. ff. de Publ. jud.*

(4) *Cap. 1. de Ordin. cognit.*

(5) *Cap. 2. et ult. de Deposit.*

(6) *Cap. 1. de Restit. spoliat. in 6.*

(7) *Glossa in cap. ult. de Ordin. cognit.*

(8) Confer *Glossam in can. 1. cap. 4. qu. 8. verb. judicem*, et in *can. 4. judic. verb. Non tenet.*

§. IV. Cui jus agendi, et conveniendi jus est : quoniam reconvenire est agere, ideoque inutiliter reconvenit excommunicatus, quod inutiliter agit (1). Coram arbitris reconventio fieri non potest, quoniam eorum tantum est iis de rebus judicare, quae compromissi lege continentur (2).

(1) *Cap. 5. de Except.*

(2) *Cap. 6. de Arbitris.*

§. V. Duo parit mutua petitio, seu reconventio; primum est, ut jurisdictio prorogetur, adeo ut qui coram iudice reconvenit, eundem amplius recusare non possit (1); alterum, ut res utraque, actio scilicet, et reconventio simul uno, eodemque iudicio cognoscantur (2). Sed ut haec duo efficiat mutua petitio, initio ipso litis proponenda est, antequam litigantes ad alios judiciales actus progrediantur (3). Nam si reconventio fiat in progressu, aut in exitu litis, prorogabit quidem jurisditionem (4), sed non etiam efficiet, ut reconventio una cum actione eodem iudicio absolvatur.

(1) *Cap. 1. de Mutuis petit.* Confer, quae dixi §. 2. not. 3.

(2) *Cap. 1. cit.*

(3) Reum statim mutuo agere debere, scriptum est in *Auth. et consequenter Cod. de Sent. et interloq.*, et in *Clem. 2. §. 1. de Verb. signific.* dicitur in ipso litis exordio. Neque aliud suadet *cap. 3. §. 1. de Rescript.* in 6., ubi verba eodem durante iudicio ita sunt intelligenda, ut apud eundem iudicem reconventio fieri debeat, non autem ad reconventionis tempus referenda sunt.

(4) *Cap. 4. de Rescript. in 6.*

TITULUS XIII.

DE DILATIONIBUS.

- | | |
|----------------------------|--------------------------|
| I. Dilatio quid ? | IV. Omnes iudicii partes |
| II. Dilationum distinctio. | suas habent dilationes. |
| III. Quando eae dentur ? | V. Quomodo dandae sint ? |

§. I.

Nihil in foro, et iudiciis usitatius est dilationibus. Nam eas saepe reus ad parendas exceptiones, saepe etiam actor ad probationes confirmandas a iudice petit; idque non initio solum, sed etiam in progressu litis. Dilationem vocamus justum aliquod temporis intervallum, quod litigantibus conceditur ad actum aliquem judicalem commodius expediendum (1).

(1) Auctores, qui de dilationibus secundum jus antiquum, et novum agunt, numerat Hilligerus ad *Donellum de jur. civil. lib. 24. cap. 6. not. 1. opp. tom. 6. col. 243. edit. Lucae 1764.*

§. II. Dilationes vel a lege dantur (1), vel mutua litigantium voluntate constituuntur, vel a iudice conceduntur. Sed Jus Canonicum tribuendarum dilationum omne fere arbitrium iudici commisit (2). Quod non ita intelligendum est, quasi iudici integrum sit, quas velit, dilationes concedere suo arbitratu. Nam ut dilationes concedantur, justa causa opus est, eaque rite demonstrata, denegari non possunt. Hinc si nimis breves datae sint dilationes, quae pares non sint rei praescrtim gravi, et implicatae, justa est appellandi causa (3).

- (1) De his agitur in titulo Codicis *de Dilationibus*.
- (2) *Cap. 24. de Offic. et potest. deleg.*
- (3) *Cap. 1. et 4. de Dilation.*

§. III. Dantur dilationes ad inducendos testes (1), ad exceptiones peremptorias proponendas (2), ad proferenda instrumenta, ad se purgandum (3), ad accusandum, et agendum (4), ad cursum appellationis prosequendum (5).

- (1) *Cap. 9. de Probat.*
- (2) *Cap. 1. et 3. cap. 3 qu. 3.*
- (3) *Cap. 33. de testib. et attestat.*
- (4) *Cap. 14. de Accusat.*
- (5) *Cap. 13. de Offic. judic. ordin.*

§. IV. Quemadmodum in judicio sunt partes tres, ita singulae suas habent dilationes. Hinc triplex earum genus distinguitur. Nam aliae dantur in prima litis parte, videlicet a citatione usque ad litis contestationem; et hae vel citatoriae, vel deliberatoriae vocantur. Citatoriae dantur ad comparandum, dilatoriae ad deliberandum, num ille, qui in judicium vocatus est, litem suscipere debeat. Quaedam autem conceduntur a litis contestatione usque ad sententiam, quae probatoriae dicuntur, quia dantur ad parandas, afferendasque probationes. Denique in tertia litis parte dilationes conceduntur ad audiendam sententiam, vel mandatum exequendum, quae definitoriae nuncupantur.

§. V. Dilationum tempore judicis officium con-
quiescit. Et quia arbitrarias tribuere dilationes, a-
ctus est judicialis, idcirco concedendae sunt a judi-
ce pro tribunali sedente, causaque cognita (1). In
dilationibus, quae a jure dantur, nulla causae co-
gnitione opus est.

- (1) *Can. ult. cap. 3. qu. 3.*

TITULUS XIV.

DE SENTENTIA, ET RE JUDICATA.

- | | |
|------------------------------|-------------------------------|
| I. Sententia quid? | XIII. In quibus causis in rem |
| II. Ea vel definitiva, vel | judicatam nunquam trans- |
| interloquutoria. | eat |
| III. Utriusque discrimen. | XIV. Rei judicatae executio. |
| IV. Sententia a competen- | XV. Quis rem judicatam exe- |
| te iudice. | quitur? |
| V. Et pro tribunali sedente. | XVI. Quibus in rebus, et quo |
| VI. Et in scripto ferenda | ordine executio fiat? |
| est. | XVII. Executio in bonis mo- |
| VII. An a iudice recitanda? | bilibus, et immobilibus. |
| VIII. Quo idiomate conce- | XVIII. Auctio, et distra- |
| pta esse debeat? | ctio pignorum. |
| IX. An noctu ferri possit? | XIX. Debitor quando in car- |
| X. Juri, actisque, et pro- | cerem detrudendus? |
| batis congruens, certa- | XX. Cessio bonorum. |
| que esse debet. | XXI. Quemadmodum ea fiat, |
| XI. Condemnatio in expen- | et in quo differat a justit- |
| sis, et fructuum restitutio. | tia quinquennii? |
| XII. Sententia quando trans- | XXII. Beneficium competen- |
| eat in rem judicatam? | tiae. |

§. I.

Judiciaria disceptione absoluta, oritur *conclusio in causa* (1), et a iudice ferenda sententia est. Definitur sententia, iudicis pronuntiatio super re, a litigantibus proposita, condemnationem, vel absolutionem continens, et controversiam definiens (2). Justiniani legibus cautum erat, ut iudex sententiam non ferret, nisi primum juratus declarasset, se procul habuisse studia partium, *aliquo uno ante oculos*

habita justitia, et veritate, causam judicasse (3). Sed hodie hoc juramentum emittunt judices, cum munus judicandi suscipiunt.

(1) Formula haec a Decretalibus Pontificis in forum civile defluxit *C. 5. §. 3. de Caus. possess. et propr.*, *C. 9. de Fid. instrum.*

(2) *Leg. 1. ff. de re judicat.* Multa de hac sententiae definitione habes a Cujacio in *cod. tit. de Senten. et interloq. opp. tom. 9. col. 996. ed. cit. recte*, et sapienter animadversa, ubi etiam multae sunt leges, quae ad hunc locum pertinent, diligenter explicatae. Vide etiam Donellum in *leg. 1. ff. de Re judic. opp. tom. 11. col. 117. et seq. ed. cit.*, qui de illa Modestini definitione in *dict. Leg. 1.* accurate disputat, et Philippum Vicatum vocabulum *jur. verb. Sententia.*

(3) *Leg. 12. cod. de Judic.*

§. II. Sententia vel est interlocutoria, vel definitiva (1). Interlocutoria est, quae non dirimit controversiam, de qua praecipue quaeritur, neque super ea fertur, sed super quaestione inter judicii cursum incidente (2). Interlocutoria dicitur, quia judex, dum de primaria causa quaeritur, interea loquitur, neque definitive pronunciat, sed ea tantum dicit, quae ad causam promovendam pertinent, ut judicium ad propositum finem perducatur (3). Definitiva autem est, quae totum negotium definit, planeque dirimit controversiam.

(1) Jus civile sententiae nomine proprie definitivam intelligebat: mandata, jussa, aliaque decreta, quae parabant quidem ad praecipuam causam definiendam, viam, non tamen eam definiabant, interlocutiones dicebantur, nec vim habebant sententiae, neque in rem judicatam transibant *Leg. 17. et 10. C. ex quib. caus. infam. tol.*

tit. *cod. Senten. et interloq. Leg. 2. ff. de Appellat. recip.* Sed Jus canonicum promiscue hoc vocabulum usurpat, quod etiam in praxi receptum est, unde nata est vulgata distinctio inter sententiam interlocutoriam, et definitivam.

(2) Vox haec *interloquutio* juris auctoribus usitata est, eaque pluries in civiles, et canonici juris libris occurrit. Verum antiquiores *interloquutionem* vocarant *praejudicium*, quoniam *interloquutorium* vix latine dici, et eleganter posse, Vossius de *Vit. Serm. lib. 3. cap. 16.* monet.

(3) Consule Donellum in tit. *ff. de Re judic. et de Effect. sentent. et de interloq. opp. tom. 11. col. 115. et 116. ed. cit.*

§. III. Magnum inter utramque sententiam discrimen est: Nam interlocutoria sententia ab eodem iudice revocari potest (1), definitiva non potest (2); haec in scriptis ferri debet, illa non scribitur; a definitiva appellatur, ab interlocutoria appellare non licet, nisi vim habeat definitivae, aut magnum inferat detrimentum, quod alio modo removeri non possit (3).

(1) *L. 14. ff. de Re judic., C. 60. de Appellat.*

(2) *Leg. 9. Cod. de Senten. et interloq., Leg. 55. ff. de Re judic.*

(3) Jus civile ab interlocutoria appellationem negat *Leg. 16. cod. de judic., Leg. 36. C. de Appellat.* quam legem restituit Cujacius *Observ. lib. 12. c. 3 opp. tom. 3. col. 306. ed. Venet. 1758.* Confer etiam *Leg. 3. C. Theod. Quae appell., et Leg. 65. C. Theod. de Appellat.* Erant tamen etiam apud Romanos interloquutiones vel *simplices*, quae directo praecipuam causam non attingebant, sed quibus Iudex vetabat, vel jubebat ea, quae ad ordinem in iudicio servandum pertinebant *Leg. 14. ff. de Re judic. vel vim sententiae habentes*, quibus, iudex rem aliquam incidentem definiebat, quae tamen

praecipuam causam respiciebat, parabatque simul ad eam definiendam viam, qualis etiam sententiae nomine comprehendebatur *Leg. 39. ff. de Minor.*, ubi haec quaestio proponitur. Minores intra quadriennium in integrum restitutionem petierant. Dubitabatur, utrum minores essent, cum gestum est negotium, et ita aetatem demonstrare oportebat. Lata est pro aetate sententia, quae quamvis interlocutoria esset, vim tamen definitivae habebat, cum causa cognita rem incidentem definiret, ex qua iudicium praecipuae causae pendebat, num danda esset restitutio? Ab hac sententia emissa, et accepta appellatio est. Concedit etiam Jus civile appellationem ab interlocutoria, quae insigne damnum affert, quod alio modo removeri non potest. *Leg. 2. C. si penden. appellat., leg. 2. ff. de Appell. recip., leg. 18. C. Theod. Quar. appell. non recip.* Jus Canonicum a quavis interlocutoria, et a quovis gravamine appellationem permittebat *C. 11. et 12. de appellat., et C. 1. eod. in 6.* Sed Concilium Tridentinum *Sess. 13. cap. 1. et Sess. 24. c. 20. de Reform.* jus hoc antiquavit, neque ab interlocutoria appellationem permisit, nisi ea vim habeat definitivae, aut grave inferat detrimentum, quod alio modo tolli, avertique nequeat. Quae etiam Juris civilis disciplina est.

§. IV. Ut definitiva sententia vim habeat, plura desiderat. Principio a competente iudice, qui in litigantes, aut saltem in reum jurisdictionem habeat (1), eoque pro tribunali sedente, ac juris ordine servato (2) ferenda est. Tribunal erat locus sublimis, et editus, fere ad instar hemicycli introrsum curvatus, ad quem per gradus ascendebatur, et in quo magistratus jus reddebat (3); ideo legum auctores saepe magistratum designant iis verbis: *qui tribunali praest, qui pro tribunali cognoscit* (4). Cui loco a Latinis opponitur *locus planus* (5); unde *de plano cognoscere*, videlicet ex aequo loco cognoscere, non ex superiore, neque pro tribunali, sed in via, in transitu, cum vel lavandi, vel gestandi, vel ludorum gratia magistratus prodierit (6).

(1) *Cap. 4. de Judic. cap. 3. de Consuet.*

(2) *Cap. 19. de Senten. et re jud. cap. 1. seq. Ut lit. non contest.*

(3) Vitruvius *Architect. lib. 1. cap. 4. p. 168. ed. Galiani Neap. 1758.* Item tribunal, inquit, ut in ea aede, hemicycli schematis, minore curvatura formatum. Ejus autem hemicycli in fronte est intervallum pedum XLVI, introrsus curvatura pedum XV, uti eos, qui apud magistratus starent, negotiantes in basilica ne impedirent. Extrema hujus curvaturae latera a Tacito *Annal. lib. 1. c. 75. tom. 1. p. 132. ed. Amstelæd. 1673.* cornua appellantur. Praetor ex hoc tribunali in sella curuli jus reddebat, quo spectat Martialis *Epigr. 98 lib. 11. vers. 17. et 18. p. 655. edit. Lugd. Batav. 1670.* Atque adeo proprium erat tribunal majorum Magistratum Romanorum, ut eo uti non possent Magistratus Municipiorum, quin etiam minores Magistratus Romanorum, veluti Tribuni plebis, et triumviri, qui tantum in subselliis jus dicere solebant. Hinc et municipales Magistratus pedanei judices a Paulo vocantur *Leg. 38. §. Qui se ff. de Poen.*

(4) *Leg. 2. §. Poen. ff. de Judic., leg. 2. ff. de Re judic.* Cujus jurisdictio non est, ejus nullum est tribunal. Consule Pollettum *Hist. for. Roman. lib. 1. c. 6.* et Brissonium *de Verb. signif. verb. Tribunal.*

(5) Paulus *Recept. senten. lib. 5. cap. 16. §. 14.,* apud Schultingium *Jurisprud. vet. ante-justinian. p. 495. edit. Lipsiae 1737.* Custodiae, inquit, non solum pro tribunali, sed et de plano audiri possunt, atque damnari. Locum planum locum equum appellat Cicero, et eum loco superiori, hoc est tribunali opponit *Epist. ad familiar. lib. 3., Epist. 8. opp. tom. 7. pag. 79. edit Oliveti Genevae 1746.* Confer Gerardum Noodtium *de Jurisdict. et imper. lib. 1. cap. 10.* Hinc edictalis formula, quo edicta proponi jubebantur apud forum palam, unde de plano recte legi possint. Ita enim illam in tabula aenea Bibliothecae Regiae repetit Cujacius *Observ. lib. 7. cap. 30. opp. tom. 3. col. 170. ed. cit*

(6) *Leg. 7. ff. de Manum. vind., leg. 1. ff. 1. de Constit. Princip., leg. 9. §. de Plano ff. de Offic. Procons., leg. 6. ff. de Accusat. §. Servi vero Inst. de*

Libertin. Et hujusmodi quidem est plenaria cognitio, cuius occurrit mentio in *leg. 4. cod. de Dilat.*, licet in vulgatis editionibus mendose prorsus legatur plenaria. Qui de plano postulabant Magistratum per libellum adiebant, et Praetor per subscriptionem postulanti respondebat *leg. 15. de In jus vocan.*, *leg. 29. ff. ad leg. Cornel. de Fals.* Verum quae decretum, causaeque cognitionem requirebant, non per libellum, ac tantum pro tribunali expediri poterant *leg. 9. §. Ubi decretum, ff. de Offic. Procons. leg. 1. §. suspecti ff. ad S. C. Turpil.* Ne quis tamen putet, Romanis idem fuisse de plano, et summam cognoscere, animadvertendum est, multa fuisse, quae summam, sed tamen pro tribunali expedire oportebat. Ita decretalis bonorum possessio ex Carboniano edicto, vel ejus exemplo data summaria erat *leg. 3. ff. de Bon. possess., leg. 2. ff. Quis ordo in bon. possess. serv.*

§. V. Sedere iudicem leges jubent, cum profert sententiam (1), sive ut suam ostendat auctoritatem, sive quod mens acrius intendit, quo magis corpus quiescit (2). Sed nusquam Jure civili cautum est, ut sententia a non sedente iudice prolata irrita habeatur, id a solo Jure Canonico constitutum est (3). In judiciis summariis nulla est sedendi necessitas (4). Sedere vero debet iudex sententiam dicturus publice, non in secreto, adeo ut nulla sit vis sententiae, si in secreto dicatur (5).

(1) *Leg. 6. §. ult. cod. de Postulando Novel. 71. c. 1.* Hinc sessiones iudicum, quarum mentio est in *leg. 2. §. 1. Quis ord. in possess.* Consule Polletum *loc. cit. lib. 1. cap. 5.*

(2) Hinc Trantio apud Plantum in *Mostell. act. 5. sc. 1. vers. 54. tom. 1. p. 551. ed. Lugd. Batav. 1669.*

Nimio plus sapio sedens.

(3) *Cap. 5. de Senten. et Re judic. in 6.*

(4) *Clement. 2. de Verb. signific.*

(5) *Leg. 6. cod. de Senten. et interlog.*

§. VI. Deinde vero sententia ferenda est in scripto, et quae sine scripto lata est, ne nomen quidem sententiae meretur (1). Nam saepe verba ori pronuntiata menti illudunt, non item ea, quae literis consignata sunt; periculosum est autem in proferenda sententia iudicem labi, quoniam sententiam semel latam mutare, aut emendare non potest. Hinc iudex, diligenti primum de negotio deliberatione, et consultatione habita sententiam concipit, conceptamque in libellum, sive brevem chartam referre debet (2). Sed in causis brevioribus, et maxime vilium personarum necessaria non est scriptura (3), quae etiam omittitur in interloquutionibus quas iudici ore proferre licet; inde vero notarius scripto mandat.

(1) *Leg. 3. cod. de Senten. ex peric. recit., can. 7. caus. 2. qu. 1., C. 5. de Senten. et re judic. in 6.*

(2) *Leg. 2. cod. de Senten. ex peric. recit.*

(3) *Auth. nisi breves Cod. cod., ubi etiam scripturae necessitate solvitur sententia Episcopi, qui inter suos subditos causas cognoscit, quod retulit Gratianus in decretum suum can. 45. cap. 11. qu. 1. Quod autem de Episcopo, idem etiam de capitulo sede vacante sancitum est in C. 43. de Testib. Sed hodie etiam Episcopi inter suos subditos judicantis sententia in scripto ferenda est. Cujacius ad cap. 43. de Testib. opp. tom. 6. col. 853. ed. cit. Ideo tum Episcopo, tum vacante sede Capitulo definitivam sententiam ex non scripto ferre licere arbitratur, quod sint illustres iudices, qui ejus sollemnitatis necessitate soluti sunt in leg. 2. cod. de senten. ex peric. recit. Verum in ea lege id tantum illustribus iudicibus datur, ut etiam per officium suum, et eos, qui ministerium suum eis accommodant, sententias definitivas recitent ex tabella, cum alii debeant eas suo*

Der. Inst. Can. Tom. III.

8

ipsi ore scriptas ex libello partibus legere; quod generatim Canonico quoque jure de Episcopo constitutum est propter dignitatis prerogativam, ut inquit Bonifacius VIII. in cit. cap. 5. de Senten. et re judic. in 6. Ego id jure singulari de Episcopo sancitum arbitror, ut cum causam cognosceret inter clericos, scripturae solemnitatem servare non cogeretur. Simile jus singulare de Praefecto Praetorio, qui verbo *sententiam dicebat*, constitutum fuisse, scribit Cassiodorus Var. lib. 6. n. 3. seu Formul. Praefect. Praet. p. 97. ed. Rotomag. 1679., sed ceteri illustres judices, de quibus simile jus editum non fuerat, definitivas sententias scripto mandare debebant, neque certe laudata lex 2. eos hac necessitate solvit.

§. VII. Collata in libellum sententia ab ipso judice recitanda est, et vero praesentibus, aut saltem in eam rem vocatis litigantibus (1). Tantum Praefectis Praetorio, ceterisque illustribus magistratibus Jure Civili concessum est, ut per ministros suos sententias ex tabella recitent (2), et exemplo illustrium magistratuum Bonifacius VIII sancivit, ut etiam Episcopi sententias suas per alios proferant (3). Sed jam ubique receptum est, ut judicum sententiae per alios recitentur (4); imo apud nos a nemine sententia legitur, sed eam *latam et publicatam* notarius peculiari libro scribit, eaque tunc incipit vim suam exserere.

(1) Leg. 2. cod. de Senten. ex peric. recitan. C. ult. de Senten. et Re judic. in 6. Sententiam ex tabella, seu ex scripto pronunciare in jure civili dicitur ex periculo recitare; unde titulus Codicis de Sententiis ex periculo recitandis. Extat hic idem titulus in Codice Theodosiano lib. 4. tit. 17. De illo autem verbo periculi, ex quo sententiae recitantur, multae sunt, interque se discrepantes doctorum hominum opiniones. Plures sunt, qui utrumque locum in Codice Theodosiano, et Justiniano corruptum putant, ac legendum contendunt de Sententiis ex breviculo recitandis, atque ita sentiunt Alciatus Disput. 20. Perrenon. Animadvers. 2. 17.,

Ferrandus Adduensis *Explic. l. 2. apud Everardum Ottonem Thes. jur. civ. tom. 2. p. 575.*, aliique, atque hæc etiam lectio probabilis videtur Donello *de Jur. civil. lib. 28. cap. 3. num. 10. opp. tom. 3. col. 403. cit. ed. Lucae.* Sed vera lectio est *ex periculo*, quam solide tacentur Sirmondus *Antirreth. 2. cap. 11.*, Desiderius Heraldus *Observ. cap. 50. et Animadv. ad jus. Attic. 2. 7. 4. Grotius in Flor. spars. ad cod. Justinia. 7. 34.*, Cujacius *Observ. l. 5. cap. 25. opp. tom. 3. col. 121. et in cod. de Senten. ex peric. recitan. tom. 9. col. 995. ed. cit.* De hujus autem vocabuli interpretatione magnum est sententiarum divortium. Mitto quorundam explanationes plane ridiculas, et mitto illos, qui *recitare ex periculo* interpretantur *recitare ex memoria*; cum revera sit *recitare ex scripto*, uti titulum illum in utroque codice legenti facile patebit. Fere inter omnes constat, *periculum* esse libellum, ex quo sententia recitatur, sed male hujus nominis causam reddunt, quia scilicet ex sententia semper aliquis periculum subeat, aut reus, aut judex si male judicavit, quæ etiam Cujacii sententia est. Ego assentior Jacobo Gothofredo in *leg. 2. cod. Theod. de Senten. ex peric. recitan. tom. 1. p. 435. ed. Lipsiae cit.*, qui *periculum* interpretatur experimentum, et tentamen, quemadmodum *periculum facere* nihil est aliud, quam rem antea tentare, ne quid per errorem fiat. Est igitur *periculum* tabella, seu libellus, in quo judex scribit quod sentit; ac sedulo legens, atque relegens, quæ scripto mandavit, cuncta emendat quæ emendanda putat, ut in hisce scripturis fieri solet, denique conficit sententiam quam recitare debet. Uno verbo quod a nobis *minuta*, id in Codicibus Theodosiano, et Justiniano *periculum* appellatur.

(2) *Leg. 2. cod. de Senten. ex peric. recitan.*

(3) *Cap. de Senten. et re judic. in 6.*

(4) *Consule Gudelinum de Jur. novis. lib. 4. c. 12.*

§. VIII. Quod attinet ad idioma, quo sententiam concipere oportet, id jure Romano tantum Latinum erat, quod a ferendis sententiis, atque in publicis actibus adhibebatur (†). Quod quidem jus

non in urbe solum, sed etiam in provinciis, licet alio sermone uteretur populus, obtinuisse videtur (2). Sed Arcadii, et Honorii lege sancitum est, ut magistratus provinciarum tam latina, quam graeca lingua sententias proferre possint (3). Ecclesia semper usa videtur graeco, aut latino sermone, qualem videlicet populi usus postulabat; quin etiam posteaquam sermo latinus popularis esse desiit, eum in dicendis sententiis Occidentalis Ecclesia retinuit. Nunc etiam forum saeculare multis in locis latina lingua, barbara tamen, et incondita utitur.

(1) *Leg. 48. ff. de re judic.*

(2) S. Augustinus de *Civit. Dei. lib. 19. cap. 7. opp. tom. 7. col. 551. cit. ed. Ven.* Vide A. Duck *De usu, et Authoritate Jur. Civ. Rom. l. 2. c. 1. § 8.*

(3) *Leg. 12. cod. de Senten. et interloqu.* Quam legem quidam pugnare existimant cum *dict. leg. 42.* sed revera nulla inter utramque pugna est.

§. IX. Noctu quoque judicia exerceri, aut sententias ferri vetant leges Romanorum (1), quod jus profuit a legibus XII. Tabularum (2). Nam quidquid iudex agit, non in tenebris, sed palam atque in omnium luce agere debet. A Jure Civili Canonicum non abludit (3); sed tamen exempla non desunt iudiciorum, quae noctu gesta vim et exitum habuerunt (4). Certo etiam in loco, in quo jus dici solet, sententia ferenda est (5); sed his in rebus spectare decet locorum consuetudinem; et jam plerisque in locis subtiliores hae solemnitates fori usu sublatae sunt.

(1) *Leg. 1. §. 8. ff. Quand. appell., Novell. 82. c. 8.* Consule Petrum Fabrum *Semestr. l. 2. c. 9.*

(2) A. Gellius *Noct. Attic. lib. 17. c. 2. p. 923. ed. Lugd. Batav. 1666., Seneca de Ira lib. 3. cap. 18.*

et 19. p. 114. et 126. ed. *Amstelæd.* 1672. Confer *Rævardum ad Cap. 12. Tabul. cap. 7. p. 14. ed. Neap.* 1779., et *Scipionem Gentilem de Jurisd. lib. 2. c. 29. opp. tom. 3. p. 221. ed. Neap.* 1764.

(3) *Cap. 24. de Offic. et potest. deleg.*

(4) *Svetonius in Augusto cap. 33. p. 233. tom. 1. ed. Pitisci Leovardiae* 1714. *Areopagitas noctu judicasse* constat, et multa sunt exempla judiciorum noctu gestorum aut ex consensu litigantium, aut ex locorum consuetudine.

(5) *Leg. penult. ff. de Just. et jur., leg. 6. cod. de Senten. et interloq. ibique Glossa.*

§. X. Porro sententia debet esse cum Jure consentiens, actisque, et probatis congruens (1), si juri expresso repugnet, nulla sit (2); si vero litigantis juri adversetur, valet quidem, etsi iniqua sit, sed per appellationem suspenditur, novoque judicio revocantur (3). Debet etiam esse certa, et quae definite absolvat, aut condemnet; quamquam necesse non sit in ea decidendi rationes enarrare, nisi id gravis causa postulet (4); postremo controversiam per omnes ejus partes expedire debet. Hinc non tantum super praecipuo negotio ferenda est, sed etiam super iis, quae negotio accedunt, cum eoque sunt connexa, et conjuncta, uti sunt expensae litis, et fructus percepti; dedecet enim, absoluto judicio, litem alteram ex prima litis materia exoriri (5).

(1) Si aliud ex actis constet, et aliud judici ex privata conscientia exploratum sit, multi putant, judicem non secundum acta, et probata, sed secundum conscientiam judicare oportere. Verum haec sententia longiorem faciet judicii cursum, et graviori sumptu utrumque litigantem afficiet, neutri tamen proderit. Nemo enim judici extra acta credere cogitur, illaque statim novo judicio secundum acta revocabitur. Tatius esse judicem sese prorsus ab eo judicio abstinere, causamque deferre ad judicem superiorem, vel de componendo negotio la-

horare. Quod si nihil horum facere iudex possit, et omnino sententiam ferre cogatur, eum non secundum id, quod ipse novit tamquam privata persona, sed secundum id, quod sibi innotescit tamquam personae publicae, hoc est secundum acta, et probata iudicare debere tradit S. Thomas 2. 2. qu. 67. art. 2. Ex iis tamen, quae iudex privatim novit, adjuvari potest, pergit ipse Thomas, ut districtius discutiat probationes inductas, ut possit eorum defectus investigare. Quod si eas non possit de jure repellere, debet eas in iudicando sequi. Late ea de re disputat Covarruvias Var. resol. lib. 1. c. 1.

(2) Leg. 19. ff. de Appellat., C. 1. de Sentent. et re judic., C. 64. de Regul. jur. in 6.

(3) Leg. 2. cod. Quand. provoc. non est necess., C. 5. et 6. de in integr. restit., C. 13 et 21. de Sentent. et re judic.

(4) Cap. 16. et 18. de Sentent. et re judic.

(5) Leg. 3. cod. de fructib. et lit. expens.

§. XI. Et quia litem injuste videtur instituisse, qui causa cecidit, ubique victus in expensas victori condemnatur (1); praesertim si constet, eum temere, se per calumniam litem intulisse (2). Fructus vero, quos victus cogitur restituere, ii praecipue sunt, qui post litem contestatam fuere percepti, aut saltem percipi potuissent; quoniam, re in iudicium deducta, statim in possessore mala fides oritur (3). Quin etiam si quis ante litem contestatam in dolo, malave fide versatus est, etiam fructus antea perceptos restituere debet.

(1) L. 5. cod. de Fructib. et lit. expens.

(2) Confer Donellum de Jur. l. 16. c. 3. n. 6. et seq. t. 6. col. 309. et seq. ed. cit.

(3) Leg. 2. cod. cod.

§. XII. Lata, et publicata sententia, nisi ab

ea intra decem dies appellatum fuerit, vim acquirit rei judicatae (1), quae finem controversiarum pronuntiatione judicis accipit (2). Nam qui intra legitimum tempus non provocavit, cum provocare posset, is in sententiam consensisse videtur. Proprie res judicata, non sententia, controversiae finem imponit, quoniam haec non ita rem expedit, ut totum negotium plane finitum habeatur. Res judicata, actionem, et exceptionem parit (3); jus facit inter litigantes, quin et tertium obligat, si ex ejus consensu lis acta sit, aut is causam ab alterutra parte habeat (4); veritatis habetur loco (5), et quamquam postea nova prodierint monumenta, tamen lis per rem judicatam extincta, nonnisi ope restitutionis in integrum, redintegrari potest (6).

(1) *Novell. 23. cap. 1.*, quam Pontifices sequuntur *cap. 13. 13. de senten. cap. 36. de elect., cap. 32. in fin. de elect., cap. 36. de testib.*

(2) *Leg. 1. ff. de Re judic.*

(3) *Cap. 13. de Senten. et re judic.*

(4) *Cap. 15. eod., c. 23. in fin. de Praeben.*

(5) *Leg. 25. ff. de stat. homin.* Eleganter Cicero pro Sylla num. 22 tom. 4. p. 383. ed. Genev. 1744. Status, inquit, reipublicae maxime judicatis rebus continetur.

(6) *Leg. 4. cod. de Re judic., C. 21. de Sentent. et re judic.*

§. XIII. Multae tamen causae sunt, in quibus sententiae vim nunquam obtinent rei judicatae, quamquam appellatum non fuerit, eaeque idcirco recte revocantur. Hujusmodi sunt causae, in quibus agitur de vi matrimonii (1); item sententiae latae a iudice excommunicato (2), vel incompetente, aut competente quidem, sed contra jus expressum (3), aut

contra priorem rem judicatam (4), aut neglecto juris ordine, aut ex falsis instrumentis et testibus, a quibus judex deceptus est (5), aut quae legitime publicatae non sunt (6), aut quae dictae a iudice pecunia corrupto (7); denique nunquam transeunt in rem judicatam sententiae criminales, in quibus rei condemnati sunt, praesertim cum subjecti sunt poenae, quae restitutionem admittit (8).

(1) *Cap. 10. et 11. de Sentent. et re judic., C. 5. et 6. de Frigid. et malefic.*

(2) *Cap. 24. de Sentent. et re judic., C. 13. de Haeret.*

(3) *L. 1. §. 2. ff. Quae senten. sine appellat. rescind.*

(4) *Leg. 1. cod. Quand. provocat. non est necess.*

(5) *Leg. 3. cod. Si ex fals. instrum., C. 22. de Sentent. et re judic., C. 9. de Testib., C. 6. de Except.*

(6) *Cap. ult. de Senten. et re judic. in 6.*

(7) *Leg. 7. cod. Quand. provocat. non est necess.*

(8) *Argum. leg. 6. ff. de appell. Ceterum sententia nulla esse potest modis compluribus, quos late recenset Blasius Altimarus de Nullit. senten.*

§. XIV. Rei judicatae finis est executio, per quam ad exitum, actumque perducitur, quod re judicata definitum, et mandatum est (1). Nam vana, et inanis esset sententia, nisi exitum haberet, qui finis est, quo referri omnem judicariam disceptationem oportet. Haec autem executio fit statim in actione reali, si res ipsa, quae extat, tradi possit. In actione personali dantur induciae quatuor mensium; qui a die, quo edita, vel si provocatum fuerit, a die, quo confirmata sententia est, numerantur (2). Sed iudex praescriptum tempus vel producere, vel

contrahere potest, uti rerum ratio postulare videbitur (3). Nunc fori usu, et consuetudine receptum est, ut vel statim post emissam sententiam, vel post aliquot dies, vel etiam post longum tempus arbitrio judicis constitutum expediantur literae executoriales, quarum vi apparitores, alique inferiores ministri sententiam exequantur.

(1) Fit executio post rem judicatam; quoniam iudicii initium ab executione sumere non licet *leg. 58. ff. de Re judic., leg. 1. cod. de execut. rei judic.* Ac recte monet Cujacius in *cod. tit. de Execut. rei judic. opp. tom. 9. col. 1023. edit. cit.*, esse contra jus, quod profitemur, illa instrumenta, per quae debitor non adito iudice, neque edita re judicata in carceres detrudi potest.

(2) *Leg. 68. ff. de Rei vindic., C. 5. de Senten. et re judic., C. 26. de Offic. et potest. jud. delegat.* Tempus hoc humanitatis gratia, ut ait Papinianus in *leg. 16. in fin. ff. de compensat. debitori a lege conceditur*, ut tempus habeat conquirendae pecuniae, quam adversario persolvat. Et olim quidem ex jure XII. Tabularum tempus illud erat triginta dierum; qui in iisdem tabulis iusti dies appellantur, quo eodem vocabulo utitur Cicero *de legibus lib. 2. §. 9. opp. tom. 3. p. 198. ed. Oliveti Genev. 1743.* Praeter ideae matris, inquit, famulos, easque iustis diebus, ne quis stipem cogito; hoc est diebus certis, quibus fas est stipem cogere. Illud vero triginta dierum spatium, quod datur, ut iudicato satisfiat, modicum tempus dicitur in *leg. 84. §. In pecunia ff. de leg. et in leg. 1. ff. de Iun. actuq.* Itaque ex lege XII. Tabularum recte dici poterat modicum tempus, quo iudicato satisfaceret; sed immodicum factum est ex constitutione Justiniani, qui illud ad menses quatuor prorogavit.

(3) *Leg. 2. ff. de Re Judic., C. 15. de Senten. et re judic.*

§. XV. Jamvero sententiam exequitur ipse iudex, qui eam dixit, modo jurisdictionem habeat;

quoniam per executionem quis ad parendum sententiae cogitur, nemo autem aliquem cogere sine jurisdictione potest. Hinc judex ordinarius, atque judex a Summo Pontifice, aut a Principe delegatus, quod plenam habent jurisdictionem, sententiam ipsi suam exequuntur (1), eodemque jure potitur judex, cui a magistratu jurisdictio mandata est (2). Quin delegati a Summo Pontifice, ut facilius sententiam exequantur, acceptam potestatem, et jurisdictionem per annum retinent (3). Verum datus judex, et arbiter, quorum tantum propria est rei cognitio, sententiam non exequuntur, sed ejus executio pertinet ad magistratum (4), unde jus cognoscendi profectum est.

(1) *Cap. 7. et 11. de offic. et potest. delegat.*

(2) *Leg. 5 ff. de Offic. ejus cui mand. est jurisdict.*

(3) *Cap. 7. et 26. de Offic. et potest. delegat.*

(4) *Leg. 15. ff. de Re judic., C. 4. de For. competen.*

§. XVI. Cum autem fit executio, certus est observandus ordo, quem Jus constituit. Nimirum si res ipsa extat, quae restitui debet, ea, vi quoque, ubi opus fuerit, adhibita, auferenda est (1); si nulla ea sit, aut propter pecuniae debitum facienda sit executio, primum capienda sunt bona mobilia, deinde immobilia, postremo, si illa non extant, vel statis non sint, jura, et nomina debitorum; semper tamen pro modo debiti, creditori addicenda sunt (2). Tantum speciali jure cautum est, ut non nisi in subsidium executio fiat in stipendia, arma, et equos

milium (3), itemque ut instrumenta ad agriculturam necessaria executioni non subjiciantur (4).

(1) *Leg. 58. ff. de Re vindic.*

(2) *Leg. 15. ff. de Re judic.* Sed nunc fori usu receptum est, ut creditor indiscriminatim tum mobilia, tum immobilia capiat debitoris bona; praesertim cum creditum hypothecarium est.

(3) *Leg. 4. cod. de Execut. rei judic.*

(4) *Leg. 7. cod. Quae res pignor. oblig. pos.* Ad similitudinem autem instrumentorum, quae ad agriculturam sunt necessaria, etiam instrumenta artis, quam quis exercet, executioni non subsunt. Similiter executio non fit in vestes, quibus quis indutus est.

§. XVII. Cum executio pertinet ad bona mobilia, ea perficitur ab apparitoribus, qui se in locum conferunt, ubi sunt bona, quorum partem capiunt eamque inferunt in locum publicum, ubi servanda est, donec auctione constituta vendatur, aut a debitore recuperetur. Quod si bona haec ad publicum locum deferri commode nequeant, ubi sunt retinentur; sed clauso, obsignatoque ostio, et edicto proposito, ne quis ostium effringat, locumque ingrediatur (1). Verum cum executio de bonis immobilibus est, in ea perficienda, praeter apparitores, aut nuncium, sive cursorem, etiam notarius adhibetur, qui factae executionis publicum testimonium perhibet.

(1) A pragmaticis pagina illa superimposita transverso ligno, quae fores occludit, et qua cautum est, ne quis eas reseret, *biffa* appellatur.

§. XVIII. Peracta executione pignus distrahitur; nisi quod interim debitor impedimentum inferat, cujus gratia ea pignoris venditio expediri non

possit. Pignora autem distrahuntur in foro, hasta posita (1); non quidem statim, sed post certum temporis intervallum, quod Jure Civili complectitur duos menses, postquam pignora capta sunt (2). Verum fori mos est, ut decreto-judicis, quod rogante creditore emittitur, intra dies decem hastae subji- ciantur, vendantque bona mobilia; at in bonis im- mobilibus primum instat creditor, ut hasta ponatur, tum proponuntur edicta, quibus licitatores ad au- ctionem vocantur; postremo exhibitis, apertisque chirographis auctionariis singulorum, rogatu credi- toris, bona iptra mensem largiori oblatori adjudica- ntur; eoque elapso adhuc debitor habet mensem unum, quo pignus luat, hoc est recuperet bona, pretiumque restituat, quod ab emptore solutum est. Cum nemo ad hastam accessit auctionem factururus, tertio minoris, quam aestimata sunt, bona credi- tori addicuntur (3).

(1) Hastam hanc dominam Juvenalis *Satyr.* 3. *vers.* 33. p. 61. *ed. Lugdun. Batav.* 1664. vocat, quia scilicet hastae potestati, et imperio omnia in venditione subji- ciuntur.

Et praebere caput domina venale sub hasta.

Propertius autem *lib.* 4. *Eleg.* 1. *vers.* 130. p. 570. *ed. Patav.* 1710. eandem hastam tristem perticam appellat.

Abstulit excultas pertica tristis opes.

Confer Brissonium *de Formulis lib.* 6. *cap.* 59. p. 486. *ed. Halas* 1731., et Heineccium *Antiq. Roman.* *lib.* 2. *tit.* 1. §. 25. et *tit.* 18. et 19. §. 11. *opp. tom.* 3. p. 242. et 269. *edition. Neapol.* 1769. Extat etiam *de Fide et jure hastae fiscalis* egregia dissertatio Cl. V. Januarii Fran- conii Archiepiscopi Consentinae edita Romae an. 1767.

(2) *Leg. 1. ff. de Re judic. , leg. 1. cod. Theod. de Distrahen. pign. Consule Cajacium in cod. tit. de Execut. rei judic. opp. tom. 9. col. 1023. seq. ed. cit. et Donellum de Jur. civil. lib. 23. cap. 13. et 14 opp. tom. 6. col. 141. et seq. ed. Lucae cit.*

(3) Confer, quae scripsi in libro de *Novissimis in jure legibus lib. 2. p. 190. ed. Romae 1766.*

§. XIX. Extremum denique, cum desunt cetera contra eos, qui rei judicatae executionem ferre debent, remedium est, ut in carceres detrudantur. Tantum autem custodiae causa detrusus in carceribus retinetur, donec judicato satisfecerit (1). Mulieres jure novissimo Justiniani propter civile negotium in carceres conjici nequeunt, ut faciant judicato satis (2); eodem jure a Decretalibus donati sunt clerici (3), et huc etiam spectant certa quibusdam in pluribus locis concessa privilegia; quae non eadem ubique sunt.

(1) *Leg. XII. Tabularum*, sicuti narrat A. Gellius *Noct. attic. lib. 20. cap. 1. p. 1401. ed. Lugduni Batav. 1666.*, nisi debitor intra triginta dies post editum judicatum creditori satisfecisset, ei in servitutem addicebatur. Jus hoc vel aliis legibus, vel tacito populi consensu abrogatum jam erat, cum Diocletianus, et Maximianus tulerunt *leg. 12. cod. de Obligat. et action.*, qua scriptum est: *ob aes alienum servire liberos creditoribus jura compelli non patimur.* Quidam sunt, qui hac lege sancitum putant, ut debitores propter pecuniae debitum in carceres detrudi nequeant, atque hanc eandem esse ajunt Juris Canonici sententiam in *C. 2. de Pignor.* Sed errant vehementer. Nam lex illa Diocletiani, et Maximiani hoc tantum constituit, ut liberi creditoribus servire non cogantur, secundum jus ea aetate receptum, nihil vero habet de conjiciendis in carceres debitoribus. Quin eos, nisi honorum cessionem emitterent, in carceres esse conjiciendos, edixit Alexander in

leg. 1. cod. Qui bon. ceder. poss. A jure civili nulla in re discrepat Jus Canonicum, quod in *cit. cap. 2.* expresse memorat, atque confirmat civilem legem his verbis: *Lex habet, ut homo liber pro debito non tenetur; si res defuerint, quae possint pro debito adduci.* Jus hoc expressit S. Gregorius M. *lib. 4. Epist. 45. ad Fantin. opp. tom. 2. ed. Maurin. Paris. 1705*, unde forte desumptum est *C. 2.*, licet Gregorio III. vulgo tribuatur.

(2) *Novel. 134. cap. 9.*

(3) *Cap. Odoardus de Solut.*

§. XX Ad effugiendam tamen carceris injuriam, praesto est debitoribus miserabile beneficium inductum a L. Julia, per quam sua omnia bona cedunt creditoribus, ut ea vendant; eorumque pretium obtineant (1); atque ita illi a carceris molestia, et squalore liberantur (2). Quod beneficium iis tantum conceditur, qui propter casus adversos in egestate sunt, non decoctoribus, neque iis, qui patrimonium suum cum fraude effuderunt, quique cum creditoribus solo sunt usi, cum scirent, sese solvendo non esse (3). Hoc autem efficit cessio bonorum, ut debitor in carceres non conjiciatur, sed a debito liber, et solutus non evadit, si cessis bonis satisfieri nequeat creditoribus; et ideo si deinceps alia bona adipiscatur, aes alienum dissolvere debet, modo ipse non careat quotidianis alimentis (4).

(1) Bona ipsa a creditoribus retineri non posse, sed ea esse vendenda, ut pretium secundum antiquiorem, et potiore, quem unusquisque obtinet, locum singulis tribuatur, praeter ceteros, docet Voetus *ad Pandect. lib. 42. tit. 3. num. 8*

(2) *Leg. 4. cod. Qui bon. ceder. poss.*

(3) Consule Hilligerum in *Donellum ad leg. 16. et 17. ff. de Re judic. not. 18. col. 261. tom. 11. ed. cit.*

(4) *L. 6. ff. de Cession. bonor.*

§. XXI. Cessio bonorum ex Theodosii constitutione sola voluntatis professione, et ruda voce peragitur (1); sed in locis compluribus solemniter impetranda est (2), in eaque emittenda contumeliosi quidam ritus adhibentur (3). Differt a cessione bonorum dilatio, seu justitium quinquennii, quod tantum Principis beneficio, non a jure scripto conceditur. Dat Princeps hanc dilationem, cum plerique creditores consentiunt (4); quique eam impetravit, amplius post quinquennium bona cedere non potest (5). Imo ne quis Principis beneficio abutatur, dilatio non conceditur, nisi quis caveat, sese, exactis quinquennii induciis, creditoribus satisfactorum (6).

(1) *Leg. 6. cod. Qui bon. ceder. poss.*

(2) Confer Voetum in *Pandect. lib. 42. tit. 3. num. 5.*

(3) Verum cessionem bonorum infamiam non irrogare, statutum est ab Alexandro Imp. in *leg. 11. cod. Ex quib. caus. infam. irrog.*, quod et innuit Justinianus *leg. ult. cod. Qui bon. ceder. pos.* Confer Contium *Lect. subseciv. lib. 2. cap. 18. p. 34. ed. Neap. 1725.*, et Hilligerum ad *Donellum in leg. 16. et 17. tit. ff. de Re jud. c. opp. tom. 11. not. 22. col. 265. ed. cit.*

(4) Major pars creditorum non ex personarum numero, sed ex debiti quantitate aestimatur *leg. ult. cod. Qui bon. ceder. poss.*

(5) Consule Cujacium in *cod. lib. 7. tit. 71. opp. t. 9. col. 1058. ed. cit.*

(6) *Leg. 4. cod. de Precib. Imper. offer.*

§. XXII. Sunt nonnulli, qui bonorum cessione non indigent, ut a carceribus liberentur, quoniam habent beneficium *competentiae*, ut vocant; quod in eo positum est, ut id tantum, quod face-

re possunt , praestare cogantur. Eo beneficio a jure civili donati sunt parentes , patroni , socius , maritus ad dotis restitutionem ab uxore , donator a donatario conventus (1) , filii familias in jus vocati pro contractibus gestis, cum in patria potestate essent, si patris haereditatem non obtinuerunt (2). Idem hoc beneficium jure canonico concessum est clericis (3) , qui clericalibus induti vestibus incedunt , ac tonsuram gerunt (4).

(1) §. 37. et seq. *Inst. de Action.*

(2) *Leg. 2. ff. Quod cum eo qui in alien. potest. leg. 49. ff. de Re judic. , et leg. 3. §. 4. de Minor. 25. an.* Imo et filium , qui ex minima tantum parte patri haeres extitit , eodem beneficio frui , scriptum est in *cit. leg. 2. ff. Quod cum eo qui alien. potest.* Quaesitum autem est quae sit haec minima pars ; et multi quidem legitimam intelligunt. Sed ego assentior iis , qui hanc partem existimant , quae minima est , si cum aeris alieni mole comparetur.

(3) *Cap. Odoardus 3. de Solut.*

(4) Consule Fagnanum in *cit. Cap. 3. de Solut. 58* , et consule etiam librum meum *de Novissimis in jure legibus lib. 2. p. 231. ed. Romae 1766.*

TITULUS XV.

DE APPELLATIONIBUS.

- I. Appellatio quid ?
 II. Appellatio ab interlocutione , et a sententia definitiva.
 III. et IV. Utriusque discrimina.
 V. Quibus liceat appellare ?
 VI. An appellare oportet a sententia nulla ?
 VII. Quae causae appellationem rejiciant ?
 VIII. Fatalia tempore appellationis.
 IX. Quo tempore interponenda sit appellatio ?
 X. et XI. Quo petendi, et accipiendi apostoli ?
 XII. Quae introducenda appellatio ad judicem superiorem ?
 XIII. Quod proseguendae , ac finendae appellationis tempus sit ?
 XIV. Quid nostris moribus observandum ?
 XV. Appellatio in devoluto
 XVI. et XVII. Quibus in causis tantum in devoluto appellatio detur ?
 XVIII. Nefas appellare ab eo , qui toti reipublicae cum imperio praest.
 XIX. Jus appellationum haeret in summa potestate.
 XX. Summa potestas in Ecclesia penes Romanum Pontificem.
 XXI. Christus Ecclesiae Caput , et Episcopos constituit.
 XXII. Metropolitae, et Patriarchas instituit Ecclesia.
 XXIII. Potestas ab Ecclesia data Metropolitae, nihil detrahit de potestate a Christo data Summo Pontifici.
 XXIV. Jus appellationum , quod ab Ecclesia habent Metropolitae , et Patriarchae, nihil detrahit de jure , quod a Christo Summus Pontifex habet.
 XXV. et XXVI. Appellatio ad Pontificem omisso medio.
 XXVII. Nam aliquando expedit ad Pontificem non appellare ?
 XXVIII. Jus appellationum ad Pontificem in primatu insitum etiam Ecclesiae lege , et consuetudine firmatum.
 XXIX. Pontifex omnes appellationes jure Primatus recipit.
 XXX. Discrimen inter Orientis , et Occidentis appellationes.
 XXXI. Pontifex vel dat judices in causis appellationum , vel eas ipse cognoscit.

§. 1. **N**e sententia transeat in rem judicatam, neve

victo spes omnis eripiat, inventum est remedium appellationis, cujus ope vis editae sententiae suspenditur. Est autem appellatio ab inferiore judice ad superiorem facta provocatio, ut hujus sententia id, quod inique factum est, tollatur, vel emendetur (1). Jure decretalium alia extrajudicialis appellatio est (2): illa emittitur adversus actum judicalem, postquam judicium citata parte inchoatum est; haec adversus quoscumque extrajudiciales actus, sive illatum gravamen, sive inferendum sit, interponitur. Ita contra electiones, postulationes, provisiones (3), et ita etiam si judex de facto, non causa cognita judicet, appellatio permittitur. Quae extra judicium appellationes fiunt, magis provocationes ad causam sunt (4).

(1) *L. 7. ff. de Minor., leg. 1. ff. de Appellat. C. 15. cod. Liceat appellatori*, inquit Capitularia Caroli M. lib. 7. cap. 333. apud Balutium Capitular. Reg. Franc. tom. 1. col. 733. ed. Venet. cit., *vitiatam causam appellationis remedio sublevare*. Quoniam appellatio ab inferiori ad superiorem interponenda est, quaeri potest, num a judicis dati sententia appellari possit, qui eum dedit; et num a sententia judicis, cui mandata est jurisdictio, recte appelletur, qui eam mandavit. Sed dantem appellari posse demonstrant Ulpianus in *leg. 1. §. Si quis ff. de appellat.*, et Modestinus in *leg. 3. ff. Quis a quo appellet*, mandantem vero non posse, respondit Ulpianus in *leg. 1. §. Ab eo ff. Quis a quo appellet*. Discriminis ratio est, quod qui judicem dedit, censetur retinuisse, non alienasse jurisdictionem; verum ea se abdicasse videtur, qui jurisdictionem suam alteri mandavit. Ea de causa a judicio vicarii generalis Episcopus appellari non potest; quoniam illi omnis ab hoc mandata est jurisdictio, et utriusque tribunal nūm, idemque est. Consule Cornelium Bykershock *Observ. Jur. Roman. lib. 6. cap. 23. opp. tom. 2. p. 254. ed. Lugdun. Batav. 1750.*

(2) *Cap. 5. de appellat., C. 8. eod. in 6. Clem. 2. eod.*

(3) *Cap. 21. de Elect., C. 1. 19. et 29 eod. in 6., C. 87. de Appellat. in 6.*

(4) *Cap. 5. de Appellat. cap. 1. de Appellat. in 6., cap. 2. de dol. et contumac. in 6.* Cujus observationis utilitas in eo est posita, quod non statim ad superiorem confugere oporteat, sed ad eum judicem, qui de illato damno in prima instantia cognoscere potest, quod minime fieri posset, si proprie dicta esset appellatio.

§. II. Judicialis appellatio duplex est: alia, quae contra interlocutionem, alia, quae contra sententiam definitivam emittitur. Appellationem ab interlocutione Jus civile non probat (1), nisi ei vis definitivae sententiae sit, aut nisi ab ea illato gravamini nullum aliud adhiberi remedium possit (2). Sed canones ante Tridentinam Synodum editi appellationem permittunt tum a sententia, tum a quavis etiam simplici interlocutione, qua judicialia acta ordinantur (3). Verum cum Patres Tridentini plane intelligerent, saepe ad vexandos longa frustratione litigantes appellationes interponi, sapienter statuerunt; ut his appellationibus tantum detur locus cum interlocutio vim habet sententiae definitivae, aut cum magnum attulit gravamen, quod per appellationem a definitiva removeri non potest (4).

(1) *L. 7. cod. Quor. appellat. non recip.*

(2) *L. 7. et 40 ff. de Minor. xxv. an., leg. 2. ff. de Appellat. recip.*

(3) *Cap. 1. de Dilat., C. 9. C. 15. C. 20. de Appellat., C. 1. eod. in 6.*

(4) *Concilium Tridentinum Sess. 13 cap. 1. et Sess. 24. cap. 20. de Reform.*

§. III. Inter appellationem, quae a definitiva, et quae ab interlocutione fit, magnum discrimen intercedit. Principio appellatio a definitiva jurisdictionem suspendit judicis, unde appellatum est (1); sed non item efficit appellatio ab interlocutione, nisi ea irreparabile damnum afferat, aut inferior judex appellationi detulerit, aut judex superior dederit inhibitionis literas (2), quas minime dat, nisi primum justam appellationis causam deprehenderit (3). Imo expirat haec appellatio, si ipse judex inferior damnum per simplicem interlocutionem ab se illatum corrigat (4).

(1) *L. 3. cod. de Appellat., C. 7. eod. in 6.*

(2) *Cap. 10. de Appellat. C. 5. et 7. eod. in 6. C. 2. de Dol. et contumac. in 6.*

(3) *Cap. 3. et 7. de Appellat. in 6.*

(4) *Cap. 60. de Appellat.*

§. IV. Item appellatio ab interlocutione scripto comprehenditur, eoque exprimenda est appellationis causa (1). Cum enim definitivam mutare judex non possit (2), interlocutoriam possit (3), patefacienda est causa, propter quam haec emendari possit, ac debeat. Contra a definitiva si illico (4); apud acta appellemus, etiam viva voce appellamus (5); quamquam libello opus sit, cum ex intervallo appellatio interponitur (6), neque necesse est appellationis causas exprimere (7). Denique cum a definitiva appellatur, jus est litiganti, novis uti probationibus, et causas etiam non expressas judicio persequi (8); sed qui appellat ab interlocutoria non alias causas prosequitur, quam nominatim dumtaxat expressas (9), neque novis utitur probationibus.

(1) *Cap. 1. et 9 de Appellat. in 6. Emmanuel Gonzalez in C. 59. num. 12. de Appellat.* tria distinguit tempora; nimirum tempus Anacleti, tempus Innocentii III, tempus Innocentii IV. Anacletus *Can. 3. cap. 2. qu. 6. omnis oppressus*, inquit, *libere sacerdotum, si voluerit, appellet judicium.* Ex verbo *liber* collegit Gonzalezius, olim tum a definitiva, tum ab interlocutoria, nulla expressa causa, appellari potuisse. Deinde Innocentius III, in *C. 61. §. de Appellat.* ab interlocutione appellari *probabili causa* verbo etiam *exposita* voluit. Denique Innocentius IV. causam scripto proponi jussit in *cit. cap. 1.* Verum Anacleti epistola in *cit. cap. 3.* Isidori Mercatoris figmentum est.

(2) *L. 55. ff. de Re judic.*

(3) *Cap. 60. de Appellat.*

(4) *L. 14. cod. de Appellat., L. 2. ff. eod.*

(5) *Satis erit, si dicatur appello*, inquit *cit. L. 2.*

(6) *L. 1. §. ult. ff. de Appellat.*

(7) *Leg. 2. ff. eod.*

(8) *Leg. 4. cod. de Temp. et reparat. appellat.*

(9) *Clement. 5. de appellat.*

§. V. Appellare possunt non tantum ii, qui damnati judicis sententia damnum pertulerunt, sed etiam omnes, quorum interest, sententiam infirmari (1). Ita recte provocat fidejussor, si debitor, victus judicium deserat, itemque venditor, contra quem regressum habet emptor, si hic, postquam causa cecidit, ab ea desistat. In communi causa unius appellatio, quaeque eam sequitur, victoria ceteris etiam prodest litis consortibus, qui non appellarunt (2).

(1) *L. 4. ff. de Appellat., can. 30. cap. 2. qu. 6. C. 16. §. de Elect.*

(2) *L. 1. et 2. cod. Si unus ex plurib. appellav., C. 72. de Appellat.*

§. VI. Nec solum nostro , sed et procuratorio nomine appellamus (1) , quin alium etiam ab eo , per quem iudicium egimus, procuratorem ad appellandum constituere possumus (2). Nihil autem attinet appellare , cum sententia nulla est , quoniam appellatio pertinet ad sententiam , quae iniqua quidem est , sed tamen valet, ideoque infirmanda , ut iniquitas corrigatur ; verum sententiam per se nullam infirmare supervacaneum est. Ergo inutilis est appellatio , si ab incompetente iudice (3) , aut a competente quidem , sed neglecto juris ordine (4), aut contra expressam legem (5) bonosve mores (6) sententia lata sit. Atque ita contra has sententias satis est nullitates proponere, ut iis expensis, atque probatis, nulla earum ratio habeatur. Usu fori hae sententiae, quae nullae sunt, *circumscribi* dicuntur, hoc est e medio tolli, et abrogari ; id vero fit imperio Principis , qui nisi primum extinxerit , ac deleverit sententiam, ea semper in iudicio rata firma censetur.

(1) *L. 2. ff. Quand. appell.*

(2) *L. 4. in fin. ff. de Appell.*

(3) *L. ult. cod. si a non competen. iudic.*

(4) *L. 4. cod. de Senten. et interloq.*

(5) *L. 1. §. 2. ff. Quae senten. sine appellat. Capitularia Caroli M. lib. 7. cap. 249. t. 1. col. 720. ed. Balutii Venet. 1772. in carcerem detrudi jubent iudicem , qui oblatas sibi in iudicio leges , vel juris species audire noluerit , et contra eas judicaverit , atque hujus facinoris convictus fuerit. His autem capitularibus antiquior Chlotharii Regis constitutio edita circa annum 560. num. 60 apud Balutium cap. Reg Franc. tom. 1. col. 7. cit. ed. jubet , Episcoporum Imperio castigari iudicem , qui aliquem contra legem injuste damnaverit. Huc etiam referenda est Graeca constitutio Justiniani apud Contium praetermis. class. 1. pag. 295. edit. Neapol. 1725.*

(6) *Instit. de Offic. iudic.*

§. VII. Quaedam vero causae sunt, quae omnem appellationem rejiciunt, vel quod celerite expediendae sunt, vel quod appellatio potius ad retardandum judicium, quam ob justam causam interposita videtur. Ergo frustra provocant qui sententiam quoquo modo probarunt (1), vel se non appellaturos jurati promiserunt (2), qui testibus, et argumentis convicti crimen confessi sunt (3), qui ob veram, non fictam contumaciam damnati sunt (4), denique illi contra quos tres conformes sententiae latae sunt (5). Similiter non datur appellatio in manifestis, sive notoriis (6), in judiciis remota appellatione actis (7), in causis modicae summae (8), a sententiae executione, nisi ille, quem tenere oportebat, modus superatus fuerit (9), in causis disciplinae, et emendationis morum (10), nisi ea res praeter modum acta sit (11).

(1) *Cap. 20. de Offic. et potest. delegat.* ibique Glossa verb. *recessum*.

(2) *Cap. 20. et 21. de Appellat.*

(3) *Cap. 3. §. Si autem de Appellat. l. 6.*, ibique Glossa v. *In jure, can. 41. § Nullus etiam c. 2. qu. 6., leg. 2. cod. Quor. appellat. non recip.*

(4) *L. 23. §. Ult. ff. de Appellat.*, ibique Glossa v. *Non recte*, *leg. 53. ff. de Re judic.*, ibique Glossa v. *Litis damno*.

(5) Ante Justinianum semel tantum provocare licebat; post Justinianum etiam bis provocare licet *leg. unic. cod. Ne liceat in una ead. caus.* Eandem hanc regulam proponit Clemens III. in *C. 39. de Appellat.* Sed statuta plurimarum gentium redierunt ad jus antiquum, ideoque apud eas nunc semel tantum appellatio permittitur, quoniam non tres, ut fert Jus Commune, sed duae sententiae rem judicatam efficiant. Atque hoc quidem jus est, quo Romae utimur.

(6) *Cap. 5. §. ult. et cap. 61. §. Porro de Appellat., C. 3. §. Si autem eod. in 6.*

(7) *Cap. 53. de Appellat. C. 1. de Rescript. C. 15. de Offic. et potest. Jud. deleg. In cap. inquisitioni 71. de appell.* quaeritur, num clausula *appellationis remota* missa in Pontificio rescripto non postremo loco, sed medio, referenda sit ad ea tantum, quae praecedunt, an etiam ad ea, quae sequuntur, ac tantum ad praecedentia referenda esse responsum est, nisi ea, quae sequuntur, cum superioribus conjuncta, et connexa sint.

(8) Consule Cornelium Bykershoek *Observ. jur. Roman. lib. 5. capit. 4. opp. tom. 2. pag. 17. et seq. edit. Lugdun. Batav. 1759.* Apud nos in causis, quae pertinent ad Urbem Romam, ejusque terminos, et territorium, sive, ut vocant *districtum*, quaeque summam non superant scut. 50., *recursus*, ut vulgo loquimur, seu non appellatio conceditur. Extra Urbis terminos appellatio tantum datur in causis scutorum centum, *recursus* in ceteris; in his vero causis, quae non superant scuta quinque, neque appellatio, neque *recursus* datur, sed victus in una sententia acquiescat necesse est.

(9) *C. 5. cod. Quar. appellat. non recip. , C. 15. de Senten. et re judic. , C. 43. de Appellat.*

(10) *Cap. 3. 26. 32. cod.*

(11) *Cap. 13. de Offic. judic. ordin. , C. 3. de Appellat.*

§. VIII. Appellatio proponenda est intra legitima tempora, quae vulgo *fatales dies* (1) appellantur, quoniam eorum lapsu, quasi fato quodam appellatio perimitur. Ea tempora quatuor numero sunt. Primum est tempus interponendi appellationem; alterum petendi, atque accipiendi libellos dimissorios; tertium introducendae appellationis apud judicem superiorem; quartum denique tempus est, intra quod litigator prosecui, ac finire appellationem debet.

(1) Fatalium dierum mentio est in *leg. 31. cod. de Appellat. , et in leg. 2. ult. cod. de Temper. et repar.*

appellat. Fallitur autem egregie Bodinus *de Republic. lib. 3. cap. 6. num. 324.*, qui nullam veterum ea tempora appellationi praefinita *fatales dies* vocasse putat, eaque potius *statos dies*, *statum tempus* appellanda esse contendit. Errorem inde ortum esse arbitratur, quod qui leges Codicis, et Novellarum in Latinum sermonem verterant pro *χρῆς ἡμερας* legerint *χρῆς* Bodinum refellit, et exagitat Cujacius *ad Tit. 63. cod. lib. 7. opp. tom. 9. col. 1044. ed. cit.* . ubi praeclarum habes doctissimi viri de hoc homine iudicium, Fatalis dies etiam *temporalis* dicitur in *L. 32. C. de Appellat.* Consule Cujacium *Observ. lib. 12. cap. 4. opp. tom. 3. col. 307. ejusd. ed.*

§. IX. Jure Digestorum, et Codicis appellationis interponendae tempus biduum erat in causa propria, in aliena triduum (1); sed postea Justinianus cuilibet, qui appellare vellet, decem dierum spatium concessit (2). Justinianum jus Innocentio III. probatum est (3); idque tum in iudiciali, tum in extrajudiciali appellatione servandum esse, Bonifacius VIII. constituit (4). Hoc tempus in sententiis labi incipit a die latae sententiae, in aliis actibus ex ipso actu, unde appellatur (5). Quod ita accipiendum est, si adversus praesentem fuerit pronunciatum. Nam si adversus absentem, hujus temporis initium repetitur non a die, quo lata est sententia, sed a die, quo quis ejus rei certior factus est (6).

(1) *L. 1. §. 3. 6. et 11. leg. 2. ff. Quand. appellat. leg. 6. §. 5. cod. de Appellat.*

(2) *Novel. 23. c. 1., Auth. hodie de Appell.*

(3) *Cap. 15. de Senten. et re judic.*

(4) *Cap. 8. de Appellat. in 6.*

(5) *L. 1. §. Biduum, et §. Quod in sententiis ff. Quand. appellat.*

(6) *Tit. leg. 1. §. ult., et C. 8. de Appell. in 6. D^{ist.} Inst. Can. Tom. III.*

ulsi cum dicat Bonifacius *infra decem dies*, postquam sciverit, perspicuum est, quod recte vulgo dicitur, appellationis interponendae tempus initio utile, deinceps vero continuum esse.

§. X. Post appellationem interpositam literae dandae sunt ab eo a quo appellatum est, ad eum, qui de appellatione cogniturus est (1). Quae literae dicuntur Apostoli, a graeco verbo ἀποστέλλω, latine, dimitto. Sunt enim literae datae a iudice, qui sententiam edidit, per quas causa dimittitur ad eum, qui appellatus est (2). Harum literarum non unum genus. Nam si appellationem interpositam, et admissam fuisse testentur, dimissoriae dicuntur; reverentiales autem, si ob superioris reverentiam probatam appellationem ostendant, non quod eam causa postulare videatur; postremo si testentur, eam esse rejectam refutatoriae appellantur. Interdum Iudex non satis intelligit, num concedenda sit appellatio, an secus; et tunc concedit testimoniales, quae vim accipiunt a jure, ideoque suspendunt causam, si danda appellatio erat; rejiciunt autem, si erat deneganda. Quin etiam litigantium alter saepe interpositae appellationi assentitur; et tunc, quia partes ipsae de appellatione conveniunt, dicuntur apostoli conventionales.

(1) Verba haec sunt Marciani in *leg. un. ff. de Libell. dimiss.* eaque descripsit Gratianus in Decreto *can. 31. c. 2. qu. 6.* Tum Gratianus formulam proposuit Apostolorum his verbis: *Ego ille Sanctae Bononiensis Ecclesiae Episcopus te Presbyterum Rolandum Capellanium S. Apollinaris ad Apostolicam Sedem, quam appellasti, ab observatione mei iudicii his apostolis dimitto.*

(2) *L. 106. ff. de Verb. signific.*

§. XI. Antiquo jure petebantur, accipiebantur, et reddebantur Apostoli intra diem quintum post interpositam appellationem (1); jure novo intra dies triginta a lata sententia petendi, et a judice, a quo appellatur litigantibus exhibendi sunt (2). Quin judex etiam non petenti Apostolos dare debet (3): verum hi sunt petendi, si ille officii sui partibus non satisfaciat. Petuntur autem *instante*, et *saepius*, ne quis se appellationis beneficio abdicasse videatur (4). Nam qui intra tempora praestituta Apostolos non petit, acceperit, reddidit, praescriptione repellitur (5); hoc autem tempus judex contrahere potest, producere vero non potest (6). Sed nunc fere nullus in foro est Apostolorum usus (7), ac per libellum appellationis intra decennium in actis exhibito appellatio interponitur.

(1) Paulus *Recept. sentent. lib. 5. tit. 34. §. 1.*, apud Schultingium *Jurisprud. vet. Ante-Justinian. pag. 533. ed. Lipsiae 1737*, quem Pauli locum descripsit Gratianus *can. 24. cap. 2. qu. 6.*

(2) *L. 24. cod. de Appellat., Cod. 6. eod. in 6.* Verba illa *Ex die sententiae*, quae occurrunt in *cit. leg. 24.* forte a Triboniano addita sunt; certe non extant in *leg. 32. cod. Theod. de Appellat.*, unde *leg. 24.* desumpta est. Eodem tamen modo tempus illud aestimatur in *leg. 29. cod. Theodos. eod.* Atque ea quidem verbis *ex die sententiae* multi ita accipiunt, quasi scriptum sit *a die scientiae latae sententiae*, quae opinio verior esse videtur. Consule Schultingium in *Paul. loc. cit.*, et Cujacium *leg. 5. cod. de Appellat. opp. tom. 9. col. 1036. seq. ed. cit.*

(3) *L. 6. §. ult. cod. de Appellat.*

(4) *Cap. 6. de Appellat. in 6., Clem. 2. eod.*

(5) Paulum *loc. cit. §. 2.* Atque haec causa est, propter quam Modestinus in libro singulari de *Praescriptionibus* egerit de Apostolis *leg. 106. ff. de Verb. si-*

gnif. Tantum praescriptione ab agendo submoveri vult Paulus *loc. cit.* eum, qui intra tempora praestituta Apostolos non petiit, accepit, reddidit, sed in libris quibusdam postremo additur, quod is *et poenam appellationis inferre cogitur*; quae verba Gratianus etiam descripsit in *cit. can. 24. caus. 2. qu. 6.* Sed Cujacius in *Paul. loc. cit. opp. tom 1. col. 461. ed. cit.*, et Schultingius *eod. loc.* hanc lectionem improbant.

(6) *Cap. 5. de Appellat.*

(7) Confer Voetum in *Pandect. lib. 49. titul. 6. num. 2.*

§. XII. Acceptis literis dimissoriis, qui appellavit majori judici sistere se praesentem debet, eique literas offerre, quod jure civili non eodem temporis spatio pro varia locorum, et judicum ratione faciendum est (1). Varium hoc jus gentium moribus servari vix potuit; nihil autem certi de eo tempore a Decretalibus constitutum est. Quare tota res pendet ab arbitrio judicis, a quo provocantur (2), et alicubi hoc tempus municipali jure definitum est. Exhibitis vero superiori judici literis dimissoriis appellans instat, ut appellatio recipiatur, adversarius ad certum terminum citetur, inhibeaturque judex, de quo provocatum est (3).

(1) *L. 1. 2. et ult. cod. de Tempor. appellat.*

(2) *Cap. 5. et 33. de Appellat., Clem. 4. cod.*

(3) Citationes typis Camerae impressae, quas vulgo camerales dicimus, quamquam eae a nullo Romanae Curiae judice subscriptae sint, vim inhibendi habere sancivit Benedictus XIV. *Constit. Romanae Curiae 115. §. 5. t. 1. ejus Bullar. p. 285. ed. Rom. seu Ven. 1754.*

§. XIII. Denique proseguendae, ac definiendae appellationis tempus est annus unus, atque ex

justa causa etiam alter (1). Qua in re juris civilis, et canonici magna consensio est. Verum unde id tempus ex jure civili initium sumat, non satis constat, sed jus canonicum hoc initium ab interposita appellatione repetit (2), quod etiam civilis fori usu receptum est.

(1) *Auth. ei qui et, leg. ult. §. 4. cod. de Tempor. appellat., Clem. 3. eod.*

(2) *Cap. 8. de Appellat., Clem. 3. cit.*

§. XIV. Nostris moribus intra biennium appellationis negotium expedire oportet. Primo anno causa committitur judici, quem quis appellavit; altero *transportanda* sunt acta, ut pragmatici loquuntur, nimirum exemplum actorum et documentorum, quae priori judicio gesta dataque sunt, exhibendum est coram altero iudice, ad quem postremo itum est. Qui intra primum annum alteri judici causam committere neglexit, is ne alterius quidem anni beneficium habet ad acta exhibenda; verum id praestare debet intra tempus a iudice definitum. Quare curandum est, ut suo anno utrumque fiat, quique id ob justam causam praestare non potest, ampliandi facultatem a iudice petit, antequam constitutum tempus elabatur.

§. XV. Appellatio legitime interposita (1) jurisdictionem suspendit iudicis inferioris, causamque defert ad superiorem, qui appellatus est (2). Quare interim, dum appellatio pendet, nihil amplius in causa inferior iudex agere potest, et si quid egerit, cuncta a majore iudice ad pristinum statum rediguntur (3). Verum cum haec suspensio sententiae, ejusque executionis in causis quibusdam minus congruens, et apta videretur ad rectum ordinem re-

rum, merito receptum est, ut sententiis quibusdam suspensiva vis adimatur; propterea fit interdum, ut quamquam sit appellatum, tamen sententia exitum obtineat, et postea causae cognitio ad superiorem deferatur. Tunc autem sententiae non *suspensivum*, sed *devolutivum effectum* habere dicuntur.

(1) Appellationes autem non recipiuntur, neque in earum vim inhibitiones conceduntur, nisi primum constiterit, intra legitima tempora, atque a legitima persona, item a definitiva, vel habente vim definitivae, aut gravamine, quod per definitivam reparari non possit, appellatum fuisse, idque patere debet ex publicis monumentis, quae in actis exhibentur. Confer Benedictam XIV. *Const. ad Militantis* 48. §. 43. p. 86. tom. 1. *ejus Bullar. ed. Ven.* 1754, qua quidem constitutione multa de appellationibus, deque inhibitionibus comprehensa sunt.

(2) *L. 32. §. 4. cod. de Appellat. cap. 55. eod.*

(4) *L. un. ff. Nihil innovar. appellat. interpos., C. 7. de Appellat. in 6.*

§. XVI. Plures vero sunt causae, in quibus interposita appellatio impedimento non est, quominus lata sententia vim, et exitum habeat. Jure communi appellatione non suspenduntur decreta de alimentis praestandis, neque datur suspensiva appellatio in causis de restitutione spoli, ac momentanae possessionis (1), in judiciis arbitratorum ex compromisso, in causis, ut ajunt, executivis, quae ex populorum moribus, et legibus privilegium habent paratae executionis. Apud nos provocatio nullam affert moram, et tarditatem, causis in quibus duo continua, eaque concordia judicata edita sunt; itemque

causis de menstrua diurnave mercede, de alimentis futuris, de restituendo depositò, de explenda solutione, quam quis syngrapha (2) se facturum promisit, de oneribus cameralibus, vel communitatis, de canonibus, pensionibusque domus, de obligationibus cameralibus, ceteris demum quae a Benedicto XIV. expressa sunt (3).

(1) *Leg. 27. ff. de Inoffic. , L. un. C. de moment.*

(2) Hae sunt syngraphae, quas vulgo appellamus *Pagherò per altrettanti.*

(3) Confer Benedictum XIV. *Const. Romanae Curiae* 115. §. 10. et seq. tom. 1. ejus *Bullarii* p. 28. ed. *Romae seu Venet.* 1754.

§. XVII. Sed et executionem sententiae irrogatarum censurarum minime appellatio retardat (1); quod etiam obtinet in causis emendationis morum, nisi antistes, uti supra dictum est, rem egerit supra modum, quem observare oportebat (2): itemque in causis, quarum executio a Concilio Tridentino *remota appellatione* mandata est (3).

(1) *Cap. 53. de Appellat.*

(2) *Cop. 3. de Appellat.*

(3) Consule Benedictum XIV. cit. *Const.* 48. §. 5. et seq. p. 82., ubi omnes hae causae, in quibus suspensiva appellatio non conceditur, accurate recensentur. Vide etiam, quae *lib. 1. tit. 6. §. 3. p. 325.* dixi de appellatione interposita ab Episcopi judicio in beneficiis curatis, quae per concursum collata sunt.

§. XVIII. Ab omnibus iudicibus provocare fas est, praeterquam a supremis Principibus (1), et a

Summo Pontifice, cujus judicium soli Deo subijcitur (2). Nam absurdum esset inferiorem judicem delere, aut emendare sententiam ejus, cui ipse subest, et cui summa in republica potestas est. Ea de causa inducta est appellatio, ut ex inferiore judice gradatim provocetur ad superiorem, ac denique causa deferatur ad eum, qui reipublicae cum imperio praeest. Is cum in omnes, qui in republica continentur, imperium habeat, et potestatem, omnium tollere, delere, emendare sententias potest; ejus vero sententiae ab iis, qui subjecti sunt, emendari, abrogarique non possunt.

(1) *L. 1. ff. A quib. appell. non lic.*

(2) *Can. 16. et 17. c. 9. qu. 3. Quid adhuc quaeris examen*, inquit Augustinus *Oper. imperf. contra Julianum lib. 2. opp. tom. 10. col. 993. ed. Maurin. Venet. 1733.*, quod apud Sedem Apostolicam factum est? Sane appellantes a Summi Pontificis judicio faturum Concilium damnantur a Martino V. apud *Guerram Epitom. Pontific. Constitut. tom. 1. pag. 173. Venet. 1772.*, a Pio II. *Const. Execrabilis 5. t. 3. par. 3. Bul. Roman. p. 97.*, Julio II. *Const. Suscepti 27. p. 312. ibid.*, Benedicto XIV. *Const. Altissimo 132. p. 824. tom. 1. ejus Bullar. ed. Ven. 1754.*, Bulla in coena Domini, aliisque Summorum Pontificum Constitutionibus. *L' Histoire de l' Eglise*, inquit Cardinalis de Byssy Meldensis Episcopus in *Docum. pastor. an. 1728. p. 59.*, nous apprend, qu' elle a rejeté tous les appels faits contre les Bulles dogmatiques, et qu' elle a regardé comme hérétiques, et schismatiques, ceux, qui les ont formés. Idem ipse habet *Epistol. ad Episcop. Ebroicens.*, idemque Senonensis Archiepiscopus Languet *Docum. pastor. advers. consult. Advocat. p. 9.*, et *Epist. 1. ad Episc. Bononien. p. 26.*, et Cardinalis de Mailly Archiepiscopus Remensis *Instruct. Pastor. au sujet de la Constitution Unigenitus an. 1719. p. 8.*, et idem quoque docet Thomassinus *Diss. 12. in synod. Chalcedon. num.*

26., et Diss. 18. n. 96. Ipse Petrus de Marca *Concord. sacerdot. et imper. l. 2. c. 17. n. 1.* testatur quod numquam in Ecclesia admissa fuit provocatio a Papa ad Concilium. Recte S. Bernardus *Epist. 239. opp. tom. 1. pag. 198. ed. Horstii et Mabillonii Ven. 1781.*, Summi Pontificis sententiam peremptoriam vocat, et *Epist. 213. p. 166.* Innocentius II. dicit haec: *Quis mihi faciet justitiam de vobis? Si haberem judicem, ad quem vos trahere possem, jam nunc ostenderem Extat quidem tribunal Christi, sed absit, ut ad illum appellem vos Itaque recurro ad eum, cui in praesenti datum est judicare de universis, hoc est ad vos; vos appello ad vos: vos judicate inter me, et vos.* Consule, inter ceteros, librum, cui titulus: *Trattato dello scisma c. 10., Du-Valium de Supr. Roman. Pontif. in ecclesia potest. p. 4. qu. ult., Serrium de Rom. Pontif. Diss. 2. c. 9., Roncagliam Animadvers. in Natal. Alexand. Histor. eccles. saec. 13. et 14. Diss. 9. tom. 8. p. 419. et seq. ed. Ven. 1776., Gasparem de Boeken Dissert. Salisburgi edita an. 1723, qua ostenditur, Soli Summo Pontifici Romano supremam in universam Ecclesiam potestatem, et de fide definiendi jus competere, nec ab illo ad Concilium generale appellari posse, Zaohariam Anti-Febron. tom. 4. c. 5. et 6. p. 163. seq. ult. ed., et Anti-Febron. vindic. t. 4. Diss. 12. c. 4. p. 387., Cl. Gerbertum Ecclesia militans etc. cap. ult. tom. 2. p. 358., et Bolgenium Risposta ad quesito: cosa è un appellante? quo quidem opere graviter, nervoseque refutatur quidquid ab Appellantibus, novissime autem ab eorum gregali Petro Tamburino proponitur. Illud postremo addam, quod est ab ipso Joanne Ludovico Moshemio, haeretico quidem homine, sed docto, et erudito, animadversum de Gallorum appellationibus ad Concilium universae Ecclesiae, unitatem Ecclesiae spectabilem tolerantibus, scilicet pugnanti loqui illos catholicos, qui ex Primatu Divini juris Romanum Pontificem totius Ecclesiae, et Catholicae unitatis centrum profitentur, et simul ab ejus judicio generale concilium appellari posse contendunt. Placuit laudare hoc testimonium, ut omnes intelligant, quod ipsi haeretici agnoscunt, et confitentur, appellationes ad futurum Concilium cum catholica veri-*

tate de Primatu Summi Pontificis convenire non posse. Consule Ballerinium *de vi ac ration. Primat. Pontific. fere per tot. , et de Potest. Eccles. Sum. Pontif. et Conc. gen. c. 5. p. 66. et seq. , et C. 9. §. 5. p. 139. et seq. ed. Augustae Vindelic. 1770.*

§. XIX. In civili republica summa haec potestas est penes Principem , cui subjecti sunt omnes, qui ad illam pertinent. Quare ipse in cunctis negotiis , quae civilis reipublicae propria sunt ab omnibus appellatur , omnium infirmat, confirmative sententias, quodque ab eo gestum est subditorum iudicio , et potestati subesse non potest (1). Hoc autem jus appellationis non solum pars est intima summae potestatis (2) , sed etiam est necessaria pars officii, quo tenetur quisquis rempublicam cum imperio regit , qui in ejus custodia tamquam in specula collocatus , omnia circumspicere , atque observare debet , quemadmodum se unusquisque gerat in iudiciis exercendis (3).

(1) Vide Montesquieum *Esprit des loix liv. 28. chap. 27.*

(2) Confer Grotium *de Jure belli , et pacis lib. 2. c. 4. §. 13. , et Heineccium Jur. natur. et gent. lib. 2. c. 8. §. 157. opp. tom. 8. pag. 213. ed. cit.*

(3) Consule Puffendorgium *de Jur. natur. et gent. lib. 7. c. 9. , et Heineccium lib. cit. §. 250. et seq. p. 210. et seq.*

§. XX. Quod in civili republica Princeps , id in ecclesiastica Summus Pontifex est; quoniam eum a Christo toti Ecclesiae praepositum fuisse cum dignitate, et jurisdictione, certum est. Quare ut Princeps in civili republica omnium, quos sibi subiectos habet , appellationes recipit, et ex jure summi

imperii, quod habet in republica, et ex officio, quod est annexum curae, et solitudini omnium rerum, quae in republica geruntur; ita Summus Pontifex pari jure, et officio in republica ecclesiastica omnes recipit appellationes, quae propter res, vel propter personas hujus reipublicae propriae sunt. Itaque jus appellationum non extrinsecus accessit Summo Pontifici, sed affixum, et insitum est in ipso Primatu, atque in jurisdictione, quae hujus Primatus Divina institutione propria est (1); quemadmodum qui civili reipublicae cum imperio praeest, omnium accipit appellationes subditorum, jure potestatis, et imperii sui.

(1) Eusebiani IV. saeculo, cum iniquam tulissent sententiam in S. Athanasium, atque is ad Julium I. Summum Pontificem confugisset, hanc appellationem aegre tulerant; sicuti constat ex Julii I. *Ep. ad Eusebian.* apud Constantium *Ep. Pontific. Roman. col. 353. et seq.*, et Sozomeno *Histor. lib. 3. c. 7. p. 101. edit. Cantabrig. 1720.* Photius IX. saeculo jus appellationum in discrimen revocavit, cum eoque consentiunt Zacharias Episcopus Chalcedonensis, Joannes Zonara, Theodorus Balsamon, Marcus Ephesius, et Meletius Alexandrinus. In eodem luto haesitarunt Calvinus *Inst. lib. 4. cap. 7.*, Marcus Antonius de Dominis *Apostata de Republ. Christ. lib. 1. c. 3.*, Melchior Leydekerus in *Dissert. de Libert. Eccles. Afric. et transmarin. appellat.* alique similes. Hincmarus Remensis IX. saeculo contendit, jus appellationum tantum a Sardicensi Concilio Summo Pontifici fuisse tributum, et eum posse quidem novos dare judices in provincia, in qua Episcopi judicati sunt, ipsum vero causam Romae judicare non posse. Eadem est sententia Petri de Marca *Concord. Sacerd. et imperr. lib. 7. c. 3.*, Quesnelli *Dissert. 5. et 8. in opp. S. Leonis M. Du-Pinii de Antiq. eccles. disciplin. Dissert. 2. c. 1. §. 3.*, Bohemerus etiam *Dissert. de Causis arduis, et majoribus* multa cumulat tum adversus jus judicandi in causis majoribus, tum adversus jus appellationum,

et multa item, ut ceteros mittam, habent Basnagius *Anal. politic. eccles. ad an. 347. num. 11. seq.*, Febronius de *Eccles. stat. c. 5. §. 6. num. 2.*, Van-Espenius *Jur. eccles. par. 2. tit. 10. cap. 1.*, Fleuryus *Disc. 4. num. 5.* Eybelius in *libello: Quid est Papa?* Sed jus ipsum appellationum, quod in Primatu haeret, solide, copioseque, praeter ceteros, tuentur Baronius, ad *an. 347. n. 52. t. 4. p. 440.*, ibique Pagius in *Not. n. 6. seq. pag. 438. seq. et ad an. 419. n. 75. tom. 7. p. 179. edit. Lucae*, Bellarminus de *Roman. Pontif. lib. 2. c. 21. seq. opp. tom. 1. p. 330. seq. ed. Ven. 1731.*, Franciscus de Simeonibus de *judiciar. Summ. Pontific. potestat. lib. 2. c. 20.*, Natalis Alexander *Histor. eccles. Diss. 28. in saec. IV. tom. 4. p. 462. et seq. ed. Ven. 1776.*, ibique notarum Auctores *p. 481. seq.*, Christianus Lupus peculiari opere de *Appellationibus*, Zalwennius *Inst. Canonic. tom. 2. qu. 1. c. 4. c. 5. n. 2.*, Archiepiscopus Senonensis *Instruction Pastorale contenant une troisieme lettre à un Conseiller du Parlement de Paris an. 1753.*, David in opere *Des jugemens canoniques chap. 8. art. 1.*, Gerardus Casteel *Controv. historic. eccles. controuv. 31.*, Auctor dissertationis *Romae editae an. 1768. de Appellationibus*, Fratres Ballerini in *ed. opp. S. Leonis M. Observat. ad dissert. 5. Quesnelli tom. 2. col. 927. et seq.*, ac VV. CCL. Marnachius ad *Auctorem opp. Quid est Papa? Epist. 3. p. 234. et seq. tom. 1.*, et Zacharia *Anti-Febron. tom. 3. per tot. et in Anti-Febron. vindic. t. 3. Diss. 7. cap. 5. et 6. p. 451. seq.*

§. XXI. Certe Christus non alius constituit magistratus, qui ecclesiam regerent, quam Episcopos, et unum omnium caput, ac principem Summum Pontificem; qui et Episcopis, et cunctis Christianae reipublicae civibus dignitate, ac jurisdictione praeesset. Si secundum hanc Christi institutionem alicujus Episcopi judicium emendari, abrogarique debuisset; et vero nemo non fatebitur, omnes homines errare

presso, ideoque inventum est remedium appellationis, ut iudicis error corrigatur; quis id praestare, et quem iudicio injuria damnatus appellare potuisset? Haud sane alius Episcopus Episcopi sententiam infirmare potuisset; quoniam Christus nullam uni Episcopo supra ceteros Episcopos potestatem, et jurisdictionem attribuit. Atqui appellatio provocatio est ab inferiore iudice ad superiorem. Ergo cum omnium hominum sententiae errori subsint, cum aequum, ac necessarium sit emendare errorem, qui alteri perniciem affert, cum hic error a superiore magistratu per appellationem sit emendandus, cum Christi institutione omnes Episcopi pares potestate sint, ac nemo in alium habeat jurisdictionem; consequens est, ut tantum Pontifex, cui uni haec jurisdictio, et potestas in omnes data est, aliorum Episcoporum sententias e medio tollere, atque abrogare possit. Id vero est quod jus appellationis vocamus.

§. XXII. Post Christi mortem visum est alios etiam constituere magistratus, qui Summo Pontifici subessent, praessent tamen Episcopis; sed id sola hominum lege factum est. Nimirum cum Petrus ejusque successores Romani Pontifices nec ubique praesto esse, nec omnibus omnium Episcoporum negotiis ubique opportune consulere possent, ecclesiastica institutione provisum est, ut unaquaeque provincia haberet Antistitem, qui ejus Episcopis, et in quavis majori dioecesi unus item esset Antistes, qui et illi, et ei subjectis Episcopis praesideret. Ita Metropolitae, et Patriarchae instituti sunt, omnino ex lege Ecclesiastica, non Divina, et utrisque data sunt jura eorum praefecturae, et jurisdictionis propriae. Inter cetera vero datum est jus appellationis, quod adversus Episcopi sententiam Metropolitae, ad-

versus sententiam Metropolitae, Patriarchae competit, quod ille Episcopis, hic vero et Episcopis, et Metropolitae superior est (1).

(1) Huc sane spectat communis regula, quae est in Concilio Carthaginensi III. an. 397. can. 10. apud Labbaeum col. 1401. t. 2. *Ut a quibuscumque iudicibus ecclesiasticis ad alios iudices ecclesiasticos, ubi est major auctoritas, provocare liceat.*

§. XXIII. Quidquid vero auctoritatis in Episcopos Patriarchis, et Metropolitae Ecclesiastica lege concessum est, tantum cum consensu saltem tacito, et praesumpto Summi Pontificis concedi potuit. Cum enim ipse unus ex divino instituto in Episcopos haberet potestatem, ejus sane pars ad alios transferri non poterat, nisi assentiretur ille, qui eam totam a Christo potestatem, et jurisdictionem acceperat. Sed cum Concilia in Patriarchas, et Metropolitae contulerunt partem jurisdictionis, et potestatis, quae Christi instituto unius Summi Pontificis propria erat, cumque Pontifices id fieri siverunt, neque hi se abdicarunt potestate sua, quam a Christo habebant, neque eam Concilia ipsis eripere potuerunt.

§. XXIV. Quare Metropolitae, et Patriarchis datum quidem est, jus appellationum a sententiis Episcoporum, quoniam illos his superiores fecerat lex Ecclesiastica, hoc est ipsis attribuerat partem jurisdictionis, et potestatis, quam in Episcopos tantum summi Pontifices Divina lege obtinebant; sed hi semper potestatem, quam habebant initio retinuerunt. Christi instituto, ab Episcopi sententia unus Pontifex appellari potuisset, lege ecclesiastica appellantur etiam Metropolitae, et Patriarchae; sed sem-

per integrum est jus appellationum quod in Primatu haeret.

§. XXV. Et quoniam prima a Christo procedens institutio Primatus erat, ut solus Pontifex confirmaret, infirmaretve sententias Episcoporum, in quos ipse unus jurisdictionem habebat; Ecclesia autem hujus potestatis participes fecit Patriarchas, et Metropolitans, sed eam non ademit illi, cui Christus dederat; profecto Summus Pontifex non tantum a sententiis Patriarcharum, et Metropolitans, sed etiam illico a sententiis Episcoporum appellari potest. Illae quidem appellationes pertinent ad summam, et supremam potestatem in omnes Episcopos, Metropolitans, Patriarchas, quam nemo communem habet cum Capite, et Principe Ecclesiae; hae procedunt ex eadem potestate, quae hac in parte communis facta est etiam Patriarchis, et Metropolitans, non tamen Summo Pontifici erepta.

§. XXVI. Itaque si Pontifex statim velit cognoscere sententias Episcoporum, omissis mediis, hoc est Metropolitans, et Patriarchis, quos inter Pontificem, et Episcopos lex Ecclesiae medios posuit; utitur jure, quod a Christo habuit, et quod ei integrum est relictum, etiam postquam Patriarchis, et Metropolitans commune factum est. Lex Ecclesiae quae sola Patriarchas supra Episcopos constituit, eos appellandi facultatem dedit, omisso iudice, quem recta appellandi ratio medium interponebat (1). An quod ex lege ecclesiastica Patriarchis licet, non licebit Summo Pontifici, quem unum lex divina Episcopis superiorem fecit, et cui lex Ecclesiae semper integram reliquit eam quoque potestatis partem, quam Patriarchis, et Metropolitans communem fecit?

(1) Confer, quae dixi l. 1. tit. 2. Sect. 3. §. 38. not. 1. p. 209., et 210.

§. XXVII. Fieri quidem interdum potest, ut non expediat omittere medios iudices, atque ad Sedem Apostolicam statim confugere; quin etiam interdum locorum distantia, fraudis metus, rerum difficultas, periculum ne resciri accurate possint, quae procul gesta sunt facere potest, ut non videatur interponenda ad Summum Pontificem appellatio. Tunc autem ipse suo jure non utitur; sed non ideo quia peculiaribus de causis interdum non expedit, Summum Pontificem suo jure uti, exinde efficitur, ut ipse revera non habeat potestatem (1). Ea de causa Africani Patres, qui Episcoporum appellationes ad Sedem Apostolicam plus semel aequissimo animo probaverant (2), Apiarii Presbyteri appellationi modeste restiterunt (3); quoniam haec appellatio temporis, locorum, personae rationi minus congruere videbatur (4).

(1) Simili modo S. Bernardus *lib. 3. de Consid. c. 4. p. 374. tom. 5. edit. Mabil. Venet. 1781*, aliquas reprehendit exemptiones, quae mala afferebant, ab iisque concedendis detertere conatur Eugenium III., sed tamen non ideo negat Pontificis auctoritatem. *Sic facitando*, inquit, *probat is vos habere plenitudinem potestatis, sed justitiae forte non ita. Facitis hoc, quia potestis; sed utrum et debeatis, quaestio est.* Sardicenses quoque canones cum innuunt, causas appellationum Episcoporum a Romano Pontifice per delegatos in provincia iudices, vel per legatum in eam missum esse cognoscendas, pertinent ad illud, quod magis expedire videbatur, non Pontificiam auctoritatem in discrimen revocant; imo *can. 4. tom. 2. col. 659. collect. Labbaei ed. Ven.* diserte memorantur causae episcopales agenda in *Urbe Roma*, et in *judicio Romani Episcopi determinandae.*

(2) Plurimum appellationum Episcopaliū exempla,

quae consuetudinem ostendunt , ultro confessi sunt Africani Patres ; uti constat ex Augustini Epistola , quam Constantius descripsit inter epistolas Caelestini *Epist. 1. num. 8. column. 1056.* Tum antiqua , ac recentia hujusmodi exempla indicans Augustinus inquit : *quae ut a nostris temporibus remotissima non requiram , recentia memorabo ;* ac tria profert exempla , eaque ex una provincia Caesariensi , et in particulari tantum judiciorum specie ; quae Augustini causae congruebat , unde facilis est de aliis quoque provinciis , aliisque judiciis conjectura. Recte in hunc locum monet Constantius : *Apostolicae Sedis in Afrorum judiciis potestas* (addenda etiam consuetudo) *hic aperte praedicatur.* Ipsa causa Antonii Episcopi Fussalensis , de qua Augustinus in eadem epistola loquitur , appellatio fuit primum ad Bonifacium Pontificem , cui ipse Numidiae Primas assensus est , traditis ei commendatitiis ad eundem Bonifacium literis , deinde ad Caelestinum , cujus judicio Augustinus obsequutus est , cum ad eum gesta transmisit.

(5) Recte observat Cardinalis Orsius *Histor. eccl. lib. 27. n. 36. p. 130. t. 12. ed. Rom.* , synodicam epistolam Concilii Africani ad Caelestinum non praecipientium , atque audacter obsistentium esse ; sed Afros tantum adhibere preces , quibus Pontificem rogant , ut repellat , coerceatque auctoritate sua licentiam Presbyterorum , aliorumque clericorum , qui appellationis beneficio abutebantur , eos praeterea non rogare , ut omnes rejiciantur , sed ut *ad aures venientes non facilius admittantur , ne praepropere , vel indebite videantur restitui.*

(4) Sane , ut animadvertunt Fratres Ballerinii *Observ. in 1. part. Diss. 5. Quesnelli n. 30. opp. S. Leonis t. 2. col. 971.* , sive inspiciantur acta Synodi an. 419. , sive literae in causa Apiarii ad Bonifacium , et Caelestinum datae manifestum est , nulla usquam ex parte jus Sedis Apostolicae recipiendi appellationes in discrimen fuisse vocatum. Omnis rei ratio petitur ex fraudis periculo , ex temporum dilationibus , ex testium , locorumque difficultatibus. Accedit , quod Apiarius simplex erat Presbyter , neque Africani Patres ob illas , quas memoravi , causas , expedire putabant , quod Presbyteris , ceterisque clericis transmarinae appellationes permitte-

rentur. Nam cuius facile concessa appellandi facultate, fere quotidie rediissent pericula, et difficultates, quarum causa illam Apiarii provocationem aëgre ferebant. His incommodis hactenus obviam ierat Africanæ Ecclesiæ consuetudo, per quam receptum erat, ut clericorum causæ in ea regione finirentur; quare Africani Patres illa incommoda, ea pericula objiciebant, illamque urgebant consuetudinem, ne Apiarii provocatio admitteretur. Neque vero cum illi consuetudinem proponebant, quidquam detrahebant de jure Primatus, quod numquam in discrimen revocarunt. Nam eo firmo, et immoto, per legitimam consuetudinem, quæ scilicet cum expresso, aut tacito Summi Pontificis consensu fuisset inducta, potuissent Africani jus acquirere finiendi in sua regione, sine ullo appellationis beneficio, suorum clericorum controversias. Simili modo quamquam jus confugiendi ad Principem semper integrum esse debeat, tamen populus ei subditus per consuetudinem acquirere potest privilegium judicandi suorum causas sine appellatione, ut docet Grotius *de jur. bel. et pac. lib. 2. cap. 4. §. 13.*; neque ideo quis dicat, Principem in civili republica non habere potestatem, quæ summo imperio affixa est. Hanc igitur consuetudinem Africani Patres urgebant, ignorantes, eam a Sardicensi Concilio ruptam, sublatamque fuisse, eamque ut firmarent consuetudinem, ann. 418. novum illum edidere canonem, ne Presbyteri, et clerici ad transmarina judicia confugerent. Sane Pontifex in ea controversia proponebat canones Sardicenses, quos Nicaenos vocabat, quod hi illis confirmati fuerant, et quod fuerant conditi a pluribus Episcopis, qui Nicænæ Synodo interfuerant, ut observat Amortius *Elem. jur. canonic. tom. 1. pag. 5. seq.* Responderunt Afri, se hos canones ignorare, agentes in *Epist. ad Cælestinum* apud Constantium *Epist. Pontif. Roman. num. 4. col. 1061. et 1062.*: Nam ut aliqui, tamquam a tuæ sanctitatis latere, mittantur, in nulla invenimus Patrum synodo constitutum: quia illud, quod pridem per eundem Coepiscopum nostrum Faustinum tamquam ex parte Nicæni concilii exinde transmisisti, in conciliis verioribus tale aliquid non potuimus reperire. Quibus ex verbis manifestum est,

sine cunctatione paruisse, si canonem novissent Sardinensis Concilii, cui, praeter ceteros, etiam Gratus Carthaginensis Episcopus interfuerat, uti observant Constantius in *Not. lit. Epist. loc. cit.*, et Tillemontius *art. 324. in Vit. Augustin. tom. 13. p. 864.* qui de cetero his appellationibus minus favent. Revera ipsi Africani Patres ann. 419. ad Zosimum dedere literas, quarum mentio est *Epist. 2. ad Bonifacium I.* apud Constantium col. 1013. et 1014., et quibus ipsi dicant haec: *cura-
vimus, ut ea (Sardicensia decreta) servare sine ulla
injuria paulisper sineremus usque ad inquisitionem sta-
tutorum Nicaeni Concilii.* Ipsa haec temporis Concilia demonstrant, Afros, repertis canonibus, de quibus quaerebatur, statim Summo Pontifici obsequuturos. Late hoc argumentum persequuntur Fratres Ballerini *cit. Observa-
ta 1. part. Diss. 5. Quesnelli col. 955. et seq.* Atque haec quidem de Presbyteri appellatione disputatio fuit; verum de Episcoporum ad Sedem Apostolicam appellationibus minime actum est, neque iis unquam Africani Patres restiterunt. Imo et remotissima, et recentia, uti loquitur Augustinus *loc. cit.*, erant exempla appellationum; et vero ipse Augustinus appellationes memorat Prisci, Victoris, Laurentii, Antonii Fussalensis, qui omnes Africani Episcopi erant. In eadem causa sunt Caecilianus, et Lupicinus, similiter Africani Episcopi: ex quibus intelligitur consuetudinem, quam Afri de Presbyteris, minoribusque clericis urgebant, nunquam ad Episcopos fuisse traductam. Revera de appellationibus clericorum erat Africanus Canon, quem in illo controversiae aestu Afri condiderant, ut firmarent consuetudinem, quam proponebant; sed de Episcopis nusquam cautum fuerat, ut ipsi Apostolicam Sedem non appellarent. Neque scrupulum aliquem injicere potest id, quod Carthaginensi Concilio an. 419. *can. 28.* apud Dionysium *Cod. can. Eccl. Afric. in Bibl. Jur. can. Justelli t. 1. p. 344. ed. Paris. 1661.* constitutum est; quo quidem canone confirmatur id, quod de vetitis Presbyterorum, aliorumque clericorum appellationibus superiori anno sancitum fuerat, atque additur: *sicut et de Episcopis saepius constitutum est.* Verba haec quibusdam viris doctis, praesertim Natali Alexandro *Hist. eccl. Diss. 28. in*

saec. IV. prop. 3. t. 4. p. 479. ed. cit., et Orsio Cardinali *Histor. Eccl. lib. 27. n. 36. t. 12. p. 134. edit. Rom.* falsa, ac per fraudem adjecta videntur. Sed utut vera, et germana habeantur, certe eo canone prohiberi non possunt Episcoporum appellationes, quae saepius vetitae dicuntur; et tamen nunquam eas vetitas fuisse constat, qui earum et remotissima, et recentia exempla sunt, ut loquitur Augustinus. Adde, quod Africani Patres in Apiarii causa usque ad inquisitionem Nicaenorum curarunt servanda a Zosymo prolata statuta, uti ipsi loquuntur in cit. *Ep. 2. ad Bonifacium I*, ac denique cuncta sunt composita, uti patet ex epistola ad Bonifacium, quam describunt Mansius t. 4. *Concilior. p. 481.*, et Amortius *Elem. jur. canon. tom. 1. in Append. p. 488. ed. Ven. 1763.* Quis credat, eo ipso anno, quo omnia sunt composita, contra jus hactenus observatum, contra consuetudinem tum antiquioris, tum recentioris temporis Episcopos appellare ad Summ. Pontificem fuisse prohibitos? Itaque longe alius hujus canonis sensus est, quod solide, nervoseque ostendunt Fratres Ballerini loc. cit. col. 966., et Cl. Zacharia *Anti-Febron. t. 3. cap. 4. num. 12.* Scilicet eo canone id constituitur, ut Presbyteri ad transmarina judicia non confugiant, sed Primates, aut universale concilium appellent; quae appellatio ad Primates, aut ad universale concilium saepius de Episcopis constituta est. Id vero non excludit transmarinas appellationes Episcoporum; sed sicuti Episcopi in appellationibus, quas in provinciis interposuerant, iudices habebant Primates, aut universale concilium, ita etiam Presbyteri, ac Diaconi iisdem judiciis in posterum uti jubentur.

§. XXVIII. Lapsu temporum jus hoc appellationum ad Summum Pontificem etiam Ecclesiae lege (1), et consuetudine (2) firmatum est. Vnum utraque non novum jus constituit, sed jam constitutum, et haerens in Primatu confirmavit (3). Quare qui jus quarundam appellationum Summo Pontifici tantum esse putant ex jure Patriarchico, ii fa-

ciunt, ut quod ex jure Divino Pontifex habet, id ex jure Ecclesiastico habere videatur. Sed Patriarchas supra Episcopos posuit sola lex Ecclesiae, Summum Pontificem ipse Christus. Itaque illi opus habent Ecclesiae lege, sine qua Episcopis superiores non sunt, ut appellationes recipiant a sententiis Episcoporum; sed hac lege Ecclesiae, et hoc jure Patriarchico opus non habet Summus Pontifex, qui a Christo supra Episcopos jurisdictionem accepit.

(1) Jus appellationum ad Sedem Apostolicam confirmatum fuisse Sardicensi Concilio ita compertum, exploratumque est, ut se plane ecclesiasticae historiae rudes, et ignaros fateantur, qui huc etiam pertrahunt Isidorianas Decretales, quae post quinque fere saecula in manus hominum pervenerunt. Nolo in horum ineptiis refutandis frustra operam terere; quia si jam an. 347., quo Synodus Sardicensis habita est, jus appellationum ad Sedem Apostolicam probatum, confirmatumque fuerat, plane se deridendos praebent, qui ea de re initium juris positivi a falsis Isidori decretalibus ducendum esse arbitrantur. Sunt autem in Sardicensi Concilio canones tres, qui ad hunc locum pertinent, nimirum *can. 3. 4. 7. seu 5. t. 2. Concil. col. 659. collect. Labbaei can. 3.*, ut ostendunt Fratres Ballerini *loc. cit. 947.*, non pertinet ad appellationes, quae post omnia gradatim exousa judicia postremo loco ad Sedem Apostolicam interponuntur; sed pertinent ad secundum judicium, quod statim post primum judicium a Summo Pontifice constitueretur. Novum id quidem erat ex eorum temporum consuetudine, ut qui primo judicio damnatus fuerat, non statim iret ad episcopos finitimae provinciae, ut cautum erat Concilio Antiocheno *can. 14. concil. t. 2. col. 591. collect. Labbaei*; propterea dictum est: *Si vobis placet, S. Petri Apostoli memoriam honoremus, ut scribatur ab his, qui causam examinerunt, Julio Romano Episcopo, et si judicaverit renovandum esse judicium, renovetur, et det iudices.* Sed ratio Primatus, et studium coercendi audaciam Eusebianorum, qui Romano Pontifici in causis Orientis jus suum eripere conabantur, fecit, ut

novum illud jus constitueretur. De appellationibus discrete agunt. Canones 4. et 7. seu 5., iisque constitutum est, quod Summus Pontifex appellationes recipiat, ac det iudices appellanti- bus, vel ipse *causa cognita sententiam ferat*. Quod clarius explicat interpretatio Dionysii Exigu- cit. can. 4. quae his est concepta verbis: *Cum aliquis Episcopus depositus fuerit eorum Episcoporum iudicio, et proclamaverit, agendum sibi negotium in Urbe Ro- ma; item Episcopus in ejus cathedra, post appellatio- nem ejus qui videtur depositus, omnino non ordinetur nisi causa fuerit in iudicio Episcopi Romani determinata*. Basnagius, Du-Pinius, Quesnellus, et ceteri, qui Sár- dicenses Canones in Oriente receptos negant, refutan- tur certissimis testimoniis, et monumentis, quae, prae- ter ceteros, collegerunt Fratres Ballerinii cit. tom. 2. opp. S. Leon. col. 95. et tom. 5. p. xxxiv. et seq., et Josephus Sim. Assemanius *Biblioth. jur. Orient. tom. 2. lib. 1. cap. 5. p. 110.* Recte Græcorum canonum inter- pres Theodorus Prodromus Senior apud Papadopolum *Praenot. mystag. p. 367.* de his canonibus Sardicensibus dicit haec: *Damnatis in omni iudicio semper licet appel- lare ad Romanum Episcopum, et hujus imperio iterum judicari, aut ab eo, aut a suis legatis.* De Sardicen- sibus canonibus, praeter Ballerinius, accurate, et copio- se egerunt Natalis Alexander *Histor. Eccles. Diss. 8. in saec. 4. t. 4. p. 462. et seq. cit. ed. Venet., Za- charia Anti-Febronio tom. 3. lib. 3. c. 3. pag. 478. ed. Caeserae, et Anti-Feb. vindic. Diss. 8. C. 5. n. 5. p. 456. et seq. tom. 3., et Marchettus dei Canon del Concilio di Sardica par. 2. § pag. 111., a quibus omnia, quae contra jus appellationum ex his canonibus peti solent, graviter ac solide refutantur.*

(2) Appellationum, quae ad Sedem Apostolicam ex omnibus mundi partibus interpositae sunt, tum ante, tum post Sardicense Concilium, magnus numerus est. Anno 142. a iudicio Synopensis Episcopi, a quo ob stuprum de gradu dimotus fuerat, Marcio Romam venit, ut a Sede Apostolica pacem, et communionem obtineret. Na- gant Launojus, de Marca, Du-Pinius, pluresque Proto- stantes Marcionis appellationem, sed aliud ostendunt Bel- larminus *De Rom. Pont. lib. 2. c. 21. opp. tom. 1. p.*

331. *ed. Venet. 1721.*, Christianus Lupus *de Appellat. Diss. 1. cap. 18.* Mansius et Roncaglia in *Natal. Alexandr. Histor. Eccles. saec. 4. Diss. 28. t. 4. p. 481. seq. ed. Venet. 1776*, Zacharia *Anti-Febron. par. 2. lib. 3. cap. 2. num. 2.* anno 250. Privatus Lambesitanus damnatus a synodo 90 Episcoporum literas communionis a S. Cornelio Pontifice fraudulenter impetrare conatus est; quod sane, nonnisi cognita, et revocata synodi sententia, fieri poterat. Unde veram appellationem ipse Constantius educit *Epist. Pontif. Roman. in notit. Epist. Non extant. Steph. I. §. 2. num. 4. col. 223.* Biennio post Fortunatus, alique Africanæ Ecclesiae Presbyteri, anno autem 262. Basilides Asturicensis, et Martialis Emeritensis Episcopus Apostolicam Sedem appellarent Cyprianus *Ep. 68. col. 253. ed. Balutii Ven. 1728.* nullam adversus hanc appellationem querelam proponit; tantum dicit eam obreptitiam, et ita jus appellationis agnoscit. Exemplum hoc vetusto juri appellationum confirmando aptissimum esse, animadvertunt Balutius *Not. 27. in cit. Epist. 68. col. 260.* et Fratres Ballerinii *cit. tom. 2. Opp. S. Leonis col. 931.* Eodem anno Paulus Samosatenus ab Antiocheno Concilio depositus suam iterum causam apud Felicem Pontificem agendam curavit; qua de re copiose agit Cl. Zacharia *Anti-Febron. par. 2. lib. 3. cap. 2. §. 6.* anno 313. Caecilianus Carthaginensis Episcopus judicatus, est ejectus a synodo Carthaginensi multarum provinciarum Melchiadem Pontificem appellavit, ab eoque, causa cognita, absolutus est. Denique anno 341 celebris est Athanasii appellatio; de qua agit Sozomenus *Hist. lib. 3. cap. 8. p. 102. ed. Cantabrig.*, ac Gelasius I. *Epist. 13. ad Dardan.* apud Labacum *tom. 5. col. 329. edit. Venet.* habet haec: *Sanctae memoriae quippe Athanasium Synodus Orientalis addixerat, quem tamen exceptum Sedes Apostolica, quia damnationi Graecorum non consensit, absoluit.* Atque hanc quidem appellationem in discrimen revocare ausus non est Constantius Arianus Imperator, sed tantum apud Liberium egit, ut ejus quoque judicio Athanasius damnaretur, sicuti patet ex *Dial. inter Liberium, et Constantium* apud Constantium *Epist. Pontif. Roman. col. 433. et seq.* Sunt, et alia harum appellationum Sardi-

censi concilio antiquiorum exempla , quae omnia , praeter ceteros , collegit Auctor dissertationis Romae editae 1768. *de Appellationibus ad Romanum Pontificem*. Post Sardicense Concilium plura etiam sunt de his appellationibus monumenta. Nam saeculo IV. Eusthatius Sebastenus Episcopus cum in Concilium Melitinensi Arianorum depositus fuisset , Liberium Pontificem appellavit , a quo restitutus est ; quae de re confer ea , quae diximus *lib. 1. tit. 3. sect. 1. §. 18. not. 5. pag. 179.* Eodem saeculo Petrus Alexandrinae Ecclesiae Sacerdos ; itemque Instantius , Salvianus , Priscillianus Apostolicam Sedem appellarunt. Initio V. saeculi appellatio occurrit S. Joan. Chrysostomi , de qua multa a me dicta sunt *cit. p. 179.* , et quam adversus Launojum , Dupinijum , Quesnellium , Gianonium , Petrum de Marca , et ceteros late vindicant , David *Jugemens canon. cap. 7. art. 5.* , Natalis Alexander *loc. cit. pag. 466.* , ibique Mansius in *Not.* , Pagnius in *Baronium ad an. 404. num. 16. tom. 6. p. 433. ed. Lucae* , Christianus Lupus *de Appellation. Dis. 1. cap. 27.* , Bianchius *dell' Esterna Polizia della Chiesa tom. 5. par. 2. p. 81* , Zacharia *Anti-Febronio tom. 3. p. 503. et seq.* Atque haec quidem Chrysostomi appellatio non fidei , sed merae disciplinae causam respiciebat ; unde educitur , ut recte monet Natalis Alexander *p. 467* , jus appellationum ad sedem Apostolicam non tantum in rebus fidei , sed etiam disciplinae. Pertinent ad idem saeculum V. appellationes Bubalii , et Tauriani ad Innocentium I. , uti patet ex ejus *Ep. ad Episc. Maced.* apud Constantium *col. 841.* ; Caelestii Presbyteri , et Patrocli Arelatensis ad Zosimum , qui utramque memorat *Ep. 2. ad Aurel. et Ep. 5* , apud eundem Constantium *col. 944. et 959* , item quatuor illae ex Africa appellationes , quas ab Augustino recenserimus , Perevii Episcopi , de quo loquitur Bonifacius I. *Epist. ad Rufum 13.* , apud Constantium *col. 1036.* , Eutherii Thyanensis , et Helladii Tarsensis , qui nomine Episcoporum Ephrathesiae , utriusque Ciliciae , Cappadociae secundae , Bithyniae , Thessaliae , et Moesiae ad Sixtum III. confugerunt : uti constat ex eorum epistola apud Constantium *col. 1245. et seq.* , Idduae Smirnensis Episcopi ad eundem Sixtum III. , qui eam memorat *Ep. 9. num.*

3. col. 1266. apud Constantium. De Gallicanis appellationibus celebre est testimonium S. Leonis M., qui *Epist.* 10. ed. *Ballerin.* t. 1. col. 634. inquit: *a Gallicanis innumeris relationibus esse consultam Sedem Apostolicam, et quemadmodum vetus consuetudo poscebat, per diversarum appellationem causarum, aut retractata ab ea, aut confirmata fuisse judicia.* Mitto appellationes Chelidonii, Lupicini, Eutychetis, S. Flaviani, Theodoreti, Salomonis Presbyteri, Stephani Larissaei, Contumeliosi Episcopi Rejensis, ceteras, quarum magnus est numerus, quaeque ab iis, quas supra indicavi, scriptoribus accurate describuntur. Consistam in appellationibus Honorati Archidiaconi Salonensis, Felicissimi, et Vincentii, Diaconorum Hadriani Episcopi Thebani, Joannis Presbyteri Chalcedonensis, et Athanasii Monachi, Claudii Abbatis, Pauli Episcopi Africani, Florentii Episcopi Epidauri, Donadei Diaconi Numidiae, Januarii Malacae, Alcisonis Coreyrensis, quarum appellationum omnium testis est S. Gregorius M. *lib.* 1. *Epist.* 19. 20. *opp. tom.* 2. col. 503. 504. 566., *lib.* 3. *Epistol.* 6. 7. 8. 9. et 53. col. 627. *seq.* et col. 662., *l.* 6., *Epistol.* 14. 15. 16. 24. 63. col. 803. 804. 809. 838., *l.* 12., *Epist.* 8. col. 1186., *lib.* 13. *Ep.* 45. col. 1250. *seq.*, *lib.* 14. *Ep.* 7. et 8. col. 1264. et 1266. ed. *Paris.* 1705. Vide etiam Ferrandum *can.* 59. apud Justellum *Biblioth. Jur. Canon.* tom. 1. p. 715. ed. *Paris.*, et *Capitularia Caroli M.* *lib.* 7. *cap.* 450. apud Balutium *Capitular. Reg. Franc.* tom. 1. col. 731. et *cap.* 412. col. 745. ed. *Venet.* 1772. Postremo rem concludam Gelasii I. verbis *Epist.* 4. seu in *Commonitor.* ad Faustum Magistrum tom. 5. *concil.* col. 295. Labbaei cit. ed. *Venet.* Nobis, inquit, opponunt canones, dum nesciunt quid loquantur, contra quos hoc ipso venire se produnt, quod primae sedi sana, rectaque suadenti porere fugiunt. Ipsi sunt canones, qui appellationes totius Ecclesiae ad hujus sedis examen voluere deferri; ab ipsa vero nusquam prorsus appellari debere sanxerunt. Late hoc tantum argumentum persecutus sum in opere *Juris canonici universi publici, ac privati lib.* 2. p. 243. *seq.*

(3) Quae de Primatus jure dicta sunt, ostendunt,
Dav. Instit. Can. Tom. III.

ei prorsus haerere jus appellationum; idque etiam confirmant exempla appellationum Sardicensi concilio antiquiorum. Nam si jus hoc primum his canonibus statutum fuisset, nullae ante eos occurrerent ad Apostolicam secundum appellationes. Hinc eas ex ipso jure Primatus repetunt S. Bonifacius I. *Ep. 14. ad Thessal. Episc. col. 1038.* apud Constantium, Agapetus *Ep. 4. ad Justinianum Imperat. apud Labbaeum collect. concil. tom. 5. col. 942. ed. Ven.*, Agatho in Concilio Romano *ibid. tom. 7. col. 606.*, Gelasius I. in *cit. Common. ad Faustum apud Labbaeum t. 5. concil. col. 297.*, Valentinianus III. *Ep. ad Theodos. opp. S. Leon. p. 201. ed. Rom.*, et S. Bernardus de *Considerat. ad Eugen. lib. 3. cap. 2. opp. tom. 2. pag. 370. ed. Ven 1781.* Appellatur, inquit, de toto mundo ad te. Id quidem in testimonium singularis Primatus tui. Reliqui Patres, quos inter sunt S. Innocentius I. *Ep. 2. ad Victric. num. 6.* apud Constantium *col. 749.*, Julius I. *Ep. 1. ad Eusebian. num. 22.* apud eundem Constantium *col. 386.*, Leo M. *Ep. 10. ad Viennens. Episc. cap. 2. opp. t. 1. col. 634. edit. Ballerin.*, ceteri quas mitto, ne nimis sim, hanc ajunt, perpetuo fuisse Ecclesiae consuetudinem, ut ab omnibus Summus Pontifex appellaretur; quae perpetua consuetudo tantum ad jus primatus referri potest. Ipse Quesnellus, qui tanto studio appellationibus adversatur *Diss. 15. in S. Leon. §. 14. num. 4.* fateri vel invitatus debuit, Gallicanos, cum appellationes receperunt, respexisse ad Primatus Pontificis dignitatem, ac potentiorē, ut Ireneus vocat, principalitatem.

§. XXIX. Jus Patriarchicum inesse dicimus in Summo Pontifice, propterea quod lex Ecclesiae, quae in Oriente inter ipsum, et Episcopos esse voluit Patriarchas, medium hunc gradum in Occidente non constituit; ideoque Pontifex Occidentis Patriarcha appellatur, quoniam eum quoque occupat in Occidente locum, qui in Oriente datus est certis Episcopis, quos Ecclesia ceteris in ea regione superiores fecit. Sed tum in Oriente, tum in Occidente Primas, et caput Ecclesiae est; et jus annexum Potestati supe-

riori, qualis est Primatus, ad inferiorem, quae in illa inest, hoc est ad Patriarchatum, referri non potest. Simili modo si Princeps, qui summo potitur imperio, aut Ducis in bello, aut Judicis civilium controversiarum partes velit sustinere, quidquid in utroque munere gerit non ex mera judicis, ducisve potestate gerit, sed ex potestate summi imperii, in qua utraque illa potestas insita et affixa est (1).

(1) Confer Heineccium *Elem. jur. natur. et gent.* lib. 2. cap. 8. §. 156. et 157. cap. 9. §. 192. opp. tom. 8. p. 213. et 229. ed. Neap. cit.

§. XXX. Inter appellationes, quae ex Oriente, quaeque ex Occidente ad Summum Pontificem interponuntur, hoc discrimen est, quod illae, cum gradatim sunt judicium postulant Patriarcharum antequam Capitis, et Primatis judicium subeant; haec vero a Metropolitae statim ad hunc Primatem, et caput deferuntur. Sed utroque loco Primas est, qui appellatur, et qui judicat. Si quid Pontifex ageret annexum soli Patriarchatui non Primatui, id quidem ageret tamquam Patriarcha, non tamquam Primas; sed cum ipse habeat jus appellationum ex Primatu, non ex Patriarchatu, semper tamquam Primas appellationes recipit, quocumque ex loco procedant.

§. XXXI. Quod si jus appellationum oritur ex potestate, et jurisdictione, quae in Primatu haeret, consequens est, ut Pontifex, cum ex ea potestate, et jurisdictione appellationes recipit, possit suo lubitu vel causas ipse cognoscere, vel iudices, qui eas cognoscant, constituere in loco unde appellatur. Ita in civili republica alterutrum facit Princeps arbitratu suo, quoniam jus appellationum adhaeret in sum-

ma potestate, cum qua reipublicae praepositus est. Alicubi quidem lex Ecclesiae, aut consuetudo potest efficere, ut propter locorum longinquitatem, difficultatem rerum, aliasve causas ejusmodi dentur iudices in provincia, unde appellatio interposita est; verum neque Ecclesiae lex, neque consuetudo potuit eripere Summo Pontifici potestatem, et jurisdictionem quam a Christo accepit (1).

(1) Sane maxima pars appellationum, quas supra descripsi, pertinent ad judicia, quae a Summo Pontifice Romae acta sunt; et Sardicensibus canonibus, uti ostendi loco superiore, diserte cautum est, ut Romae causae agerentur. Argumentum hoc, praeter ceteros, solide, copioseque persequuntur Fratres Ballerinii cit. tom. 2. *Opp. S. Leonis col. 983.*, et Zacharia *Anti-Febron. vindic. par. 3. Diss. 8. cap. 6. p. 495. et seq.* Illud ridiculum, quod habet Dominicus Cavallarius *Instit. Jur. canon. par. 3. cap. 28.* Is enim §. 4. libens agnoscit jus appellandi Romanam Sedem a synodorum inferiorum judiciis, tamquam consectaneum Primatus Romani Pontificis in universam Ecclesiam haberi posse; est enim Romanus Pontifex ceteris Episcopis superior; naturalis vero ratio dictat, ab inferioribus ad superiorem appellandum. Tum §. 5. et seq. conatur ostendere, Romanos Pontifices eo jure usos non fuisse; postea Sardicensi Concilio eis dandi iudices facultatem fuisse concessam, hos canones serius fuisse receptos, denique per falsas Isidori decretales Summos Pontifices non tantum dandi iudices, sed etiam judicandi in causis appellationum potestatem obtinuisse. Mitto omnia, quae supra dixi, ac suis ipsis principiis Cavallarium urgeo. Si jus appellationum consectaneum est Primatus Romani Pontificis in universam Ecclesiam, si ipse appellatur, quia ceteris Episcopis superior est, et naturalis ratio dictat, ab inferioribus ad superiorem appellandum: hoc est si jus appellationum originem habet a Jure divino, a quo certe Primatus oritur, quid Summus Pontifex opus habuit canonibus Sardicensibus, aut falsis Isidori decretalibus? Non hae de

cretales, neque illi canones dederunt jus appellationum, sed dedit ipse Christus, qui Primatum instituit. Mitto cetera, quae Cavallarius cumulat contra jus appellationum, quod in ipso Primatu inesse demonstravimus. Nam ipsa sunt argumenta Bohemerii, Van-Espenii, Febronii, ceterorum, quos supra refutavimus, ut proinde eadem omnia quadrent etiam in Cavallarium, qui aliorum errores literis consignavit. Simili plane de causa in *notis ad titulum de Judiciaria Ecclesiae potestate* separatim non refutavimus Cavallarium, qui in *Inst. canon. par. 3. cap. 2. et 3.* adversus judiciariam in causis civilibus Ecclesiae potestatem multa habet, quae a Du-Pinio, Fevretio, Van-Espenio, ceterisque similibus desumpta sunt. Nam eorum ineptiis explosis, atque rejectis, etiam Cavallario, cujus par omnino causa est, satisfactum arbitramur. Liceat mihi hoc loco, quoniam memoravi Isidori Mercatoris collectionem, cujus saepe in his institutionibus mentio occurrit, aliquid animadvertere, quod post editum totum tomum I. earundem Institutionum, ubi de hac collectione disserui *p. 67. et seq.* intellexi ex Mss. epistola P. Burriclii data ad Franciscum Ravagum die 22. Decembris an. 1752., quam mihi legendam dedit V. Cl. Laurentius Hervas, qui etiam illius partem descripsit in opere, cui titulus: *Storia della vita dell' Uomo tom. 2. lib. 4. c. 11. p. 191.* Tradit nimirum Burrielius Isidorum usum praesertim fuisse Hispanica collectione canonum, cui multa addidit ingenio suo, multaque emendavit, atque detraxit, ut suum illud figmentum componeret, quod et ego observavi in *prolegomenis tom. 1. cap. 5. §. 64. p. 68. et seq.* Illud in primis monet ipse Burrielius, sese omnia Hispaniarum archivis diligentissime lustrasse, neque ullum unquam manuscriptum codicem ejus collectionis reperire potuisse; quod argumento est plane maximo, Hispanos, qui Isidorum conferentes cum ea collectione, quae in omnium manibus versabatur, nullo negotio fraudem detegere potuissent, Isidori figmenta penitus ignorasse. Illam autem collectionem Gotico-Hispanicam descripsit Burrielius literis ad Canonicum Petrum de Casiro datis die 30 Decembris an. 1754., quas equidem literas apud eundem eruditum virum Laurentium Hervas legi. Scilicet ea continet canones XX. Ni-

caenos, quos continuo sequuntur aliarum Graecarum Synodorum Canones in latinum sermonem conversi; aed haec versio diversa est a Dionysiana, atque eadem magna ex parte est, quam dedit Isidorus Mercator, cujus nomine eam Harduinus edidit. Atque haec causa est, propter quam multi in Gallis putaverint, Isidori collectionem in Hispaniis fuisse absolutam, quia nimirum Isidorus ex collectione Gotico-Hispanica fere integram Graecorum canonum versionem arripuit. Novum hinc argumentum educitur, ex quo patet, non modo nullas fuisse in hac Isidori collectione Pontificum Romanorum partes, sed ipsos etiam nullam ejus rationem habuisse; quam si habuissent, illam certe misissent ad Ecclesiam Hispanicam, quae semper magnam habuit cum Romana Ecclesia conjunctionem. Sane pars altera collectionis Gotico-Hispanicae constat ex Decretalibus Summorum Pontificum centum, ac duabus, iisque omnibus certae fidei, quas sequitur Decretalis *de Libris recipiendis*, et non recipiendis, unde Gratianus desumpsit *Can. Sancta Romana 3. Dist. 15.*, qui canon, uti testatur Burrielius *cit. Ep. ad Canon. de Castro*, in omnibus Codicibus non Gelasio, sed Horsmidiae tribuitur. Optandum maxime esset, ut praeclara Hispanorum natio, quae viris abundat ingenio, ac doctrina plenis, in lucem emitteret collectionem Gotico-Hispanicam, quam duabus illis literis Burrielius memorat, quamque ipse illustravit; magnum exinde lumen acciperet ecclesiastica jurisprudentia, et multa forte occurrent emendanda in operibus eorum, qui antiquas canonum collectiones ediderunt. Certo testatur Burrielius, multa se animadvertisse minus vere, et minus accurate scripta a Card. Aguirrio, et a Cajetano Cennio, qui hactenus visi sunt Hispanicas Canonum Collectiones omnium diligentissime expendisse. Ceterum de hac Isidori collectione actum supra est *pag. 66 seq.*, et mihi valde probabilis conjectura est totius fraudis auctorem fuisse Benedictum Levitam Moguntinum qui circa annum 845. Capitularium libros vulgavit.

TITULUS XVI.

DE IN INTEGRUM RESTITUTIONE.

- | | |
|---|--|
| I. In integrum restitutio quid? | restituunt? |
| II. et III. Qui habeant beneficium restitutionis in integrum? | VII. Effectus restitutionis in integrum. |
| IV. Quibus in rebus detur? | VIII. Supplicatio Principi oblata. |
| V. et VI. Qui in integrum | IX. Confirmatio Apostolica. |
| | X. Oris aperitio. |

§. I.

Qui appellationis remedio uti non potest, beneficium habet restitutionis in integrum, per quam omnia in antiquum statum restituuntur. Definitur autem in integrum restitutio a Paulo IC (1) redintegrandae rei, vel causae actio (2). Datur hoc remedium extra ordinem, ut subsidio sit iis, quibus aliae desunt actiones, per quas jus suum consequantur. Quare cum actus ipso jure irritus est, aut cum aliud suppetit ordinarium civile remedium, in integrum restitutio dari non solet (3).

(1) *Recept. sentent. lib. 1. tit. 7. §. 1.* apud Schultingium *Jurisprud. vet. Ante-Justinian. pag. 233. ed. Lipsiae 1737.*

(2) Actionis vocabulum generatim hic accipitur pro quovis Juris remedio, quod quis vel intendit, vel a magistratu conceditur, ut in *L. 37. ff. de Obligat. et action.* Ab Isidoro *Origin. lib. 5. cap. 25.* in integrum restitutio definitur: *causae, vel rei reparatio.*

(3) *L. 17. ff. de Minor.*

§. II. Non temere, ac sine delectu, sed tantum justis de causis in integrum restitutio conceditur. Majores XXV. annis non restituuntur, nisi demonstrata causa laesionis, quae culpa vacat: qualis est dolus alterius (1), causa metus, alienatio judicii mutandi causa facta (2), absentia, aut justus error (3), denique si qua alia iudici justa causa videatur (4). Minores annis XXV propter lubricam aetatem, probata laesione, restituuntur (5), modo restitutio petatur intra quadriennium a tempore, quo minores esse desinunt.

(1) *Cap. 4. de restit., capit. 6. de His quae vi metusve.*

(2) *L. 1. de Alien. jud., C. 11. de Judic.* Extat in Pandectis, atque in Decretalibus titulus *de alienatione judicii mutandi causa facta*. Fit autem haec alienatio, quoties pars altera, quae litem habet, dolo malo jus suum in aliquem transfert, et facit commutationem, ut loquitur *C. 1. de Alienat. judic. mutand. caus.*, veluti si vendat, aut cedat potentioribus, ut adversario gravius negotium ingerat, atque ejus conditionem deteriore faciat.

(3) *L. 2. ff. de Restit. in integr., C. 4. eod.* Vide etiam Paulum *Recept. sentent. lib. 1. tit. 7. §. 1.* apud Schultingium *l. et edit. c. pag. 233.*

(4) *L. 1. ff. Ex quib. caus. major. C. 4. de In integr. restit.*

(5) *L. 1. ff. Ex quib. caus. major. C. 4. de In integr. restit.* Concessa autem in integrum restitutione minori, etiam ejus fidejussori succurritur, ut inquit Ulpianus in *leg. 51. ff. de Procurat.* Consule Edmundum Merillum *Observ. l. 4. cap. 10. p. 127. ed. Neap. 1720.*

§. III. Exemplo minorum, etiam Universitates habent in integrum restitutionem (1): similiter et Ecclesia eodem beneficio fruitur (2). Nomine autem

Ecclesiae Jurisconsultorum sententia, et usu fori omnia corpora ecclesiastica, monasteria, domus religiosas, academiae, hospitalia comprehenduntur. Restituitur Ecclesia, si detrimentum accepit, eaque restitutionem petat intra quadriennium postquam illud pertulit; modo ab initio propter dolum, vim, metum, aut aliud justum impedimentum jus suum persequi non potuerit (3), et vero restituitur ubicumque sit laesa, etiam propter negligentiam Procuratoris, qui ejus jura, et documenta non protulit (4); contra confessionem sibi noxiam (5); contra lapsum fatalium (6); non solum contra laicum, sed etiam contra aliam Ecclesiam, quae intulit detrimentum (7).

(1) *L. 4. cod. Ex quib. caus. major. in Integr. restit., leg. 3. cod. de Jur. reipublic., leg. 9. ff. de Appellat.*

(2) *Cap. 1. de in integr. restit., C. 2. eod. in 6., Clem. unic. eod.*

(3) *Cap. 1. de in integr. restit. in 6.*

(4) *Cap. 2. de in integr. restit.*

(5) *Cap. 2. eod. in 6.*

(6) *Cap. 3. de in integr. restit.*

(7) *Cap. 3. eod.* At enim qui privilegium habet, eo uti non potest adversus illum, cui par est privilegium *L. 12. §. 1. cod. Qui potior. in pignor.* Verum id quidem est, si utraque Ecclesia de damno vitando agat; at si altera de damno vitando, altera de lucro captando agat; illam contra hanc restitui aequum est, uti similiter minor contra minorem restituitur, *L. 12. §. Item quaeritur ff. de Minor.*

§. IV. Datur in integrum restitutio etiam contra sententiam Principis (1), aut Summi Pontificis (2), sed tantum uterque contra propriam sententiam, aut sui delegati restituit (3): datur praeterea tam in ju-

dicio, quam extra iudicium cum quis ex aliquo facto, aut contractu laesus est. Semel denegata non amplius conceditur, praeter quam ad appellationem omissam, nisi deinceps novo prodierint monumenta, quorum gratia tribuenda videatur (4).

(1) *L. 1. et 2. cod. Si saep. restit. in integr. postul.*

(2) *Cap. 5. de In integr. restit.*

(3) *L. 18. ff. de Minar. 25. an., L. 3. cod. Si adver. rem. judic.*

(4) *Cap. ult. de In integr. restit.*

§. V. Restituit autem Magistratus urbanus, vel provincialis, vel iudex in eam rem a Principe, vel a Magistratu datus (1). Municipalis Magistratus sine Principis mandato neminem restituere potest (2), quoniam non habet mixtum imperium, cujus praesertim est propria in integrum restitutio. Atque hi quidem concedunt in integrum restitutionem, quam ordinariam dicimus, quae scilicet ab ipsa lege, atque intra certum tempus, puta intra quadriennium tribuitur. Nam extra ordinem, hoc est praeter scripti Juris imperium, uti fit in transactionibus, et similibus, lapsoque tempore a lege constituto, solus Princeps restituit.

(1) Confer Cujacium in *cod. lib. 4. tit. 46. opp. tom. 20. col. 862. ed. cit.*

(2) *L. 26. ff. ad Municipal. Vide Scipionem Gentilem de Jurisdict. lib. 1 c. 32. opp. tom. 3. p. 96. et seq. ed. Neap. 1764. Veram jure Codicis etiam Municipales Magistratus in integrum restituere posse, censet Oddus de Restit. in integr. par. 1. qu. 32. art. 4.*

§. VI. Magistratus adversus suam, aut iudicis inferioris, parisve potestatis sententiam restituit; inferior autem Magistratus contra superioris sententiam restituere non potest (1). Nostris moribus Iudex ordinarius, qui in Urbe princeps jus reddit, quique ex omnibus provinciis appellatur, in integrum restituit adversus iudicata Magistratum provincialium, et municipalium: sed contra ipsius iudicatum a Principe in integrum restitutio conceditur. Alicubi mos est, ut propter incidentia in lite a iudice ordinario, cum vero agitur de praecipuo negotio, veluti de contractibus, transactionibus, haereditatum aditionibus, aut repudiationibus, praescriptionibus, rebus iudicatis, ceterisque similibus, non nisi a Principe, vel ab eo, cui data haec potestas a Principe est, restitutio tribuatur (2).

(1) Consule Cajacium *loc. cit.*, et in *Leg. 16 ff. de Minor. 25. an. opp. tom. 1. col. 868. ed. cit.*, et Donellum *de Jur. civil. lib. 12. cap. 14. §. 3. opp. tom. 5. col. 1243. seq. ed. Lucae cit.*

(2) Vide Voetum in *Pandect. lib. 4. tit. 1. num. 3. et 4.*

§. VII. Petita in integrum restitutione omnia in suo statu manere debent, donec res finita fuerit (1); et ideo latae sententiae executio suspenditur, perinde ac appellatio interposita fuisset (2). Ea vero inde impetrata omnia ad pristinum statum vocantur, laesio removetur, et quae sua sunt unusquisque recuperat (3). Nam restitutio prodest non tantum illi, qui eam impetrat, sed etiam illi, contra quem conceditur, quoniam utrique suumtribuendum est. Sed qui rem recuperat,olvere debet impensas, quas alter in rem fecit (4).

(1) *L. un. cod. in integr. rest. postul. ne quid novi fiat.*

(2) *Cap. 6. de in integr. restit.*

(3) *L. 25. §. Restitutio ff. de Minor.*

(4) *Cap. 1. de in integr. restit., C. 11. de Reb. eccles. alien.*

§ VIII. Etiam a supplicatione Principi oblata, quam et *revisionem* appellamus (1), adjuvantur ii, qui appellationis remedio uti nequeunt. Quae supplicatio dici potest quaerela adversur molestiam, sive gravamen iudicis, a cujus sententia propter ejus excellentiam statuto, aut Principis constitutione appellare non licet (2). Ea vero si proponatur intra decem dies post latam sententiam, efficit, ut eadem sententia non aliter exitum habeat, nisi victor fidejussionem praebuerit tantum restituendi cum ultimis augmentis, quantum fuerit in condemnatione, si sententia revocetur (3). Elapso quoque decennio recte intra biennium haec supplicatio proponitur; sed tunc nulla cautione opus est, ac sententia statim vim, et exitum habet (4).

(1) Multi supplicationem a revisione distinguunt, et hanc illi quidem affinem, non omnino similem faciunt. Confer Bendorum *de Revision. in proem. num. 18. et seq.*, et Hilligerum *ad Donellum de Jur. civil. lib. 28. cap. 6. §. 15. not. 22. tom. 6. col. 418. et 419. ed. Lucae cit.*

(2) *L. unic. cod. de Senten. praefect. praetor.*

(3) *Auth. Quae supplicatio cod. de Precib. Imper. offeren.*, quae Authentica sumpta est ex *Novell. 119. C. 5.* Vide Cujacium *in cod. de Senten. Praefect. Praetor. opp. tom. 9. col. 989. ed. cit.* Sed jam plerisque in locis fori usu receptum est, ut supplicatio intra dies decem Principi oblata sententiae executionem suspendat, neque ulla habeatur ratio cautionis *de restituendo*, quam forte victor emittere velit.

(4) Consule Voetum *ad Pandect. l. 49. tit. 2.*, qui ea de re copiose disputat.

§. IX. Quemadmodum vero qui causa cecidit, judicium antea gestum infirmari postulat, ita qui superior discessit, illi vim majorem saepe addendam curat, quod fit potissimum Apostolicae Sedis Confirmatione. Agunt ea de re Decretales in titulo *de Confirmatione utili, vel inutili*. Apostolica haec confirmatio, cum facta est causa cognita, praecedit omnem controversiam: adeo ut res a Summo Pontifice confirmata amplius in discrimen revocari non possit. Contra vero si edita est re non cognita, atque *in forma communi*, ut ajunt, ea quidem impedimento non est, quominus judex rem noscat: quia confirmatio conditionem habet, modo justa sit sententia, de qua quaerebatur (1).

(1) *Cap. I. ibique Glossa v. Confirmationem, et C. 2., et C. 7. de Confirmat. util. vel inutil., C. 5. de Concess. praeben., C. 14. de Offic. et potest. delegat.*

§. X. In primis autem curandum est, ut a Pontificia confirmatione procul absit omne obreptionis, aut subreptionis vitium: scilicet ea non est impetranda aut falsa narrando, aut vera malitiose reticendo (1). Quod merito transferitur etiam ad cetera Apostolicae Sedis mandata, decreta, confirmationes, quae, cum in iis obreptio, aut subreptio inest, vim nullam habent. Hodie de vi, aut justitia privilegii, mandati, aut confirmationis Sedis Apostolicae disputari non solet; nisi primum ab ipso Pontifice oris, ut vocant, *aperitio* fuerit impetrata.

(1) *Cap. 1. et 2. de Confirmat. util. vel inutil.*

TITULUS XVII.

DE ARBITRIS.

- | | |
|--|---|
| I. Per arbitros, et transactiones lites tolluntur. | agendum, si inter se dissentiant. |
| II. Qui arbiter? | X. Quando arbitri cogendi ad ferendum iudicium? |
| III. Arbiter vel necessarius, vel voluntarius. | XI. Quomodo ab arbitris iudicandum? |
| IV. Quibus in rebus necessarii arbitri assumantur? | XII. Quae causae rejiciant arbitrium? |
| V. Arbitri voluntarii nullam habent jurisdictionem. | XIII. Arbitri iudicium ad boni viri arbitrium quando redigatur? |
| VI. Sententia ab arbitro lata quam vim habeat? | XIV. Quis arbitri executionem decernat. |
| VII. Qui arbitri esse possint? | XV. Quomodo expirent arbitria? |
| VIII. Unus ne, an plures arbitri eligendi? | |
| IX. Quomodo plures arbitri judicare debeant, et quid | |

§. I.

Forensem strepitum longasque, ac periculosas iudiciorum ambages declinaturi non raro controversias omnes arbitrorum fidei dijudicandas committimus, aut initis mutuo consensu pactis, et transactionibus sedamus, atque componimus. Itaque posteaquam de iudiciis actum est, aliqua etiam de arbitriis, et aliqua item de pactis, et transactionibus addenda sunt.

§. II. Arbiter in libris juris civilis saepe est iudex a Praetore datus (1); sed tamen distinguitur ab eo, quem proprie iudicem appellamus (2). Qui bonae fidei iudiciis datur, arbiter, qui stricti juris, iudex est: uterque constituitur a Magistratu, qui

dati ab se iudicis , aut arbitri sententiam exequitur (3). Nobis hoc loco arbiter est iudex ad cognoscendam , finiendamque controversiam litigantium voluntate constitutus, sive id ipsi legis imperio fecerint , sive sponte sua (4).

(1) *Leg. 3. cod. de Commun. divid.*

(2) *Leg. 7. ff. ad leg. Jul. repet. , leg. 15. ff. de Re judic. §. 1. Inst. de Act.*

(3) *Leg. 15. cit. ff. de Re judic. Confer Brissonium de Verb. signific. v. Arbiter.*

(4) Arbiter ab eo distinguitur , quem nos arbitrato-rem vocamus, quod quidem vocabulum Jus Civile ignoravit , rem tamen ipsam recte novit. Arbitrator autem dicitur , qui sine ulla iudicii forma ex aequo , et bono lites suo consilio , et auctoritate studet componere , *leg. 14. §. Recepisse ff. de Recept. qui arbitr. recep. vel convenientes , aliaque ad finem bonum perducit , adhibeturque in contractibus , ut rerum pretia , mercedem operarum , lucrum , aut damnum , ceteraque similia boni viri arbitrio constituat leg. 70. §. Gener. ff. de jur. dot. leg. 76. 77. 78. 79. ff. Pro socio , §. Inst. de Locat. , §. 2. Inst. de empt. , leg. ult. cod. de Contrahen. empt. Confer Cujacium in l. 4. quaest. Pauli leg. 77. opp. tom. 5. col. 966. seq.*

§. III. Nam alii sunt arbitri , quos ipsi quidem litigantes sumunt, sed legis jussu, et alii sunt, quos ipsi suo arbitrio , ac libera voluntate constituunt , et hi voluntarii , illi vero necessarii appellantur (1). Arbitri necessarii veri iudices sunt, quoniam dantur a lege , vel Principe , vel Magistratu , qui eos eligere cogunt: ideoque habent jurisdictionem, eorumque sententia vim accipit rei iudicatae , ab eaque appellatur (2). Retinent tamen nomen arbitrorum ,

quoniam mutuo partium consensu eliguntur, ut arbitri pro socio, tutelae (3).

(1) Arbitri libera litigantium voluntate electi proprie *compromissarii*, legis autem imperio constituti *iuris* arbitri dicuntur. Atque hi quidem originem ducant a iudicibus, qui olim dabantur in negotiis bonae fidei partium voluntate electi *leg. 17. de Judic.*, qui ex se quo, et bono arbitrari de lite poterant, et quorum in Jure Romano saepe mentio est *leg. 7. ff. de Negot. gest. leg. 1. ff. de Pact. dotal. leg. 47. ff. Famul. ercisc.* Quin etiam hi dabantur ad articulos incidentes definandos, veluti ad probandos fidejussores, a quibus etiam appellari poterat, cum instar iudicium pedaneorum essent *leg. ff. Qui satisd. cogan.*

(2) *Leg. 9. ff. Qui satisd. cogan., leg. 23. ff. de Appellat., C. 11. de Offic. deleg. in 6.*

(3) Consule Cujacium in *leg. 16. cod. de Judic. opp. tom. 9. col. 138. ed. cit.*

§. IV. Plura autem negotia sunt, quae leges ab his arbitris expediri volunt. Ita jure civili si delegati iudices suspecti habeantur, eligendi sunt arbitri, qui ipsam principem causam dijudicent (1): itemque jure canonico cum iudices super revocatione Literarum Apostolicarum inter se non consentiunt (2), aut cum datus iudex suspectus est, arbitri constituuntur (3). In Africana Ecclesia eligi debebant arbitri, qui noscerent appellationes a sententia synodi provincialis (4): et nunc jure municipali quarundam regionum sancitum est, ut eorum, qui inter se certo cognationis gradu conjunguntur, lites arbitrorum iudicio committantur.

(1) *Leg. 16. cod. de Judic.*

(2) *Cap. 11. de Offic. et potest. delegat. in 6.*

(3) *Cap. 39. de Offic. et potest. deleg. C. 14. de*

rescript., C. 41. §. 2., et C. 61. de Appellat., C. 4. de For. competen.

(4) Can. 46. cod. African. apud Dionysium Exiguum in Biblioth. t. 1. p. 382.

§. V. Arbitri voluntarii nullam habent jurisdictionem, sed tantum notionem, nec proprie iudices sunt, quos privatorum consensu facere non potest (1), sed tantum ex compromisso iudicis partes suscipiunt (2). Compromissum est conventio, qua litigantes controversiam alicujus iudicis subjiunt, spondentque, se arbitri sententiae parituros (3). Accepta ab arbitro conventio *receptum* dicitur (4). Hoc autem promittunt litigantes vel mutua stipulatione, vel nudo pacto, et interdum etiam pro eorum arbitrio adjecta poena, per quam ipsi firmiori vinculo obstringuntur.

(1) L. 3. cod. de Jurisd.

(2) L. 14. §. 2. ff. de Recept. arbitr. qui arbitr. recep.

(3) L. 11. §. 2. ff. cod. Cap. 10 de Arbitr.

(4) L. 23. §. 2. cod. C. 4. de Arbitr.

§. VI. Antiquo jure etiam jurisjurandi religione compromittentes suam obligabant fidem; tum id vetuit Justinianus (1); sed jure canonico recte emititur jusjurandum, et emissum valet (2). Cum compromisso adjecta poena est, quae adjicitur, et omititur arbitrio litigantium (3), tum civili, tum canonico jure locus est petitioni poenae, non exceptioni rei judicatae, quam arbitrium minime parit (4); cum poena est omissa, *incerti actio* a jure civili comparata est (5). Justiniani lege (6) si pactum sine

poena est *arbitri sententiae stari*, et litigantes aut sententiam subscripserint, aut decem dierum silentio confirmaverint, reo pacti exceptio, actori in factum actio conceditur. Sed hodie sublati jam civilis juris subtilitatibus, quodvis compromissum, etiam nudo pacto initum, actionem, et exceptionem parit. Nam passim recepta sententia est, etiam ex nudo pacto actionem, et exceptionem oriri, sive id ex jure canonico, aut potius ex ejus interpretatione in mores traductum fuerit, sive quod labentibus annis grave, et absurdum visum fuerit, etiam in nudis pactis fidem fallere (7)

(1) *Auth. Decernit cod. de Recept. et arbitr.*, *Novell. 82. cap. 11. §. 1.*

(2) *Cop. 2. de Arbitr.*

(3) *L. 32. §. ult. ff. de Recept., C. 9. de Arbitr.*

(4) *L. 2. ff. de Recept., C. 9. de Arbitr.*

(5) *L. 32. §. ult. ff. de Recept.*

(6) *L. 5. cod. de Recept.*

(7) Confer Gudelinum de *Jur. novissim. lib. 3. c. 5. num. 8. et seq.*, Vinnium de *Pactis c. 7.*, Voetum ad *Pandect. lib. 2. tit. 14. num. 9.*, Grotium *Manud. ad jurispr. Holland. lib. 3. cap. 1.*

§. VII. Omnes, qui judices, ii ferme arbitri esse possunt, sive sint privati homines, sive magistratus (1), judicesve ordinarii, aut delegati (2). Quin etiam ab hoc officio non repelluntur infames, et libertini (3), filii quoque causam patris cognoscere non prohibentur (4). Haud tamen arbitri constitui possunt servi, pupilli, furiosi, amentes, et similes (5), minores annis viginti (6), itemque ex jure civili mulieres (7); quamquam eis jus canonicum arbitrium permittat, si lege, aut moribus ordinariam

habeant jurisdictionem (8). Laici quoque in rebus spiritualibus arbitri esse nequeunt (9), nisi cum Episcopi auctoritate clericis sint adjuncti, aut jussi a summo Pontifice arbitrium susceperint (10); denique excommunicati vitandi, quorum societatem refugi-
mus, arbitri munere fungi non possunt.

(1) *L. 3. et 4. ff. de Recept. arbitr. qui arbitr.*

(2) Inquit Ulpianus in *leg. 9. ff. eod.* non posse judicem arbitrium recipere ejus rei, de qua judex est. Sed civili juri a Canonico derogatum plerique sentiant. Utut sit, certe jure Canonico tum ordinarii, tum delegati judices arbitri esse possunt, uti patet ex *C. 5. 7. 10. de Arbitris*, et *C. 14. de Presumpt.*

(3) *L. 7. ff. de Recept. arbitr. et qui arbitr. can. a. §. cognitores c. 3. qu. 7.*

(4) *L. 6. ff. eod.*

(5) *L. 9. ff. de Recept. arbitr. et qui arbitr. recip.*

(6) *L. 46. ff. eod.* Late ea de re disputat Voetus ad *Pandect. lib. 4. tit. 8. num. 7.*

(7) *L. ult. eod. de Recept. et arbitr.*

(8) *Cap. 4. de Arbitr.* Cujus historiam tradit Mantique *Annal. Cisterciens. tom. 3. an. 204. c. 5.* Confer etiam Cujacium *Observ. lib. 13. cap. 23. opp. tom. 3. col. 348. ed. cit.*

(9) *Cap. 8. de Arbitris.*

(10) *Cap. 9. eod.*

§. VIII. Tam unus, quam plures arbitri constitui possunt, sique tum pares, tum impares numero; licet satius sit impares numero eligere, ut hoc modo, si dissentiant, ratum firmum habeatur quod a pluribus definitum fuerit (2). Nam scitum est, quod cum omnium, qui judices dati sunt, sententiae inter se non conveniunt, litem finit judicium, quod plures numero ediderunt; cum autem cuncti sunt opinione discordes, praefertur sententia

ejus, qui minorem summam constituit, quoniam summa minor in majori continetur, ideoque omnes in eam consenserunt (2).

(1) *Cap. 1. de Arbitris.*

(2) *Cap. 1. eod. in 6. leg. 32. §. Si plures ff. de Recept. arbitr. qui arbitr.*

§. IX. Jure civili, cum plures arbitri electi sunt, omnes conjunctim judicare debent; nisi cautum nominatim sit ut uno absente, reliqui negotium expediant (1). At jure canonico si unus citatus, nec impeditus adesse nolit, recte praesentes controversiam finiunt (2); quod rectissime sancitum est, ut lites exitum habeant celeriores. Quod si duo arbitri constituti sint, iique inter se in judicando dissentiant, secundum jus civile tertius sumitur in compromisso designatus, sed eo non designato, solvitur compromissum, quoniam in hoc tertio eligendo arbitri dissentire possunt (3). Sed hodie semper duobus arbitris, quorum est dissimile iudicium, integrum est tertium, etiam non nominatum, sumere, qui litem finiat, modo litigantes expresse non contradicant (4); quod juris canonici disciplinae consentaneum est (5).

(1) *Leg. 19. §. Item, et leg. 20. et 21. ff. de Recept. arbitr.*

(2) *Cap. 2. de Arbitris in 6.*

(3) *L. 19. §. Si in duos ff. de Recept. arbitr.*

(4) Arbitris dissentionibus posse litigantes a compromisso resillire certum est, cum id eis a lege permittatur. Itaque si litigantes testationibus suis denuncient, ne tertius eligatur, aut ne sententiam dicat, non intelligo, quomodo hic tertius, in quem numquam ligantes

consenserunt , arbiter efficiatur ; cum nemo sine partium voluntate satis idoneus arbiter esse possit. Consule Voetium *ad Pandect. lib. 4. tit. 8. n. 13.*

(5) *Cap. 61. de Appellat.*

§. X. Arbitri judicium sponte suscipiunt , quoniam , ut eleganter inquit Ulpianus (1) , haec res libera , et soluta est , et extra necessitatem jurisdictionis posita. Sed quod initio voluntarium erat , fit postea necessarium ; quoniam qui arbitrium susceperunt , videntur suam obligasse fidem , quam eos liberare oportet. Itaque arbitri semel suscepto munere omnino fungi debent , et repugnantes coguntur imperio magistratus (2) ; nisi justam habeant causam , propter quam sui officii partibus non satisfacere impune possint. Ita si litigantes arbitrum infamaverint , aut eo spreto , et contempto ad alium arbitrum iverint , si graves inter ipsos inimicitiae ortae sint , impune arbitrium abjicitur ; similiter adversa valetudo , necessaria profectio , munus reipublicae , aliaque similia justam praebent abjiciendi , aut saltem differendi arbitrii causam (3).

(1) *L. 3. §. de Recept. arbitr. qui arbitr.*

(2) *Leg. 3. §. 1. cit. , et leg. 22. ff. eod.*

(3) Confer Huberum *Praelect. ad pandect. lib. 4. tit. 8. num. 7. , et Heineccium eod. loc. §. 540. opp. tom. 2. p. 135. ed. Neap. 1769.*

§. XI. Pendet autem ex indole praesertim , et ratione compromissi , quo modo , quoque ordine procedere ; quam potestatem habere , quam contra non habere , quot numero esse , intra quod tempus , et quibus de rebus arbitri judicare debeant (1). Generatim ferenda est ab arbitris sententia loco , in quem

compromissum fuit (2); die non feriato (3); tempore convento, nisi litigantes nullum tempus defini-
verint, vel ejus prorogandi arbitris dederint faculta-
tem, vel arbitri jurent, sibi nondum liquere (4);
partibus praesentibus publicanda est (5), nisi aliud
populorum moribus receptum sit; denique ferenda
est de negotio, quod datum fuit, non de alio (6); et
si plura negotia commissa sunt, de omnibus est ju-
dicandum (7). Possunt quoque arbitri alios eligere,
qui controversiam definiant cum hanc potestatem a
litigantibus acceperunt (8), non item cum ea de re
nihil actum est (9).

(1) Confer cap. 1. et 12. de Arbitris.

(2) L. 27. §. Si arbiter ff. de Recept., qui arbitris
recep.

(3) Leg. 2. et 7. cod., et leg. 41. ff. de Recept.
qui arbitr.

(4) Leg. 14. leg. 30. leg. 35. leg. 38. ff. de Re-
cep. qui arbitr. recep.

(5) L. 32. §. Si quis ff. cod.

(6) L. 37. §. de Officio ff. cod.

(7) Id vero plenum compromissum appellatur leg.
25., et leg. 27. §. Plenum ff. cod.

(8) Cap 13. de Arbitris.

(9) Leg. 37. §. Quaesitum ff. de Recept. qui ar-
bitr. recep.

§. XII. Non in omnibus tamen causis arbitri
adhiberi possunt, sed in iis tantum, quae privati
arbitrii sunt; quoniam per simplicem arbitri notio-
nem expediri non possunt, quae ad jus publicum
pertinent et publicam auctoritatem desiderant. Ergo
rejiunt arbitrium causae restitutionis in integrum,
criminales, in quibus criminaliter agitur, item causae

status, scilicet ingenuitatis, natalium, libertatis (1), actiones populares, et famosae (2), similiter causae matrimoniales (3); quippe quae omnes vires superant privatae potestatis. Etiam causae exemptionum, quod in iis agitur de jure Summi Pontificis, per compromissum nosci, expediri non possunt (4).

(1) *Leg. 37. §. Julianus de Recept. qui arbitr. recep. , leg. ult. cod. Ubi et apud quem cognosc. restit. in integr. , C. 9, de In Integr. restit.*

(2) *Leg. 37. §. Julianus ff. de Recept. qui arbitr. recep.*

(3) *Cap. penult. de In Integr. restit.* Verum sponsalia de futuro non rejiciunt compromissum, quoniam ea mutuo consensu dissolvuntur *cap. 2. de Sponsal.*

(4) *Cap. 5. de Arbitris.*

§. XIII. Arbitri pronuntiatio sententia proprie non est, sed a jurisconsultis arbitrium (1), passim vero fori usu laudum vocatur (2). Ab eo non datur appellatio, quoniam absurdum esset diuturna lite vexare eos, qui ad arbitros iverunt, ut se a litium ambagibus, et impensis liberarent; arguere vero semetipsum debet qui compromisit, si minus aequum judicem elegit (3). Verum ut sententiae ab arbitro prolatae iniquitas, atque error emendetur, passim in foro receptum est, ut illa ad arbitrium boni viri redigatur. Quam *reductionem* intra decem dies postulat, qui causa cecidit (4). Magnam autem haec *reductio* cum appellatione affinitatem habet, ac per eam negotia arbitris antea commissa ad ordinarium judicem deferuntur.

(1) *L. 9. ff. qui satisd. cog.*

(2) Inferiori latinitatis aetate *judicare* dictum est *lau-*

*dare. In lib. 2. de Feudis cap. 22. scriptum est : laudatum saepe scio, hoc est, judicatum. Consule Hoto-
manum de verb. Feudal. Turnebus Advers. lib. 14. cap.
12., vehementer abjurgat juris consultos, quod barbaro
laudi vocabulo utantur, cum arbitri sententia arbitrium
latine dicatur. Verum hoc quidem est, quod Turnebus
dicit de barbarie vocabuli laudi; sed elegantiores juris-
consulti arbitrii verbo usi sunt, et ita sane loquitur Ca-
jus cit. leg. 9. ff. Qui satisd. cog.*

(3) *Leg. 32. §. Stari ff. de Recept. qui arbitr.*

(4) *Confer Voetum in Pandect. lib. 4. tit. 8. n. 25.
et seq.*

§. XIV. Ceterum cum arbitri voluntarii nullam habeant jurisdictionem, eorum arbitrium vim, et exitum non habet, nisi praesto sit auctoritas Magistratus, seu Judicis ordinarii, cujus imperio arbitri executio perficitur. Hoc autem imperium ad illud exequendum non accommodat Magistratus, nisi primum re cognita intelligat, dignum revera esse arbitri judicium, quod a litigantibus observetur.

§. XV. Expirant arbitria mutuo consensu, morte compromittentium, nisi etiam haeredum facta sit mentio (1), uno alterove ex arbitris mortuo (2), nisi cautum compromisso sit, ut uno ex arbitris vita functo reliqui judicent (3), lata sententia, interitu rei de qua litigatur, lapso tempore constituto, nisi illud justis de causis, uti demonstratum supra est, prorogatum fuerit.

(1) *Cap. 10. et ult. de Arbitr., leg. 32. §. Si haeredis ff. de Recept. arbitr.*

(2) *Cap. 50. de Testib.*

(3) *Cap. 42. de Offic. et potest. delegat.*

FINIS LIBRI TERTII.

VA1-1532252